

Namo tassa bhagavato arahato sammāsambuddhassa

# Vinayapiṭake

## Mahāvagga-aṭṭhakathā

### 1. Mahākhandhakaṃ

#### Bodhikathā

Ubhinnaṃ pātimokkhānaṃ, saṅgītisamanantaraṃ;  
Saṅgāyimsu mahātherā, khandhakaṃ khandhakovidā.

Yaṃ tassa dāni sampatto, yasmā saṃvaṇṇanākkamo;  
Tasmā hoti ayaṃ tassa, anuttānatthavaṇṇanā.

Padabhājaniye atthā, yehi yesaṃ pakāsītā;  
Te ce puna vadeyyāma, pariyosānaṃ kadā bhave.

Uttānā ceva ye atthā, tesāṃ saṃvaṇṇanāya kiṃ;  
Adhippāyānusandhīhi, byañjanena ca ye pana.

Anuttānā na te yasmā, sakkā ñātuṃ avaññitā;  
Tesaṃyeva ayaṃ tasmā, hoti saṃvaṇṇanāyoti.

**1. Tena samayena buddho bhagavā uruvelāyaṃ viharati najjā nerañjarāya tīre bodhirukkhamūle paṭhamābhisambuddhoti** ettha kiñcāpi “tena samayena buddho bhagavā verañjāya”ntiādīsu viya karaṇavacane visesakāraṇaṃ natthi, vinayaṃ patvā pana karaṇavacaneneva ayamabhilāpo āropitoti ādīto paṭṭhāya āruḷhābhilāpavasenevetāṃ vuttanti veditabbaṃ. Esa nayo aññesu ito paresu evarūpesu.

Kiṃ panetassa vacane payojananti? Pabbajjādīnaṃ vinayakammānaṃ ādīto paṭṭhāya nidānadassanaṃ. Yā hi bhagavatā “anujānāmi, bhikkhave, imehi tīhi saraṇagamanehi pabbajjaṃ upasampada”nti (mahāva. 34) evaṃ pabbajjā ceva upasampadā ca anuññātā, yāni ca rājagahādīsu upajjhāyupajjhāyavattaācariyaācariyavattādīni anuññātāni, tāni abhisambodhiṃ patvā sattaṣaṭṭhaṃ bodhimaṇḍe vītināmetvā bārāṇasiyaṃ dhammacakkaṃ pavattetvā iminā anukkamena idañcidañca ṭhānaṃ patvā imasmiñca imasmiñca vatthusmiṃ paññattānti evametesāṃ pabbajjādīnaṃ vinayakammānaṃ ādīto paṭṭhāya nidānadassanaṃ etassa vacane payojananti veditabbaṃ.

Tattha **uruvelāyanti** mahāvelāyaṃ; mahante vālikarāsimhīti attho. Atha vā “**urū**”ti vālikā vuccati; “**velā**”ti mariyādā; velātikkananahetu āhaṭā uru uruvelāti evampettha attho daṭṭhabbo. Atīte kira anuppanne buddhe dasasahassakulaputtā tāpasapabbajjaṃ pabbajitvā tasmīṃ padese viharantā ekadivasaṃ sannipatitvā katikavattaṃ akaṃsu – “kāyakammavacīkammāni nāma paresampi pākāṭāni honti, manokammaṃ pana apākāṭaṃ; tasmā yo kāmavitakkaṃ vā byāpādavitakkaṃ vā vihiṃsāvītakkaṃ vā vitakketi, tassa añño codako nāma natthi, so attanāva attānaṃ codetvā pattapuṭena vālikaṃ āharitvā imasmiṃ ṭhāne ākiratu, idamassa daṇḍakamma”nti. Tato paṭṭhāya yo tādisaṃ vitakkaṃ vitakketi, so tattha pattapuṭena vālikaṃ ākirati. Evaṃ tattha anukkamena mahāvālikarāsi jāto, tato naṃ pacchimā janatā parikkhipitvā cetiyatṭhānamakāsi. Taṃ sandhāya vuttaṃ – “uruvelāyanti mahāvelāyaṃ; mahante

vālikarāsimhīti attho’’ti. Tameva sandhāya vuttaṃ – ‘‘atha vā urūti vālikā vuccati; velāti mariyādā; velātikamanahetu āhaṭā uru uruvelāti evampettha attho daṭṭhabbo’’ti.

**Bodhirukkhamūleti** bodhi vuccati catūsu maggesu ñāṇaṃ; taṃ bodhiṃ bhagavā ettha pattoti rukkhopi ‘‘bodhirukkho’’tveva nāmaṃ labhi, tassa bodhirukkha mūle bodhirukkhamūle. **Paṭhamābhisambuddhoti** paṭhamaṃ abhisambuddho; abhisambuddho hutvā sabbapaṭhamamaṃyevāti attho. **Ekapallankena**ti sakimpī anuṭṭhahitvā yathāābhujitena ekeneva pallanena. **Vimuttisukhapaṭisaṃvedīti** vimuttisukhaṃ phalasaṃpattisukhaṃ paṭisaṃvedayamāno.

**Paṭiccasamuppādanti** paccayākāraṃ. Paccayākāro hi aññamaññaṃ paṭicca sahite dhamme uppādetīti ‘‘paṭiccasamuppādo’’ti vuccati. Ayamettha saṅkhepo. Vitthāro pana sabbākārasampannaṃ vinicchayaṃ icchantena visuddhimaggato gahetabbo. **Anulomapaṭilomanti** anulomañca paṭilomañca. Tattha ‘‘avijjāpaccayā saṅkhārā’’tiādinā nayena vutto avijjādiko paccayākāro attanā kattabbakiccarāṇato ‘‘anulomo’’ti vuccati. ‘‘Avijjāya tveva asesavirāganirodhā saṅkhāranirodho’’tiādinā nayena vutto sveva anuppādanirodhena nirujjhamāno taṃ kiccaṃ na karotīti tassa akaraṇato ‘‘paṭilomo’’ti vuccati. Purimanayena vā vutto pavattiyā anulomo, itaro tassā paṭilomoti evampettha attho daṭṭhabbo. Ādīto pana paṭṭhāya yāva antaṃ, antato ca paṭṭhāya yāva ādiṃ pāpetvā avuttattā ito aññenatthena anulomapaṭilomatā na yujjati.

**Manasākāsīti** manasi akāsi. Tattha yathā anulomaṃ manasi akāsi, idaṃ tāva dassetuṃ ‘‘avijjāpaccayā saṅkhārā’’tiādi vuttaṃ. Tattha avijjā ca sā paccayo cāti avijjāpaccayo. Tasmā **avijjāpaccayā saṅkhārā sambhavantīti** iminā nayena sabbapadesu attho veditabbo. Ayamettha saṅkhepo. Vitthāro pana sabbākārasampannaṃ vinicchayaṃ icchantena visuddhimaggatova gahetabbo.

Yathā pana paṭilomaṃ manasi akāsi, idaṃ dassetuṃ **avijjāya tveva asesavirāganirodhā saṅkhāranirodhoti**tiādi vuttaṃ. Tattha **avijjāya tvevāti** avijjāya tu eva. **Asesavirāganirodhāti** virāgasāṅkhātena maggena asesanirodhā. **Saṅkhāranirodhoti** saṅkhārānaṃ anuppādanirodho hoti. Evaṃ niruddhānaṃ pana saṅkhārānaṃ nirodhā viññāṇaṃ niruddhaṃ, viññāṇādīnañca nirodhā nāmarūpādīni niruddhāniyeva hontīti dassetuṃ **saṅkhāranirodhā viññāṇanirodhoti**tiādinī vatvā **evametassa kevalassa dukkhakkhandhassa nirodho hotīti** vuttaṃ. Tattha **kevalassāti** sakalassa; suddhassa vā sattavirahitassāti attho. **Dukkhakkhandhassāti** dukkharāsissa. **Nirodho hotīti** anuppādo hoti.

**Etamatthaṃ viditvāti** yvāyaṃ ‘‘avijjādivasena saṅkhārādikassa dukkhakkhandhassa samudayo ca avijjānirodhādivasena ca nirodho hotī’’ti vutto, sabbākārena etamatthaṃ viditvā. **Tāyaṃ velāyanti** tāyaṃ tassa atthassa viditavelāyaṃ. **Imaṃ udānaṃ udānesīti** imaṃ tasmīṃ vidite atthe hetuno ca hetusamuppannadhammassa ca pajānanāya ānubhāvādīpakāṃ ‘‘yadā have pātubhavantī’’tiādikāṃ somanassayuttañāṇasamuṭṭhānaṃ udānaṃ udānesi, attamanavācaṃ nicchāresīti vuttaṃ hoti.

Tassattho – **yadā haveti** yasmīṃ bhava kāle. **Pātubhavantīti** uppajjanti. **Dhammāti** anulomapaccayākārapaṭivedhasādhakā bodhipakkhiyadhammā. Atha vā **pātubhavantīti** pakāsanti; abhisamayavasena byattā pākāṭā hontī. **Dhammāti** catuariasaccadhammā. Ātāpo vuccati kilesasantāpanaṭṭhena vīriyaṃ; **ātāpinoti** sammappadhānavīriyavato. **Jhāyatoti** ārammaṇūpanijjhānalakkhaṇena ca lakkhaṇūpanijjhānalakkhaṇena ca jhānena jhāyantassa. **Brāhmaṇassāti** bāhitapāpassa khīṇāsavassa. **Athassa kaṅkhā vapayantīti** athassa evaṃ pātubhūdadhammassa kaṅkhā vapayanti. **Sabbāti** yā etā ‘‘ko nu kho bhante phusatīti; no kallo pañhoti bhagavā avocā’’tiādinā, tathā ‘‘katamaṃ nu kho bhante jarāmaṇaṃ; kassa ca panidaṃ jarāmaṇanti; no kallo pañhoti bhagavā avocā’’tiādinā ca nayena paccayākāre kaṅkhā vuttā, yā ca paccayākārasseva appaṭividdhattā ‘‘ahosiṃ nu kho ahaṃ atītamaddhāna’’ntiādikā soḷasa kaṅkhā āgatā, tā sabbā vapayanti apagacchanti nirujjhanti. Kasmā? **Yato pajānāti sahetudhammanti** yasmā avijjādikena hetunā sahetukaṃ imaṃ saṅkhārādiṃ kevalaṃ dukkhakkhandhadhammaṃ pajānāti aññāti paṭivijjhatīti.

2. Dutiyavāre – **imaṃ udānaṃ udānesīti** imaṃ tasmim vidite atthe “avijjāya tveva asesavirāganirodhā saṅkhāranirodho” ti evaṃ pakāsitassa nibbānasaṅkhātassa paccayakkhayassa avabodhānubhāvadīpakaṃ vuttappakāraṃ udānaṃ udānesīti attho. Tatrāyaṃ saṅkhepattho – yasmā paccayānaṃ khayasaṅkhātaṃ nibbānaṃ aveđi aññāsi paṭivijjhi, tasmā yadāssa ātāpino jhāyato brāhmaṇassa vuttappakārā dhammā pātubhavanti, athassa yā nibbānassa aviditattā uppajjeyyūṃ, tā sabbāpi kaṅkhā vapayantīti.

3. Tatiyavāre – **imaṃ udānaṃ udānesīti** imaṃ yena maggena so dukkhakkhandhassa samudayanirodhasaṅkhāto attho kiccavasena ca ārammaṇakiriyāya ca vidito, tassa ariyamaggassa ānubhāvadīpakaṃ vuttappakāraṃ udānaṃ udānesīti attho. Tatrāpāyaṃ saṅkhepattho – **yadā have pātubhavanti dhammā ātāpino jhāyato brāhmaṇassa**, tadā so brāhmaṇo tehi vā uppannehi bodhipakkhiyadhammehi, yassa vā ariyamaggassa catusaccadhammā pātubhūtā, tena ariyamaggena **vidhūpayam tiṭṭhati mārasenaṃ** “kāmā te paṭhamā senā” tiādinā nayena vuttappakāraṃ mārasenaṃ vidhūpayanto vidhamento viddhamṣento tiṭṭhati. Kathaṃ? **Sūriyova obhāsaya mantalikkhaṃ**, yathā sūriyo abbhuggato attano pabhāya antalikkhaṃ obhāsento andhakāraṃ vidhamento tiṭṭhati, evaṃ sopi brāhmaṇo tehi dhammehi tena vā maggena saccāni paṭivijjhantova mārasenaṃ vidhūpayanto tiṭṭhatīti.

Evamettha paṭhamaṃ udānaṃ paccayākārapaccavekkhaṇavasena, dutiyaṃ nibbānapaccavekkhaṇavasena, tatiyaṃ maggapaccavekkhaṇavasena uppannanti veditabbaṃ. Udāne pana “rattiyā paṭhamaṃ yāmaṃ paṭiccasamuppādaṃ anulomaṃ, dutiyaṃ yāmaṃ paṭilomaṃ, tatiyaṃ yāmaṃ anulomapaṭilomaṃ” nti vuttaṃ; taṃ sattāhassa accayena “sve āsanā vuṭṭhahissāmī” ti rattim uppāditamanasikāraṃ sandhāya vuttaṃ. Tadā hi bhagavā yassa paccayākārapajānanassa ca paccayakkhayādhigamassa ca ānubhāvadīpikā purimā dve udānagāthā, tassa vasena ekekameva koṭṭhāsaṃ paṭhamayāmaṇca majjhimayāmaṇca manasākāsi, idha pana pāṭipadarattiyā evaṃ manasākāsi. Bhagavā hi visākhapunnāmāya rattiyā paṭhamayāme pubbenivāsaṃ anussari, majjhimayāme dibbacakkuṃ visodhesi, pacchimayāme paṭiccasamuppādaṃ anulomapaṭilomaṃ manasi katvā “idāni aruṇo uggamissati” ti sabbaññutaṃ pāpuṇi. Sabbaññutappattisamanantareva ca aruṇo uggacchi. Tato taṃ divasaṃ teneva pallaṅkena vītināmetvā sampattāya pāṭipadarattiyā tīsu yāmesu evaṃ manasi katvā imāni udānāni udānesi. Iti pāṭipadarattiyā evaṃ manasi katvā taṃ “bodhirukkhamūle sattāhaṃ ekapallaṅkena nisīdī” ti evaṃ vuttasattāhaṃ tattheva vītināmesi.

Bodhikathā niṭṭhitā.

### Ajapālakathā

4. **Atha kho bhagavā sattāhassa accayena tamhā samādhimhā vuṭṭhahitvā bodhirukkhamulā yena ajapālanigrodho tenupasaṅkamīti** ettha na bhagavā tamhā samādhimhā vuṭṭhahitvā anantareva bodhirukkhamulā yena ajapālanigrodho tenupasaṅkami. Yathā pana “bhutvā sayatī” ti vutte na “hatthe adhovitvā mukhaṃ avikkhāletvā sayanasamīpaṃ agantvā aññaṃ kiñci ālāpasallāpaṃ akatvā sayatī” cceva vuttaṃ hoti, bhojanato pana pacchā sayatī, na nasayatīti idamevattha dīpitaṃ hoti. Evamidhāpi “na tamhā samādhimhā vuṭṭhahitvā anantareva pakkāmī” ti vuttaṃ hoti, vuṭṭhānato ca pana pacchā pakkāmī, na napakkāmīti idamevettha dīpitaṃ hoti.

Anantaraṃ pana apakkamitvā bhagavā kiṃ akāsīti? Aparānipi tīṇi sattāhāni bodhisamīpeyeva vītināmesi. Tatrāyaṃ anupubbikathā – bhagavati kira buddhattaṃ patvā sattāhaṃ ekapallaṅkena nisinne “na bhagavā vuṭṭhātī; kiṃ nu kho aññepi buddhattakarā dhammā atthī” ti ekaccānaṃ devatānaṃ kaṅkhā udapādi. Atha bhagavā aṭṭhame divase samāpattito vuṭṭhāya devatānaṃ kaṅkhaṃ ñatvā kaṅkhāvidhamanattaṃ ākāse uppatitvā yamakapāṭihāriyaṃ dassetvā tāsāṃ kaṅkhaṃ vidhamitvā pallaṅkato īsakaṃ pācīnanissite uttaradisābhāge ṭhatvā cattāri asaṅkhyeyyāni kappasatasahassaṇca upacitānaṃ pāramīnaṃ balādhigamaṇaṭṭhānaṃ pallaṅkaṃ bodhirukkhaṇca animisehi akkhiṇhi olokayamāno sattāhaṃ vītināmesi, taṃ ṭhānaṃ **animisacetiyam** nāma jātaṃ. Atha pallaṅkassa ca

ṭhitaṭṭhānassa ca antarā puratthimato ca pacchimoto ca āyate ratanacaṅkame caṅkamanto sattāhaṃ vītināmesi, taṃ ṭhānaṃ **ratanacaṅkamacetiyaṃ** nāma jātaṃ. Tato pacchimadisābhāge devatā ratanagharaṃ māpayiṃsu. Tattha pallaṅkena nisīditvā abhidhammapīṭakaṃ visesato cettha anantanayaṃ samantapaṭṭhānaṃ vicinanto sattāhaṃ vītināmesi, taṃ ṭhānaṃ **ratanagharacetiyaṃ** nāma jātaṃ.

Evamaṃ bodhisamīpeyeva cattāri sattāhāni vītināmetvā pañcame sattāhe bodhirukkhamulā yena ajapālanigrodho tenupasaṅkami. Tassa kira nigrodhassa chāyāya ajapālakā gantvā nisīdanti; tenassa ajapālanigrodhotveva nāmaṃ udapādi. **Sattāhaṃ vimuttisukhapaṭisaṃvedīti** tatrāpi dhammaṃ vicinantoyeva vimuttisukhaṃ paṭisaṃvedento nisīdi. Bodhito puratthimadisābhāge esa rukkho hoti. Evaṃ nisinne ca panettha bhagavati eko brāhmaṇo gantvā pañhaṃ pucchi. Tena vuttaṃ **“atha kho aññataro”**tiādi. Tattha **humhuṅkajātiko** so kira diṭṭhamaṅgaliko nāma, mānavasena kodhavasena ca “humhu”nti karonto vicarati, tasmā “humhuṅkajātiko”ti vuccati. “Huhukkajātiko”tipi paṭhanti.

**Etamatthaṃ viditvāti** etaṃ tena vuttassa vacanassa sikhāpattamatthaṃ viditvā tāyaṃ velāyaṃ imaṃ udānaṃ udānesi. Tassattho – yo bāhitapāpadhammatāya **brāhmaṇo** na diṭṭhamaṅgalikatāya, humhuṅkārakabhāvādīpāpadhammayutto hutvā kevalaṃ jātimattakena brahmaññaṃ paṭijānāti, so brāhmaṇo bāhitapāpadhammatā humhuṅkārappahānena **nihumhuṅko**, rāgādikasāvābhāvena **nikkasāvo**, bhāvanānuyogayuttacittatāya **yatto**, sīlasaṃvarena vā saññatacittatāya **yatto**, catumaggañāṇasaṅkhātehi vedehi antaṃ, vedānaṃ vā antaṃ gatattā **vedantagū**, maggabrahmacariyassa vusitattā **vusitabrahmacariyo**. **Dhammena brahmavādaṃ vadeyya**, “brāhmaṇo, aha”nti etaṃ vādaṃ dhammena vadeyya, yassa sakale lokasannivāse kuhiñci ekārammaṇepi rāgussado dosussado mohussado mānussado diṭṭhussadoti ime ussādā natthīti.

Ajapālakathā niṭṭhitā.

### Mucalindakathā

**5. Akālameghoti** asampatte vassakāle uppannamegho. Ayaṃ pana gimhānaṃ pacchime māse udapādi. **Sattāhavaddalikā**ti tasmim uppanne sattāhaṃ avicchinnavuṭṭhikā ahoṣi. **Sītavātaduddinī**ti sā ca pana sattāhavaddalikā udakaphusitasammissena sītavātena samantā paribbhamantena dūsitadivasattā sītavātaduddinī nāma ahoṣi. **Atha kho mucalindo nāgarājāti** tasseva mucalindarukkhasa samīpe pokkharāṇiyā nibbatto mahānubhāvo nāgarājā. **Sattakkhattuṃ bhogehi parikkhipitvāti** evaṃ bhogehi parikkhipitvā uparimuddhani mahantaṃ phaṇaṃ karitvāva ṭhite; tasmim tassa parikkhepabbhantaraṃ lohapāsāde bhaṇḍāgāragabbhappamāṇaṃ ahoṣi, tasmā bhagavā nivāte pihitadvāravātapāne kūṭāgāre nisinnō viya jāto. **Mā bhagavantaṃ sītanti**tiādi tassa tathā karitvā ṭhānakāraṇaparidīpanaṃ. So hi “mā bhagavantaṃ sītaṃ bādhayittha, mā uṇhaṃ, mā ḍaṃsādisamphasso bādhayitthā”ti tathā karitvā aṭṭhāsi. Tattha kiñcāpi sattāhavaddalikāya uṇhameva natthi, sace pana antarantarā megho vigaccheyya uṇhaṃ bhaveyya, tampi naṃ mā bādhayitthāti evaṃ tassa cintetuṃ yuttaṃ. **Viddhanti** ubbidham; meghavigamena dūrībhūtanti attho. **Vigatavalāhakanti** apagatameghaṃ. **Devanti** ākāsaṃ. **Sakavaṇṇanti** attano rūpaṃ.

**Sukho vivekoti** nibbānasāṅkhāto upadhiviveko sukho. **Tuṭṭhassāti** catumaggañāṇasantosena santuṭṭhassa. **Sutadhammassāti** pakāsītadhammassa. **Passatoti** taṃ vivekaṃ yaṃ vā kiñci passitabbaṃ nāma, taṃ sabbhaṃ attano vīriyabalādhigatena ñāṇacakkhunā passantassa. **Abyāpajanti** akuppanabhāvo; etena mettāpubbabbhāgo dassito. **Pāṇabhūtesu saṃyamoti** sattesu ca saṃyamo; avihiṃsanabhāvo sukhoti attho. Etena karuṇāpubbabbhāgo dassito. **Sukhā virāgatā loketi** vītarāgatāpi sukhāti dīpeti. **Kāmānaṃ samatikkamoti** yā “kāmānaṃ samatikkamo”ti vuccati; sā virāgatāpi sukhāti attho. Etena anāgāmimaggo kathito. **Asmimānassa yo vinayoti** iminā pana arahattaṃ kathitaṃ; arahattañhi asmimānassa “passaddhivinayo”ti vuccati. Ito parañca sukhaṃ nāma natthi, tenāha “etaṃ ve paramaṃ sukha”nti.

Mucalindakathā niṭṭhitā.

### Rājāyatanakathā

**6. Mucalindamūlāti** mahābodhito pācīnakone ṭhitamucalindarukkhamulā. **Rājāyatananti** dakkhiṇadisābhāge ṭhitam rājāyatanarukkham upasankami. **Tena kho pana samayenāti** katarena samayena. Bhagavato kira rājāyatanamūle sattāham ekapallaṅkena nisinnassa samādhito vuṭṭhādivase aruṇuggamanavelāyameva “bhojanakiccena bhavitabba”nti ñatvā sakko devarājā osadhaharītakaṃ upanesi. Bhagavā tam paribhuñji, paribhuttamattasseva sarīrakiccaṃ ahoṣi. Sakko mukhodakaṃ adāsi. Bhagavā mukhaṃ dhovitvā tasmiṃyeva rukkhamūle nisīdi. Evaṃ uggate aruṇamhi nisinne bhagavati.

**Tena kho pana samayena tapussabhallikā vāṇijāti** tapusso ca bhalliko cāti dve bhātaro vāṇijā. **Ukkalāti** ukkalajanapadato. **Tam desanti** yasmiṃ dese bhagavā viharati. Katarasmiṃca dese bhagavā viharati? Majjhimadese. Tasmā majjhimadesaṃ gantuṃ addhānamaggappaṭipannā hontīti ayamettha attho. **Ñātisālohitā devatāti** tesam ñātibhūtapubbā devatā. **Etadavocāti** sā kira nesam sabbasakaṭāni appavattīni akāsi. Tato te kiṃ idanti maggadevatānaṃ baliṃ akaṃsu. Tesam balikammakāle sā devatā dissamāneneva kāyena etaṃ avoca. **Manthena ca madhupiṇḍikāya cāti** abaddhasattunā ca sappimadhuphāṇitādīhi yojetvā baddhasattunā ca. **Patimānethāti** upaṭṭhahatha. **Tam voti** tam patimānaṃ tumhākaṃ bhavissati dīgharattaṃ hitāya sukhāya. **Yaṃ amhākanti** yaṃ paṭiggahaṇaṃ amhākaṃ assa dīgharattaṃ hitāya sukhāya. **Bhagavato etadahosīti** yo kirassa padhānanuyogakāle **patto** ahoṣi, so sujātāya pāyasaṃ dātuṃ āgacchantiyā eva antaradhāyi. Tenassa etadahosi – “patto me natthi, purimakāpi ca na kho tathāgatā hatthesu paṭiggaṇhanti, kimhi nu kho ahaṃ paṭiggaṇheyyaṃ manthaṅca madhupiṇḍakaṅca”ti.

**Parivitakkamaññāyāti** ito pubbeva bhagavato sujātāya dinnabhojanaṃyeva ojanupbandhanavasena aṭṭhāsi, ettakaṃ kālaṃ neva jīghacchā na pipāsā na kāyadubbalyaṃ ahoṣi. Idāni panassa āhāraṃ paṭiggahetukāmatāya “**na kho tathāgatā**”tiadinā nayena parivitakko udapādi. Tam evaṃ uppannaṃ attano cetasā bhagavato cetoparivitakkamaññāya. **Catuddisāti** catūhi disāhi. **Selamaye patteti** muggavaṇṇaselumaye patte. Idamyeva bhagavā paṭiggahesi, teyeva sandhāya vuttaṃ. Cattāro pana mahārājāno paṭhamaṃ indanīlamanimaye patte upanāmesuṃ, na te bhagavā aggahesi. Tato ime cattāropi muggavaṇṇasilāmaye patte upanāmesuṃ, bhagavā cattāropi patte aggahesi tesam pasādānurakkhaṇatthāya, no mahicchatāya. Gahetvā ca pana cattāropi yathā ekova patto hoti tathā adhiṭṭhahi, catunnampi ekasadiṣo puññavipāko ahoṣi. Evaṃ ekaṃ katvā adhiṭṭhite **paṭiggahesi bhagavā paccagge selamaye patte manthaṅca madhupiṇḍikaṅca**. **Paccaggheti** paccagghasmim; pāṭekkaṃ mahagghasminti attho. Atha vā **paccaggheti** abhinave abbhunṇe; taṅkhaṇe nibbattasminti attho. Dve vācā etesaṃ ahesunti **dvevācikā**. Atha vā dvīhi vācāhi upāsakabhāvaṃ pattāti attho. Te evaṃ upāsakabhāvaṃ paṭivedetvā bhagavantaṃ āhaṃsu – “kassa dāni bhante amhehi ajja paṭṭhāya abhivādanapaccuṭṭhānaṃ kātabba”nti? Atha bhagavā sīsaṃ parāmasi, kesā hatthe laggimṃsu. Te tesam adāsi “ime tumhe pariharathā”ti. Te kesadhātuyo labhitvā amateneva abhisittā haṭṭhatuṭṭhā bhagavantaṃ vanditvā pakkamimṃsu.

Rājāyatanakathā niṭṭhitā.

### Brahmayācanakathā

**7.** Atha kho bhagavā sattāhassa accayena tamhā samādhimhā vuṭṭhahitvā vuttappakārametaṃ sabbam kiccaṃ niṭṭhāpetvā rājāyatanamulā punapi yena ajapālanigrodho tenupasankami. **Parivitakko udapādīti** tasmiṃ nisinnamattasseva sabbabuddhānaṃ āciṇṇasamāciṇṇo ayaṃ cetaso parivitakko udapādi. Kasmā panāyaṃ sabbabuddhānaṃ uppajjatīti? Dhammassa mahantabhāvaṃ garubhāvaṃ bhāriyabhāvaṃ paccavekkhaṇāya brahmunā yācite desetukāmatāya ca. Jānanti hi buddhā “evaṃ parivitakkite brahmā āgantvā dhammadesanaṃ yācissati, tato sattā dhamme gāraṃ upādessanti,

brahmagaruko hi lokasannivāso’’ti. Iti imehi dvīhi kāraṇehi ayaṃ vitakko uppajjatīti.

Tattha **adhigato kho myāyanti** adhigato kho me ayaṃ. **Ālayarāmāti** sattā pañca kāmagaṇe allīyanti, tasmā te ‘‘ālayā’’ti vuccanti. Tehi ālayehi ramantīti **ālayarāmā**. Ālayesu ratāti **ālayaratā**. Ālayesu suṭṭhumuditāti **ālayasammuditā**. **Yadidanti** nipāto. Tassa ṭhānaṃ sandhāya ‘‘yaṃ ida’’nti paṭiccasamuppādaṃ sandhāya ‘‘yo aya’’nti evamattho datṭhabbo. **Idappaccayatāpaṭiccasamuppādoti** imesaṃ paccayā idappaccayā, idappaccayāva **idappaccayatā**, idappaccayatā ca sā paṭiccasamuppādo cāti **idappaccayatāpaṭiccasamuppādo**. **So mama** kilamathoti yā ajānantānaṃ desanā nāma, so mama kilamatho assa; sā mama vihesā assāti attho. **Bhagavantanti** bhagavato. **Anacchariyāti** anu acchariyā. **Paṭibhamsūti** paṭibhānasankhātassa ñāṇassa gocharā ahesuṃ, parivittakkayitabbabhāvaṃ pāpuṇṇisu.

**Halanti** ettha hakāro nipātamatto; alanti attho. **Pakāsītunti** desituṃ. Alaṃ dāni me imaṃ kicchena adhigataṃ dhammaṃ desetunti vuttaṃ hoti. **Paṭisotagāminti** paṭisotaṃ vuccati nibbānaṃ; nibbānagāminti attho. **Rāgarattāti** kāmarāgabharāgadiṭṭhirāgena rattā. **Na dakkhantīti** na passissanti. **Tamokhandhena āvuṭāti** avijjārāsinaṃ ajjhotthaṭā. **Appossukkatāyāti** nirussukkabhāvena; adesetukāmatāyāti attho.

**8. Yatra hi nāmāti** yasmiṃ nāma loke. **Bhagavato purato pāturaḥosīti** dhammadesanāyācanatthaṃ dasasu cakkavāḷasahassee mahābrahmāno gahetvā āgamma bhagavato purato pāturaḥosī. **Apparajakkhajātikāti** paññāmaye akkhimhi appaṃ rāgadosamoharajaṃ etesaṃ evaṃsabhāvāti **apparajakkhajātikā**. **Bhavissanti dhammassa aññātāro**ti paṭivijjhitaro.

**Pāturaḥosīti** pātubhavi. **Samalehi cintitoti** rāgādīhi malehi samalehi chahi sathārehi cintito. **Apāpuretanti** vivara etaṃ. **Amatassa dvāranti** amatassa nibbānassa dvārabhūtaṃ ariyamaggaṃ. **Suṇantu dhammaṃ vimalenānubuddhanti** ime sattā rāgādimalānaṃ abhāvato vimalena sammāsambuddhena anubuddhaṃ catusaccadhammaṃ suṇantu.

**Sele yathā pabbatamuddhaniṭṭhitoti** selamaye ekagghane pabbatamuddhani yathāṭhitova yathā cakkhumā puriso samantato janataṃ passeyya, tvampi sumedha sundarapañña sabbaññutaññāna samantacakkhu bhagavā dhammamayaṃ paññāmayāṃ pāsādamāruyha sayāṃ apetasoko sokāvatiṇṇaṃ jātijarābhibhūtañca janataṃ avekkhassu upadhāraya.

**Uṭṭhehīti** bhagavato dhammadesanatthaṃ cārikacaraṇaṃ yācanto bhaṇati. **Vīrāti**ādīsu bhagavā vīriyavantatāya **vīro**. Devaputtamaccukilesābhisaṅkhāramārānaṃ vijitattā **vijitasāṅgāmo**. Jātikantārādīnitharaṇasamatthatāya **sathavāho**. Kāmacchandaiṇassa abhāvato **aṇaṇo**.

**9. Ajjhesananti** yācanaṃ. **Buddhacakkhunāti** indriyaparopariyattañāṇena ca āsayānusayañāṇena ca. Imesañhi dvinnaṃ ñāṇānaṃ buddhacakkhūti nāmaṃ. **Apparajakkhāti** paññācakkhumhi rāgādirajaṃ appaṃ yesaṃ, te **apparajakkhā**. Yesaṃ taṃ mahantaṃ te **mahārajakkhā**. Yesaṃ saddhādīni indriyāni tikkhāni te **tikkhindriyā**. Yesaṃ tāni mudūni te **mudindriyā**. Yesaṃ teyeva saddhādayo ākāraṃ suṇarā te **svākārā**. Yesaṃ teyeva saddhādayo ākāraṃ asuṇarā te **dvākārā**. Ye kathitakāraṇaṃ sallakkhenti, sukkena sakkā honti viññāpetuṃ te **suviññāpayā**. Ye paralokañca vajjañca bhayato passanti te **paralokavajjabhayadassāvino**. **Uppaliniyanti** uppalavane. Itaresupi eseva nayo. **Antonimuggaposīnīti** yāni udakassa anto nimuggāneva posayanti. **Samodakaṃ ṭhitānīti** udakena samaṃ ṭhitāni. **Udakaṃ accuggamma ṭhitānīti** udakaṃ atikkamitvā ṭhitāni.

**Apārutāti** vivaṭā. **Amatassa dvārāti** ariyamaggo. So hi amatasānkhatassa nibbānassa dvāraṃ. **Pamuñcantu saddhanti** sabbe attano saddhaṃ pamuñcantu. Pacchimapadadvaye ayamatto, ahañhi attano paguṇaṃ suppvattimpī imaṃ pañītaṃ uttamaṃ dhammaṃ kāyavācākīlamathasaññī hutvā manujesu devamanussesu na bhāsinti.

Brahmayācanakathā niṭṭhitā.

### Pañcavaggiyakathā

**10. Paṇḍitoti** paṇḍiccena samannāgato. **Byattoti** veyyattiyena samannāgato. **Medhāvīti** ṭhānuppattiyā paññāya samannāgato. **Apparajakkhajātikoti** samāpattiyā vikkhambhitattā nikkilesajātiko visuddhasatto. **Ājānissatīti** sallakkhessati paṭivijjhissati. **Bhagavatopi kho ñāṇaṃ udapādīti** sabbaññutaññāṇaṃ uppajji “ito sattamadivasamatthake kālaṃkatvā ākiñcaññāyatane nibbato”ti. **Mahājāniyoti** sattadivasabbhantare pattabbamaggaphalato parihīnattā mahatī jāni assāti **mahājāniyo** akkhaṇe nibbattattā. **Abhidosakālaṃkatoti** hiyyo kālaṃkato, sopi nevasaññānāsaññāyatane nibbattoti addasa. **Bahūkārāti** bahūpakārā. **Padhānapahitattaṃ upaṭṭhahimsūti** padhānatthāya pesitattabhāvaṃ mukhodakadānādīnā upaṭṭhahimsu.

**11. Antarā ca gayamaṃ antarā ca bodhinti** upako bodhimaṇḍassa ca gayāya ca antare bhagavantamaṃ addasa. **Addhānamaggapaṭipannanti** addhānamaggaṃ paṭipannaṃ.

**Sabbābhibhūti** sabbaṃ tebhūmakadhammaṃ abhibhavitvā ṭhito. **Sabbavidūti** sabbaṃ catubhūmakadhammaṃ avediṃ aññasiṃ. **Sabbesu dhammesu anūpalittoti** sabbesu tebhūmakadhammesu kilesalepena alitto. **Sabbañjahoti** sabbaṃ tebhūmakadhammaṃ jahitvā ṭhito. **Taṇhakkhaye vimuttoti** taṇhakkhaye nibbāne ārammaṇato vimutto. **Sayamaṃ abhiññāyāti** sabbaṃ catubhūmakadhammaṃ attanāva jānitvā. **Kamuddiseyyanti** kaṃ aññaṃ “āyamaṃ me ācariyo”ti uddiseyyamaṃ.

**Na me ācariyo atthīti** lokuttaradhamme mayhaṃ ācariyo nāma natthi. **Natthi me paṭipuggaloti** mayhaṃ paṭibhāgapuggalo nāma natthi. **Sītibhūtoti** sabbakilesagginibbāpanena sītibhūto. Kilesānaṃyeva nibbutattā **nibbuto**.

**Kāsīnaṃ puranti** kāsiraṭṭhe nagaraṃ. **Āhañchaṃ amatadundubhinti** dhammacakkappaṭilābhāya amatabheriṃ paharissāmīti gacchāmi.

**Arahasi anantajinoti** anantajino bhavitumaṃ yutto. **Hupeyyapāvusoti** āvuso evampi nāma bhaveyya. **Sīsaṃ okampetvāti** sīsaṃ cāletvā.

**12. Saṅghapesunti** katikaṃ akaṃsu. **Bāhullikoti** cīvarabāhullādīnaṃ atthāya paṭipanno. **Padhānavibbhantoti** padhānato vibbhanto bhaṭṭho parihīno. **Āvatto bāhullāyāti** cīvarādībahulabhāvattāya āvatto. **Odahatha bhikkhave sotanti** upanetha bhikkhave sotaṃ; sotindriyaṃ dhammasavanatthaṃ abhimukhaṃ karoṭhāti attho. **Amatamadhigatanti** amataṃ nibbānaṃ mayā adhigatanti dasseti. **Iriyāyāti** dukkarairiyāya. **Paṭipadāyāti** dukkarapaṭipadāya. **Abhijānātha me notī** abhijānātha nu me samanupassatha. **Evarūpaṃ bhāsitametanti** etaṃ evarūpaṃ vākyamaṃ bhāsitanti attho. **Asakkhi kho bhagavā pañcavaggiye bhikkhū saññāpetunti** “ahaṃ buddho”ti jānāpetumaṃ asakkhi.

**13. Cakkhukaraṇīti** paññācakkhumaṃ sandhāyāha. Ito paraṃ sabbaṃ padatthato uttānameva. Adhippāyānusandhiyojanādībhedato pana papañcasūdaniyā majjhimaṭṭhakathāyaṃ vuttanayena vedītabbaṃ. Ito paṭṭhāya hi ativitthārabhīrukassa mahājanassa cittaṃ anurakkhantā suttantakathaṃ avaṇṇayitvā vinayakathaṃyeva vaṇṇayissāma.

**18. Sāva tassa āyasmato upasampadā ahoṣīti** āsālhipuṇṇamāya aṭṭhārasahi devatākoṭṭhi saddhiṃ sotāpattiphale paṭiṭṭhitassa “ehi bhikkhū”ti bhagavato vacanena abhinipphannā sāva tassa āyasmato **ehibhikkhūpasampadā** ahoṣi.

**19. Atha kho āyasmato ca vappassāti** ādimhi vappattherassa pātipadadivase dhammacakkhum udapādi, bhaddiyattherassa dutiyadivase, mahānāmattherassa tatiyadivase, assajittherassa catutthiyanti. Imesañca pana bhikkhūnaṃ kammaṭṭhānesu uppannamalavisodhanatthaṃ bhagavā antovihāreyeva ahoṣi. Uppanne uppanne kammaṭṭhānamale ākāseṇa gantvā malaṃ vinodesi. Pakkhassa pana pañcamiyaṃ sabbe te ekato sannipātetvā anattasuttēna ovadi. Tena vuttaṃ **“atha kho bhagavā pañcavaggiye”**tiādi.

**24. Tena kho pana समयेना चा लोके अराहन्तो हन्ति**ti pañcamiyā pakkhassa lokasmiṃ cha manussā arahanto hontīti attho.

Pañcavaggiyakathā niṭṭhitā.

### Pabbajjākathā

**31. Pubbānupubbakānanti** paveṇivasena porāṇānuporāṇānanti attho. **Tena kho pana समयेना एकात्थि लोके अराहन्तो हन्ति**ti purimā cha ime ca pañcapaññāsāti antovassamhiyeva ekasatthi manussā arahanto hontīti attho.

Tatra yasaādīnaṃ kulaputtānaṃ ayaṃ pubbayogo – atīte kira pañcapaññāsajanā saḥāyakā vaggabandhena puññāni karontā anāthasarīrāni paṭijaggantā vicaranti, te ekadivasaṃ gabbhinim itthim kalamkataṃ disvā “jhāpessāmā”ti susānaṃ nīhariṃsu. Tesu pañca jane “tumhe jhāpethā”ti susāne ṭhapetvā sesā gāmaṃ pavitṭhā. Yaso dārako taṃ sarīraṃ vijjhivā parivattetvā ca jhāpayamāno asubhasaññaṃ paṭilabhi. So itaresampi catunnaṃ janānaṃ “passatha bho imaṃ asuciṃ paṭikūla”nti dassesi. Tepi tattha asubhasaññaṃ paṭilabhiṃsu. Te pañcapi janā gāmaṃ gantvā sesasahāyakānaṃ kathayīṃsu. Yaso pana dārako gehampi gantvā mātāpitūnañca bhariyāya ca kathesi. Te sabbepi asubhaṃ bhāvayīṃsu. Ayametesam pubbayogo. Tenāyasmato yasassa nāṭakajanesu susānasaññāyeva uppajji, tāyeva ca upanissayasampattiyā sabbesaṃ visesādhigamo nibbattīti.

**Atha kho bhagavā bhikkhū āmantesīti** bhagavā yāva pacchimakkattikapuñṇamā, tāva bārāṇasiyaṃ viharanto ekadivasaṃ te khīṇāsava satthi bhikkhū āmantesi.

**32. Dibbā** nāma dibbesu visayesu lobhapāsā. **Mānusa** nāma mānusesu visayesu lobhapāsā. **Mā ekena dveti ekena** maggena dve mā agamittha. **Assavanatāti** assavanatāya. **Parihāyantīti** anadhigataṃ nādhigacchantā visesādhigamato parihāyanti.

**33. Antakāti** lāmaka hīnasatta. **Antalikkhacaroti** rāgapāsaṃ sandhāyāha. Tañhi so “antalikkhacaro”ti mantvā āha.

**34. Nānādisā nānājanapadāti** nānādisato ca nānājanapadato ca. **Anujānāmi bhikkhave tumheva dāni tāsū tāsū disāsū tesu tesu janapadesu pabbājethāti**ādimhi pabbajjāpekkhaṃ kulaputtaṃ pabbājentena ye parato “na bhikkhave pañcahi ābādhehi phuṭṭho pabbājetabbo”tiādim katvā yāva “na andhamūgabadhiro pabbājetabbo”ti evaṃ paṭikkhittā puggalā, te vajjetvā pabbajjādosavirahito puggalo pabbājetabbo. Sopi ca mātāpitūhi anuññātōyeva. Tassa anujānanalakkhaṇaṃ “na bhikkhave ananuññāto mātāpitūhi putto pabbājetabbo, yo pabbājeyya, āpatti dukkaṭassā”ti etasmiṃ sutte vaṇṇayissāma.

Evaṃ pabbajjādosavirahitaṃ mātāpitūhi anuññātaṃ pabbājentenāpi ca sace acchinnakeso hoti, ekasīmāya ca aññepi bhikkhū atthi, kesacchedanattāya bhaṇḍukammaṃ āpucchitabbaṃ. Tassa āpucchanaṅkāraṃ “anujānāmi, bhikkhave, saṅghaṃ apaloketuṃ bhaṇḍukammāyā”ti ettha vaṇṇayissāma. Sace okāso hoti, sayam pabbājetabbo. Sace uddesaparipucchādīhi byāvaṭo hoti, okāsaṃ na labhati, eko daharabhikkhu vattabbo “etaṃ pabbājehi”ti. Avuttopi ce daharabhikkhu upajjhāyaṃ uddissa pabbājeti, vaṭṭati. Sace daharabhikkhu natthi, sāmaṇero pi vattabbo “etaṃ khaṇḍasīmaṃ netvā



pabbājetvā kāsāyāni acchādetvā ehī”ti. Saraṇāni pana sayamaṃ dātābbāni. Evaṃ bhikkhunāva pabbajito hoti. Purisañhi bhikkhuto añño pabbājetuṃ na labhati, mātugāmaṃ bhikkhunito añño. Sāmaṇero pana sāmaṇerī vā añattiyā kāsāyāni dātuṃ labhati. Kesoropanaṃ yena kenaci kataṃ sukataṃ.

Sace pana bhabbarūpo hoti sahetuko ñāto yasassī kulaputto, okāsaṃ katvāpi sayameva pabbājetabbo. “Mattikāmuṭṭhiṃ gahetvā nhāyitvā kese temetvā āgacchāhī”ti ca pana na vissajjetabbo. Pabbajitukāmānañhi paṭhamamaṃ balavaussāho hoti, pacchā pana kāsāyāni ca kesaharaṇasatthakañca disvā utrasanti, ettoyeva palāyanti, tasmā sayameva nahānatitthaṃ netvā sace nātidaharo hoti, “nahāhī”ti vattabbo. Kesā panassa sayameva mattikaṃ gahetvā dhovittabbā. Daharakumārako pana sayamaṃ udakaṃ otarivā gomayamattikāhi ghaṃsitvā nahāpetabbo. Sacepissa kacchu vā piḷakā vā honti, yathā mātā puttamaṃ na jigucchati, evameva ajjucchantena sādhuṃ hatthapādasīsāni ghaṃsitvā nahāpetabbo. Kasmā? Ettakena hi upakārena kulaputtā ācariyupajjhāyesu ca sāsane ca balavasinehā tibbagāravā anivattidhammā hontī, uppannaṃ anabhiratiṃ vinodetvā therabhāvaṃ pāpuṇanti, kataññū katavedīno hontī.

Evaṃ nahāpanakāle pana kesamassuṃ oropanakāle vā “tvaṃ ñāto yasassī, idāni mayaṃ taṃ nissāya paccayehi na kilamissāmā”ti na vattabbo, aññāpi aniyānikakathā na kathetabbā. Atha khvassa “āvuso, suṭṭhu upadhārehi satimaṃ upaṭṭhāpehī”ti vatvā tacapañcakakammaṭṭhānaṃ ācikkhitabbaṃ, ācikkhantena ca vaṇṇasaṅghānagandhāsavāsena asucijegucchapaṭikūlabhāvaṃ nijjīvanissattabhāvaṃ vā pākāṃ karontena ācikkhitabbaṃ. Sace hi so pubbe madditasāṅkhāro hoti bhāvitabhāvāno, kaṅṭhakavedhāpekkho viya paripakkagaṇḍo, sūriyuggamanāpekkhamaṃ viya ca pariṇatapaḍamaṃ, athassa āraddhamatte kammaṭṭhānāmanasikāre indāsani viya pabbate kilesapabbate cuṇṇayamānaṃyeva ñānaṃ pavattati, khuraggeyeva arahattaṃ pāpuṇāti. Ye hi keci khuragge arahattaṃ pattā, sabbe te evarūpaṃ savanaṃ labhitvā kalyāṇamittena ācariyena dinnanayaṃ nissāya no anissāya. Tasmāssa āditova evarūpī kathā kathetabbāti.

Kesesu pana oropitesu haliddicuṇṇena vā gandhacuṇṇena vā sīsañca sarīrañca ubbaṭṭetvā gihigandhaṃ apanetvā kāsāyāni tikkhattuṃ vā dvikkhattuṃ vā sakiṃ vā paṭiggāhetabbo. Athāpissa hatthe adatvā ācariyo vā upajjhāyo vā sayameva acchādeti, vaṭṭati. Sacepi aññaṃ daharaṃ vā sāmaṇeraṃ vā upāsakaṃ vā añāpeti “āvuso, etāni kāsāyāni gahetvā etaṃ acchādehī”ti taṃyeva vā añāpeti “etāni gahetvā acchādehī”ti sabbamaṃ vaṭṭati. Sabbamaṃ tena bhikkhunāva dinnamaṃ hoti.

Yaṃ pana nivāsanaṃ vā pārupanaṃ vā anāñattiyā nivāseti vā pārupati vā, taṃ apanetvā puna dātābbamaṃ. Bhikkhunā hi sahatthena vā añattiyā vā dinnameva kāsāvaṃ vaṭṭati, adinnaṃ na vaṭṭati, sacepi tasseva santakaṃ hoti, ko pana vādo upajjhāyamūlake! Ayaṃ **“paṭhamaṃ kesamassuṃ ohāretvā kāsāyāni vatthāni acchādāpetvā ekaṃsaṃ uttarāsaṅgaṃ kārāpetvā”**ti ettha vinicchayo.

**Bhikkhūnaṃ pāde vandāpetvāti** ye tattha sannipatitā bhikkhū, tesamaṃ pāde vandāpetvā; atha saraṇaggahaṇatthaṃ ukkuṭikaṃ nisīdāpetvā añjaliṃ paggaṇhāpetvā evamaṃ vadehīti vattabbo. “Yamahaṃ vadāmi, taṃ vadehī”ti vattabbo. Athassa upajjhāyena vā ācariyena vā “buddhaṃ saraṇaṃ gacchāmi”tiādinā nayena saraṇāni dātābbāni yathāvuttapaṭipāṭiyāva na uppaṭipāṭiyā. Sace hi ekapadampi ekakkharampi uppaṭipāṭiyā deti, buddhaṃ saraṇaṃyeva vā tikkhattuṃ datvā puna itaresu ekekaṃ tikkhattuṃ deti, adinnāni hontī saraṇāni.

Imaṃca pana saraṇagamanūpasampadaṃ paṭikkhipitvā anuññātaupasampadā ekato suddhiyā vaṭṭati. Sāmaṇerapabbajjā pana ubhatosuddhiyāva vaṭṭati, no ekato suddhiyā. Tasmā upasampadāya sace ācariyo ñāttidosañceva kammavācādosañca vajjetvā kammaṃ karoti, sukataṃ hoti. Pabbajjāya pana imāni tīṇi saraṇāni bukārādhakārādīnaṃ byañjanaṃ ṭhānakaraṇasampadaṃ ahāpenteneva ācariyenaṃpi antevāsikenāpi vattābbāni. Sace ācariyo vattuṃ sakkoti, antevāsiko na sakkoti; antevāsiko vā sakkoti, ācariyo na sakkoti; ubhopi vā na sakkonti, na vaṭṭati. Sace pana ubhopi sakkonti, vaṭṭati.

Imāni ca pana dadamānena “buddham saraṇaṃ gacchāmī”ti evaṃ ekasambandhāni anunāsikantāni vā katvā dātābbāni, “buddham saraṇaṃ gacchāmī”ti evaṃ vicchinditvā makārantāni vā katvā dātābbāni. **Andhakatṭhakathāyaṃ** nāmaṃ sāvetaṃ “ahaṃ bhante buddharakkhito yāvajīvaṃ buddham saraṇaṃ gacchāmī”ti vuttaṃ, taṃ ekaatṭhakathāyampi natthi, pāliyaṃ na vuttaṃ, tesam rucimattameva, tasmā na gahetabbaṃ. Na hi tathā avadantassa saraṇaṃ kuppātīti.

**Anujānāmi bhikkhave imehi tīhi saraṇagamanehi pabbajjaṃ upasampadanti** imehi buddham saraṇaṃ gacchāmītiādīhi evaṃ tikkhattuṃ ubhatosuddhiyā vuttehi tīhi saraṇagamanehi pabbajjañceva upasampadañca anujānāmīti attho. Tatha yasmā upasampadā parato paṭikkhattā, tasmā sā etarahi saraṇamatteneva na ruhati. Pabbajjā pana yasmā parato “anujānāmi, bhikkhave, imehi tīhi saraṇagamanehi sāmaṇerapabbajja”nti anuññātā eva, tasmā sā etarahipi saraṇamatteneva ruhati. Ettāvata hi sāmaṇerabhūmiyaṃ patitṭhito hoti.

Sace panesa matimā hoti paṇḍitajātiko, athassa tasmimyeva tṭhāne sikkhāpadāni uddisitābbāni. Kathaṃ? Yathā bhagavatā uddiṭṭhāni. Vuttañhetam –

“Anujānāmi, bhikkhave, sāmaṇeraṇaṃ dasa sikkhāpadāni, tesu ca sāmaṇerehi sikkhituṃ. Pāṇātipātā veramaṇī, adinnādānā veramaṇī, abrahmacariyā veramaṇī, musāvādā veramaṇī, surāmerayamajjapamādaṭṭhānā veramaṇī, vikālabhojanā veramaṇī, naccagītavādītavisūkadassanā veramaṇī, mālāgandhavilepanadhāraṇamaṇḍanavibhūsanatṭhānā veramaṇī, uccāsayanamahāsayanā veramaṇī, jātarūparajatapaṭiggahaṇā veramaṇī”ti (mahāva. 106).

Andhakatṭhakathāyaṃ pana “ahaṃ, bhante, itthannāmo yāvajīvaṃ pāṇātipātā veramaṇisikkhāpadaṃ

Samādiyāmī”ti evaṃ saraṇadānaṃ viya sikkhāpadaḍānampi vuttaṃ, taṃ neva pāliyaṃ na atṭhakathāsu atthi, tasmā yathāpāliyaṃ uddisitābbāni. Pabbajjā hi saraṇagamaneheva siddhā, sikkhāpadāni pana kevalaṃ sikkhāparipūraṇattham jānitābbāni. Tasmā tāni pāliyaṃ āgatanayena uggahetuṃ asakkontassa yāya kāyaci bhāsāya atthavasena pi ācikkhituṃ vaṭṭati. Yāva pana attanā sikkhitābbasikkhāpadāni na jānāti, saṅghātipattacīvaradhāraṇatṭhānanisajjādīsū pānabhojanādividhimhi ca na kusalo hoti, tāva bhojanasālaṃ vā salākabhājanatṭhānaṃ vā aññaṃ vā tathārūpatṭhānaṃ na pesetabbo, santikāvacaroyeva kātabbo, bāladārako viya paṭijaggitabbo, sabbamassa kappiyākappiyaṃ ācikkhitabbaṃ, nivāsanapārūpanādīsū ābhisamācārikesu vinetabbo. Tenāpi “anujānāmi, bhikkhave, dasahaṅgehi samannāgataṃ sāmaṇeraṃ nāsetu”nti (mahāva. 108) evaṃ parato vuttāni dasa nāsanaṅgāni ārakā parivajjetvā ābhisamācārikaṃ paripūrentena dasavidhe sīle sādhuṃ sikkhitābbanti.

Pabbajjākathā niṭṭhitā.

### Dutiyamārakathā

**35. Mayhaṃ kho bhikkhave**ti mayā khoti attho. Atha vā yo mayhaṃ yoniso manasikāro, tena hetunāti attho. Puna **anuppattāti** ettha vibhattiṃ pariṇāmetvā mayāti vattabbaṃ.

Dutiyamārakathā niṭṭhitā.

### Bhaddavaggiyakathā

**36. Bhaddavaggiyāti** te kira rājakumārā rūpena ca cittaṃ ca bhaddakā vaggabandhena ca vicaranti, tasmā “bhaddavaggiyā”ti vuccanti. **Tena hi voti** ettha vokāro nipātamatto. **Dhammacakkuṃ udapādīti** kesañci sotāpattimaggo, kesañci sakadāgāmimaggo, kesañci anāgāmimaggo udapādī. Tayopi hi ete maggā “dhammacakkhū”ti vuccanti. Te kira tuṇḍilajātaka tiṃsadhuttā ahesuṃ, atha tuṇḍilovādaṃ sutvā pañcasīlāni rakkhimsu; idaṃ nesaṃ pubbakammaṃ.

Bhaddavaggiyakathā niṭṭhitā.

### Uruvelapāṭihāriyakathā

37. **Pamukhoti** pubbaṅgamo. **Pāmokkhoti** uttamo visuddhapañño.

38. **Anupahaccāti** avināsetvā. **Tejasā tejanti** attano tejena nāgassa tejaṃ. **Pariyādiyeyyanti** abhibhaveyyaṃ, vināseyyaṃ vāti. **Makkhanti** kodhaṃ. **Natveva ca kho arahā yathā ahanti** attānaṃ “arahā aha”nti maññamāno vadati.

39. **Nerañjarāyaṃ bhagavāti**ādikā gāthāyo pacchā pakkhittā.

44-9. **Vissajjeyyanti** sukkhāpanatthāya pasāretvā ṭhapeyyanti attho. “Bhante āhara hattha”nti evaṃ vadanto viya oṇatoti **āharahattho**. **Uyyojetvāti** vissajjetvā. **Mandāmukhiyoti** aggibhājanāni vuccanti.

51. **Cirapaṭikāti** cirakālato paṭṭhāya.

52. **Kesamissanti**ādīsu kesā eva kesamissaṃ. Esa nayo sabbattha. **Khārikājanti** khāribhāro.

Uruvelapāṭihāriyakathā niṭṭhitā.

### Bimbisārasamāgamakathā

55. **Laṭṭhivaneti** tāluyyāne. **Suppatiṭṭhe cetiyeti** aññatarasmim vaṭarukkhe; tassa kiretaṃ nāmaṃ. **Dvādasanahutehīti** ettha ekaṃ nahutaṃ dasasahassāni. **Ajjhabhāsīti** tesam kaṅkhācchedanatthaṃ abhāsi.

**Kisakovadānoti** tāpasacariyāya kisasarīrattā “kisako”ti laddhanāmānaṃ tāpasānaṃ ovādako anusāsako samānoti attho. Atha vā sayam kisako tāpaso samāno vadāno ca aññe ovadanto anusāsantoti attho. **Kathaṃ pahīnanti** kena kāraṇena pahīnaṃ. Idaṃ vuttaṃ hoti – “tvaṃ uruvelavāsiaggiparicārakānaṃ tāpasānaṃ sayam ovādācariyo samāno kiṃ disvā pahāsi, pucchāmi taṃ etamatthaṃ kena kāraṇena tava aggihuttaṃ pahīna”nti.

Dutiyagāthāya ayamatto – ete rūpādike kāme itthiyo ca yaññā abhivadanti, svāhaṃ etaṃ sabbampi rūpādikaṃ kāmappabhedam khandhupadhīsu malanti ñatvā yasmā ime yitṭhahutappabhedā yaññā malameva vadanti, tasmā na yitṭhe na hute araṅgiṃ; yitṭhe vā hute vā nābhīraminti attho.

Tatīyagāthāya – **atha kocarahīti** atha kvacarahi. Sesam uttānameva.

Catutthagāthāya – **padanti** nibbānapadaṃ. Santasabhāvatāya **santaṃ**. Upadhīnaṃ abhāvena **anupadhikaṃ**. Rāgakiñcanādīnaṃ abhāvena **akiñcanaṃ**. Tīsu bhavesu alaggatāya yaṃ kāmabhavaṃ yaññā vadanti, tasmimpī kāmabhava asattaṃ. Jātijarāmarāṇānaṃ abhāvena **anaññathābhāviṃ**. Attanā bhāvitena maggeneva adhigantabbaṃ, na aññena kenaci adhigametabbanti **anaññaneyyaṃ**. Yasmā īdisaṃ padamaddasaṃ, tasmā na yitṭhe na hute araṅgiṃ. Tena kiṃ dasseti? Yo ahaṃ devamanussalokasampattisādhake na yitṭhe na hute araṅgiṃ, so kiṃ vakkhāmi “ettha nāma me devamanussaloke rato mano”ti.

56. Evaṃ sabbaloke anabhiratibhāvaṃ pakāsetvā atha kho āyasmā uruvelakassapo “sāvako hamasmī”ti evaṃ bhagavato sāvakabhāvaṃ pakāsesi. Tañca kho ākāse vividhāni pāṭihāriyāni

dassetvā. **Dhammacakkhanti** sotāpattimaggaññaṃ.

**57. Assāsakāti** āsānā; patthanāti attho. **Esāhaṃ bhanteti** ettha pana kiñcāpi maggappaṭivedhenevassa siddhaṃ saraṇagamaṇaṃ, tattha pana nicchayaḡamaṇameva gato, idāni vācāya attasanniyyātaṇaṃ karoti. Maggavasenevāyaṃ niyatasaraṇataṃ patto, taṃ paresaṃ vācāya pākaṭaṃ karonto paṇipātagamaṇaṇca gacchanta evaṃ vadati.

**58. Siṅgīnikkhasavaṇṇoti** siṅgīsuvavaṇṇanikkhena samānavaṇṇo. **Dasavāsoti** dasasu ariyavāsesu vutthavāso. **Dasadhammavidūti** dasakammapaṭhavidū. **Dasabhi cupetoti** dasahi asekkhehi aṅgehi upeto. **Sabbadhidantoti** sabbesu danto; bhagavato hi cakkhuādīsū kiñci adantaṃ nāma natthi.

**59. Bhagavantaṃ bhuttāviṃ onītapattapaṇiṃ ekamantaṃ nisīdīti** bhagavantaṃ bhuttavantaṃ pattato ca apanītapāṇiṃ sallakkhetvā ekasmiṃ padese nisīdīti attho. **Atthikānanti** buddhābhivādanagamaṇena ca dhammasavaṇena ca atthikānaṃ. **Abhikkamaṇīyanti** abhigantaṃ sakkuṇeyyaṃ. **Appākiṇṇanti** anākiṇṇaṃ. **Appasaddanti** vacanasaddena appasaddaṃ. **Appanigghosanti** nagaraṇigghosasaddena appanigghosaṃ. **Vijanaṇvātanti** anusaṇcaraṇajaṇassa sarīravātena virahitaṃ. “Vijanaṇvāda”ntipi pāṭho; anto jaṇavaṇdena rahitanti attho. “Vijanaṇpāta”ntipi pāṭho; jaṇasaṇcāravirahitanti attho. **Manussarāhaseyyakanti** manussaṇaṃ rahassa kiriyatṭhāṇiyaṃ. **Paṭisallānaṇsaruppanti** vivekānurūpaṃ.

Vimvisārasamaḡamakathā niṭṭhitā.

### Sāriputtamoggallānapabbajjākathā

**60. Sāriputtamoggallānāti** sāriputto ca moggallāno ca. **Tehi katikā katā hoti “yo paṭhamaṃ amataṃ adhigacchati, so ārocetū”**ti te kira ubhopi gihikāle upatisso kolitoti evaṃ paṇṇāyaṃ mānaṇāmaṃ aḍḍhateyyasataṃ māṇavaḡaparivārā giraggaṇsamaḡjaṃ aḡamaṃsu. Tatra nesaṃ mahājaṇaṃ disvā etadaḡosi – “ayaṃ nāma evaṃ mahāsattaniḡāyo appatte vassasate maraṇaṃ mukhe patissati”ti. Atha ubhopi utṭhitāya paṇisāya aṇṇamaṇṇaṃ pucchitvā ekajjhāsayā paccupaṭṭhitamaṇasaṇṇā sammantaḡiyaṃsu “samma maraṇe sati amataṇeḡpi bhavitabbaṃ, handa mayaṃ amataṃ pariyesāma”ti amataḡariyesanattaṃ saṇcayassa channaḡariḡbbājakassa santike saḡarisā pabbajitvā katipaḡheneva tassa ṇṇaṇvisaye pāraṃ gantvā amataṃ aḡassantaḡ pucchimaṃsu “kiṃ nu kho, ācariya, aṇṇopettha sāro atthi”ti? “Natthāvuso, ettakameva ida”nti ca sutvā “tucchaṃ idaṃ āvuso nissāraṃ, yo dāni amhesu paṭhamaṃ amataṃ adhigacchati, so itarassa ārocetū”ti katikaṃ akaṃsu. Tena vuttaṃ – “tehi katikā katā hoti”tiādi.

**Pāsādikena abhikkantaṇeḡtiādīsū** itthambhūtalakkaḡaṇe karaṇavaḡanaṃ veditabbaṃ. **Atthikehi upaṇṇātaṃ maggaṇti** etaṃ anubandhanaṇsa kāraṇavaḡanaṃ; idaṇṇhi vuttaṃ hoti – “yaṃ nūnāhaṃ imaṃ bhikkhuṃ piṭṭhito piṭṭhito anubandheyyaṃ, kasmā? Yasmā idaṃ piṭṭhito piṭṭhito anubandhanaṃ nāma atthikehi upaṇṇātaṃ maggaṃ ṇṇāto ceva upagato ca maggaḡ”ti attho. Atha vā atthikehi amhehi “maraṇe sati amataṇeḡpi bhavitabba”nti evaṃ kevalaṃ atthiṇti upaṇṇātaṃ nibbānaṃ nāma, taṃ maggaṇto pariyesantoti evampettha attho daṭṭhabbo.

**Piṇḡapātaṃ ādāya paṭikkamīti** sudinnakaṇḡe vuttappaḡāraṃ aṇṇataraṃ kuṭṭamūlaṃ upasaṇkamitvā nisīdi. Sāriputtopi kho “akālo kho tāva paṇṇhaṃ pucchitu”nti kālaṃ āḡamayamaṇo ekamantaṃ ṭhatvā vattaḡaṭipattipaṇaṇattaṃ katabhattakiccassa therassa attano kamaṇḡaluto udakaṃ datvā dhotahattaḡapādena therena saddhiṃ paṭisaṇthāraṃ katvā paṇṇhaṃ pucchi. Tena vuttaṃ – “atha kho sāriputto paṇṇibbājako”tiādi. **Na tāhaṃ sakkomīti** na te ahaṃ sakkomi. Ettha ca paṭisaṃbhidaḡappatto thero na ettaḡaṃ na sakkoti. Atha kho imassa dhammaḡāraṃ uppaḡadessaṃmīti sabbākārena buddhavisaye avisayabhāvaṃ gaḡetvā evamaḡa.

**Ye dhammā hetuppabhavāti** hetuppabhavā nāma pañcakkhandhā; tenassa dukkhasaccaṃ dasseti. **Tesaṃ hetuṃ tathāgato āhāti** tesaṃ hetu nāma samudayasaccaṃ; tañca tathāgato āhāti dasseti. **Tesañca yo nirodhoti** tesaṃ ubhinnampi saccānaṃ yo appavattinirodho; tañca tathāgato āhāti attho. Tenassa nirodhasaccaṃ dasseti. Maggasaccaṃ panettha sarūpato adassitampi nayato dassitaṃ hoti, nirodhe hi vutte tassa sampāpako maggo vuttova hoti. Atha vā **tesañca yo nirodhoti** ettha tesaṃ yo nirodho ca nirodhupāyo cāti evaṃ dvepi saccāni dassitāni hontūti. Idāni tamevatthaṃ paṭipādentō āha – “**evaṃvādī mahāsamaṇo**”ti.

**Eseva dhammo yadi tāvadevāti** sacepi ito uttari natthi, ettakameva idaṃ sotāpattiphalamattameva pattabbaṃ, tathāpi eso eva dhammoti attho. **Paccabyattha padamasokanti** yaṃ mayāṃ pariyesamānā vicarāma, taṃ padamasokaṃ paṭividdhāttha tumhe; pattaṃ taṃ tumhehīti attho. **Adiṭṭhaṃ abbhātitaṃ bahukehi kappanahutehīti** amhehi nāma idaṃ padaṃ bahukehi kappanahutehi adiṭṭhameva abbhātitaṃ; itī tassa padassa adiṭṭhabhāvena dīgharattaṃ attano mahājānibhāvaṃ dīpeti.

**62. Gambhīre ñāṇavisayeti** gambhīre ceva gambhīrassa ca ñāṇassa visayabhūte. **Anuttare upadhisañkhayeti** nibbāne. **Vimutteti** tadārammaṇāya vimuttiyā vimutte. **Byākāsīti** “etaṃ me sāvakaṃ bhavissati aggaṃ bhaddayuga”nti vadanto sāvakaṃ pāramiññāṇe byākāsī. **Sāva tesaṃ āyasmantānaṃ upasampadā ahoṣīti** sā ehibhikkhūpasampadāyeva tesaṃ upasampadā ahoṣi. Evaṃ upasampannesu ca tesu mahāmoggallānatthero sattahi divasehi arahatte patiṭṭhito, sārīputtatthero aḍḍhamāseṇa.

Atīte kira anomadassī nāma buddho loke udapādi. Tassa sarado nāma tāpaso sake assame nānāpupphehi maṇḍapaṃ katvā pupphāsaneveva bhagavantaṃ nisīdāpetvā bhikkhusaṅghassa tatheva maṇḍapaṃ katvā pupphāsānāni paññāpetvā aggasāvakaḥ bhāvaṃ patthesi. Patthayitvā ca sirīvaḍḍhassa nāma seṭṭhino pesesi “mayā aggasāvakaṭṭhānaṃ patthitaṃ, tvampi āgantvā ekaṃ ṭhānaṃ patthehi”ti. Seṭṭhi nīluppalamaṇḍapaṃ katvā buddhappamukhaṃ bhikkhusaṅghaṃ, tattha bhojetvā dutiyasāvakaḥ bhāvaṃ patthesi. Tesu saradatāpaso sārīputtatthero jāto, sirīvaḍḍho mahāmoggallānattheroti idaṃ nesaṃ pubbakammaṃ.

**63. Aputtakatāyāti**ādīsu yesaṃ puttā pabbajanti, tesaṃ aputtakatāya. Yāsaṃ patī pabbajanti, tāsaṃ vedhabyāya vidhavābhāvāya. Ubhayenāpi **kulupacchedāya. Sañcayānīti** sañcayassa antevāsikāni. **Magadhānaṃ giribajanti** magadhānaṃ janapadassa giribajāṃ nagaraṃ. **Mahāvīrāti** mahāvīriyavanto. **Nayamānānanti** nayamānesu. Bhummatthe sāmivacanaṃ, upayogatthe vā. **Kā usūyā vijānatanti** dhammena nayantīti evaṃ vijānantānaṃ kā issā.

Sārīputtamoggallānapabbajjākathā niṭṭhitā.

### Upajjhāyavattakathā

**64-5. Anupajjhāyakāti** vajjāvajjaṃ upanijjhāyakena garuṇā virahitā. **Anākappasampannāti** na ākappena sampannā; samaṇasārūppacāravirahitāti attho. **Uparibhojaneti** bhojanassa upari. **Uttiṭṭhapattanti** piṇḍāya caraṇakapattaṃ. Tasmīñhi manussā ucchiṭṭhasaññino, tasmā uttiṭṭhapattanti vuttaṃ. Atha vā utṭhahitvā pattaṃ upanāmentīti evampettha attho daṭṭhabbo. **Anujānāmi bhikkhave upajjhāyanti** upajjhāyaṃ gahetaṃ anujānāmīti attho. **Puttacittaṃ upaṭṭhapessatīti** putto me ayanti evaṃ gehassitapemavasena cittaṃ upaṭṭhapessati. Esa nayo dutiyapadepi. **Sagāravā sappatissāti** garubhāvañceva jeṭṭhakabhāvañca upaṭṭhapetvā. **Sabhāgavuttinoti** sabhāgajīvika. **Sāhūti vāti**ādīni pañca padāni upajjhāyabhāvasampaṭicchanavevacanāni. **Kāyena viññāpetīti** evaṃ saddhivihārikena “upajjhāyo me bhante hohī”ti tikkhattuṃ vutte sace upajjhāyo “sāhū”tiādīsu pañcasu padesu yassa kassaci padassa vasena kāyena vā vācāya vā kāyavācāhi vā “gahito tayā upajjhāyo”ti upajjhāyaggahaṇaṃ viññāpeti, gahito hoti upajjhāyo. Idameva hi ettha upajjhāyaggahaṇaṃ, yadidaṃ upajjhāyassa imesu pañcasu padesu yassa kassaci padassa vācāya vā sāvanaṃ kāyena vā

atthaviññāpananti. Keci pana sādūhi sampatičchanam sandhāya vadanti. Na tam pamānam, āyācanadānamattena hi gahito hoti upajjhāyo, na ettha sampatičchanam aṅgam. Saddhivihārikenāpi na kevalam iminā me padena upajjhāyo gahitoti nātum vaṭṭati. “Ajjatagge dāni therō mayham bhāro, ahampi therassa bhāro”ti idampi nātum vaṭṭati.

**66. Tatrāyam sammāvattanāti** yam vuttam sammā vattitabbanti, tatra ayam sammāvattanā. **Kālasseva uṭṭhāya upāhanā omūñcitvāti** sacassa paccūsakāle caṅkamanatthāya vā dhotapādapariharatthāya vā paṭimukkā upāhanā pādakatā honti, tā kālasseva uṭṭhāya apantvā. **Dantakaṭṭham dātābbanti** mahantam majjhimam khuddakanti tīni dantakaṭṭhāni upantvā tato yam tīni divasāni gaṇhāti, catutthadivasato paṭṭhāya tādīsameva dātābbam. Sace aniyamam katvā yam vā tam vā gaṇhāti, atha yādīsam labhati tādīsam dātābbam.

**Mukhodakam dātābbanti** sītañca uṇhañca udakam upantvā tato yam tīni divasāni vaḷaṇjeti, catutthadivasato paṭṭhāya tādīsameva mukhadhovanodakam dātābbam. Sace aniyamam katvā yam vā tam vā gaṇhāti, atha yādīsam labhati tādīsam dātābbam. Sace duvidhampi vaḷaṇjeti, duvidhampi upantābbam. Udakam mukhadhovanatthāne ṭhapetvā vaccakuṭito paṭṭhāya sammajjitābbam. There vaccakuṭim gate pariveṇam sammajjitābbam; evam pariveṇam asuññam hoti. There vaccakuṭito anikkhanteyeva āsanam paññāpetābbam. Sarīrakiccam katvā āgantvā tasmim nisinnassa “**sace yāgu hoti**”tiādīnā nayena vuttavattam kātābbam. **Uklāpoti** kenaci kacavarena saṅkiṇṇo, sace pana añño kacavaro natthi, udakaphusitāneva honti, hatthenapi pamajjitābbo.

**Sagaṇam katvāti** dve cīvarāni ekato katvā, tā ekato katā dvepi saṅghāṭiyo dātābbā. Sabbañhi cīvaram saṅghāṭitattā “saṅghāṭi”ti vuccati. Tena vuttam – “saṅghāṭiyo dātābbā”ti. **Nātidūre gantābbam nāccāsanneti** ettha sace upajjhāyam nivattitvā oloketam ekena vā dvīhi vā padavītiḥārehi sampāpuṇāti, ettāvata nātidūre nāccāsanne gato hotīti veditābbam. **Pattapariyāpanam paṭiggahetābbanti** sace upajjhāyena bhikkhācāre yāguyā vā bhatte vā laddhe patto uṇho vā bhāriko vā hoti, attano pattam tassa datvā so patto gahetābboti attho. **Na upajjhāyassa bhaṇamānassa antarantarā kathā opātetābbāti** antaraghare vā aññatra vā bhaṇamānassa anīṭṭhite tassa vacane aññā kathā na samuṭṭhāpetābbā. Ito paṭṭhāya ca pana yattha yattha nakārena paṭisedho kariyati, sabbattha dukkaṭāpatti veditābbā. Ayañhi khandhakadhammatā. **Āpattisāmantā bhaṇamānoti** padasodhammaduṭṭhullādivasena āpattiyā āsannavācam bhaṇamāno. **Nivāretābboti** “kiṃ bhante īdisam nāma vattum vaṭṭati, āpatti na hoti”ti evam pucchanta viya vāretābbo. Vāressāmīti pana katvā “mahallaka, mā evam bhaṇā”ti na vattābbo.

**Paṭhamataram āgantvāti** sace āsanne gāmo hoti, vihāre vā gilāno bhikkhu hoti, gāmato paṭhamataram āgantābbam. Sace dūre gāmo hoti, upajjhāyena saddhim āgacchanto natthi, teneva saddhim gāmato nikkhamitvā cīvarena pattam veṭhetvā antarāmaggato paṭhamataram āgantābbam. Evam nivattantena paṭhamataram āgantvā āsanapaññāpanādi sabbam kiccaṃ kātābbam. **Sinnam hotīti** tintam sedaggahitam. **Caturaṅgulaṃ kaṇṇam ussāretvāti** kaṇṇam caturaṅgulappamānam atirekam katvā evam cīvaram saṃharitābbam. Kiṃ kāraṇā? **Mā majjhe bhaṅgo ahoṣīti**. Samam katvā saṃharitassa hi majjhe bhaṅgo hoti, tato niccam bhijjamānam dubbalam hoti tam nivāranatthametam vuttam. Tasmā yathā ajja bhaṅgaṭṭhāneyeva sve na bhijjati, tathā divase divase caturaṅgulaṃ ussāretvā saṃharitābbam. **Obhoge kāyabandhanam kātābbanti** kāyabandhanam saṃharitvā cīvarabhoge pakkhipitvā ṭhapetābbam.

**Sace piṇḍapāto hotīti** ettha yo gāmeyeva vā antaraghare vā paṭikkamane vā bhuñjitvā āgacchati, piṇḍam vā na labhati, tassa piṇḍapāto na hoti, gāme abhuttassa pana laddhabhikkhassa vā hoti; tasmā “sace piṇḍapāto hoti”tiādī vuttam. Sacepi tassa na hoti, bhuñjitukāmo ca hoti, udakam datvā attanā laddhatopi piṇḍapāto upantābbo. **Pānīyena pucchitābboti** bhuñjamāno tikkhattum “pānīyam bhante āhariyatū”ti pānīyena pucchitābbo. Sace kālo atthi, upajjhāye bhutte sayam bhuñjitābbam. Sace upakaṭṭho kālo, pānīyam upajjhāyassa santike ṭhapetvā sayampi bhuñjitābbam.

**Anantarahitāyāti** taṭṭikadhammakhaṇḍādīsu yena kenaci anattatāya paṃsusakkharamissāya bhūmiyā pattho na ṭhapetabboti attho. Sace pana kāḷavaṇṇakatā vā sudhābaddhā vā hoti nirajamattikā, tathārūpāya bhūmiyā ṭhapetuṃ vaṭṭati. Dhotavālikāyapi ṭhapetuṃ vaṭṭati. Paṃsurajasakkharādīsu na vaṭṭati. Tatra pana paṇṇaṃ vā ādhāraṃ vā ṭhapetvā tatra nikkhipitabbo. **Pārato antaṃ orato bhoganti** idaṃ cīvaravaṃsādīnaṃ heṭṭhā hatthaṃ pavesetvā abhimukhena hatthena saṅkaṃ nikkhipanattaṃ vuttam. Ante pana gahetvā bhogena cīvaravaṃsādīnaṃ upari nikkhipantassa bhittiyaṃ bhogo paṭihaññati, tasmā tathā na kātabbam.

**Cuṇṇaṃ sannetabbanti** nhānacūṇṇaṃ udakena temetvā piṇḍi kātabbā. **Ekamantaṃ nikkhipitabbanti** ekasmiṃ niddhūme ṭhāne ṭhapetabbam. Jantāghare parikammaṃ nāma aṅgaramattikaṃhodakadānādikaṃ sabbaṃ kiccaṃ. **Udakepi parikammanti** aṅgapaccāṅgahaṃsanādikaṃ sabbaṃ kiccaṃ. **Pāṇiyena pucchitabboti** jantāghare uṇhasantāpena pipāsā hoti, tasmā pucchitabbo.

**Sace ussahatīti** sace pahoti; na kenaci gelaññena abhibhūto hoti; agilānena hi saddhivihārikena saṭṭhivassenāpi sabbaṃ upajjhāyavattaṃ kātabbam, anādarena akarontassa vattabhede dukkaṭam. Nakārapaṭisaṃyuttesu pana padesu gilānassāpi paṭikkhittakiriyaṃ karontassa dukkaṭameva. **Appaṭighaṃsantenāti** bhūmiyaṃ appaṭighaṃsantena. **Kavāṭapiṭṭhanti** kavāṭaṅca piṭṭhasaṅghātaṅca acchupantena. **Santānakanti** yaṃkiñci kīṭakulāvakamakkaṭakasuttādi. **Ullokā paṭhamam ohāretabbanti** ullokato paṭhamam ullokaṃ ādiṃkatvā avaharitabbanti attho. **Ālokasandhikaṇṇabhāgāti** ālokasandhibhāgā ca kaṇṇabhāgā ca antarabāhiravātapānakavāṭakāni ca gabbhassa ca cattāro koṇā pamajjitabbāti attho.

**Yathāpaññattaṃ paññapetabbanti** yathā paṭhamam paññattaṃ ahosi, tatheva paññapetabbam. Etadatthameva hi yathāpaññattaṃ sallakkhetvā nīharitvā ekamantaṃ nikkhipitabbanti purimavattaṃ paññattaṃ. Sace pana paṭhamam aṅjanantena kenaci paññattaṃ ahosi, samantato bhittim dvaṅgulamattena vā tivaṅgulamattena vā mocetvā paññapetabbam. Idañhi paññāpanavattaṃ. Sace kaṭasārako hoti atimahanto ca, chinditvā koṭim nivattetvā bandhitvā paññapetabbo. Sace koṭim nivattetvā bandhituṃ na jānāti, na chinditabbo. **Puratthimā vātapānā thaketabbāti** puratthimāya vātapānā thaketabbā. Evaṃ sesāpi vātapānā thaketabbā.

**Vūpakāsetabboti** aññattha netabbo. **Vūpakāsetabboti** añño bhikkhu vattabbo “theraṃ gahetvā aññattha gacchā”ti **vivecetabbanti** vissajjāpetabbam. **Vivecāpetabbanti** añño vattabbo “theraṃ diṭṭhigataṃ vissajjāpehī”ti. **Ussukkaṃ kātabbanti** parivāsādānatthaṃ so so bhikkhu upasaṅkamitvā yācitabbo. Sace attanā paṭibalo hoti, attanāva dātabbo. No ce paṭibalo hoti, aññena dāpetabbo. **Kinti nu khoti** kena nu kho upāyena. Esa nayo sabbattha. **Lahukāya vā pariṇāmeyyāti** ukkhepanīyaṃ akatvā tajjanīyaṃ vā niyassaṃ vā kareyyāti attho. Tena hi “upajjhāyassa ukkhepanīyakammaṃ kattukāmo saṅgho”ti ñatvā ekamekaṃ bhikkhuṃ upasaṅkamitvā “mā bhante amhākaṃ upajjhāyassa kammaṃ karitthā”ti yācitabbā. Sace karontiyeva, “tajjanīyaṃ vā niyassaṃ vā karothā”ti yācitabbā. Sace karontiyeva, atha upajjhāyo “sammā vattatha bhante”ti yācitabbo. Iti taṃ sammā vattāpetvā “paṭippassambhetha bhante kamma”nti bhikkhū yācitabbā.

**Samparivattakaṃ samparivattakanti** samparivattetvā samparivattetvā. **Na ca acchinne theve pakkamitabbanti** yadi appamattakampi rajanaṃ gaḷati, na tāva pakkamitabbam. **Na upajjhāyaṃ anāpucchā ekaccassa patto dātabboti**ādi sabbaṃ upajjhāyassa visabhāgapuggalavasena kathitaṃ. **Na upajjhāyaṃ anāpucchā gāmo pavisitabboti** piṇḍāya vā aññena vā karaṇīyena pavisitukāmena āpucchitvāva pavisitabbo. Sace upajjhāyo kālasseva vuṭṭhāya dūraṃ bhikkhācāraṃ gantukāmo hoti, “daharā piṇḍāya pavasantū”ti vatvā gantabbam. Avatvā gate pariveṇaṃ gantvā upajjhāyaṃ apassantena gāmaṃ pavisituṃ vaṭṭati. Sace gāmaṃ pavisantopi passati, diṭṭhatthānato paṭṭhāya āpucchitūmyeva vaṭṭati.

Na **susānaṃ gantabbanti** vāsathāya vā dassanathāya vā na gantabbaṃ. Na **disā pakkamitabbāti** ettha pakkamitukāmena kammaṃ ācikkhitvā yāvatiyaṃ yācitabbo. Sace anujānāti, sādhu; no ce anujānāti, taṃ nissāya vasato cassa uddeso vā paripucchā vā kammaṭṭhānaṃ vā na sampajjati, upajjhāyo bālo hoti abyatto, kevalaṃ attano santike vasāpetukāmatāya eva gantuṃ na deti, evarūpe nivārentepi gantuṃ vaṭṭati. **Vuṭṭhānamassa āgametabbanti** gelaññato vuṭṭhānaṃ assa āgametabbā; na katthaci gantabbaṃ. Sace añño bhikkhu upaṭṭhāko atthi, bhesajjaṃ pariyesitvā tassa hatthe datvā “bhante ayaṃ upaṭṭhahissatī”ti vatvā gantabbaṃ.

Upajjhāyavattakathā niṭṭhitā.

### Saddhivihārikavattakathā

67. Upajjhāyena saddhivihārikamhi sammāvattanāyaṃ – **saṅgahetabbo anuggahetabboti** uddesādīhissa saṅgaho ca anuggaho ca kattabbo. Tattha **uddesoti** pālivācanaṃ. **Paripucchāti** pāliya atthavaṇṇanā. **Ovādoti** anotiṇṇe vatthusmiṃ “idaṃ karohi, idaṃ mā karitthā”ti vacanaṃ. **Anusāsanīti** otiṇṇe vatthusmiṃ. Api ca otiṇṇe vā anotiṇṇe vā paṭhamāṃ vacanaṃ ovādo; punappunaṃ vacanaṃ anusāsanīti. **Sace upajjhāyassa patto hotīti** sace atirekapatto hoti. Esa nayo sabbattha. **Parikkhāroti** aññopi samaṇaparikkhāro. Idha ussukkaṃ nāma dhammikenā nāyena uppajjamānaupāyapariyesanaṃ. Ito paraṃ dantakaṭṭhadānaṃ ādiṃ katvā ācamaṇakumbhiyā udakāsiñcanapariyosānaṃ vattaṃ gilānasseva saddhivihārikassa kātabbaṃ. Anabhirativūpakāsanaṃ pana agilānassāpi kattabbameva. **Cīvaraṃ rajantenāti** “evaṃ rajeyyāsī”ti upajjhāyato upāyaṃ sutvā rajantena. Sesāṃ vuttanayeneva vedītabbaṃ.

Saddhivihārikavattakathā niṭṭhitā.

### Nasammāvattanādīkathā

68. Na **sammā vattantīti** yathāpaññattaṃ upajjhāyavattaṃ na pūrenti. **Yo na sammā vatteyyāti** yo yathāpaññattaṃ vattaṃ na pūreyya; so dukkaṭaṃ āpajjati attho. **Paṇāmetabboti** apasādetabbo. Na **adhimattaṃ pemaṃ hotīti** upajjhāyamhi adhimattaṃ gehassitapemaṃ na hoti. **Nādhimattā bhāvanā hotīti** adhimattā mettābhāvanā na hoti; vuttapaṭipakkhanayena sukkapakkho vedītabbo. **Alaṃ paṇāmetunti** yutto paṇāmetuṃ.

**Appaṇāmento upajjhāyo sātisāro hotīti** sadoso hoti, āpattiṃ āpajjati; tasmā na sammā vattanto paṇāmetabbova. Na sammāvattanāya ca yāva cīvararajanaṃ tāva vatte akariyamāne upajjhāyassa parihāni hoti. Tasmā taṃ akarontassa nissayamuttakassāpi amuttakassāpi āpattiyeva. Ekaccassa pattadānato paṭṭhāya amuttakanissayasseva āpatti.

Saddhivihārikā sammā vattanti, upajjhāyo sammā na vattati, upajjhāyassa āpatti. Upajjhāyo sammā vattati, saddhivihārikā sammā na vattanti, tesāṃ āpatti. Upajjhāye vattaṃ sādiyante saddhivihārikā bahukāpi honti, sabbesaṃ āpatti. Sace upajjhāyo “mayhaṃ upaṭṭhāko atthi, tumhe attano sajjhāyamanasikārādīsu yogaṃ karoṭhā”ti vadati, saddhivihārikānaṃ anāpatti. Sace upajjhāyo sādiyaṇaṃ vā asādiyaṇaṃ vā na jānāti, bālo hoti, saddhivihārikā bahukā. Tesu eko vattasampanno bhikkhu “upajjhāyassa kiccaṃ ahaṃ karissāmi, tumhe appossukkā viharathā”ti evañce attano bhāraṃ katvā itare vissajjeti, tassa bhāraṇato paṭṭhāya tesāṃ anāpatti.

Nasammāvattanādīkathā niṭṭhitā.

### Rādhabrāhmaṇavattukathā

69. **Rādhabrāhmaṇavattusmiṃ** – kiñcāpi āyasmā sārīputto bhagavatā bārāṇasiyaṃ tīhi



saraṇagamaṇehi anuññātaṃ pabbajjañceva upasampadañca jānāti, bhagavā pana taṃ lahukaṃ upasampadaṃ paṭikkhipitvā ñatticatutthakammena garukaṃ katvā upasampadaṃ anuññātukāmo. Athassa therō ajjhāsayaṃ viditvā “kathāhaṃ bhante taṃ brāhmaṇaṃ pabbājemi upasampādemī”ti āha. Buddhānañhi parisā ajjhāsayaṃkusalā honti, ayañca buddhapaṇisāya aggo.

**Byattena bhikkhunā paṭibalenāti** ettha byatto nāma yassa sātthakathaṃ vinayaṇṭakamaṃ vācuggataṃ pavattati, tasmim̄ asati yassa antamaso idaṃ ñatticatutthakammavācāmattampi suggahitaṃ hoti, vācuggataṃ pavattati, ayampi imasmim̄ atthe **byatto**. Yo pana kāsasosaseṃhādīnā vā gelaññena oṭṭhadantajivhādīnaṃ vā asampattiyā pariyaṭṭiyaṃ vā akataparicayattā na sakkoti parimaṇḍalehi padabyañjanehi kammavācaṃ sāvetuṃ, byañjanaṃ vā padaṃ vā hāpeti, aññathā vā vattabbaṃ aññathā vadati, ayaṃ **appaṭibalo**. Tabbiparīto imasmim̄ atthe “paṭibalo”ti veditaṃ. **Saṅgho ñāpetabboti** saṅgho jānāpetabbo. Tato paraṃ yaṃ saṅgho jānāpetabbo, taṃ dassetuṃ “suṇātu me bhante”tiādimāha.

**71. Upasampannasamanantarāti** upasampanno hutvā samanantarā. **Anācāraṃ ācaratīti** paṇṇattivītikkaṃ karoti. **Ullumpatu manti** uddharatu maṃ, akusalā vuṭṭhāpetvā kusale paṭiṭṭhapetu; sāmaṇerabhāvā vā uddharitvā bhikkhubhāve paṭiṭṭhāpetūti. **Anukampaṃ upādāyāti** anuddayaṃ paṭicca; mayi anukampaṃ katvāti attho.

**73. Aṭṭhitā hotīti** niccappavattinī hoti. **Cattāro nissayeti** cattāro paccaye. Yasmā cattāro paccaye nissāya attabhāvo pavattati, tasmā te nissayāti vuccanti.

Rādhabrāhmaṇavattukathā niṭṭhitā.

### Ācariyavattakathā

**75. Kintāyaṃ bhikkhu hotīti** kiṃ te ayaṃ bhikkhu hoti. **Aññehi ovadiyo anusāsiyoti** aññehi ovaditaṃ ceva anusāsitaṃ ca. **Bāhullāya āvatto yadidaṃ gaṇabandhikanti** gaṇabandho etassa bāhullassa atthīti gaṇabandhikaṃ, bāhullaṃ. Yaṃ idaṃ gaṇabandhikaṃ nāma bāhullaṃ, tadatthāya atilahaṃ tvaṃ āpannoti vuttaṃ hoti.

**76. Abyattāti** paññāveyyattiyena virahitā. **Aññattaropi aññatitthiyapubboti** pasūro paribbājako. So kira “dhammaṃ thenessāmī”ti udāyittherassa santike pabbajitvā tena sahadhammikaṃ vuccamāno tassa vādaṃ āropesi. **Anujānāmi bhikkhave byattena bhikkhunāti**ādimhi byatto pubbe bhikkhunovādakavaṇṇanāyaṃ vuttalakkhaṇoyeva. Yo pana antevāsino vā saddhivihārikassa vā gilānassa sakkoti upaṭṭhānādīni kātuṃ, ayaṃ idha paṭibaloti adhippeto. Vuttampi cetam̄ –

“Pañcahupāli, aṅgehi samannāgatena bhikkhunā upasampādetabbaṃ, nissayo dātabbo, sāmaṇero upaṭṭhāpetabbo. Katamehi pañcahi? Paṭibalo hoti antevāsim̄ vā saddhivihāriṃ vā gilānaṃ upaṭṭhātuṃ vā upaṭṭhāpetuṃ vā, anabhirataṃ vūpakāsetuṃ vā vūpakāsāpetuṃ vā, uppannaṃ kukkuccaṃ dhammato vinodetuṃ, abhidhamme vinetuṃ, abhivinaye vinetū”nti (pari. 418).

**77. Pakkhasaṅkantesūti** titthiyapakkhasaṅkantesu. **Anujānāmi bhikkhave ācariyanti** ācārasamācārasikkhāpanakaṃ ācariyaṃ anujānāmi. **Ācariyo bhikkhave antevāsikamhīti**ādi sabbam̄ “upajjhāyo bhikkhave saddhivihārikamhī”tiādinā nayena vuttavaseneva veditaṃ. Nāmamattameva hi ettha nānaṃ.

Ācariyavattakathā niṭṭhitā.

### Paṇāmanākhamaṇākaṭṭhā

**80. Antevāsikā ācariyesu na sammā vattantīti** ettha pana yaṃ pubbe “nasammāvattanāya ca yāva cīvararajanam, tāva vatte akariyamāne upajjhāyassa parihāni hoti, tasmā taṃ akarontassa nissayamuttakassāpi amuttakassāpi āpattiyeva”ti ca, “ekaccassa pattadānato paṭṭhāya amuttakanissayasessa āpatti”ti ca lakkhaṇam vuttaṃ, na teneva lakkhaṇena nissayantevāsikassa āpatti veditabbā. Nissayantevāsikena hi yāva ācariyaṃ nissāya vasati, tāva sabbaṃ ācariyavattaṃ kātabbaṃ. Pabbajjāupasampadādhammantevāsikehi pana nissayamuttakehipi ādito paṭṭhāya yāva cīvararajanam, tāva vattaṃ kātabbaṃ; anāpucchitvā pattadānādīmhi pana etesaṃ anāpatti. Etesu ca pabbajjantevāsiko ca upasampadantevāsiko ca ācariyassa yāvajīvaṃ bhāro. Nissayantevāsiko ca dhammantevāsiko ca yāva samīpe vasanti, tāvadeva. Tasmā ācariyenāpi tesu sammā vattitabbaṃ. Ācariyantevāsikesu hi yo yo na sammā vattati, tassa tassa āpatti.

Paṇāmanākhamaṇā kathā niṭṭhitā.

### Nissayapaṭippassaddhikathā

**83. Upajjhāyamhā nissayapaṭippassaddhīsu – upajjhāyo pakkanto vātiādīsu** ayaṃ vinicchayo – **pakkantoti** tamhā āvāsā vippavasitukāmo pakkanto disaṃ gato. Evaṃ gate ca pana tasmim sace vihāre nissayadāyako atthi, yassa santike aññadāpi nissayo vā gahitapubbo hoti, yo vā ekasambhogaparibhogo, tassa santike nissayo gahetabbo, ekadivasampi parihāro natthi. Sace tādiso natthi, añño lajjī pesalo atthi, tassa lajjīpesalabhāvaṃ jānantena tadaheva nissayo yācitabbo. Sace deti, iccetam kusalam. Atha pana “tumhākaṃ upajjhāyo lahuṃ āgamissati”ti pucchati, upajjhāyena ca tathā vuttaṃ, “āma, bhante”ti vattabbaṃ. Sace vadati “tena hi upajjhāyassa āgamaṇam āgamethā”ti vaṭṭati. Atha panassa pakatiyā pesalabhāvaṃ na jānāti, cattāri pañca divasāni tassa bhikkhuno sabhāgataṃ oloketvā okāsaṃ kāretvā nissayo gahetabbo.

Sace pana vihāre nissayadāyako natthi, upajjhāyo ca “ahaṃ katipāhena āgamissāmi, mā ukkaṇṭhitthā”ti vatvā gato, yāva āgamaṇā parihāro labbhati. Athāpi naṃ tattha manussā paricchinnakā lato uttaripi pañca vā dasa vā divasāni vāsentiyeva, tena vihāram pavatti pesetabbā “daharā mā ukkaṇṭhantu, ahaṃ asukadivasam nāma āgamissāmi”ti. Evampi parihāro labbhati. Atha āgacchato antarāmagge nadīpūrena vā corādīhi vā upaddavo hoti, thero udakosakkaṇam vā āgacchati, sahāye vā pariyesati, tañce pavattim daharā suṇanti, yāva āgamaṇā parihāro labbhati. Sace pana so “idhevāham vasissāmi”ti paṇiṇati, parihāro natthi. Yattha nissayo labbhati, tattha gantabbaṃ.

Vibbhante pana kālaṅkate pakkhasaṅkante vā ekadivasampi parihāro natthi. Yattha nissayo labbhati, tattha gantabbaṃ. **Āṇattīti** pana nissayapaṇāmanā vuccati. Tasmā “paṇāmemi ta”nti vā “mā idha paṭikkamī”ti vā “nīhara te pattacīvara”nti vā “nāham tayā upaṭṭhātabbo”ti vāti iminā pāḷinayena “mā maṃ gāmapavesanaṃ āpucchī”tiādīnā pāḷimuttakanayena vā yo nissayapaṇāmanāya paṇāmito hoti, tena upajjhāyo khamāpetabbo.

Sace āditova na khamati, daṇḍakammaṃ āharitvā tikkhattuṃ tāva sayameva khamāpetabbo. No ce khamati, tasmim vihāre mahāthere gahetvā khamāpetabbo. No ce khamati, sāmantavihāre bhikkhū gahetvā khamāpetabbo. Sace evampi na khamati, aññattha gantvā upajjhāyassa sabhāgānaṃ santike vasitabbaṃ “appeva nāma sabhāgānaṃ me santike vasatīti ṇatvāpi khomeyyā”ti. Sace evampi na khamati, tatveva vasitabbaṃ. Tatra ce dubbhikkhādidosena na sakkā hoti vasituṃ, taṃyeva vihāram āgantvā aññassa santike nissayaṃ gahetvā vasituṃ vaṭṭati. Ayamāṇattiyam vinicchayo.

Ācariyamhā nissayapaṭippassaddhīsu **ācariyo pakkanto vā hotīti** ettha koci ācariyo āpucchitvā pakkamati, koci anāpucchitvā. Antevāsikopi evameva. Tatra sace antevāsiko ācariyaṃ āpucchati “asukaṃ nāma bhante ṭhānaṃ gantuṃ icchāmi kenacideva karaṇīyena”ti, ācariyena ca “kadā gamissasī”ti vutto “sāyanhe vā rattim vā uṭṭahitvā gamissāmi”ti vadati, ācariyopi “sādhū”ti sampaṭicchati, taṅkhaṇaññeva nissayo paṭippassambhati.

Sace pana “bhante asukaṃ nāma ṭhānaṃ gantukāmomhī”ti vutte ācariyo “asukasmiṃ nāma gāme piṇḍāya caritvā pacchā jānissasi”ti vadati, so ca “sādhū”ti sampaṭicchati, tato ce gato, sugato. Sace pana na gacchati, nissayo na paṭippassambhati. Athāpi “gacchāmī”ti vutte ācariyena “mā tāva gaccha, rattim mantevā jānissāmā”ti vutto mantevā gacchati, sugato. No ce gacchati, nissayo na paṭippassambhati. Ācariyaṃ anāpucchā pakkamantassa pana upacārasīmātikame nissayo paṭippassambhati. Antoupacārasīmato paṭinivattantassa na paṭippassambhati.

Sace pana ācariyo antevāsikaṃ āpucchati “āvuso asukaṃ nāma ṭhānaṃ gamissāmī”ti, antevāsikena ca “kadā”ti vutte “sāyanhe vā rattibhāge vā”ti vadati, antevāsikopi “sādhū”ti sampaṭicchati, taṅkhaṇaññeva nissayo paṭippassambhati.

Sace pana ācariyo “sve piṇḍāya caritvā gamissāmī”ti vadati, itaro ca “sādhū”ti sampaṭicchati, ekadivasam tāva nissayo na paṭippassambhati, punadivase paṭippassaddho hoti. “Asukasmiṃ nāma gāme piṇḍāya caritvā jānissāmi mama gamanaṃ vā agamanaṃ vā”ti vatvā sace na gacchati, nissayo na paṭippassambhati. Athāpi “gacchāmī”ti vutte antevāsikena “mā tāva gacchatha, rattim mantevā jānissathā”ti vutto mantevāpi na gacchati, nissayo na paṭippassambhati.

Sace ubhopi ācariyantevāsikā kenaci karaṇīyena bahisīmaṃ gacchanti, tato ce ācariyo gamiyacitte uppanne anāpucchāva gantvā dvinnam leḍḍupātānaṃ antoyeva nivattati, nissayo na paṭippassambhati. Sace dve leḍḍupāte atikkamitvā nivattati, paṭippassaddho hoti. Ācariyupajjhāyā dve leḍḍupāte atikkamma aññasmiṃ vihāre vasanti, nissayo paṭippassambhati.

Ācariye vibbhante kālaṅkate pakkhasaṅkate ca taṅkhaṇaññeva paṭippassambhati. Āṇattiyam pana sacepi ācariyo muñcitukāmovā hutvā nissayapaṇāmanāya paṇāmeti, antevāsiko ca “kiñcāpi maṃ ācariyo paṇāmeti, atha kho hadayena muduko”ti sālayova hoti, nissayo na paṭippassambhatiyeva. Sacepi ācariyo sālayo, antevāsiko nirālayo, “na dāni imaṃ nissāya vasissāmī”ti dhuraṃ nikkhipati, evampi na paṭippassambhati. Ubhinnaṃ sālayabhāve pana na paṭippassambhatiyeva. Ubhinnaṃ dhuranikkhepena paṭippassambhati. Paṇāmitena daṇḍakammaṃ āharitvā tikkhattuṃ khamāpetabbo. No ce khamati, upajjhāye vuttanayena paṭipajjitabbaṃ.

**Upajjhāyena vā samodhānagatoti** ettha dassanasavanavasena samodhānaṃ veditabbaṃ. Sace hi ācariyaṃ nissāya vasanto saddhivihāriko ekavihāre cetiyaṃ vā vandantaṃ ekagāme piṇḍāya vā carantaṃ upajjhāyaṃ passati, nissayo paṭippassambhati. Upajjhāyo passati, saddhivihāriko pana na passati, na paṭippassambhati. Maggappaṭipannaṃ vā ākāseṇa vā gacchantaṃ upajjhāyaṃ disvā dūrattā bhikkhūti jānāti, upajjhāyoti na jānāti, na paṭippassambhati. Sace jānāti, paṭippassambhati. Uparipāsāde upajjhāyo vasati, heṭṭhā saddhivihāriko, taṃ adisvāva yāguṃ pivitvā pakkamati, āsanāsālāya vā nisinnaṃ adisvāva ekamante bhuñjitvā pakkamati, dhammassavanamaṇḍape vā nisinnampi taṃ adisvāva dhammaṃ sutvā pakkamati, nissayo na paṭippassambhati. Evaṃ tāva dassanavasena samodhānaṃ veditabbaṃ.

Savanavasena pana sace upajjhāyassa vihāre vā antaraghare vā dhammaṃ kathentassa anumodanaṃ vā karontassa saddaṃ sutvā “upajjhāyassa me saddo”ti sañjānāti, nissayo paṭippassambhati. Asañjānantassa na paṭippassambhatīti ayaṃ samodhāne vinicchayo.

Nissayapaṭippassaddhikathā niṭṭhitā.

### Upasampādetabbapañcakakathā

**84.** Idāni yaṃ pubbe “anujānāmi bhikkhave byattena bhikkhunā paṭibalena dasavassena vā atirekadasavassena vā upasampādetuṃ, nissayaṃ dātu”nti saṅkhepato upajjhāyācariyaṇaṃ lakkhaṇaṃ vuttaṃ, taṃ vitthārato dassetuṃ “**pañcahi, bhikkhave, aṅgehi samannāgatenā**”tiādīmāha. Tattha

**pañcahi añgehīti** pañcahi aguṇaṅgehi. So hi sīlakkhandhādīhi asamannāgatattāva aguṇaṅgehi samannāgato hoti. **Na upasampādetabbanti** upajjhāyena hutvā na upasampādetabbaṃ. **Na nissayo dātabboti** ācariyena hutvā nissayo na dātabbo. Ettha ca na asekkhena sīlakkhandhenāti ca attanā na asekkhenāti ca assaddhoti ca ādīsu tīsu pañcakesu ayuttavasena paṭikkhepo kato, na āpattiaṅgavasena. Yo hi asekkhehi sīlakkhandhādīhi asamannāgato pare ca tattha samādapetuṃ asakkonto assaddhiyādidosayuttova hutvā parisam pariharati, tassa parisā sīlādīhi parihāyatiyeva, na vaḍḍhati. Tasmā tena na upasampādetabbantiādi ayuttavasena vuttaṃ, na āpattiaṅgavasena. Na hi khīṇāsavasseva upajjhāyācariyabhāvo bhagavatā anuññāto. Yadi tasseva anuññāto abhaviṣṣa, “sace upajjhāyassa anabhirati uppannā hotī”tiādimṃ na vadeyya. Yasmā pana khīṇāsavassa parisā sīlādīhi na parihāyati, tasmā “pañcahi bhikkhave añgehi samannāgatena bhikkhunā upasampādetabba”ntiādi vuttaṃ.

**Adhisīle sīlavipannoti**ādīsu pārājikañca saṅghādisesañca āpanno adhisīle sīlavipanno nāma. Itare pañcāpattikkhandhe āpanno **ajjhācāre ācāravipanno** nāma. Sammādiṭṭhiṃ pahāya antaggāhikāya diṭṭhiyā samannāgato **atidiṭṭhiyā diṭṭhivipanno nāma**. Yattakaṃ sutam parisam pariharantassa icchitabbaṃ, tena virahitattā **appassuto**. Yaṃ tena jānitabbaṃ āpattādi, tassa ajānanato **duppañño**. Imasmiṃ pañcake purimāni tīṇi padāni ayuttavasena vuttāni, pacchimāni dve āpattiaṅgavasena.

**Āpattiṃ na jānātīti** “idaṃ nāma mayā kata”nti vutte “imaṃ nāma āpattiṃ ayaṃ āpanno”ti na jānātī. **Vuṭṭhānaṃ na jānātīti** vuṭṭhānagāminito vā desanāgāminito vā āpattito evaṃ nāma vuṭṭhānaṃ hotīti na jānātī. Imasmiṃ pañcake purimāni dve padāni ayuttavasena vuttāni, pacchimāni tīṇi āpattiaṅgavasena.

**Ābhisamācārikāya sikkhāyāti** khandhakavatte vinetuṃ na paṭibalo hotīti attho. **Ādibrahmacariyakāyāti** sekkhapaṇṇattiyaṃ vinetuṃ na paṭibaloti attho. **Abhidhammeti** nāmarūpaparicchede vinetuṃ na paṭibaloti attho. **Abhivinayeti** sakale vinayapītake vinetuṃ na paṭibaloti attho. **Vinetuṃ na paṭibaloti** ca sabbattha sikkhāpetuṃ na sakkotīti attho. **Dhammato vivecetunti** dhammena kāraṇena vissajjāpetuṃ. Imasmi pañcake sabbapadesu āpatti. **Āpattiṃ na jānātīti**ādipañcakasmimpi sabbapadesu āpatti. Ūnadasavassapariyosānapañcakepi eseva nayo. Iti ādito tayo pañcakā, catutthe tīṇi padāni, pañcame dve padānīti sabbepi cattāro pañcakā ayuttavasena vuttā. Catutthapañcake dve padāni, pañcame tīṇi, chaṭṭhasattamaaṭṭhamā tayo pañcakāti sabbepi cattāro pañcakā āpattiaṅgavasena vuttā; sukkapakkhe aṭṭhasu anāpattiyevāti.

Upasampādetabbapañcakakathā niṭṭhitā.

### Upasampādetabbachakkakathā

**85.** Chakkesu ūnadasavassapadaṃ vireso, taṃ sabbattha āpattikaraṃ. Sesam vuttanayeneva veditabbaṃ. Tattha **ubhayāni kho panassa pātimokkhāni vitthārena na svāgatāni** **hontīti** ubhatovibhaṅgavasena na svāgatāni. **Na suvibhattānīti** mātīkāvibhaṅgavasena. **Na suppavattīnīti** vācuggatavasena. **Na suvinicchitāni** **suttaso anubyañjanasoti** mātīkāto ca vibhaṅgato ca na suṭṭhu vinicchitāni.

Upasampādetabbachakkakathā niṭṭhitā.

### Aññatitthiyapubbavattukathā

**86.** Aññatitthiyapubbavattusmiṃ – yo tāva ayaṃ pasūro, so titthiyapakkantakattā na upasampādetabbo. Yo pana aññopi nayidha pabbajitapubbo āgacchati, tasmim yaṃ kattabbaṃ taṃ dassetuṃ “**yo so bhikkhave aññopi**”tiādimāha. Tattha **tassa cattāro māse parivāso dātabboti** ayaṃ titthiyaparivāso nāma; appaṭicchannaparivāsotipi vuccati. Ayaṃ pana naggaparibbājakasseva ājīvakkassa vā acelakassa vā dātabbo. Sace sopi sāṭakaṃ vā vāḷakambalādīnaṃ aññataraṃ titthiyaddhajaṃ vā

nivāsetvā āgacchati, nāssa parivāso dātabbo. Aññassa pana tāpasapaṇḍaraṅgādikassa na dātabbova.

**Paṭhamam kesamassuntiādinā** tassa āditova sāmaṇerapabbajjam dasseti. Evaṃ pabbājentehi pana tasmim saṅghamajjhe nisinneyeva “tvam pabbājehi, tvam ācariyo hohi, tvam upajjhāyo hohi”ti therā bhikkhū na vattabbā. Evaṃ vuttā hi sace tassa ācariyupajjhāyabhāvena jigucchantā na sampañcchanti, atha so “nayime mayham saddahanti”ti kujjhivāpi gaccheyya. Tasmā tam ekamantaṃ netvā tassa ācariyupajjhāyā pariyesitabbā.

**87. Evaṃ kho bhikkhave aññatitthiyapubbo ārādhako hoti, evaṃ anārādhakoti** ayamassa parivāsavattadassanattaṃ mātikā. **Kathaṅca bhikkhavetiādi** tasseva vibhaṅgo. Tattha **atikālena gāmaṃ pavisatīti** bhikkhūnaṃ vattakaraṇavelāyameva gāmaṃ piṇḍāya pavisati. **Atidivā paṭikkamatīti** kulagharesu itthipurisadārakādārikādīhi saddhim gehassitakathaṃ kathento tattheva bhuñjitvā bhikkhūsu pattacīvaraṃ paṭisāmetvā uddesaparipucchādīni vā karontesu paṭisallīnesu vā āgacchati; na upajjhāyavattaṃ nācariyavattaṃ karoti, aññadatthu vasanaṭṭhānaṃ pavisitvā niddāyati. **Evampi bhikkhave aññatitthiyapubbo anārādhako hotīti** evampi karonto parivāsavattassa sampādako pūraḥ na hoti.

**Vesiyāgocaro vātiādīsu vesiyāti** āmisakiñcikkhasampadānādinā sulabhajjhācārā rūpupajjivikā itthiyo. **Vidhavāti** matapatikā vā pavutthapatikā vā itthiyo; tā yena kenaci saddhim mittabhāvaṃ patthenti. **Thullakumārikāti** yobbannappattā yobbannatīti vā kumāriyo; tā purisādhippāyāva vicaranti, yena kenaci saddhim mittabhāvaṃ patthenti. **Paṇḍakāti** ussannakilesā avūpasantaparilāhā napumsakā; te parilāhavegābhībhūtā yena kenaci saddhim mittabhāvaṃ patthenti. **Bhikkhuniyoti** samānapabbajjā itthiyo; tāhi saddhim khippameva vissāso hoti, tato sīlaṃ bhijjati.

Tattha vesiyānaṃ kulesu kulupako hutvā piṇḍapātacariyādīhi vā apadisitvā sinehasanthavajātena hadayena abhiṇhadassanasallāpakāmatāya tasmaṃ santikaṃ upasaṅkamanto “vesiyāgocaro”ti vuccati, so nacirasseva “asukavesiyā saddhim gato”ti vattabbataṃ pāpuṇāti. Esa nayo sabbattha. Sace pana vesiyādayo salākabhāttādīni denti, bhikkhūhi saddhim gantvā saddhimyeva bhuñjitvā vā gahetvā vā āgantum vaṭṭati. Gilānā bhikkhuniyo ovaditum vā dhammaṃ vā desetum uddesaparipucchādīni vā dātum gacchantehi bhikkhūhi saddhim gantum vaṭṭati. Yo pana tathā āgantvā mittasanthavavasena gacchati, ayaṃ anārādhako hoti.

**Uccāvacāni karaṇīyānīti** mahantakhuddakāni kammāni. Tattha ghaṇṭim paharivā samaggena saṅghena sannipatitvā kattabbāni cetiyamahāpāsādapaṭisaṅkharaṇādīni kammāni **uccāni** nāma. Cīvaradhovanarajanādīni khandhakapariyāpannāni ca aggisālavattādīni ābhisamācārikāni **avacāni** nāma. **Tattha na dakkho hotīti** tesu kammesu cheko susikkhito na hoti. **Na analasoti** uṭṭhānavīriyasampanno na hoti; “bhikkhusaṅghassa kammaṃ atthi”ti sutvā pageva bhattakiccaṃ katvā gabbhantaraṃ pavisitvā yāvadattaṃ supitvā sāyaṃ nikkhamati. **Tatrupāyāyāti** tesu kammesu upāyabhūtāya. **Vīmaṃsāyāti** ṭhānuppattikavīmaṃsāya. “Idamevaṃ kattabbaṃ, idamevaṃ na kattabba”nti tasmimyeva khaṇe uppannapaññāya samannāgato na hoti. **Na alaṃ kātum na alaṃ saṃvidhātunti** sahatthāpi kātum samattho na hoti; “gaṇhatha bhante, gaṇha dahara, gaṇha sāmaṇera, sace tumhe vā na karissatha, amhe vā na karissāma, ko dāni imaṃ karissatī”ti evaṃ ussāhaṃ janetvā saṃvidhātum aññamaññaṃ kāretumpi samattho na hoti. Bhikkhūhi “kammaṃ karissāmā”ti vutte kiñci rogaṃ apadisati, bhikkhūnaṃ kammaṃ karontānaṃ samīpeneva vicarati, sīsameva dasseti, ayampi anārādhako hoti.

**Na tibbacchando hotīti** balavacchando na hoti. **Uddeseti** pālipariyāpuṇane. **Paripucchāyāti** atthasavane. **Adhisīleti** pātimokkhasīle. **Adhicitteti** lokiyasamādhībhāvanāya. **Adhipaññāyāti** lokuttaramaggabhāvanāya.

**Saṅkanto hotīti** idhāgato hoti. **Tassa satthunoti** tassa titthāyatanasāmikassa. **Tassa ditthiyāti** tassa santakāya laddhiyā. Idāni sāyeva laddhi yasmā tassa titthakarassa khamati ceva ruccati ca “idameva

sacca’’nti ca dalhaggāhena gahitā; tasmā tassa khanti ruci ādāyoti vuccati. Tena vuttaṃ – “tassa khantiyā tassa ruciyā tassa ādāyassā’’ti. **Avanṇe bhañṇamāneti** garahāya bhañṇamānāya. **Anabhiraddhoti** aparipuṇṇasaṅkappo; no paggahitacitto. **Udaggoti** abbhunnatakāyacitto. **Idaṃ bhikkhave saṅghātanikaṃ aññatitthiyapubbassa anārādhaniyasminti** bhikkhave yamidaṃ tassa satthuno tasseva ca laddhiyā avanṇe bhañṇamāne “kiṃ ime paraṃ garahanti’’ti kāyavacīvikāranibbattaṃ anattamanattaṃ, buddhādīnañca avanṇe bhañṇamāne attamanattaṃ, yañca tasseva satthuno tasseva ca laddhiyā vaṇṇe bhañṇamāne attamanattaṃ, buddhādīnañca vaṇṇabhaṇane anattamanattaṃ, idaṃ aññatitthiyapubbassa anārādhaniyasmim saṅghātanikaṃ, anārādhake parivāsavattaṃ apūrake kamme idaṃ liṅgaṃ, idaṃ lakkhaṇaṃ, idamacalappamāṇanti vuttaṃ hoti. **Evaṃ anārādhako kho bhikkhave aññatitthiyapubbo āgato na upasampādetabboti** ito ekenapi aṅgena samannāgato na upasampādetabbo. Sukkapakkhe sabbaṃ vuttavipallāsena veditabbaṃ.

**Evaṃ ārādhako kho bhikkhavi** evaṃ nātikālena gāmapavesanā nātidivā paṭikkamaṇaṃ, na vesiyādigocaratā, sabrahmacārīnaṃ kicesu dakkhatādi, uddesādīsu tibbacchandatā, titthiyānaṃ avaṇṇabhaṇane attamanatā, buddhādīnaṃ avaṇṇabhaṇane anattamanatā, titthiyānaṃ vaṇṇabhaṇane anattamanatā, buddhādīnaṃ vaṇṇabhaṇane attamanatāti imesaṃ aṭṭhannaṃ titthiyavattānaṃ paripūraṇena ārādhako paritosako bhikkhūnaṃ aññatitthiyapubbo āgato upasampādetabbo.

Sace pana upasampadamālakepi ekaṃ vattaṃ bhindati, puna cattāro māse parivasitabbaṃ. Yathā pana bhinnasikkhāya sikkhamānāya puna sikkhāpadāni ca sikkhāsammuti ca diyyati, evaṃ nayimassa kiñci puna dātabbamatti. Pubbe dinnaparivāsoyeva hi tassa parivāso. Tasmā puna cattāro māse parivasitabbaṃ. Sace parivasanto antarā aṭṭha samāpattiyo nibbatteti, lokiyadhammo nāma kuppanasabhāvo, na upasampādetabbo. Cattāro māse pūritavattova upasampādetabbo. Sace pana parivasanto cattāri mahābhūtāni pariggaṇhati, upādārūpāni paricchindati, nāmarūpaṃ vavatthapeti, tilakkhaṇaṃ āropetvā vipassanaṃ ārabhati, lokiyadhammo nāma kuppanasabhāvo, neva upasampādetabbo. Sace pana vipassanaṃ vaḍḍhetvā sotāpattimaggam paṭilabhati, paripuṇṇamyeva hoti vattaṃ. Samūhatāni sabbadiṭṭhigatāni abbuḷhaṃ vicikicchāsallaṃ taṃdivasameva upasampādetabbo. Sacepi titthiyaliṅge ṭhito sotāpanno hoti, parivāsakiccaṃ natthi, tadaheva pabbājetvā upasampādetabbo.

**Upajjhāyamūlakaṃ cīvaraṃ pariyesitabbanti** upajjhāyaṃ issaraṃ katvā tassa cīvaraṃ pariyesitabbaṃ. Pattampi tatheva. Tasmā yadi upajjhāyassa pattacīvaraṃ atthi, “imassa dehi’’ti vattabbo. Atha natthi, aññe dātukāmā honti, tehipi upajjhāyasseva dātabbaṃ “idaṃ tumhākaṃ katvā imassa dethā’’ti. Kasmā? Titthiyā nāma vilomā honti “saṅghena me pattacīvaraṃ dinnam, kiṃ mayhaṃ tumhesu āyatta’’nti vatvā ovādānusāsaniṃ na kareyyuṃ, upajjhāyena pana āyattajīvikattā tassa vacanakaro bhavissati. Tenassa “upajjhāyamūlakaṃ cīvaraṃ pariyesitabba’’nti vuttaṃ. **Bhaṇḍukammāyāti** kesoropanattaṃ. Bhaṇḍukammakathā parato āgamissati.

**Aggikāti** aggiparicaraanā. **Jaṭilakāti** tāpasā. **Ete bhikkhave kiriyavādinoti** ete kiriyānaṃ paṭibāhanti, “atthi kammaṃ, atthi kammavipāko’’ti evaṃdiṭṭhikā. Sabbabuddhā hi nekkhammapāramiṃ pūrayamānā etadeva pabbajjāṃ pabbajitvā pūresuṃ, mayāpi tatheva pūritā, na etesaṃ sāsane pabbajjā vilomā, tasmā upasampādetabbā, na tesam parivāso dātabboti. **Imāhaṃ bhikkhave nātinam āveṇikaṃ parihāraṃ dammīti** imaṃ ahaṃ tesam pāṭekkaṃ odissakaṃ parihāraṃ dadāmi. Kasmā evamāha? Te hi titthāyatane pabbajitāpi sāsanaṃ avaṇṇakāmā na honti, amhākaṃ nātisēṭṭhassa sāsanti vaṇṇavādinova honti, tasmā evamāhāti.

Aññatitthiyapubbavatthukathā niṭṭhitā.

### Pañcābādhavatthukathā

**88. Magadhesu pañca ābādhā ussannā hontīti** magadhanāmake janapade manussānañca amanussānañca pañca rogā ussannā vuḍḍhipattā phātipattā honti. Jīvakakomārabhaccakathā

cīvarakkhandhake āvibhavissati. **Na bhikkhave pañcahi ābādhehi phuṭṭho pabbājetabboti** ye te kuṭṭhādayo pañca ābādāhā ussannā, tehi phuṭṭho abhibhūto na pabbājetabbo.

Tattha **kuṭṭhanti** rattakuṭṭham vā hotu kālakuṭṭham vā, yaṃkiñci kiṭṭibhadaddukacchuādippabhedampi sabbam kuṭṭhamevāti vuttam. Tañce nakhapiṭṭhippamānampi vaḍḍhanakapakkhe ṭhitam hoti, na pabbājetabbo. Sace pana nivāsanapāruranehi pakatipaṭicchanne ṭhāne nakhapiṭṭhippamānam avaḍḍhanakapakkhe ṭhitam hoti, vaṭṭati. Mukhe pana hatthapādapiṭṭhesu vā sacepi avaḍḍhanakapakkhe ṭhitam nakhapiṭṭhito ca khuddakatarampi, na vaṭṭatiyevāti kurundiyaṃ vuttam. Tikicchāpetvā pabbājentenāpi pakativaṇṇe jāteyeva pabbājetabbo. Godhāpiṭṭhisadisacunṇaokiraṇakasārārampi pabbājetum na vaṭṭati.

**Gaṇḍoti** medagaṇḍo vā hotu añño vā yo koci kolaṭṭhimattakopi ce vaḍḍhanakapakkhe ṭhito gaṇḍo hoti, na pabbājetabbo. Paṭicchannaṭṭhāne pana kolaṭṭhimatte avaḍḍhanakapakkhe ṭhito vaṭṭati. Mukhādike appaṭicchannaṭṭhāne avaḍḍhanakapakkhe ṭhitopi na vaṭṭati. Tikicchāpetvā pabbājentenāpi sarāram sañchaviṃ kāretvāva pabbājetabbo. Uṇṇigaṇḍā nāma honti gohanā viya aṅgulikā viya ca tattha tattha lambanti, etepi gaṇḍāyeva. Tesu sati pabbājetum na vaṭṭati. Daharakāle khīrapīlakā yobbannakāle ca mukhe kharapīlakā nāma honti, mahallakakāle nassanti, na tā gaṇḍasaṅkhyam gacchanti, tāsū sati pabbājetum vaṭṭati. Aññe pana sarīre kharapīlakā nāma aparā padumakaṇṇikā nāma honti, aññā sāsapabījakā nāma sāsapamattā eva sakalasarāram pharanti, tā sabbā kuṭṭhajātikā eva. Tāsū sati na pabbājetabbo.

**Kilāsoti** na bhijjanakam na paggharaṇakam padumapuṇḍarīkapattavaṇṇam kuṭṭham, yena gunnam viya sabalam sarāram hoti, tasmim kuṭṭhe vuttanayeneva vinicchayo veditabbo. **Sosoti** sosabyādhi; tasmim sati na pabbājetabbo. **Apamāroti** pittummāro vā yakkhummāro vā; tattha pubbaverikena amanussena gahito duttikiccho hoti. Appamattakepi pana apamāre sati na pabbājetabbo.

Pañcābādhavatthukathā niṭṭhitā.

### Rājabhaṭavattukathā

**90.** Rājabhaṭavattusmim – **paccantam uccinathāti** paccantam vaḍḍhetha. Core palāpetvā corabhayena vuṭṭhite gāme āvāsāpetvā ārakkham datvā kasikammādīni pavattāpethāti vuttam hoti. Rājā pana sotāpannattā “core ghātetha, hanathā” ti na ānāpeti. **Upajjhāyassa deva sīsam chinditabbanti** ādi sabbam “pabbajjāya upajjhāyo seṭṭho, tato ācariyo, tato gaṇo” ti cintevā idam vohāre aḍḍavinicchaye āgatanti āhamsu. **Na bhikkhave rājabhaṭo pabbājetabboti** ettha amacco vā hotu mahāmatto vā sevako vā kiñci ṭhānantaram patto vā appatto vā, yo koci rañño bhattavetanabhaṭo, sabbo rājabhaṭoti saṅkhyam gacchati, so na pabbājetabbo. Tassa pana puttannattabhātukā ye rājato bhattavetanam na gaṇhanti, te pabbājetum vaṭṭati. Yo pana rājato laddham nibaddhabhogam vā māsasamvaccharaparibbayaṃ vā rañño yeva niyyātetī, puttabhātuke vā tam ṭhānam sampaṭicchāpetvā rājānam “na dānāham devassa bhaṭo” ti āpucchati, yena vā yaṃ kammakāraṇā vetanam gahitam, tam kammam kataṃ hoti, yo vā pabbajassūti raññā anuññāto hoti, tampi pabbājetum vaṭṭati.

Rājabhaṭavattukathā niṭṭhitā.

### Coravattukathā

**91.** Coravattūsu – **manussā passivāti** yehi gihikāle diṭṭhapubbo ye ca “ayaṃ so” ti aññesaṃ suṇanti, te passivā ubbijjantipi...pe... dvārampi thakenti. Ye pana na jānanti, tesam gharesu bhikkham labhati. **Na bhikkhavesi** bhagavā sayam dhammassāmī, tasmā āyatim akaraṇatthāya bhikkhūnam sikkhāpadam paññapento evamāha. Tattha dhajam bandhitvā viya vicaratīti **dhajabandho**. Mūladevādayo viya loke pākāṭoti vuttam hoti. Tasmā yo gāmaghātam vā panthaduhanam vā nagare

sandhicchedādīkammaṃ vā karonto vicarati, paññāyati ca “asuko nāma idaṃ idaṃ karotī”ti, so na pabbājetabbo. Yo pana rājaputto rajjaṃ patthento gāmaghātādīni karoti, so pabbājetabbo. Rājāno hi tasmīṃ pabbajite tussanti, sace pana na tussanti, na pabbājetabbo. Pubbe mahājane pākaṭo coro pacchā corakammaṃ pahāya pañcasīlādīni samādiyati, tañce manussā evaṃ jānanti, pabbājetabbo. Ye pana ambalabujādicorakā sandhicchedādīcorā eva vā adissamānā theyyaṃ karonti, pacchāpi iminā nāma idaṃ katanti na paññāyanti, tepi pabbājetuṃ vaṭṭati.

**92. Kāraṃ bhinditvāti** aṭṭabandhanādīṃ bhinditvā. **Abhayūvarāti** ettha bhayena uparamantīti bhayūvarā, ete pana laddhābhayattā na bhayūvarāti **abhayūvarā**; pakārassa cettha vakāro katoti veditabbo. **Na bhikkhave kārabhedako pabbājetabboti** kāro vuccati bandhanāgāraṃ. Idha pana andubandhanaṃ vā hotu saṅkhalikabandhanaṃ vā rajjubandhanaṃ vā gāmabandhanaṃ vā nigamabandhanaṃ vā nagarabandhanaṃ vā purisagutti vā janapadabandhanaṃ vā dīpabandhanaṃ vā, yo etesu yaṃkiñci bandhanaṃ bhinditvā vā chinditvā vā muñcitvā vā vivarivā vā passamānānaṃ vā apassamānānaṃ vā palāyati, so kārabhedakoti saṅkhyāṃ gacchati. Tasmā īdiso kārabhedako coro dīpabandhanaṃ bhinditvā dīpantaraṃ gatopi na pabbājetabbo. Yo pana na coro, kevalaṃ hatthakammaṃ akaronto “evaṃ no apalāyanto karissatī”ti rājayuttādīhi baddho, so kāraṃ bhinditvā palātopi pabbājetabbo. Yo pana gāmanigamaṭṭanādīni keṇiyā gahetvā taṃ asampādentō bandhanāgāraṃ pavesito hoti, so palāyitvā āgato na pabbājetabbo. Yopi kasikammādīhi dhaṇaṃ sampādetvā jīvanto “nidhānaṃ iminā laddha”nti pesuññaṃ upasaṃharitvā kenaci bandhāpito hoti, taṃ tattheva pabbājetuṃ na vaṭṭati, palāyitvā gataṃ pana gataṭṭhāne pabbājetuṃ vaṭṭati.

**93. Na bhikkhave likhitakoti** ettha **likhitako** nāma na kevalaṃ “yattha passati tattha hantabbo”ti, atha kho yo koci corikaṃ vā aññaṃ vā garuṃ rājāparādhaṃ katvā palāto, rājā ca naṃ paṇṇe vā potthake vā “itthannāmo yattha dissati, tattha gahetvā māretabbo”ti vā “hatthapādānissa chinditabbānī”ti vā “ettakaṃ nāma daṇḍaṃ āharāpetabbo”ti vā likhāpeti, ayaṃ **likhitako** nāma, so na pabbājetabbo.

**94. Kasāhato katadaṇḍakammoti** ettha yo vacanapesanādīni akaronto haññati, na so katadaṇḍakammo. Yo pana keṇiyā vā aññathā vā kiñci gahetvā khādītva puna dātuṃ asakkonto “ayameva te daṇḍo hotū”ti kasāhi haññati, ayaṃ kasāhato katadaṇḍakammo. So ca kasāhi vā hatō hotu addhadaṇḍakādīnaṃ vā aññatarena, yāva allavaṇo hoti, tāva na pabbājetabbo. Vaṇe pana pākāṭike katvā pabbājetabbo. Sace pana jāṇūhi vā kapparehi vā nāḷikerapāsānādīhi vā ghātetvā mutto hoti, sarīre cassa gaṇṭhiyo paññāyanti, na pabbājetabbo. Phāsukaṃ katvā eva gaṇṭhīsu sannisinnāsu pabbājetabbo.

**95. Lakkhaṇāhato katadaṇḍakammoti** ettha katadaṇḍakammabhāvo purimanayeneva veditabbo. Yassa pana nalāṭe vā ūruādīsu vā tattena lohena lakkhaṇaṃ āhataṃ hoti, so sace bhujisso yāva allavaṇo hoti, tāva na pabbājetabbo. Sacepissa vaṇā ruḷhā honti, chaviyā samaparicchedā, lakkhaṇaṃ na paññāyati, timaṇḍalavatthassa uttarāsaṅge kate paṭicchannokāse ce hoti, pabbājetuṃ vaṭṭati, appaṭicchannokāse ce na vaṭṭati.

Coravatthukathā niṭṭhitā.

### **Īṇāyikavatthukathā**

**96. Na bhikkhave īṇāyikoti** ettha **īṇāyiko** nāma yassa pitipitāmahehi vā iṇaṃ gahitaṃ hoti, sayaṃ vā iṇaṃ gahitaṃ hoti, yaṃ vā āthapetvā mātāpitūhi kiñci gahitaṃ hoti, so taṃ iṇaṃ paresaṃ dhāretīti īṇāyiko. Yaṃ pana aññe ñātakā āthapetvā kiñci gaṇhanti, so na īṇāyiko. Na hi te taṃ āthapetuṃ issarā, tasmā taṃ pabbājetuṃ vaṭṭati, itaraṃ na vaṭṭati. Sace panassa ñātisālohitā “mayaṃ dassāma, pabbājetha na”nti iṇaṃ attano bhāraṃ karonti, añño vā koci tassa ācārasampattiṃ disvā “pabbājetha naṃ, ahaṃ iṇaṃ dassāmī”ti vadati, pabbājetuṃ vaṭṭati. Tesu asati bhikkhunā tathārūpassa upaṭṭhākassāpi ārocetabbaṃ “sahetuko satto iṇapalibodhena na pabbajati”ti. Sace so paṭipajjati, pabbājetabbo. Sacepi attano kappiyabhaṇḍaṃ atthi, “etaṃ dassāmī”ti pabbājetabbo. Sace pana neva ñātakādayo paṭipajjanti,



na attano dhanam atthi, ‘‘pabbājetvā bhikkhāya caritvā mocessāmī’’ti pabbājetum na vaṭṭati. Sace pabbājeti dukkaṭam. Palātopi ānetvā dātabbo. No ce deti, sabbam iṇam gīvā hoti. Ajānitvā pabbājayato anāpatti. Passantena pana ānetvā iṇasāmikānam dassetabbo. Apassantassa gīvā na hoti.

Sace iṇāyiko aññam desam gantvā pucchiyamānopi ‘‘nāham kassaci kiñci dhāremī’’ti vatvā pabbajati, iṇasāmiko ca tam pariyesanto tattha gacchati, daharo tam disvā palāyati, so ca theram upasankamitvā ‘‘ayam bhante kena pabbājito, mama ettakam nāma dhanam gahetvā palāto’’ti vadati, therena vattabham ‘‘mayā upāsaka ‘aṇaṇo aha’nti vadanto pabbājito, kiṃ dāni karomi, passa me pattacīvaramatta’’nti ayam tattha sāmīci. Palāte pana gīvā na hoti.

Sace pana nam therassa sammukhāva disvā ‘‘ayam mama iṇāyiko’’ti vadati, ‘‘tava iṇāyikam tvameva jānāhī’’ti vattabbo. Evampi gīvā na hoti. Sacepi so ‘‘pabbājito ayam idāni kuhiṃ gamissatī’’ti vadati, therena ‘‘tvameva jānāhī’’ti vattabbo. Evampissa palāte gīvā na hoti. Sace pana thero ‘‘kuhiṃ dāni ayam gamissati, idheva acchatū’’ti vadati, so ce palāyati, gīvā hoti. Sace so sahetukasatto hoti vattasampanno, therena ‘‘īdiso aya’’nti vattabham. Iṇasāmiko ce ‘‘sādhū’’ti vissajjeti, iccetam kusalam. Sace pana ‘‘upaḍḍhupaḍḍham dethā’’ti vadati, dātabbam. Aparena samayena atīārādhako hoti, ‘‘sabbam dethā’’ti vuttepi dātabbameva. Sace pana uddesapari-pucchādīsu kusalo hoti bahūpakāro bhikkhūnam, bhikkhācāravattena pariyesitvāpi iṇam dātabbamevāti.

Iṇāyikavatthukathā niṭṭhitā.

### Dāsavatthukathā

**97. Na bhikkhave dāsoti** ettha cattāro dāsā – antojāto, dhanakkīto, karamarānīto, sāmaṃ dāsabyam upagatoti. Tattha antojāto nāma jātidāso gharadāsiyā putto. Dhanakkīto nāma mātāpitūnam santikā putto vā sāmikānam santikā dāso vā dhanam datvā dāsacārittam āropetvā kīto. Ete dvepi na pabbājetabbā. Pabbājentena tattha tattha cārittavasena adāsam katvā pabbājetabbā.

Karamarānīto nāma tiroraṭṭham vilopam vā katvā upalāpetvā vā tiroraṭṭhato bhujissamānusakāni āharanti, antoraṭṭheveva vā katāparādham kiñci gāmaṃ rājā ‘‘vilumpathā’’ti āṇāpeti, tato mānusakānīpi āharanti. Tattha sabbe purisā dāsā, itthiyo dāsiyo. Evarūpo karamarānīto dāso yehi ānīto, tesam santike vasanto vā bandhanāgāre baddho vā purisehi rakkhiyamāno vā na pabbājetabbo. Palāyitvā pana gato, gataṭṭhāne pabbājetabbo. Raññā tuṭṭhena ‘‘karamarānītake muñcathā’’ti vatvā vā sabbasādhāraṇena vā nayena bandhanā makkhe kate pabbājetabbova.

Sāmaṃ dāsabyam upagato nāma jīvitahetu vā ārakkhahetu vā ‘‘aham te dāso’’ti sayameva dāsabhāvam upagato. Rājūnam hatthiassagomahimsagopakādayo viya, tādiso dāso na pabbājetabbo. Rañño vaṇṇadāsīnam puttā honti amaccaputtasadisā, tepi na pabbājetabbā. Bhujissitthiyo asaṃyātā vaṇṇadāsīhi saddhiṃ vicaranti, tāsam putte pabbājetum vaṭṭati. Sace sayameva paṇṇam āropenti, na vaṭṭati. Bhaṭṭiputtakagaṇādīnam dāsāpi tehi adinnā na pabbājetabbā. Vihāresu rājūhi āramikadāsā nāma dinnā honti, tepi pabbājetum na vaṭṭati. Bhujisse pana katvā pabbājetum vaṭṭati. Mahāpaccariyam ‘‘antojātadhanakkītake ānetvā bhikkhusaṅghassa āramike demāti denti, takkam sīse āsittakasadisāva honti, te pabbājetum vaṭṭati’’ti vuttam. Kurundiyam pana ‘‘āramikam demāti kappiyavohārena denti, yena kenaci vohārena dinno hotu, neva pabbājetabbo’’ti vuttam. Duggatamanussā saṅgham nissāya jīvissāmāti vihāre kappiyakārakā honti, etepi pabbājetum vaṭṭati. Yassa mātāpitāro dāsā, mātā eva vā dāsī, pitā adāso, tam pabbājetum na vaṭṭati. Yassa pana mātā adāsī, pitā dāso, tam pabbājetum vaṭṭati. Bhikkhussa nātākā vā upaṭṭhākā vā dāsam denti ‘‘imam pabbājetha, tumhākam veyyāvaccam karissatī’’ti attanovāssa dāso atthi, bhujisso katova pabbājetabbo. Sāmikā dāsam denti ‘‘imam pabbājetha, sace abhiraṃsati, adāso vibbhamissati ce, amhākam dāsova bhavissatīti ayam tāvakālīko nāma, tam pabbājetum na vaṭṭati’’ti kurundiyam vuttam. Nissāmikadāso hoti, sopi bhujisso katova pabbājetabbo. Ajānanto pabbājetvā vā upasampādetvā vā pacchā jānāti, bhujissam kātumeva vaṭṭati.

Imassa ca atthassa pakāsanattham idaṃ vatthum vadanti – ekā kira kuladāsī ekena saddhiṃ anurādhapurā palāyitvā rohaṇe vasamānā puttam paṭilabhi, so pabbajitvā upasampannakāle lajjī kukkuccako ahoṣi. Atheadivasam mātaram pucchi – “kiṃ upāsike tumhākaṃ bhātā vā bhaginī vā natthi, na kañci nītakam passāmī”ti. “Tāta, ahaṃ anurādhapure kuladāsī, tava pitarā saddhiṃ palāyitvā idha vasāmī”ti. Sīlavā bhikkhu “asuddhā kira me pabbajjā”ti samvegam labhitvā mātaram tassa kulassa nāmagottam pucchitvā anurādhapuram āgamma tassa kulassa gharadvāre aṭṭhāsī. “Aticchatha bhante”ti vuttepi nātikkami, te āgantvā “kiṃ bhante”ti pucchimsu. “Tumhākaṃ itthannāmā dāsī palātā atthi”ti? Atthi bhante. Ahaṃ tassā putto, sace maṃ tumhe anujānātha, pabbajjam labhāmi, tumhe mayham sāmikāti. Te haṭṭhatuṭṭhā hutvā “suddhā bhante tumhākaṃ pabbajjā”ti tam bhujissam katvā mahāvihāre vasāpesum catūhi paccayehi paṭijaggantā. Thero tam kulam nissāya vasamānoyeva arahattam paṇuṇīti.

Dāsavatthukathā niṭṭhitā.

### Kammārabhaṇḍuvatthādikathā

**98-9. Kammārabhaṇḍūti** tulādhāramuṇḍako suvaṇṇakāraputto, pañcasikho taruṇadārakoti vuttam hoti. **Saṅgham apaloketum bhaṇḍukammāyāti** saṅgham bhaṇḍukammathāya āpucchitum anujānāmīti attho. Tatrāyam āpucchavidhi – sīmāpariyāpanne bhikkhū sannipātetvā pabbajjāpekkham tattha netvā “saṅgham bhante imassa dārakassa bhaṇḍukammaṃ āpucchāmī”ti tikkhattum vā dvikkhattum vā sakim vā vattabham. Ettha ca “imassa dārakassa bhaṇḍukammaṃ āpucchāmī”tipi “imassa samaṇakaraṇam āpucchāmī”tipi “imassa pabbājanam āpucchāmī”tipi “ayam samaṇo hotukāmo”tipi “ayam pabbajitukāmo”tipi vattum vaṭṭatiyeva.

Sace sabhāgaṭṭhānam hoti, dasa vā vīsam vā tiṃsam vā bhikkhū vasantīti paricchedo paññāyati, tesam ṭhitokāsam vā nisinnokāsam vā gantvāpi purimanayeneva āpucchitabham. Pabbajjāpekkham vināva daharabhikkhū vā sāmāṇere vā pesetvāpi “eko bhante pabbajjāpekkho atthi tassa bhaṇḍukammaṃ āpucchāmā”tiādinā nayena āpucchāpetum vaṭṭati.

Sace keci bhikkhū senāsanam vā gumbādīni vā pavisitvā niddāyanti vā samaṇadhammam vā karonti, āpucchakā ca pariyesantāpi adisvā “sabbe āpucchitā amhehi”ti saññino honti, pabbajjā nāma lahukam kammaṃ, tasmā pabbajito supabbajitova pabbājentassāpi anāpatti.

Sace pana mahāvihāro hoti anekabhikkhusahassāvāso, sabbe bhikkhū sannipātetumpi dukkaram, pageva paṭipāṭiyā āpucchitum, khaṇḍasīmāyam vā ṭhatvā nadīsamuddādīni vā gantvā pabbājetabbo. Yo pana navamuṇḍo vā hoti vibbhantako vā nigaṇṭhādīsu aññataro vā dvaṅgulakeso vā unadvaṅgulakeso vā, tassa kesacchedanakiccaṃ natthi, tasmā bhaṇḍukammaṃ anāpucchitvāpi tādisam pabbājetum vaṭṭati. Dvaṅgulātirittakeso pana yo hoti antamaso ekasikhāmattharopi, so bhaṇḍukammaṃ āpucchitvāva pabbājetabbo. **Upālivatthu** mahāvibhaṅge vuttanayameva.

**100. Ahivātakarogenāti** māribyādhinā; yatra hi so rogo uppajjati, tam kulam dvipadacatuppadam sabbam nassati, yo bhittim vā chadanam vā bhinditvā palāyati, tirogāmādigato vā hoti, so muccati. Tathā cettha pitāputtā mucchimsu. Tena vuttam – “pitāputtakā sesā hontī”ti.

**Kākuḍḍepakanti** yo vāmahatthena leḍḍum gahetvā nisinnō sakkoti āgatāgate kāke uḍḍāpetvā purato nikkhattam bhattam bhujjijum, ayam kākuḍḍepako nāma, tam pabbājetum vaṭṭati.

**102. Ittaroti** appamattako; katipāhameva vāso bhavissatīti attho.

**103. Ogaṇenāti** parihīnagaṇena; appamattakena bhikkhusaṅghenāti attho. **Abyattena yāvajīvanti** ettha sacāyam vuḍḍhataram ācariyam na labhati, upasampadāya saṭṭhivasso vā sattativasso vā hotu,

navakatarassāpi byattassa santike ukkuṭikaṃ nisīditvā añjaliṃ paggahetvā “ācariyo me āvuso hohi, āyasmato nissāya vacchāmi”’ti evaṃ tikkhattuṃ vatvā nissayo gahetabbova. Gāmapavesanaṃ āpucchantenāpi ukkuṭikaṃ nisīditvā añjaliṃ paggahetvā gāmapavesanaṃ āpucchāmi ācariyā”’ti vattabbaṃ. Esa nayo sabbaāpucchanesu. Pañcakachakkesu cettha yattakaṃ suttaṃ nissayamuttakassa icchitabbaṃ, taṃ bhikkhunovādakavaṇṇanāyaṃ vuttaṃ. Tassa natthitāya ca **appassuto**; atthitāya ca **bahussutoti** veditabbo. Sesamaṃ vuttanayeneva.

Kammārabhaṇḍuvatthādīkathā niṭṭhitā.

### Rāhulavatthukathā

#### 105. Yena kapilavatthu tena cārikaṃ pakkāmi ettha ayaṃ anupubbikathā.

Suddhodanamahārājā kira bodhisattassa abhinikkhamanadivasato paṭṭhāya “mama putto buddho bhavissāmīti nikkhanto, jāto nu kho buddho”’ti pavattisavanatthaṃ ohitasotova viharati. So bhagavato padhānacariyañca sambodhiñca dhammacakkappavattanādīni ca suṇanto “idāni kira me putto rājagahaṃ upanissāya viharatī”’ti sutvā ekaṃ amaccaṃ āṇāpesi – “ahaṃ tāta vuḍḍho mahallako, sādhu me jīvantasseva puttaṃ dassēhī”’ti. So “sādhu”’ti paṭissuṇitvā purisasahassaparivāro rājagahaṃ gantvā bhagavato pāde vanditvā nisīdi. Athassa bhagavā dhammakathaṃ kathesi, so pasīditvā pabbajjañceva upasampadañca yāci. Tato namaṃ bhagavā ehibhikkhūpasampadāya upasampādesi, so saporiso arahattaṃ patvā tattheva phalasaṃpattisukhaṃ anubhavamāno vihāsi. Rājā teneva upāyena aparepi attha dūte pahīni, tepi sabbe saporisā tattheva arahattaṃ patvā tattheva viharīṃsu. “Iminā nāma kāraṇena te nāgacchantī”’ti rañño koci pavattimattampi ārocento natthi.

Atha rājā bodhisattena saddhiṃ ekadivasamaṃjātaṃ kāludāyīṃ nāma amaccaṃ pahīnitukāmo purimanayeneva yāci, so “sace ahaṃ pabbajitūṃ labhāmi, dassessāmi”’ti āha. Taṃ rājā “pabbajitvāpi me puttaṃ dassēhī”’ti pahīni; sopi purisasahassaparivāro gantvā tattheva saporivāro arahattaṃ pāpuṇi. So ekadivasamaṃ sambhatesu sabbasassesu viṣaṭṭhakammantesu janapadamanussesu pupphitesu thalajalajapupphesu paṭipajjanakkhame magge bhagavantaṃ vanditvā saṭṭhimattāhi gāthāhi gamanavaṇṇamaṃ vaṇṇesi. Bhagavā “kimeta”’nti pucchi. “Bhante tumhākaṃ pitā suddhodanamahārājā mahallakomhi, jīvantasseva me puttaṃ dassēhī”’ti maṃ pesesi, sādhu bhante bhagavā nītakānaṃ saṅghaṃ karotu, kālo cārikaṃ pakkamitunti. Tena hi saṅghassa ārocehi, “bhikkhū gamiyavattaṃ pūressantī”’ti. “Sādhu bhante”’ti therō tathā akāsi. Bhagavā āngamagadhavāsīnaṃ kulaputtānaṃ dasahi sahassehi kapilavatthuvāsīnaṃ dasahīti sabbeheva vīsatisahassehi khīṇāsavehi parivuto rājagahā nikkhamitvā rājagahato saṭṭhiyojanikaṃ kapilavatthuṃ divase divase yojanaṃ gacchanto dvīhi māsehi pāpuṇissāmīti aturita-cārikaṃ pakkāmi. Tena vuttaṃ – “yena kapilavatthu tena cārikaṃ pakkāmi”’ti.

Evaṃ pakkante ca bhagavati udāyitthero nikkhantadivasato paṭṭhāya suddhodanamahārājassa gehe bhattakiccaṃ karoti. Rājā theramaṃ parivisitvā pattaṃ gandhacūṇṇena ubbaṭṭetvā uttamabhōjanassa pūretvā “bhagavato dehī”’ti therassa hatthe ṭhapeti. Theropi tattheva karoti. Iti bhagavā antarāmagge rañño yeva piṇḍapātaṃ paribhuñji. Theropi ca bhattakiccāvasāne divase divase rañño āroceti “ajja bhagavā ettakaṃ āgato”’ti, buddhaguṇapaṭisaṃyuttāya ca kathāya sākiyānaṃ bhagavati saddhaṃ uppādesi. Teneva namaṃ bhagavā “etadaggaṃ, bhikkhave, mama sāvakānaṃ bhikkhūnaṃ kulappasādakānaṃ yadidaṃ kāludāyī”’ti etadagge ṭhapesi.

Sākiyāpi kho anuppatte bhagavati “amhākaṃ nītisēṭṭhaṃ passissāmā”’ti sannipatitvā bhagavato vasanaṭṭhānaṃ vīmaṃsamānā nigrodhasakkassa āraṃmo ramaṇīyoti sallakkhetvā tattha sabbaṃ paṭijaggaṇavidhiṃ kāretvā gandhapupphādīhatthā paccuggamaṇaṃ karontā sabbālaṅkārapaṭimaṇḍite daharadahare nāgarikadārake ca dārikāyo ca paṭhamaṃ pahīniṃsu, tato rājakumāre ca rājakumārikāyo ca tesamaṃ anantarā sāmaṃ gantvā gandhapupphacūṇṇādīhi pūjayamānā bhagavantaṃ gahetvā nigrodhārāmameva agamaṃsu. Tatra bhagavā vīsatisahasakhīṇāsavaparivuto paññattavarabuddhāsane nisīdi. Sākiyā mānājātikā mānathaddhā, te “siddhatthakumāro amhehi daharatarova amhākaṃ kaniṭṭho,

bhāgineyyo, putto, nattā”ti cintetvā daharadahare rājakumāre āhaṃsu – “tumhe vandatha, mayaṃ tumhākaṃ piṭṭhito nisīdissāmā”ti.

Tesu evaṃ nisinnesu bhagavā tesam ajjhāsayaṃ oloketvā “na maṃ ñātī vandanti, handa ne vandāpayissāmī”ti abhiññāpādakaṃ catutthajjhānaṃ samāpajjitvā vuṭṭhāya iddhiyā ākāsaṃ abbhuggantvā tesam sīse pādapaṃsum okiramāno viya kaṇḍambamūle yamakapāṭihāriyasadisam pāṭihāriyamakāsi. Rājā taṃ acchariyaṃ disvā āha – “bhagavā tumhākaṃ maṅgaladivase brāhmaṇassa vandanatthaṃ upanītānaṃ pāde vo parivattitvā brāhmaṇassa matthake patiṭṭhite disvāpi ahaṃ tumhe vandim, ayaṃ me paṭhamavandanā. Vappamaṅgaladivase jambucchāyāya sirisayane nipannānaṃ vo jambucchāyāya aparivattanaṃ disvāpi pāde vandim, ayaṃ me dutiyavandanā. Idāni imaṃ aditṭhapubbaṃ pāṭihāriyaṃ disvāpi tumhākaṃ pāde vandāmi, ayaṃ me tatiyavandanā”ti.

Suddhodanamahārājena pana vandite bhagavati avanditvā ṭhito nāma ekasākiyopi nāhosi, sabbeyeva vandimsu. Iti bhagavā ñātayo vandāpetvā ākāsaṃ oruyha paññatte āsane nisīdi. Nisinne bhagavati sikhāppatto ñāṭisamāgamo ahoṣi, sabbe ekaggā sannipatimsu. Tato mahāmegho pokkharavassaṃ vassi, tambavaṇṇamudakaṃ heṭṭhā viravantaṃ gacchati. Kassaci sarīre ekabindumattampi na patati, taṃ disvā sabbe acchariyabbhutajātā ahesuṃ. Bhagavā “na idāneva mayhaṃ ñāṭisamāgame pokkharavassaṃ vassati, atītepi vassī”ti imissā aṭṭhuppattiyā vessantarajātaṃ kathesi. Dhammadesanaṃ sutvā sabbe uṭṭhāya vanditvā padakkhiṇaṃ katvā pakkamimsu. Ekopi rājā vā rājamaḥamatto vā “sve amhākaṃ bhikkhaṃ gaṇhathā”ti vatvā gato nāma natthi.

Bhagavā dutiyadivase vīsati bhikkhusahassaparivāro kapilavatthum piṇḍāya pāvisi, na koci paccuggantvā nimantesi vā pattaṃ vā aggahesi. Bhagavā indakhīle ṭhito āvajjesi – “kathaṃ nu kho pubbe buddhā kulanagare piṇḍāya carimsu, kiṃ uppaṭipāṭiyā issarajanānaṃ gharāni agamaṃsu, udāhu sapaḍānacārikaṃ carimsu”ti. Tato ekabuddhassapi uppaṭipāṭiyā gamanaṃ adisvā “mayāpi idāni ayameva vaṃso ayaṃ pavenī paggahetabbā, āyatiṅca me sāvakāpi mameva anusikkhantā piṇḍacāriyavattaṃ pūressanti”ti koṭiyaṃ nivīṭṭhagehato paṭṭhāya sapaḍānaṃ piṇḍāya carati. “Ayyo kira siddhatthakumāro piṇḍāya caratī”ti catubhūmakādisu pāsādesu sīhapañjaraṃ vivaritvā mahājano dassanabyāvaṭo ahoṣi. Rāhulamātāpi devī “ayyaputto kira imasmimyeva nagare mahatā rājānubhāvena suvaṇṇasivikādīhi vicaritvā idāni kesamassuṃ ohāretvā kāsāyavattavasano kapālahattho piṇḍāya carati, “sobhati nu kho no vā”ti sīhapañjaraṃ vivaritvā olokayamānā bhagavantaṃ nānavirāgasamujjalāya sarīrappabhāya nagaravīthiyo obhāsetvā buddhasiriyā virocamaṇaṃ disvā uṇhīsato paṭṭhāya yāva pādatalā narasīhagāthāhi nāma aṭṭhahi gāthāhi abhitthavitvā rañño santikaṃ gantvā “tumhākaṃ putto piṇḍāya caratī”ti rañño ārocesi. Rājā saṃviggahadayo hatthena sātakaṃ saṅṭhāpayamāno turitaturitaṃ nikkhamitvā vegena gantvā bhagavato purato ṭhatvā āha – “kiṃ bhante amhe lajjāpetha, kimatthaṃ piṇḍāya caratha, kiṃ ettakānaṃ bhikkhūnaṃ na sakkā bhattaṃ laddhanti evaṃsaññino ahuvatthā”ti. Vaṃsacārittametaṃ mahārāja amhākanti. Nanu bhante amhākaṃ mahāsammatakhattiyavaṃso nāma vaṃso, tattha ca ekakhattiyopi bhikkhācāro nāma natthīti. Ayaṃ mahārāja vaṃso nāma tava vaṃso, amhākaṃ pana buddhavaṃso vaṃso nāma, sabbabuddhā ca piṇḍacārikā ahesunti antaravīthiyaṃ ṭhitova

“Uttiṭṭhe nappamajjeyya, dhammaṃ sucaritaṃ care;  
Dhammacārī sukhaṃ seti, asmiṃ loke paramhi cā”ti.

Imaṃ gāthamāha. Gāthāpariyosāne rājā sotāpattiphalaṃ sacchākāsi.

“Dhammaṃ care sucaritaṃ, na maṃ duccharitaṃ care;  
Dhammacārī sukhaṃ seti, asmiṃ loke paramhi cā”ti.

Imaṃ pana gāthaṃ sutvā sakadāgāmiphale patiṭṭhāsi, dhammapālajātakaṃ sutvā anāgāmiphale patiṭṭhāsi, maraṇasamaye setacchattassa heṭṭhā sirisayane nipannoyeva arahattaṃ pāpuṇi. Araññavāsena

padhānānuyogakiccaṃ rañño nāhosi.

Sotāpattiṭṭhalañca sacchikatvā eva pana bhagavato pattamaṃ gahetvā sapaṛisaṃ bhagavantaṃ mahāpāsādaṃ āropetvā paṇītena khādanīyena bhojanīyena parivisi. Bhattakiccāvasāne sabbaṃ itthāgāraṃ āgantvā bhagavantaṃ vandi ṭhapetvā rāhulamātaraṃ. Sā pana “gaccha ayyaputtaṃ vandāhi”ti pariṇāna vuccamānāpi “sace mayhaṃ guṇo atthi, sayameva ayyaputto āgamissati, āgataṃ naṃ vandissāmi”ti vatvā na agamāsi. Atha bhagavā rājānaṃ pattamaṃ gāhāpetvā dvīhi aggasāvakehi saddhiṃ rājadhītāya sirigabbhaṃ gantvā “rājadhītā yathāruciyā vandamānā na kiñci vattabbā”ti vatvā paññatte āsane nisīdi. Sā vegena āgantvā gopphakesu gahetvā pādapiṭṭhiyaṃ sīsaṃ parivattetvā parivattetvā yathājjhāsayamaṃ vandi.

Rājā rājadhītāya bhagavati sinehabahumānādiguṇasampattiṃ kathesi. Bhagavā “anacchariyaṃ mahārāja yaṃ idāni paripakke ñāṇe tayā rakkhiyamānā rājadhītā attānaṃ rakkhi, sā pubbe anārakkhā pabbatāpāde vicaramānā aparipakke ñāṇe attānaṃ rakkhi”ti vatvā candakinnarijātakamaṃ kathesi.

Tamaṃdivasameva ca nandarājakumārassa kesavissajjanaṃ paṭṭabandho ghamaṅgalaṃ āvāhamaṅgalaṃ chattaṃgalaṃ pañca mahāmaṅgalāni honti. Bhagavā nandaṃ pattamaṃ gāhāpetvā maṅgalaṃ vatvā uṭṭhāyāsanaṃ pakkāmi. Janapadakalyāṇī kumāraṃ gacchantaṃ disvā “tuvaṃ kho ayyaputta āgaccheyyāsi”ti vatvā gīvaṃ pasāretvā olokesi. Sopi bhagavantaṃ “pattamaṃ gaṇhathā”ti vattamaṃ avisahamaṇo vihāraṃyeva agamāsi. Tamaṃ anicchamaṇaṃyeva bhagavā pabbājesi. Iti bhagavā kapilapuraṃ āgantvā dutiyadivase nandaṃ pabbājesi.

Sattame divase rāhulamātā kumāraṃ alaṅkaritvā bhagavato santikaṃ pesesi – “passa tāta etaṃ vīsatisahassasamaṇaparivutaṃ suvaṇṇavaṇṇaṃ brahmarūpavaṇṇaṃ samaṇaṃ, ayaṃ te pitā, etassa mahantā nidhaya ahesuṃ, tyassa nikkhamaṇato paṭṭhāya na passāma, gaccha naṃ dāyajjaṃ yāca, ahaṃ tāta kumāro chattaṃ ussāpetvā cakkavattī bhavissāmi, dhanena me attho, dhanamaṃ me dehi, sāmiko hi putto pitusantakassā”ti. Rāhulakumāro bhagavato santikaṃ gantvāva pitusinehaṃ paṭilabhitvā haṭṭhacitto “sukhā te samaṇa chāyā”ti vatvā aññampi bahuṃ attano anurūpaṃ vadanto aṭṭhāsi. Bhagavā katabhattakicco anumodanaṃ katvā uṭṭhāyāsanaṃ pakkāmi. Kumāropi “dāyajjaṃ me samaṇa dehi, dāyajjaṃ me samaṇa dehi”ti bhagavantaṃ anubandhi. Tena vuttaṃ – “anupubbena cārikaṃ caramāno yena kapilavatthu...pe... dāyajjaṃ me samaṇa dehi”ti.

**Atha kho bhagavā āyasmantaṃ sārīputtaṃ āmantesi**ti bhagavā kumāraṃ na nivattāpesi, pariṇānopi bhagavatā saddhiṃ gacchantaṃ nivattetaṃ na viśahati. Atha ārāmaṃ gantvā “yaṃ ayaṃ pitusantakamaṃ dhanamaṃ icchati, taṃ vaṭṭānugataṃ savighātakamaṃ, handassa bodhimaṇḍe paṭiladdhaṃ sattavidhaṃ ariyadhanaṃ demi, lokuttaradāyajjassa naṃ sāmikaṃ karomī”ti āyasmantaṃ sārīputtaṃ āmantesi. Āmantetvā ca paṇāha – “tena hi tvaṃ sārīputta rāhulakumāraṃ pabbājehī”ti. Yaṃ ayaṃ dāyajjaṃ yācati, tasmā naṃ lokuttaradāyajjapaṭilābhāya pabbājehīti attho.

Idāni yā sā bhagavatā bārāṇasiyaṃ tīhi saraṇagamaṇehi pabbajjā ca upasampadā ca anuññātā, tato yaṃ upasampadaṃ paṭikkhipitvā garubhāve ṭhapetvā ñatticatutthena kammaṇa upasampadā anuññātā, pabbajjā pana neva paṭikkhittā, na puna anuññātā, tasmā anāgate bhikkhūnaṃ vimati uppajjissati – “ayaṃ pabbajjā nāma pubbe upasampadāsadisā, kiṃ nu kho idānipi upasampadā viya kammavācāya eva kattabbā, udāhu saraṇagamaṇehi”ti. Imañca panatthaṃ viditvā bhagavā puna tīhi saraṇagamaṇehi sāmaṇerapabbajjaṃ anujānītukāmo, tasmā dhammasenāpati taṃ bhagavato ajjhāsayamaṃ viditvā bhagavantaṃ puna pabbajjaṃ anujānīpetukāmo āha – “**kathāhaṃ bhante rāhulakumāraṃ pabbājemī**”ti.

**Atha kho āyasmā sārīputto rāhulakumāraṃ pabbājesīti** kumārassa mahāmogallānatthero kese chinditvā kāsāyāni datvā saraṇāni adāsi. Mahākassapatthero ovādācariyo ahoṣi. Yaṃ ayaṃ upajjhāyamūlakā pabbajjā ca upasampadā ca, upajjhāyova tattha issaro, na ācariyo, tasmā vuttaṃ –

“atha kho āyasmā sārīputto rāhulakumāraṃ pabbājesī”ti.

Evam “kumāro pabbajito”ti sutvā uppannasamvegena hadayena **atha kho suddhodano sakkoti** sabbaṃ vattabbaṃ. Tattha yasmā uñchācariyāya jīvato pabbajitassa avisesena “varam yācāmi”ti vutte “yācassū”ti vacanaṃ appatirūpaṃ, na ca buddhānaṃ āciṇṇaṃ, tasmā “atikkantavarā kho gotama tathāgatā”ti vuttaṃ. **Yañca bhante kappati yañca anavajjanti** yaṃ tumhākañceva dātuṃ kappati, anavajjañca hoti, mama ca sampaṭicchanaṃ paccayā viññūhi na garahitabbaṃ, taṃ yācāmīti attho. **Tathā nande adhimattaṃ rāhuleti** yatheva kira bodhisattaṃ evaṃ nandampi rāhulampi maṅgaladivase nemittakā “cakkavattī bhavissatī”ti byākariṃsu. Atha rājā “puttassa cakkavattisiriṃ passissāmi”ti ussāhajāto bhagavato pabbajjāya mahantaṃ icchāvighātaṃ pāpuṇi. Tato “nandassa cakkavattisiriṃ passissāmi”ti ussāhaṃ janesi, tampi bhagavā pabbājesi. Iti tampi dukkhaṃ adhivāsetvā “idāni rāhulassa cakkavattisiriṃ passissāmi”ti ussāhaṃ janesi, tampi bhagavā pabbājesi. Tenassa “idāni kulavaṃsopi pacchinno, kuto cakkavattisiri”ti adhikataṃ dukkhaṃ uppajji. Tena vuttaṃ – “tathā nande adhimattaṃ rāhule”ti. Rañño pana ito pacchā anāgāmiṃ phalappatti veditabbā.

**Sādhu bhante ayyāti** idaṃ kasmā āha? So kira cintesi – “yatra hi nāma ahampi buddhamāmakko dhammamāmakko saṅghamāmakko samāno attano piyataraputte pabbājjīyamāne nātiviyogadukkhaṃ adhivāsetuṃ na sakkomi, aññe janā puttanaṃ takesu pabbājjitesu kathaṃ adhivāsesanti, tasmā aññesampi tāva evarūpaṃ dukkhaṃ mā aho”ti āha. Bhagavā “sāsane niyyānikakāraṇaṃ rājā vadatī”ti dhammakathaṃ katvā “**na bhikkhave ananuññāto mātāpitūhi putto pabbājetabbo**”ti sikkhāpadaṃ paññāpesi.

Tattha **mātāpitūhi** jananijanake sandhāya vuttaṃ. Sace dve atthi, dvepi āpucchitabbā. Sace pitā mato mātā vā, yo jīvati so āpucchitabbo. Pabbajitāpi āpucchitabbāva. Āpucchantena sayam vā gantvā āpucchitabbaṃ, añño vā pesetabbo, so eva vā pesetabbo “gaccha mātāpitāro āpucchitvā ehi”ti. Sace “anuññātomhi”ti vadati, saddahantena pabbājetabbo. Pitā sayam pabbajito puttampi pabbājetukāmo hoti, mātaram āpucchitvāva pabbājetu. Mātā vā dhītaram pabbājetukāmā, pītaram āpucchitvāva pabbājetu. Pitā puttadārena anattiko palāyi, mātā “imaṃ pabbājethā”ti puttam bhikkhūnaṃ deti, “pitāssa kuhi”nti vutte “cittakeliyaṃ kīlitaṃ palāto”ti vadati, taṃ pabbājetuṃ vaṭṭati. Mātā kenaci purisena saddhiṃ palātā hoti, pitā pana “pabbājethā”ti deti, etthāpi eseva nayo. Pitā vippavuttho hoti, mātā puttam “pabbājethā”ti anujānāti, “pitā tassa kuhi”nti vutte “kiṃ tumhākaṃ pītārā, ahaṃ jānissāmi”ti vadati, pabbājetuṃ vaṭṭatīti kurundiyaṃ vuttaṃ.

Mātāpitāro matā, dārako cūlamātādīnaṃ santike samvaddho, tasmim pabbājjīyamāne nātakā kalahaṃ vā karonti, khiyyanti vā, tasmā vivādupacchedanattaṃ āpucchitvāva pabbājetabbo. Anāpucchā pabbājentassa pana āpatti natthi. Daharakāle gahetvā posanakā mātāpitāro nāma honti, tesupi eseva nayo. Putto attānaṃ nissāya jīvati, na mātāpitāro. Sacepi rājā hoti, āpucchitvāva pabbājetabbo. Mātāpitūhi anuññāto pabbajitvā puna vibbhamati, sacepi satakkhattuṃ pabbajitvā vibbhamati, āgatāgatakāle punappunaṃ āpucchitvāva pabbājetabbo. Sace evaṃ vadanti – “ayaṃ vibbhamitvā geḥaṃ āgato amhākaṃ kammaṃ na karoti, pabbajitvā tumhākaṃ vattaṃ na pūreti, natthi imassāpucchanaṃ kiccaṃ, āgatāgataṃ pabbājeyyāthā”ti evaṃ nissatṭhaṃ puna anāpucchāpi pabbājetuṃ vaṭṭati.

Yopi daharakāleyeva “ayaṃ tumhākaṃ dinno, yadā icchatha, tadā pabbājeyyāthā”ti evaṃ dinno hoti, sopi āgatāgato puna anāpucchāva pabbājetabbo. Yaṃ pana daharakāleyeva “imaṃ bhante pabbājeyyāthā”ti anujānitvā pacchā vuḍḍhippattakāle nānujānanti, ayaṃ na anāpucchā pabbājetabbo. Eko mātāpitūhi saddhiṃ bhaṇḍitvā “pabbājetha ma”nti āgacchati, “āpucchitvā ehi”ti ca vutto “nāhaṃ gacchāmi, sace maṃ na pabbājetha, vihāraṃ vā jhāpemi, satthena vā tumhe paharāmi, tumhākaṃ nātakaupaṭṭhākānaṃ vā āramacchedanādīhi anattaṃ uppādemī, rukkhā vā patitvā marāmi, coramajjhaṃ vā pavissāmi, desantaram vā gacchāmi”ti vadati, taṃ jīvāsseva rakkhaṇatthāya pabbājetuṃ vaṭṭati. Sace panassa mātāpitāro āgantvā “kasmā amhākaṃ puttam pabbājayitthā”ti vadanti, tesam tamattaṃ

ārocetvā “rakkhaṇatthāya naṃ pabbājayimha, paññāyatha tumhe puttenā”ti vattabbā. “Rukkhā patissāmi”ti āruhitvā pana hatthapāde muñcantam pabbājetum vaṭṭatiyeva.

Ekopi videsam gantvā pabbajjam yācati, āpucchitvā ce gato, pabbājetabbo. No ce daharabhikkhum pesetvā āpucchāpetvā pabbājetabbo, atidūrañce hoti; pabbājetvāpi bhikkhūhi saddhim pesetvā dassetum vaṭṭati. Kurundiyam pana vuttam – “sace dūram hoti maggo ca mahākantāro, ‘gantvā āpucchissāmā’ti pabbājetum vaṭṭati”ti. Sace pana mātāpitūnam bahū puttā honti, evañca vadanti – “bhante etesam dāraṇānam yaṃ icchatha, tam pabbājeyyāthā”ti. Dāraṇe vīmaṃsitvā yaṃ icchati, so pabbājetabbo. Sacepi sakalena kulena vā gāmena vā anuññātam hoti “bhante imasmim kule vā gāme vā yaṃ icchatha, tam pabbājeyyāthā”ti. Yaṃ icchati, so pabbājetabboti.

**Yāvatake vā pana ussahatīti yattake sakkoti.**

Rāhulavatthukathā niṭṭhitā.

### Sikkhāpadadaṇḍakammavattukathā

**106.** Dasasu sikkhāpadesu purimānam pañcannaṃ atikkamo nāsanavatthu, pacchimānam atikkamo daṇḍakammavattu.

**107. Appatissāti** bhikkhū jeṭṭhakaṭṭhāne issariyaṭṭhāne na ṭhapenti. **Asabhāgavuttikāti** samānajīvikā na bhavanti, visabhāgajīvikāti attho. **Alābhāya parisakkatīti** yathā lābham na labhanti; evaṃ parakkamati. **Anatthāyāti** upaddavāya. **Avāsāyāti** “kinti imasmim āvāse na vaseyyu”nti parakkamati. **Akkosati paribhāsātīti** akkosati ceva bhayadassanena ca tajjeti. **Bhedetīti** pesuññaṃ upasaṃharitvā bhedeti. **Āvaraṇam kātuntī** “mā idha pavisā”ti nivāraṇam kātuṃ. **Yattha vā vasati yattha vā paṭikkamatīti** yattha vasati vā pavisati vā; ubhayenāpi attano pariveṇaṇca vassaggena pattasenāsanāṇca vuttam.

**Mukhadvārikam āhāram āvaraṇam karontīti** “ajja mā khāda, mā bhuñjā”ti evaṃ nivārenti. **Na bhikkhave mukhadvāriko āhāro āvaraṇam kātabboti** ettha “mā khāda, mā bhuñjā”ti vadatopi “āhāram nivāressāmi”ti pattacīvaraṃ anto nikkhipatopi sabbapayogesu dukkaṭam. Anācārassa pana dubbacasāmaṇerassa daṇḍakammaṃ katvā yāguṃ vā bhattam vā pattacīvaraṃ vā dassetvā “ettake nāma daṇḍakamme āhaṭe idaṃ lacchasi”ti vattum vaṭṭati. Bhagavatā hi āvaraṇameva daṇḍakammaṃ vuttam. Dhammasaṅgāhakattherehi pana aparādhānurūpaṃ udakadāruvālikādīnam āharāpanampi kātabbanti vuttam, tasmā tampi kātabbam. Tañca kho “oramissati viramissati”ti anukampāya, na “nassissati vibbhamissati”tiādīnappavattena pāpajjhāsayena “daṇḍakammaṃ karomī”ti ca uṇhapāsāṇe vā nipajjāpetum pāsāniṭṭhakādīni vā sīse nikkhipāpetum udakam vā pavesetum na vaṭṭati.

Sikkhāpadadaṇḍakammavattukathā niṭṭhitā.

### Anāpucchāvaraṇavattuādīkathā

**108. Na bhikkhave upajjhāyam anāpucchāti** ettha “tumhākaṃ sāmaṇerassa ayaṃ nāma aparādhō, daṇḍakammamassa karothā”ti tikkhattum vutte, sace upajjhāyo daṇḍakammaṃ na karoti, sayam kātuṃ vaṭṭati. Sacepi āditova upajjhāyo vadati “mayham sāmaṇerānam dose satī tumhe daṇḍakammaṃ karothā”ti kātuṃ vaṭṭatiyeva. Yathā ca sāmaṇerānam evaṃ saddhivihārikantevāsīkānampi daṇḍakammaṃ kātuṃ vaṭṭati.

**Apalāletīti** “tumhākaṃ pattam dassāma, cīvaraṃ dassāmā”ti attano upaṭṭhānakaraṇattham saṅgaṇhanti. **Na bhikkhave aññassa parisā apalāletabbāti** ettha sāmaṇerā vā hontu upasaṃpannā vā, antamaso dussīlabhikkhussāpi parassa parisabhūte bhinditvā gaṇhitum na vaṭṭati, ādīnaṃ pana vattum

vaṭṭati “tayā nhāyitum āgatenā gūthamakkhanam viya katam dussīlam nissāya viharantenā”ti. Sace so sayameva jānitvā upajjham vā nissayam vā yācati, dātum vaṭṭati.

### **Anujānāmi bhikkhave dasahaṅgehi samannāgataṃ sāmaṇeraṃ nāsetunti ettha**

kaṅṭakasikkhāpadavaṇṇanāyaṃ vuttāsu tīsu nāsanāsu liṅganāsanāva adhippetā, tasmā yo pāṇātipātādīsu ekampi kammaṃ karoti, so liṅganāsanāya nāsetabbo. Yathā ca bhikkhūnaṃ pāṇātipātādīsu nānāpattiyō honti, na tathā sāmaṇerānaṃ. Sāmaṇero hi kunthakipillikampi māretvā maṅguraṇḍakampi bhinditvā nāsetabbatameva pāpuṇāti, tāvadevassa saraṇagamanāni ca upajjhāyaggahaṇaṇca senāsanaggāho ca paṭippassambhati, saṅghalābham na labhati, liṅgamattameva ekaṃ avasiṭṭham hoti. So sace ākiṇṇadosova hoti, āyatim saṃvare na tiṭṭhati, nikkadḍhitabbo. Atha sahasā virajjhivā “duṭṭhu mayā kata”nti puna saṃvare ṭhātukāmo hoti, liṅganāsanakiccaṃ natthi. Yathānivatthapārutasseva saraṇāni dātabbāni, upajjhāyo dātabbo, sikkhāpadāni pana saraṇagamaneneva ijjhanti. Sāmaṇerānaṃhi saraṇagamanam bhikkhūnam upasampadakkammavācāsadisam, tasmā bhikkhūnam viya catupārisuddhisīlam, imināpi dasasīlāni samādinnāneva honti, evam santepi dalhīkaraṇattham āyatim saṃvare paṭiṭṭhāpanattham puna dātabbāni. Sace purimikāya puna saraṇāni gahitāni, pacchimikāya vassāvāsikam lacchati. Sace pacchimikāya gahitāni, saṅghena apaloketvā lābho dātabbo.

Adinnādāne tiṇasalākamattenāpi vatthunā, abrahmacariye tīsu maggesu yattha katthaci vipaṭṭipattiyā, musāvāde hassādhippāyatāyapi musā bhaṇite assamaṇo hoti, nāsetabbatam āpajjati. Majjapāne pana bhikkhuno ajānitvāpi bījato paṭṭhāya majjam pivantassa pācittiyam. Sāmaṇero jānitvā pivanto sīlabhedam āpajjati, na ajānitvā. Yāni panassa itarāni pañca sikkhāpadāni, tesu bhinnesu na nāsetabbo, daṇḍakammaṃ kātabbam. Sikkhāpade pana puna dinnepi adinnepi vaṭṭati. Daṇḍakammaṃ pana pīletvā āyatim saṃvare ṭhapanatthāya dātabbameva. Sāmaṇerānam majjapānam sacittakam pārājikavatthu, ayam viseso.

Avanṇabhāsane pana araham sammāsambuddhotiādīnam paṭipakkhavasena buddhassa vā, svākkhātōtiādīnam paṭipakkhavasena dhammassa vā, suppaṭipannotiādīnam paṭipakkhavasena saṅghassa vā avanṇam bhāsanto ratanattayam nindanto garahanto ācariyupajjhāyādīhi “mā evam avacā”ti avanṇabhāsane ādīnavam dassetvā nivāretabbo. Sace yāvatatiyam vuccamāno na oramati, kaṅṭakanāsanāya nāsetabboti kurundiyam vuttam. Mahāaṭṭhakathāyaṃ pana “sace evam vuccamāno tam laddhim nissajjati, daṇḍakammaṃ kāretvā accayam desāpetabbo. Sace na nissajjati, tatheva ādāya paggayha tiṭṭhati, liṅganāsanāya nāsetabbo”ti vuttam, tam yuttam. Ayameva hi nāsanā idha adhippetāti.

Micchādīṭṭhikepi eseva nayo. Sassatucchedānaṃhi aññataradīṭṭhiko sace ācariyādīhi ovadiyamāno nissajjati, daṇḍakammaṃ kāretvā accayam desāpetabbo. Appaṭinissajjantova nāsetabboti. Bhikkhunidūsako cettha kāmam abrahmacāriggahaṇena gahitova abrahmacārim panā āyatim saṃvare ṭhātukāmaṃ saraṇāni datvā upasampādetum vaṭṭati. Bhikkhunidūsako āyatim saṃvare ṭhātukāmopi pabbajjampi na labhati, pageva upasampadanti etamattham dassetum “bhikkhunidūsako”ti idam visum dasamam aṅgam vuttanti vedītabbam.

Anāpucchāvaraṇavatthuādīkathā niṭṭhitā.

### **Paṇḍakavatthukathā**

**109. Dahare dahareti taruṇe taruṇe. Moḷigalleti thūlasarīre. Hatthibhaṇḍe assabhaṇḍeti** hatthigopake ca assagopake ca.

**Paṇḍako bhikkhaveti ettha āsittapaṇḍako usūyapaṇḍako opakkamikapaṇḍako pakkhapaṇḍako** napuṃsakapaṇḍakoti pañca paṇḍakā. Tattha yassa paresam aṅgajātam mukhena gahetvā asucinā āsittassa pariḷāho vūpasammati, ayam āsittapaṇḍako. Yassa paresam ajjhācāram passato usūyāya uppannāya pariḷāho vūpasammati, ayam usūyapaṇḍako. Yassa upakkamena bījāni apanītāni, ayam



opakkamikapaṇḍako. Ekacco pana akusalavipākānubhāvena kāḷapakkhe paṇḍako hoti, juṇhapakkhe panassa pariḷāho vūpasammāti, ayaṃ pakkhapaṇḍako. Yo pana paṭisandhiyaṃyeva abhāvako uppanno, ayaṃ napuṃsakapaṇḍakoti. Tesu āsittapaṇḍakassa ca usūyapaṇḍakassa ca pabbajjā na vāritā, itaresaṃ tiṇṇaṃ vāritā. Tesupi pakkhapaṇḍakassa yasmaṃ pakkhe paṇḍako hoti, tasmaṃyevassa pakkhe pabbajjā vāritāti kurundiyaṃ vuttaṃ. Yassa cettha pabbajjā vāritā, taṃ sandhāya idaṃ vuttaṃ – “anupasampanno na upasampādetabbo upasampanno nāsetabbo”ti. Sopi liṅganāsaneneva nāsetabbo. Ito paraṃ “nāsetabbo”ti vuttessu eeva nayo.

Paṇḍavatthukathā niṭṭhitā.

### Theyyasaṃvāsakavatthukathā

**110. Purāṇakulaputtoti** purāṇassa anukkamena pārijuṇṇaṃ pattassa kulassa putto. Mātipakkhapitipakkhato kolaññā khīṇā vinaṭṭhā matā assāti **khīṇakolañño**. **Anadhigatanti** appattaṃ. **Phāṭimkānti** vaḍḍhetuṃ. **Iṅghāti** uyyojanathe nipāto. **Anuyūñjyamānoti** ekamantaṃ netvā kesamassuoropanakāsāyapaṭiggahaṇasaraṇagamaṇapajjhāyaggahaṇakammavācānissayadhamme pucchiyamāno. **Etamatthaṃ ārocesīti** etaṃ sayāṃ pabbajitabhāvaṃ ādito paṭṭhāya ācikkhi.

**Theyyasaṃvāsako bhikkhavi** ettha tayo theyyasaṃvāsakā – liṅgathenako, saṃvāsathenako, ubhayathenakoti. Tattha yo sayāṃ pabbajitvā vihāraṃ gantvā na bhikkhuvassāni gaṇeti, na yathāvuḍḍhaṃ vandanaṃ sādīyati, na āsanena paṭibāhati, na uposathapavāraṇādīsu sandissati, ayaṃ liṅgamattasseva thenitattā liṅgathenako nāma.

Yo pana bhikkhūhi pabbājito sāmaṇero samānopi videsaṃ gantvā “ahaṃ dasavasso vā vīsativasso vā”ti musā vatvā bhikkhuvassāni gaṇeti, yathāvuḍḍhaṃ vandanaṃ sādīyati, āsanena paṭibāhati, uposathapavāraṇādīsu sandissati, ayaṃ saṃvāsamattasseva thenitattā saṃvāsathenako nāma. Bhikkhuvassagaṇanādiko hi sabbopi kiriyabhedo imasmiṃ atthe “saṃvāso”ti veditabbo. Sikkhaṃ paccakkhāya “na maṃ koci jānāti”ti evaṃ paṭipajjantepi eeva nayo.

Yo pana sayāṃ pabbajitvā vihāraṃ gantvā bhikkhuvassāni gaṇeti, yathāvuḍḍhaṃ vandanaṃ sādīyati, āsanena paṭibāhati, uposathapavāraṇādīsu sandissati, ayaṃ liṅgassa ceva saṃvāsassa ca thenitattā ubhayathenako nāma. Ayaṃ tividhopi theyyasaṃvāsako anupasampanno na upasampādetabbo, upasampanno nāsetabbo, puna pabbajjaṃ yācantopi na pabbājetabbo.

Ettha ca asammohatthaṃ idaṃ pakiṇṇakaṃ veditabbaṃ –

“Rājadubbhikkhakantāra-roga-veribhayehi vā;  
Cīvarāharaṇatthaṃ vā, liṅgaṃ ādiyatīdha yo.

Samvāsam nādhivāseti, yāva so suddhamānaso;  
Theyyasaṃvāsako nāma, tāva esa na vuccatī”ti.

Tatrāyaṃ vitthāranayo – idhekaccassa rājā kuddho hoti, so “evaṃ me sotthi bhavissatī”ti sayameva liṅgaṃ gahetvā palāyati. Taṃ disvā rañño ārocenti. Rājā “sace pabbājito, na taṃ labbhā kiñci kātu”nti tasmaṃ kodhaṃ paṭivineti, so “vūpasantaṃ me rājabhaya”nti saṅghamaṃjhaṃ anosarivāva gihiliṅgaṃ gahetvā āgato pabbājetabbo. Athāpi “sāsaṃ nissāya mayā jīvitam laddhaṃ, handa dāni ahaṃ pabbajāmī”ti upannasaṃvego teneva liṅgena āgantvā āgantukavattaṃ na sādīyati, bhikkhūhi puṭṭho vā apuṭṭho vā yathābhūtamattānaṃ āvikatvā pabbajjaṃ yācati, liṅgaṃ apanetvā pabbājetabbo. Sace pana vattaṃ sādīyati, pabbajitālayaṃ dasseti, sabbam pubbe vuttaṃ vassagaṇanādibhedam vidhim paṭipajjati, ayaṃ na pabbājetabbo.

Idha panekacco dubbhikkhe jīvitum asakkonto sayameva līngam gahetvā sabbapāsaṇḍiyabhattāni bhujjanto dubbhikkhe vītivatte saṅghamajjham anosarivāva gihilīngam gahetvā āgatoti sabbam purimasadisameva.

Aparo mahākantāram nittharitikāmo hoti, satthavāho ca pabbajite gahetvā gacchati. So “evam mam satthavāho gahetvā gamissatī”ti sayameva līngam gahetvā satthavāhena saddhim kantāram nittharivā khemantaṃ patvā saṅghamajjham anosarivāva gihilīngam gahetvā āgatoti sabbam purimasadisameva.

Aparo rogabhaye uppane jīvitum asakkonto sayameva līngam gahetvā sabbapāsaṇḍiyabhattāni bhujjanto rogabhaye vūpasante saṅghamajjham anosarivāva gihilīngam gahetvā āgatoti sabbam purimasadisameva.

Aparassa eko veriko kuddho hoti, ghātetukāmo naṃ vicarati, so “evam me sotthi bhavissatī”ti sayameva līngam gahetvā palāyati. Veriko “kuhim so”ti pariyesanto “pabbajitvā palāto”ti sutvā “sace pabbajito, na taṃ labbhā kiñci kātu”nti tasmim kodham paṭivineti. So “vūpasantaṃ me veribhaya”nti saṅghamajjham anosarivāva gihilīngam gahetvā āgatoti sabbam purimasadisameva.

Aparo ñātikulam gantvā sikkham paccakkhāya gihi hutvā “imāni cīvarāni idha vinassissanti, sacepi imāni gahetvā vihāram gamissāmi, antarāmagge mam ‘coro’ti gahessanti, yaṃnūnāham kāyaparihāriyāni katvā gaccheyya”nti cīvarāharaṇattham nivāsetvā ca pārupitvā ca vihāram gacchati. Taṃ dūratova āgacchantaṃ disvā sāmaṇerā ca daharā ca abbhuggacchanti, vattaṃ dassenti. So na sādiyati, yathābhūtamattānaṃ āvikaroti. Sace bhikkhū “na dāni mayaṃ taṃ muñcissāmā”ti balakkārena pabbājetukāmā honti, kāsāyāni apanetvā puna pabbājetabbo. Sace pana “nayime mama hīnāyāvattabhāvaṃ jānanti”ti taṃyeva bhikkhubhāvaṃ paṭijānitvā sabbam pubbe vuttaṃ vassagaṇanādibhedam vidhim paṭipajjati, ayam na pabbājetabbo.

Aparo mahāsāmaṇero ñātikulam gantvā uppabbajitvā kammantānuṭṭhānena ubbālho hutvā puna “dāni aham samaṇova bhavissāmi, theropi me uppabbajitabhāvaṃ na jānātī”ti tadeva pattacīvaraṃ ādāya vihāram āgacchati, nāpi tamattham bhikkhūnaṃ āroceti, sāmaṇerabhāvaṃ paṭijānāti, ayam theyyasamvāsakoyeva pabbajjam na labhati. Sacepissa līngaggahaṇakāle evam hoti, “nāham kassaci ārocessāmī”ti vihāraṇca gato āroceti, gahaṇeneva theyyasamvāsako. Athāpissa “gahaṇakāle ācikkhissāmī”ti cittaṃ uppannaṃ hoti, vihāraṇca gantvā “kuhim tvaṃ āvuso gato”ti vutto “na dāni mam ime jānanti”ti vañcetvā nācikkhati, “nācikkhissāmī”ti saha dhuranikkhepena ayampi theyyasamvāsakova. Sace panassa gahaṇakālepi “ācikkhissāmī”ti cittaṃ uppannaṃ hoti, vihāram gantvāpi ācikkhati, ayam puna pabbajjam labhati.

Aparo daharasāmaṇero mahanto vā pana abyatto, so purimanayeneva uppabbajitvā ghare vacchakarakkhaṇādīni kammāni kātuṃ na icchati, tamenam ñātakā tāniyeva kāsāyāni acchādetvā thālakam vā pattaṃ vā hatthe datvā “gaccha samaṇova hohī”ti gharā nīharanti. So vihāram gacchati, neva naṃ bhikkhū jānanti “ayam uppabbajitvā puna sayameva pabbajito”ti, nāpi sayam jānāti, “yo evam pabbajati, so theyyasamvāsako nāma hotī”ti. Sace taṃ paripuṇṇavassaṃ upasampādentī, sūpasampanno. Sace pana anupasampannakāleyeva vinayavinicchaye vattamāne suṇāti, “yo evam pabbajati, so theyyasamvāsako nāma hotī”ti. Tena “mayā evam kata”nti bhikkhūnaṃ ācikkhitabbaṃ, evam puna pabbajjam labhati. Sace “na dāni mam koci jānātī”ti nāroceti, dhuraṃ nikkhittamatte theyyasamvāsako.

Bhikkhu sikkham paccakkhāya līngam anapanetvā dussīlakammaṃ katvā vā akatvā vā puna sabbam pubbe vuttaṃ vassagaṇanādibhedam vidhim paṭipajjati, theyyasamvāsako hoti. Sikkham appaccakkhāya salīnge ṭhito methunaṃ paṭisevitvā vassagaṇanādibhedam vidhim āpajjanto theyyasamvāsako na hoti, pabbajjāmattham labhati. Andhakaṭṭhakathāyaṃ pana eso theyyasamvāsakoti

vuttaṃ, taṃ na gahetabbaṃ.

Eko bhikkhu kāsāye saussāhova odātaṃ nivāsetvā methunaṃ paṭisevitvā puna kāsāyāni nivāsetvā vassagaṇanādibhedam sabbam vidhiṃ āpajjati, ayampi theyyasamvāsako na hoti, pabbajjāmatam labhati. Sace pana kāsāye dhuraṃ nikkhipitvā odātaṃ nivāsetvā methunaṃ paṭisevitvā puna kāsāyāni nivāsetvā vassagaṇanādibhedam sabbam vidhiṃ āpajjati, theyyasamvāsako hoti.

Sāmaṇero salīge ṭhito methunādiassamaṇakaraṇadhammaṃ āpajjitvāpi theyyasamvāsako na hoti. Sacepi kāsāye saussāhova kāsāyāni apānetvā methunaṃ paṭisevitvā puna kāsāyāni nivāseti, neva theyyasamvāsako hoti. Sace pana kāsāye dhuraṃ nikkhipitvā naggo vā odātanivattho vā methunasevanādīhi assamaṇo hutvā kāsāyaṃ nivāseti, theyyasamvāsako hoti. Sacepi gihibhāvaṃ patthayamāno kāsāvaṃ ovaṭṭikaṃ vā katvā aññena vā ākārena gihinivāsanena nivāseti “sobhati nu kho me gihiliṅgaṃ, na sobhatī”ti vīmaṃsanattham, rakkhati tāva. “Sobhatī”ti sampaṭicchitvā pana puna liṅgaṃ sādiyanto theyyasamvāsako hoti. Odātaṃ nivāsetvā vīmaṃsanasampaṭicchanesupi eseva nayo.

Sace pana nivatthakāsāyassa upari odātaṃ nivāsetvā vīmaṃsati vā sampaṭicchati vā, rakkhatiyeva. Bhikkhuniyāpi eseva nayo. Sāpi hi gihibhāvaṃ patthayamānā sace kāsāyaṃ gihinivāsanam nivāseti, “sobhati nu kho me gihiliṅgaṃ, na sobhatī”ti vīmaṃsanattham, rakkhati tāva. Sace “sobhatī”ti sampaṭicchati, na rakkhati. Odātaṃ nivāsetvā vīmaṃsanasampaṭicchanesupi eseva nayo. Nivatthakāsāyassa pana upari odātaṃ nivāsetvā vīmaṃsatu vā sampaṭicchatu vā, rakkhatiyeva.

Sace koci vuḍḍhapabbajito vassāni aṇeṭvā pāliyaṃpi aṭṭhatvā ekapassenāgantvā mahāpeḷādīsu kaṭacchunā ukkhitte bhattapiṇḍe pattaṃ upanāmetvā seno viya maṃsapesiṃ gahetvā gacchati, theyyasamvāsako na hoti. Bhikkhuvassāni pana aṇeṭvā gaṇhanto theyyasamvāsako hoti.

Sayaṃ sāmaṇero vā sāmaṇerapaṭipāṭiyā kūṭavassāni aṇeṭvā gaṇhanto theyyasamvāsako na hoti. Bhikkhu bhikkhupaṭipāṭiyā kūṭavassāni aṇeṭvā gaṇhanto bhaṇḍagghena kāretabboti.

Theyyasamvāsakavatthukathā niṭṭhitā.

### **Titthiyapakkantakathā**

**Titthiyapakkantako bhikkhavi** ettha pana titthiyesu pakkanto pavitṭhoti titthiyapakkantako. So na kevalaṃ na upasampādetabbo, atha kho na pabbājetabbopi. Tatrāyaṃ vinicchayo – upasampanno bhikkhu titthiyo bhavissāmīti salīgeneva tesam upassayaṃ gacchati, padavāre padavāre dukkaṭam. Tesam liṅge ādinnaṃte titthiyapakkantako hoti. Yopi sayameva “titthiyo bhavissāmī”ti kusacīrādīni nivāseti, titthiyapakkantako hotiyeva. Yo pana naggo nhāyanto attānaṃ oloketvā “sobhati me ājīvakabhāvo, ājīvako bhavissāmī”ti kāsāyāni anādāya naggova ājīvakānaṃ upassayaṃ gacchati, padavāre padavāre dukkaṭam. Sace panassa antarāmagge hiroṭṭappaṃ uppajjati, dukkaṭāni desetvā muccati. Tesam upassayaṃ gantvāpi tehi vā ovaḍḍito attanā vā “imesam pabbajjā atidukkha”ti nivattantopi muccatiyeva.

Sace pana “kiṃ tumhākaṃ pabbajjāya ukkaṭṭha”nti pucchitvā “kesamassuluṅcanādīni”ti vutto ekakesampi luṅcāpeti, ukkuṭikappadhānādīni vā vattāni ādiyati, morapiñchādīni vā nivāseti, tesam liṅgaṃ gaṇhāti, “ayaṃ pabbajjā seṭṭhā”ti seṭṭhabhāvaṃ vā upagacchati, na muccati, titthiyapakkantako hoti. Sace pana “sobhati nu kho me titthiyapabbajjā, nanu kho sobhatī”ti vīmaṃsanattham kusacīrādīni vā nivāseti, jaṭam vā bandhati, khārikājaṃ vā ādiyati, yāva na sampaṭicchati, tāva naṃ laddhi rakkhati, sampaṭicchitamatte titthiyapakkantako hoti. Acchinnacīvaro pana kusacīrādīni nivāseto rājabhayādīhi vā titthiyaliṅgaṃ gaṇhanto laddhiyā abhāvena neva titthiyapakkantako hoti.

Ayaṅca titthiyapakkantako nāma upasampannabhikkhunā kathito, tasmā sāmaṇero salīgena

titthāyatanam gatopi puna pabbajjañca upasampadañca labhatīti kurundiyam vuttam. Purimo pana theyyasamvāsako anupasampanna katham; tasmā upasampanno kūṭavassam gaṇentopi assamaṇo na hoti. Linṅe saussāho pārājikam āpajjitvā bhikkhuvassādīni gaṇentopi theyyasamvāsako na hotīti.

Titthiyapakkantakathā niṭṭhitā.

### Tiracchānagatavattukathā

**111. Nāgayoniyā aṭṭiyatīti** ettha kiñcāpi so pavattiyam kusalavipākena devasampattisadisam issariyasampattim anubhoti, akusalavipākapaṭisandhikassa pana tassa sajātiyā methunapaṭisevane ca vissatṭhaniddokkamaṇe ca nāgasarīram pātubhavati udakasañcārikam maṇḍūkabhakkham, tasmā so tāya nāgayoniyā aṭṭiyati. **Harāyatīti** lajjati. **Jigucchati** attabhāvam jigucchati. **Tassa bhikkhuno nikkhanteti** tasmim bhikkhusmim nikkhante. Atha vā tassa bhikkhuno nikkhamaneti attho. **Vissatṭho niddam okkamīti** tasmim anikkhante vissarabhayena satim avissajjitvā kapimiddhavaseneva niddāyanto nikkhante satim vissajjitvā vissatṭho nirāsaṅko mahāniddam paṭipajji. **Vissaramakāsīti** bhayavasena samaṇasaññaṃ pahāya virūpaṃ mahāsaddamakāsi.

**Tumhe khotthāti** tumhe kho attha; akārassa lopaṃ katvā vuttam. Tumhe kho nāgā jhānavipassanāmaggaḥalānaṃ abhābattā imasmim dhammavinaye avirulhidhammā attha, virulhidhammā na bhavathāti ayamettha saṅkhepattho. **Sajātiyāti** nāgiyā eva. Yadā pana manussitthiādiḥedāya aññajātiyā paṭisevati, tadā devaputto viya hoti. Ettha ca pavattiyam abhiṇṇam sabhāvapātukammadassanavasena “dve paccayā” ti vuttam. Nāgassa pana pañcasu kālesu sabhāvapātukammaṃ hoti – paṭisandhikāle, tacajahanakāle, sajātiyā methunakāle, vissatṭhaniddokkamanakāle, cutikāleti.

**Tiracchānagato bhikkhveti** ettha nāgo vā hotu supaṇṇamāṇavakādīnaṃ vā aññataro, antamaso sakkam devarājānaṃ upādāya yo koci amanussajātiyo, sabbova imasmim atthe tiracchānagatoti veditabbo. So neva upasampādetabbo, na pabbājetabbo, upasampannopi nāsetabboti.

Tiracchānagatavattukathā niṭṭhitā.

### Mātughātakādivattukathā

**112. Mātughātakādivatthūsu – nikkhantiṃ kareyyanti** nikkhamanaṃ niggamanaṃ apavāhanaṃ kareyyanti attho. **Mātughātakato bhikkhveti** ettha yena manussitthibhūtā janikā mātā sayampi manussajātikeneva satā sañcicca jīvitā voropitā, ayam ānantariyena mātughātakammaṇa mātughātakato, etassa pabbajjā ca upasampadā ca paṭikkhittā. Yena pana manussitthibhūtāpi ajanikā posāvanikā mātā vā mahāmātā vā cūlamātā vā janikāpi vā na manussitthibhūtā mātā ghātītā, tassa pabbajjā na vāritā, na ca ānantariko hoti. Yena sayam tiracchānabhūtena manussitthibhūtā mātā ghātītā, sopi ānantariko na hoti, tiracchānagatattā panassa pabbajjā paṭikkhittā. Sesam uttānameva. Pitughātakepi eseva nayo. Sacepi hi vesiyā putto hoti, “ayam me pitā” ti na jānāti, yassa sambhavana nibbatto, so ce anena ghātito, pitughātakotveva saṅkhyam gacchati, ānantariyañca phusati.

**114. Arahantaghātakopi** manussaarahantavaseneva veditabbo. Manussajātiyañhi antamaso apabbajitampi khīṇāsavaṃ dāraṃ dārikam vā sañcicca jīvitā voropento arahantaghātakova hoti, ānantariyañca phusati, pabbajjā cassa vāritā. Amanussajātikam pana arahantaṃ manussajātikam vā avasesam ariyapuggalaṃ ghātetvā ānantariyo na hoti, pabbajjāpissa na vāritā, kammaṃ pana balavaṃ hoti. Tiracchāno manussaarahantampi ghātetvā ānantariyo na hoti, kammaṃ pana bhāriyanti ayamettha vinicchayo. **Te vadhāya onīyantīti** vadhatthāya onīyanti, māretum nīyantīti attho. Yam pana pāliyam “sacā ca maya” nti vuttam, tassa sace mayanti ayamevattho. “Sace” ti hi vattabbe ettha “sacā ca” iti ayam nipāto vutto. “Sace ca” icceva vā pāṭho. Tattha saceti sambhāvanatthe nipāto; ca iti

padapūraṇamatte. “Sacajja maya”’ntipi pāṭho. Tassa sace ajja mayanti attho.

**115. Bhikkhunīdūsako bhikkhavi** ettha yo pakatattam bhikkhunim tiṇṇam maggānam aññatarasmiṃ dūseti, ayaṃ bhikkhunīdūsako nāma. Etassa pabbajjā ca upasampadā ca vāritā. Yo pana kāyasamsaggena sīlavināsam pāpeti, tassa pabbajjā ca upasampadā ca na vāritā. Balakkārena odātavatthavasanaṃ katvā anicchamānaṃ yeveva dūsentopi bhikkhunīdūsakoyeva. Balakkārena pana odātavatthavasanaṃ katvā icchamānaṃ dūsentopi bhikkhunīdūsako na hoti. Kasmā? Yasmā gihibhāve sampācchitamatteyeva sā abhikkhunī hoti. Sakim sīlavipannaṃ pana pacchā dūsentopi sikkhamānāsamaṇerīsu ca vippatipajjanto neva bhikkhunīdūsako hoti, pabbajjampi upasampadampi labhati.

**Saṅghabhedako bhikkhavi** ettha yo devadatto viya sāsanaṃ uddhammaṃ ubbinayaṃ katvā catunnaṃ kammānaṃ aññataravasena saṅghaṃ bhindati, ayaṃ saṅghabhedako nāma. Etassa pabbajjā ca upasampadā ca vāritā.

**Lohituppādako bhikkhavi** etthāpi yo devadatto viya duṭṭhacittena vadhakacittena tathāgatassa jīvamānakaṣaṭṭhāre khuddakamakkhikāya pīvanakamattampi lohitaṃ uppādeti, ayaṃ lohituppādako nāma. Etassa pabbajjā ca upasampadā ca vāritā. Yo pana rogavūpasamanatthaṃ jīvako viya satthena phāletvā pūtimasāṇca lohitaṇca nīharitvā phāsuṃ karoti, bahuṃ so puññaṃ pasavatīti.

Mātughātakādivatthukathā niṭṭhitā.

### Ubhatobyañjanakavatthukathā

**116. Ubhatobyañjanako bhikkhavi** itthinimittuppādanakammato ca purisanimittuppādanakammato ca ubhato byañjanamassa atthīti **ubhatobyañjanako. Karotīti** purisanimittena itthīsu methunavītikkamaṃ karoti. **Kārāpetīti** paraṃ samādapetvā attano itthinimittē kārāpeti, so duvidho hoti – itthiubhatobyañjanako, purisaubhatobyañjanakoti.

Tattha itthiubhatobyañjanakassa itthinimittam pākāṭam hoti, purisanimittam paṭicchannaṃ. Purisaubhatobyañjanakassa purisanimittam pākāṭam, itthinimittam paṭicchannaṃ. Itthiubhatobyañjanakassa itthīsu purisattam karontassa itthinimittam paṭicchannaṃ hoti, purisanimittam pākāṭam hoti. Purisaubhatobyañjanakassa purisānaṃ itthibhāvaṃ upagacchantassa purisanimittam paṭicchannaṃ hoti, itthinimittam pākāṭam hoti. Itthiubhatobyañjanako sayaṇca gabbhaṃ gaṇhāti, paraṇca gaṇhāpeti. Purisaubhatobyañjanako pana sayam na gaṇhāti, paraṃ gaṇhāpetīti, idametesam nānākaraṇam. Kurundiyaṃ pana vuttaṃ – “yadi paṭisandhiyaṃ purisaliṅgaṃ pavatte itthiliṅgaṃ nibbattati, yadi paṭisandhiyaṃ itthiliṅgaṃ pavatte purisaliṅgaṃ nibbattati”’ti. Tattha vicāraṇakkamo vitthārato aṭṭhasālīniyā dhammasaṅgahaṭṭhakathāya veditabbo. Imassa pana duvidhassāpi ubhatobyañjanakassa neva pabbajjā atthi, na upasampadāti idamidha veditabbaṃ.

Ubhatobyañjanakavatthukathā niṭṭhitā.

### Anupajjhāyakādivatthukathā

**117. Tena kho pana samayenāti** yena samayena bhagavatā sikkhāpadaṃ apaññattaṃ hoti, tena samayena. **Anupajjhāyakanti** upajjhaṃ agāhāpetvā sabbena sabbaṃ upajjhāyavirahitaṃ. Evaṃ upasampannā neva dhammato na āmisato saṅgahaṃ labhanti, te parihāyantiyeva, na vaḍḍhanti. **Na bhikkhave anupajjhāyakoti** upajjhaṃ agāhāpetvā nirupajjhāyako na upasampādetabbo. **Yo upasampādeyya āpatti dukkaṭassāti** sikkhāpadapaññattito paṭṭhāya evaṃ upasampādentassa āpatti hoti; kammaṃ pana na kuppati. Keci kuppatīti vadanti, taṃ na gahetabbaṃ. **Saṅghena upajjhāyenāti** adīsipi ubhatobyañjanakupajjhāyapariyosānesu eseva nayo.

Anupajjhāyakādivatthukathā niṭṭhitā.

### Apattakādivatthukathā

**118. Hatthesu piṇḍāya carantīti** yo hatthesu piṇḍo labbhati, tadatthāya caranti. **Seyyathāpi titthiyāti** yathā ājīvakānāmakā titthiyā; sūpabyañjanehi missetvā hatthesu ṭhapitapiṇḍameva hi te bhuñjanti. **Āpatti dukkaṭassāti** evaṃ upasampādentasseva āpatti hoti, kammaṃ pana na kuppati. **Acīvarakādivatthūsupi** eseva nayo.

**Yācitakenāti** “yāva upasampadaṃ karoma, tāva dethā”ti yācitvā gahitena; tāvakālikēnāti attho. Īdisena hi pattena vā cīvarena vā pattacīvarena vā upasampādentasseva āpatti hoti, kammaṃ pana na kuppati, tasmā paripuṇṇapattacīvarova upasampādetabbo. Sace tassa natthi, ācariyupajjhāyā cassa dātukāmā honti, aññe vā bhikkhū nirapekkhehi nissajjitvā adhiṭṭhānupagaṃ pattacīvaraṃ dātabbaṃ. Pabbajjāpekkhaṃ pana paṇḍupalāsaṃ yācitakenāpi pattacīvarena pabbājetuṃ vaṭṭati, sabhāgaṭṭhāne vissāsenā gahetvāpi pabbājetuṃ vaṭṭati.

Sace pana apakkaṃ pattaṃ cīvarūpagāni ca vatthāni gahetvā āgato hoti, yāva patto paccati, cīvarāni ca kariyanti, tāva vihāre vasantassa anāmaṭṭhapiṇḍapātaṃ dātuṃ vaṭṭati, thālake bhuñjituṃ vaṭṭati, purebhattaṃ sāmaṇerabhāgasamako āmisabhāgo dātuṃ vaṭṭati. Senāsanaggāho pana salākabhattauddesabhattanimantanādīni ca na vaṭṭanti. Pacchābhattampi sāmaṇerabhāgasamo telamadhuphāṇitādibhesajjabhāgo vaṭṭati. Sace gilāno hoti, bhesajjamassa kātuṃ vaṭṭati, sāmaṇerassa viya ca sabbaṃ paṭijjaganakammanti.

Apattakādivatthukathā niṭṭhitā.

### Hatthacchinnādivatthukathā

**119. Hatthacchinnādivatthūsu – hatthacchinnoti** yassa hatthatale vā maṇibandhe vā kappare vā yattha katthaci eko vā dve vā hatthā chinnā honti. **Pādacchinnoti** yassa aggapāde vā goppakesu vā jaṅghāya vā yattha katthaci eko vā dve vā pādā chinnā honti. **Hatthapādacchinnoti** yassa vuttappakāreneva catūsu hatthapādesu dve vā tayo vā sabbe vā hatthapādā chinnā honti. **Kaṇṇacchinnoti** yassa kaṇṇamūle vā kaṇṇasakkhalikāya vā eko vā dve vā kaṇṇā chinnā honti. Yassa pana kaṇṇāviddhe chijjanti, sakkā ca hoti saṅghāṭetuṃ, so kaṇṇaṃ saṅghāṭetvā pabbājetabbo. **Nāsacchinnoti** yassa ajapadake vā agge vā ekapuṭe vā yattha katthaci nāsā chinnā hoti. Yassa pana nāsikā sakkā hoti sandhetuṃ, so taṃ phāsukaṃ katvā pabbājetabbo. **Kaṇṇanāsacchinno** ubhayavasena veditabbo. **Āṅgulicchinnoti** yassa nakhasesaṃ adassetvā ekā vā bahū vā āṅguliyo chinnā honti. Yassa pana suttatantumattampi nakhasesaṃ paññāyati, taṃ pabbājetuṃ vaṭṭati. **Āṅlacchinnoti** yassa catūsu āṅguṭṭhakesu āṅguliyaṃ vuttanayeneva eko vā bahū vā āṅguṭṭhakā chinnā honti. **Kaṇḍaracchinnoti** yassa kaṇḍaranāmakā mahānhārū purato vā pacchato vā chinnā honti; yesu ekassapi chinnattā aggapādena vā caṅkamati, mūlena vā caṅkamati, na vā pādaṃ paṭiṭṭhāpetuṃ sakkoti.

**Phaṇahatthakoti** yassa vaggulipakkhakā viya āṅguliyo sambaddhā honti; etaṃ pabbājetukāmena āṅgulantarikāyo phāletvā sabbaṃ antaracammaṃ apantvā phāsukaṃ katvā pabbājetabbo. Yassapi cha āṅguliyo honti, taṃ pabbājetukāmena adhikaāṅgulim chinditvā phāsukaṃ katvā pabbājetabbo.

**Khujjoti** yo urassa vā piṭṭhiyā vā passassa vā nikkhantattā khujjasarīro. Yassa pana kiñci kiñci āṅgapaccaṅgaṃ īsakaṃ vaṅkaṃ, taṃ pabbājetuṃ vaṭṭati. Mahāpuriso eva hi brahmujjugatto, avaseso satto akhujjo nāma natthi.

**Vāmanoti** jaṅghavāmano vā kaṭivāmano vā ubhayavāmano vā. Jaṅghavāmanassa kaṭito paṭṭhāya heṭṭhimakāyo rasso hoti, uparimakāyo paripuṇṇo. Kaṭivāmanassa kaṭito paṭṭhāya uparimakāyo rasso

hoti, heṭṭhimakāyo paripuṇṇo. Ubhayavāmanassa ubhopi kāyā rassā honti, yesaṃ rassattā bhūtānaṃ viya parivaṭṭumo mahākucchiḡaṭasadiṣo attabhāvo hoti, taṃ tividhampi pabbājetuṃ na vaṭṭati.

**Galagaṇḍīti** yassa kumbhaṇḍaṃ viya gale gaṇḍo hoti. Desanāmatameva cetam, yasmiṃ kismiñci pana padese gaṇḍe sati na pabbājetabbo. Tattha vinicchayo – “na bhikkhave pañcahi ābādhehi phutṭho pabbājetabbo”’ti ettha vuttanayeneva vedītabbo. **Lakkhaṇāhatakasāhatalikhītakesu** yaṃ vattabbaṃ, taṃ “na bhikkhave lakkhaṇāhato”’tiādīsu vuttameva.

**Sīpadīti** bhārapādo vuccati. Yassa pādo thūlo hoti sañjātapīlako kharo, so na pabbājetabbo. Yassa pana na tāva kharabhāvaṃ gaṇhāti, sakkā hoti upanāhaṃ bandhitvā udakaāvāṭe pavesetvā udakavālikāya pūretvā yathā sirā paññāyanti, jaṅghā ca telanālikā viya hoti, evaṃ milāpetuṃ sakkā, tassa pādaṃ īdisaṃ katvā taṃ pabbājetuṃ vaṭṭati. Sace puna vaḍḍhati, upasampādentenāpi tathā katvāya upasampādetabbo.

**Pāparogīti** arisabhagandarapittasemhakāsasosādīsu yena kenaci rogena niccāturo atekiccharogo jeguccho amanāpo; ayam na pabbājetabbo.

**Parisadūsakoti** yo attano virūpatāya parisam dūseti; atidīgho vā hoti aññesaṃ sīsappamāṇanābhīppadeso, atirasso vā ubhayavāmanabhūtarūpaṃ viya, atikālo vā jhāpitakhette khāṇuko viya, accodāto vā dadhitakkādīhi pamajjitamatṭhatambalohavaṇṇo, atikiso vā mandamaṃsalohito atṭhisirācammasarīro viya, atithūlo vā bhāriyamāṃso, mahodaro vā mahābhūtasadiṣo, atimahantasīso vā pacchiṃ sīse katvā thīto viya, atikhuddakasīso vā sarīrassa ananurūpena atikhuddakena sīsena samannāgato, kūṭakūṭasīso vā tālaphalapiṇḍisadisena sīsena samannāgato, sikharasīso vā uddham anupubbatanukena sīsena samannāgato, nālīsīso vā mahāveḷupabbasadisena sīsena samannāgato, kappasīso vā pabbhārasīso vā catūsū passesu yena kenaci passena oṇatena sīsena samannāgato, vaṇasīso vā pūtīsīso vā kaṇṇikakeso vā pāṇakehi khāyitakedāre sassasadiṣehi tahiṃ tahiṃ utṭhitehi kesehi samannāgato, nillomasīso vā thūlathaddhakeso vā tālahīrasadiṣehi kesehi samannāgato, jātipalitehi paṇḍarasīso vā pakatitambakeso vā ādittehi viya kesehi samannāgato, āvaṭṭasīso vā gunnaṃ sarīre āvaṭṭasadiṣehi uddhaggehi kesāvaṭṭehi samannāgato, sīsalomehi saddhiṃ ekābaddhabhamukalomo vā jālabaddhena viya nalāṭena samannāgato.

Sambaddhabhamuko vā nillomabhamuko vā makkaṭabhamuko vā atimahantakkhi vā atikhuddakakkhi vā mahiṃsacamme vāsikoṇena paharivā katachiddasadiṣehi akkhīhi samannāgato, visamakkhi vā ekena mahantena ekena khuddakena akkhinā samannāgato, visamacakkalo vā ekena uddham ekena adhoti evaṃ visamajātehi akkhicakkalehi samannāgato, kekaro vā gambhīrakkhi vā yassa gambhīre udapāne udakatārakā viya akkhītārakā paññāyanti; nikkhantakkhi vā yassa kakkaṭakasseva akkhītārakā nikkhantā honti; hatthikaṇṇo vā mahatīhi kaṇṇasakkhalikāhi samannāgato, mūsikakaṇṇo vā jaṭukakaṇṇo vā khuddikāhi kaṇṇasakkhalikāhi samannāgato, chiddamattakaṇṇo vā yassa vinā kaṇṇasakkhalikāhi kaṇṇachiddamattameva hoti; aviddhakaṇṇo vā yonakajātikko pana parisadūsako na hoti; sabhāvoyeva hi so tassa kaṇṇabhagandariko vā niccapūtīnā kaṇṇena samannāgato, gaṇḍakaṇṇo vā sadāpaggharītapubbena kaṇṇena samannāgato, ṭaṅkitakaṇṇo vā gobhattanālikāya aggasadiṣehi kaṇṇehi samannāgato, atipiṅgalakkhi vā madhupiṅgalaṃ pana pabbājetuṃ vaṭṭati. Nippakhumakkhi vā assupaggharaṇakkhi vā pupphitakkhi vā akkhipākena samannāgatakkhi vā.

Atimahantanāsiko vā atikhuddakanāsiko vā cipiṭanāsiko vā majjhe appatitṭhahitvā ekapasse thitavanākanāsiko vā, dīghanāsiko vā sukatuṇḍasadiṣāya jivhāya lehituṃ sakkuṇeyyāya nāsikāya samannāgato, niccapaggharītasīghāṇikanāso vā.

Mahāmukho vā yassa paṭaṅgamaṇḍūkasaveva mukhanimittamaṃyeva mahantaṃ hoti, mukhaṃ pana lābusadiṣaṃ atikhuddakaṃ, bhinnamukho vā vaṅkamukho vā mahāoṭṭho vā ukkhalimukhavaṭṭisadiṣehi oṭṭhehi samannāgato, tanukaotṭho vā bhericammasadiṣehi dante pidahituṃ asamatthehi oṭṭhehi samannāgato, mahādharoṭṭho vā tanukauttarotṭho vā tanukaadharoṭṭho vā mahāuttaroṭṭho vā

oṭṭhachinnako vā eḷamukho vā uppakkamukho vā saṅkhatuṇḍako vā bahisetehi anto atiratthehi oṭṭhehi samannāgato, duggandhakuṇapamukho vā.

Mahādanto vā aṭṭhakadantasadisehi dantehi samannāgato asuradanto vā heṭṭhā vā upari vā bahinikkhantadanto, yassa pana sakkā hoti oṭṭhehi pidahituṃ kathentasseva paññāyati no akathentassa, taṃ pabbājetuṃ vaṭṭati. Pūtidanto vā niddanto vā yassa pana dantantare kalandakadanto viya sukhumadanto hoti, taṃ pabbājetuṃ vaṭṭati.

Mahāhanuko vā gohanusadisena hanunā samannāgato, dīghahanuko vā cipiṭahanuko vā antopaviṭṭhena viya atirassena hanukena samannāgato, bhinnahanuko vā vaṅkahanuko vā nimmassudāṭṭhiko vā bhikkhunīsadisamukho dīghagalo vā bakagalasadisena galena samannāgato, rassagalo vā antopaviṭṭhena viya galena samannāgato, bhinnagalo vā bhaṭṭhaamsakūṭo vā ahattho vā ekahattho vā atirassahattho vā atidīghahattho vā bhinnauro vā bhinnapiṭṭhi vā kacchugatto vā kaṇḍugatto vā daddugatto vā godhāgatto vā, yassa godhāya viya gattato cuṇṇāni patanti, sabbañcetam virūpakaraṇaṃ sandhāya vitthārikavasena vuttaṃ. Vinicchayo panettha “na bhikkhave pañcahi ābādhehi” ti ettha vuttanayeneva veditabbo.

Bhaṭṭhakaṭṭhiko vā mahāānisado vā uddhanakūṭasadisēhi ānisadamamsehi accuggatehi samannāgato, mahāūruko vā vātaṇḍiko vā mahājāṇuko vā saṅghaṭṭanaajāṇuko vā dīghajāṅgho vā yaṭṭhisadisajāṅgho vikaṭo vā paṇho vā ubbaddhapiṇḍiko vā, so duvidho heṭṭhā oruḷhāhi vā upari āruḷhāhi vā mahatīhi jāṅghapiṇḍikāhi samannāgato, mahājāṅgho vā thūlajāṅghapiṇḍiko vā mahāpādo vā mahāpaṇhi vā piṭṭhikapādo vā pādavemajjhato uṭṭhitajāṅgho vaṅkapādo vā so duvidho – anto vā bahi vā parivattapādo gaṇṭhikaṅguli vā siṅgiveraphaṇasadisāhi aṅgulīhi samannāgato, andhanakho vā kāḷavaṇṇehi pūtinakhehi samannāgato, sabbopi esa parisadūsako. Evarūpo parisadūsako na pabbājetabbo.

**Kāṇoti** pasannandho vā hotu pupphādīhi vā upahatapasādo. Yo dvīhi vā ekena vā akkhinā na passati, so na pabbājetabbo. Mahāpaccariyaṃ pana ekakkhikāṇo kāṇoti vutto, dviakkhikāṇo andhena saṅghaṭṭito. Mahāaṭṭhakathāyaṃ jaccandho andhoti vutto, tasmā ubhayampi pariyāyena yujjati. **Kuṇṭi** hatthakuṇi vā pādakuṇi vā aṅgulikuṇi vā; yassa etesu hatthādīsu yaṃkiñci vaṅkaṃ paññāyati, so kuṇi nāma. **Khañjoti** natajāṇuko vā bhinnajāṅgho vā majjhe saṅkuṭitapādattā kuṇḍapādako vā piṭṭhipādamaṃjḥena caṅkamanto agge saṅkuṭitapādattā kuṇḍapādako vā piṭṭhipādaggena caṅkamanto aggapādeneva caṅkamanakhañjo vā paṇhikāya caṅkamanakhañjo vā pādassa bāhirantena caṅkamanakhañjo vā pādassa abhantarantena caṅkamanakhañjo vā gopphakānaṃ upari bhaggattā sakalena piṭṭhipādēna caṅkamanakhañjo vā; sabbopesa khañjoyeva, so na pabbājetabbo.

**Pakkhahatoti** yassa eko hattho vā pādo vā aḍḍhasarīraṃ vā sukhaṃ na vahati. **Chinniriyāpathoti** piṭṭhasappi vuccati. **Jarādubbaloti** jiṇṇabhāvena dubbalo attano cīvararajanādikammaṃ kātumpi asamattho. Yo pana mahallakopi balavā hoti, attānaṃ paṭijaggituṃ sakkoti, so pabbājetabbo. **Andhoti** jaccandho vuccati. **Mūgoti** yassa vacībhedo nappavattati; yassāpi pavattati, saraṇagamaṇaṃ pana paripuṇṇaṃ bhāsituṃ na sakkoti, tādīsaṃ mammanampi pabbājetuṃ na vaṭṭati. Yo pana saraṇagamaṇamattaṃ paripuṇṇaṃ bhāsituṃ sakkoti, taṃ pabbājetuṃ vaṭṭati.

**Badhiroti** yo sabbena sabbam na suṇāti. Yo pana mahāsaddaṃ suṇāti, taṃ pabbājetuṃ vaṭṭati. **Andhamūgādayo** ubhayadosavasena vuttā. Yesañca pabbajjā paṭikkhittā, upasampadāpi tesam paṭikkhittāva. Sace pana te saṅgho upasampādeti, sabbepi hatthacchinnādayo sūpasampannā, kārakasaṅgho pana ācariyupajjhāyā ca āpattito na mucanti. Vakkhati ca – “atthi bhikkhave puggalo appatto osāraṇaṃ, tañce saṅgho osāreti, ekacco suosārito, ekacco duosārito” ti tassattho āgataṭṭhāneyeva āvi bhavissatīti.

Hatthacchinnādivatthukathā niṭṭhitā.



## Alajjīnissayavatthukathā

**120. Alajjīnaṃ nissāya vasantīti** upayogathe sāmivacanaṃ; alajjipuggale nissāya vasantīti attho. **Yāva bhikkhusabhāgataṃ jānāmīti** nissayadāyakassa bhikkhuno bhikkhūhi sabhāgataṃ lajjibhāvaṃ yāva jānāmīti attho. Tasmā navaṃ ṭhānaṃ gatena “ehi bhikkhu, nissayaṃ gaṇhāhi”ti vuccamānenāpi catūhapañcāhaṃ nissayadāyakassa lajjibhāvaṃ upaparikkhitvā nissayo gahetabbo.

Sace “thero lajjī”ti bhikkhūnaṃ santike sutvā āgatadivaseyeva gahetukāmo hoti, thero pana “āgamehi tāva, vasanto jānissasī”ti katipāhaṃ ācāraṃ upaparikkhitvā nissayaṃ deti, vaṭṭati. Pakatiyā nissayaggahaṇaṭṭhānaṃ gatena tadaheva gahetabbo, ekadivasampi parihāro natthi. Sace paṭhamayāme ācariyassa okāso natthi, okāsaṃ alabhanto “paccūsasamaye gahessāmī”ti sayati, aruṇaṃ uggatampi na jānāti, anāpatti. Sace pana “gaṇhissāmī”ti ābhogaṃ akatvā sayati, aruṇuggamane dukkaṭaṃ. Agatapubbaṃ ṭhānaṃ gatena dve tīṇi divasāni vasitvā gantukāmena anissitena vasitabbaṃ. “Sattāhaṃ vasissāmī”ti ālayaṃ karontena pana nissayo gahetabbo. Sace thero “kiṃ sattāhaṃ vasantassa nissayenā”ti vadati, paṭikkhittakālato paṭṭhāya laddhaparihāro hoti.

Alajjīnissayavatthukathā niṭṭhitā.

## Gamikādinissayavatthukathā

**121. Nissayakaraṇīyoti** karaṇīyanissayo, karaṇīyo mayā nissayo; gahetabboti attho. **Nissayaṃ alabhamānenāti** attanā saddhiṃ addhānamaggappaṭipannesu nissayadāyake asati nissayaṃ na labhati nāma. Evaṃ alabhantena anissitena bahūnipi divasāni gantabbaṃ. Sace pubbepi nissayaṃ gahetvā vuttthapubbaṃ kañci āvāsaṃ pavisati, ekarattaṃ vasantenāpi nissayo gahetabbo. Antarāmagge vissamanto vā satthaṃ pariyesanto vā katipāhaṃ vasati, anāpatti. Antovasse pana nibaddhavāsaṃ vasitabbaṃ, nissayo ca gahetabbo. Nāvāya gacchantassa pana vassāne āgatepi nissayaṃ alabhantassa anāpatti.

**Yāciyamānenāti** tena gilānena yāciyamānena anissitena vasitabbaṃ. Sace “yācāhi ma”nti vuccamānopi gilāno mānena na yācati, gantabbaṃ.

**Phāsu hotīti** samathavipassanānaṃ paṭilābhavasena phāsu hoti. Imañhi parihāraṃ neva sotāpanno na sakadāgāmī anāgāmī arahanto labhanti; na thāmagatassa samādhino vā vipassanāya vā lābhī, vissatṭhakammaṭṭhāne pana bālaputhujjane kathāva natthi. Yassa kho pana samatho vā vipassanā vā taruṇo hoti, ayaṃ imaṃ parihāraṃ labhati, pavāraṇasaṅgahopi etasseva anuññāto. Tasmā iminā puggalena ācariye pavāretvā gatepi “yadā patirūpo nissayadāyako āgacchissati, tassa nissāya vasissāmī”ti ābhogaṃ katvā puna yāva āsāḷhīpuṇṇamā, tāva anissitena vatthum vaṭṭati. Sace pana āsāḷhīmāse ācariyo nāgacchati, yattha nissayo labbhati, tattha gantabbaṃ.

**122. Gottenapi anussāvetunti** mahākassapassa upasampadāpekkhoti evaṃ gottaṃ vatvā anussāvetum anujānāmīti attho.

**123. Dve ekānussāvaneti** dve ekato anussāvane; ekena ekassa aññena itarassāti evaṃ dvīhi vā ācariyehi ekena vā ekakkhaṇe kammavācaṃ anussāventehi upasampādetum anujānāmīti attho.

**Dve tayo ekānussāvane kātuṃ tañca kho ekena upajjhāyenāti** dve vā tayo vā jane purimanayeneva ekato anussāvane kātuṃ anujānāmi; tañca kho anussāvanakiriyaṃ ekena upajjhāyena anujānāmīti attho. Tasmā ekena ācariyena dve vā tayo vā anussāvetabbā. Dvīhi vā tīhi vā ācariyehi visum visum ekena ekassāti evaṃ ekappahāreneva dve tisso vā kammavācā kātabbā. Sace pana nānācariyā nānupajjhāyā honti, tissatthero sumanattherassa saddhivihārikaṃ, sumanatthero tissattherassa saddhivihārikaṃ anussāveti, aññamaññañca gaṇapūrakā honti, vaṭṭati. Sace pana nānāupajjhāyā honti,

eko ācariyo hoti, “natveva nānupajjhāyenā”ti paṭikkhittattā na vaṭṭati. Idaṃ sandhāya hi esa paṭikkhepo.

Gamikādinissayavatthukathā niṭṭhitā.

### Upasampadāvidhikathā

**126. Paṭhamaṃ upajjhaṃ gāhāpetabboti** ettha vajjāvajjaṃ upanijjhāyatīti upajjhā, taṃ upajjhaṃ; “upajjhāyo me bhante hohī”ti evaṃ vadāpetvā gāhāpetabbo. **Vitthāyantīti** vitthaddhagattā honti. **Yaṃ jātanti** yaṃ tava sarīre jātaṃ nibbattaṃ vijjamaṇaṃ, taṃ saṅghamaṃjhe pucchante santaṃ atthīti vattabbantiādi. **Ullumpatu manti** uddharatu maṃ.

Upasampadāvidhikathā niṭṭhitā.

### Cattāronissayādikathā

**128. Tāvadevāti** upasampannasamanantarameva. **Chāyā metabbāti** ekaporisā vā dviporisā vāti chāyā metabbā. **Utuppamāṇaṃ ācikkhitabbanti** “vassāno hemanto gimho”ti evaṃ utuppamāṇaṃ ācikkhitabbaṃ. Ettha ca utuyeva utuppamāṇaṃ. Sace vassānādayo aparipuṇṇā honti, yattakehi divasehi yassa yo utu aparipuṇṇo, te divase sallakkhetvā so **divasabhāgo** ācikkhitabbo. Atha vā “ayaṃ nāma utu, so ca kho paripuṇṇo vā aparipuṇṇo vā”ti evaṃ utuppamāṇaṃ ācikkhitabbaṃ. “Pubbaṇho vā sāyanho vā”ti evaṃ divasabhāgo ācikkhitabbo. **Saṅgītīti** idameva sabbaṃ ekato katvā “tvaṃ kiṃ labhasi, kā te chāyā, kiṃ utuppamāṇaṃ, ko divasabhāgo”ti puṭṭho “idaṃ nāma labhāmi – vassaṃ vā hemantaṃ vā gimhaṃ vā, ayaṃ me chāyā, idaṃ utuppamāṇaṃ, ayaṃ divasabhāgoti vadeyyāsī”ti evaṃ ācikkhitabbaṃ.

**129. Ohāyāti** chaḍḍetvā. **Dutiyam dātunti** upasampadamālakato pariveṇaṃ gacchantassa dutiyakaṃ dātuṃ anujānāmi, cattāri ca akaraṇīyāni ācikkhitunti attho. **Paṇḍupalāsoti** paṇḍuvaṇṇo patto. **Bandhanā pavuttoti** vaṇṇato patito. **Abhabbo haritatthāyāti** puna harito bhavituṃ abhabbo. **Puthusilāti** mahāsīlā.

**130. Alabbhamānāya sāmaggīyā anāpatti sambhoge saṃvāseti** yāva tassa ukkhepanīyakammakaraṇatthāya sāmaggī na labbhati, tāva tena saddhiṃ sambhoge ca uposathapavāraṇādikaraṇabhede saṃvāse ca anāpattīti. Sesam sabbattha mahāvibhaṅge vuttānusārena suviññeyyattā pākaṭamevāti.

Cattāronissayādikathā niṭṭhitā.

Samantapāsādikāya vinayasamvaṇṇanāya

Dvāsattatiadhikavatthusatapaṭimaṇḍitassa mahākhandhakassa

Atthavaṇṇanā niṭṭhitā.

Mahākhandhakavaṇṇanā niṭṭhitā.

## 2. Uposathakkhandhakaṃ

Sannipātānujānanādikathā

**132.** Uposathakkhandhake – **aññatitthiyāti** ettha titthaṃ vuccati laddhi; aññaṃ titthaṃ aññatitthaṃ; aññatitthaṃ etesaṃ atthīti **aññatitthiyā**; ito aññaladdhikāti vuttaṃ hoti. **Dhammaṃ bhāsantīti** yaṃ tesāṃ kattabbākattabbaṃ, taṃ kathenti. **Te labhantīti** te manussā labhanti. **Mūgasūkarāti** thūlasarīrasūkarā.

**135. Anajjhāpanno vā hoti āpajjitvā vā vuṭṭhitoti** ettha yaṃ āpattiṃ bhikkhu anajjhāpanno vā hoti, āpajjitvā vā vuṭṭhito, ayaṃ asantī nāma āpattīti evamattho vedītabbo. **Sampajānamusāvāde kiṃ hotīti** yvāyaṃ sampajānamusāvādo assa hotīti vutto, so āpattito kiṃ hoti, katarā āpatti hotīti attho. **Dukkaṭaṃ hotīti** dukkaṭāpatti hoti; sā ca kho na musāvādalakkhaṇena; bhagavato pana vacanena vacīdvāre akiriyasamuṭṭhānā āpatti hotīti vedītabbā. Vakkhati hi –

“Anālapanto manujena kenaci,  
Vācāgiraṃ no ca pare bhaṇeyya;  
Āpajjeyya vācasikaṃ na kāyikaṃ,  
Pañhā mesā kusalehi cintitā”ti. (pari. 479);

**Antarāyikoti** antarāyakaro. **Kissa phāsu hotīti** kimatthāya phāsu hoti. **Paṭhamassa jhānassa adhigamāyāti** paṭhamassa jhānassa adhigamanatthāya tassa bhikkhuno phāsu hoti sukhaṃ hoti. Esa nayo sabbattha. Iti bhagavā uddeśato ca niddeśato ca paṭhamam paṭimokkhuddesaṃ dassesi.

**136. Devasikanti** divase divase. **Cātuddase vā pannarase vāti** ekassa utuno tatiye ca sattame ca pakkhe dvikkhattuṃ cātuddase avasese chakkhattuṃ pannarase; ayaṃ tāva eko attho. Ayaṃ pana pakaticārittavasena vutto “sakim pakkhassa cātuddase vā pannarase vā”ti vacanato pana tathārūpe paccaye sati yasmim tasmim cātuddase vā pannarase vā uddisitūṃ vaṭṭati, āvāsikānaṃ bhikkhūnaṃ cātuddaso hoti, āgantukānaṃ pannaraso. Sace āvāsikā bahutarā honti, āgantukehi āvāsikānaṃ anuvattitabba”nti vacanato pi cetam vedītabbaṃ.

### Sīmānujānakathā

**138. Paṭhamam nimittā kittetabbāti** vinayadharena pucchitabbaṃ “puratthimāya disāya kim nimitta”nti? Pabbato bhanteti. Puna vinayadharena “eso pabbato nimitta”nti evam nimittam kittetabbaṃ. “Etam pabbatam nimittam karoma, karissāma, nimittam kato, nimittam hotu, hoti bhavissati”ti evam pana kittetuṃ na vaṭṭati. Pāsāṇādīsipi eseva nayo. Puratthimāya anudisāya, dakkhiṇāya disāya, dakkhiṇāya anudisāya, pacchimāya disāya, pacchimāya anudisāya, uttarāya disāya, uttarāya anudisāya, kim nimittam? Udakaṃ bhante. Etam udakaṃ nimittanti ettha pana aṭṭhatvā puna puratthimāya disāya kim nimittam. Pabbato bhante. Eso pabbato nimittanti evam paṭhamam kittitanimittam kittetvāva ṭhapetabbaṃ. Evañhi nimittena nimittam ghaṭitam hoti. Evam nimittāni kittetvā athānantaram vuttāya kammavācāya sīmā sammannitabbā. Kammavācāpariyosāne nimittānaṃ anto sīmā hoti, nimittāni sīmato bahi honti. Tattha nimittāni sakim kittitānipi kittitāneva honti. Andhakaṭṭhakathāyaṃ pana tikkhattuṃ sīmamaṇḍalam sambandhantena nimittam kittetabbanti vuttaṃ. “Pabbato bhanteti...pe... udakaṃ bhante”ti evam pana upasampanno vā ācikkhatu anupasampanno vā vaṭṭatiyeva.

Idāni pabbatanimittādīsū evam vinicchayo vedītabbo – tividho pabbato, suddhapamsupabbato, suddhapāsāṇapabbato, ubhayamissakoti. So tividhopi vaṭṭati. Vālikarāsi pana na vaṭṭati. Itaropi hatthippamāṇato omakataro na vaṭṭati. Hatthippamāṇato pana paṭṭhāya sineruppamāṇopi vaṭṭati. Sace catūsū disāsū cattāro tīsū vā tayo pabbatā honti, catūhi vā tīhi vā pabbatanimittehi eva sammannituṃ vaṭṭati. Dvīhi pana nittehi ekena vā sammannituṃ na vaṭṭati. Ito paresu pāsāṇanimittādīsipi eseva nayo. Tasmā pabbatanimittam karontena pucchitabbaṃ “ekābaddho na ekābaddho”ti. Sace ekābaddho hoti, na kātabbo. Tañhi catūsū vā aṭṭhasū vā disāsū kittentenāpi ekameva nimittam kittitam hoti, tasmā yo evam cakkasaṅghānena vihāram parikkhipitvā ṭhito pabbato, taṃ ekadisāya kittetvā aññāsū disāsū

taṃ bahiddhā katvā anto aññāni nimittāni kittetabbāni.

Sace pabbatassa tatiyabhāgaṃ vā upaḍḍhaṃ vā antosīmāya kattukāmā honti, pabbataṃ akittetvā yattakaṃ padesaṃ anto kattukāmā, tassa parato tasmimyeva pabbate jātarukkhavammikādīsu aññataraṃ nimittaṃ kittetabbaṃ. Sace ekayojanadvijoyanappamaṇaṃ sabbhaṃ pabbataṃ anto kattukāmā honti, pabbatassa parato bhūmiyaṃ jātarukkhavammikādīni nimittāni kittetabbāni.

**Pāsāṇanimitte** – ayaguḷopi pāsāṇasaṅkhyameva gacchati, tasmā yo koci pāsāṇo vaṭṭati. Pamāṇato pana hatthippamaṇo pabbatasāṅkhyāṃ gato, tasmā so na vaṭṭati. Mahāgoṇamahāmahimsappamaṇo pana vaṭṭati. Heṭṭhimaparicchena dvattiṃsapalaguḷapiṇḍaparimāṇo vaṭṭati. Tato khuddakataro iṭṭhakā vā mahantīpi na vaṭṭati. Animittipagapāsāṇarāsīpi na vaṭṭati, pageva paṃsuvālikarāsi. Bhūmisamo khalamaṇḍalasadiso piṭṭhipāsāṇo vā bhūmito khāṇuko viya uṭṭhitapāsāṇo vā hoti, sopi pamāṇupago ce vaṭṭati. Piṭṭhipāsāṇo atimahantopi pāsāṇasaṅkhyameva gacchati, tasmā sace mahato piṭṭhipāsāṇassa ekappadesaṃ antosīmāya kattukāmā honti, taṃ akittetvā tassupari añño pāsāṇo kittetabbo. Sace piṭṭhipāsāṇupari vihāraṃ karonti, vihāramajjhena vā piṭṭhipāsāṇo vinivijjhivā gacchati, evarūpo piṭṭhipāsāṇo na vaṭṭati. Sace hi taṃ kittenti, nimittassa upari vihāro hoti, nimittaṅca nāma bahisīmāya hoti, vihāropi bahisīmāyaṃ āpajjati. Vihāraṃ parikkhipivā ṭhitapiṭṭhipāsāṇo ekattha kittetvā aññattha na kittetabbo.

**Vananimitte** – tiṇavanaṃ vā tacasāratālanāḷikerādirukkhavanaṃ vā na vaṭṭati. Antosārānaṃ pana sākasālādīnaṃ antosāramissakānaṃ vā rukkhānaṃ vanaṃ vaṭṭati, taṅca kho heṭṭhimaparicchena catupañcarukkhamaṭṭampi tato oraṃ na vaṭṭati, paraṃ yojanasatikampi vaṭṭati. Sace pana vanamajjhe vihāraṃ karonti, vanaṃ na kittetabbaṃ. Ekadesaṃ antosīmāya kattukāmehipi vanaṃ akittetvā tattha rukkhapāsāṇādayo kittetabbā. Vihāraṃ parikkhipivā ṭhitavanaṃ ekattha kittetvā aññattha na kittetabbaṃ.

**Rukkhanimitte** – tacasāro tālanāḷikerādirukkho na vaṭṭati, antosāro jīvamānako antamaso ubbedhato aṭṭhaṅgulo pariṇāhato sūcidaṇḍakappamaṇopi vaṭṭati, tato oraṃ na vaṭṭati, paraṃ dvādasayojano suppatiṭṭhitanigrodhopi vaṭṭati. Vaṃsanaḷakasarāvādīsu bījaṃ ropetvā vaḍḍhāpito pamāṇupagopi na vaṭṭati. Tato apantevā pana taṅkhaṇampi bhūmiyaṃ ropetvā koṭṭhakaṃ katvā udakaṃ āsiñcitvā kittetuṃ vaṭṭati. Navamūlasākhāniggamaṇaṃ akāraṇaṃ. Khandhaṃ chinditvā ropite pana etaṃ yujjati. Kittentena ca “rukko”tipi vattuṃ vaṭṭati, “sākarukkhotiṃpi sālarukko”tipi. Ekābaddhaṃ pana suppatiṭṭhitanigrodhasadisāṃ ekattha kittetvā aññattha kittetuṃ na vaṭṭati.

**Magganimitte** – araññakhettanadītaḷakamaggādayo na vaṭṭanti, jaṅghamaggo vā sakaṭamaggo vā vaṭṭati, yo nibbijjhivā dve tīṇi gāmantarāni gacchati. Yo pana jaṅghamaggo sakaṭamaggato okkamitvā puna sakaṭamaggameva otarati, ye vā jaṅghamaggasakaṭamaggā avalaṅṅajā, te na vaṭṭanti. Jaṅghasatthasakaṭasatthehi vaḷaṅṅiyamānāyeva vaṭṭanti. Sace dve maggā nikkhamitvā pacchā sakaṭadhuramiva ekībhavanti, dvidhā bhinnatṭhāne vā sambandhatṭhāne vā sakiṃ kittetvā puna na kittetabbā, ekābaddhanimittaṅhettaṃ hoti.

Sace vihāraṃ parikkhipivā cattāro maggā catūsu disāsu gacchanti, majjhe ekaṃ kittetvā aparaṃ kittetuṃ na vaṭṭati. Ekābaddhanimittaṅhettaṃ hoti. Koṇaṃ nibbijjhivā gatamaggaṃ pana parabhāge kittetuṃ vaṭṭati. Vihāramajjhena nibbijjhivā gatamaggo pana na kittetabbo. Kittite nimittassa upari vihāro hoti. Sace sakaṭamaggassa antimacakkamaggaṃ nimittaṃ karonti, maggo bahisīmāya hoti. Sace bāhiracakkamaggaṃ nimittaṃ karonti, bāhiracakkamaggova bahisīmāya hoti, sesaṃ antosīmaṃ bhajati. Maggaṃ kittentena “maggo pantho patho pajjo”ti dasasu yena kenaci nāmena kittetuṃ vaṭṭati. Parikhāsaṅṭhānena vihāraṃ parikkhipivā gatamaggo ekattha kittetvā aññattha kittetuṃ na vaṭṭati.

**Vammikanimitte** – heṭṭhimaparicchena taṃ divasaṃ jāto aṭṭhaṅgulubbedho govīsāṇappamaṇopi vammiko vaṭṭati, tato oraṃ na vaṭṭati, paraṃ himavantapabbatasadisopi vaṭṭati. Vihāraṃ parikkhipivā

ṭhitam pana ekābaddham ekattha kittetvā aññattha kittetum na vaṭṭati.

**Nadīnimitte** – yassā dhammikānaṃ rājūnaṃ kāle anvaddhamāsaṃ anudasāhaṃ anupañcāhanti evaṃ anatikkamitvā deve vassante valāhakesu vigatamattesu sotaṃ pacchijjati, ayaṃ nadīsankhyaṃ na gacchati. Yassā pana īdise suvuṭṭhikāle vassānassa cātumāse sotaṃ na pacchijjati, timaṇḍalaṃ paṭicchādetvā yattha katthaci uttarantiyā bhikkhuniyā antaravāsako temiyati, ayaṃ nadīsankhyaṃ gacchati, sīmaṃ bandhantānaṃ nimittam hoti. Bhikkhuniyā nadīpāragamanepi uposathādisaṅghakammakaraṇepi nadīpārasīmasammannanepi ayameva nadī.

Yā pana maggo viya sakaṭadhurasanṭhānena vā parikhāsanṭhānena vā vihāraṃ parikkhipitvā gatā, taṃ ekattha kittetvā aññattha kittetum na vaṭṭati. Vihārassa catūsu disāsu aññamaññaṃ vinibbijjhitvā gate nadicatukkepi eseva nayo. Asammissanadiyo pana catassopi kittetum vaṭṭati. Sace vatim karonto viya rukkhapāde nikhaṇitvā vallipalālādīhi nadisotaṃ rumbhanti, udakañca ajjhottharivā āvaraṇaṃ pavattatiyeva, nimittam kātum vaṭṭati. Yathā pana udakaṃ nappavattati, evaṃ setumhi kate appavattamānā nadī nimittam kātum na vaṭṭati. Pavattanaṭṭhāne nadinimittam, appavattanaṭṭhāne udakanimittam kātum vaṭṭati.

Yā pana dubbuṭṭhikāle vā gimhe vā nirudakabhāvena nappavattati, sā vaṭṭati. Mahānadito udakamātikam nīharanti, sā kunnadisadisā hutvā tīṇi sassāni sampādentī niccam pavattati, kiñcāpi pavattati, nimittam kātum na vaṭṭati. Yā pana mūle mahānadito niggaṭāpi kālantarena teneva niggaṭamaggena nadim bhinditvā sayañca gacchati, gacchantī parato susumārādisamākiṇṇā nāvādīhi sañcaritabbā nadī hoti, taṃ nimittam kātum vaṭṭati.

**Udakanimittē** – nirudake ṭhāne nāvāya vā cāṭiādīsu vā udakam pūretvā udakanimittam kittetum na vaṭṭati, bhūmigatameva vaṭṭati. Tañca kho appavattanaudakam āvāṭapokkharanīṭākajātassaraloṇisamuddādīsu ṭhitam, aṭṭhitam pana oghanadiudakavāhakamātikādīsu udakam na vaṭṭati. Andhakaṭṭhakathāyaṃ pana “gambhīresu āvāṭādīsu ukkhepimam udakam nimittam na kātabba”nti vuttaṃ, taṃ duvuttaṃ attanomatimattameva. Ṭhitam pana antamaso sūkarakhatāyapi gāmadārakānaṃ kīṭanavāpiyampi taṅkhaṇaññeva pathaviyaṃ āvāṭakam katvā kuṭehi āharitvā pūritaudakampi sace yāva kammavācāpariyosānā tiṭṭhati, appam vā hotu bahu vā, vaṭṭati. Tasmim pana ṭhāne nimittasaññākaranaṭṭham pāsānavālikāpaṃsuādirāsi vā pāsānaṭṭhambho vā dārutṭhambho vā kātabbo. Taṃ kātuñca kāretuñca bhikkhussa vaṭṭati. Lābhasīmāyaṃ pana na vaṭṭati. Samānasamvāsakasīmā kassaci pīṭanaṃ na karoti, kevalam bhikkhūnaṃ vinayakammameva sādheti, tasmā ettha vaṭṭati.

Imehi ca aṭṭhahi nimittehi asammisshipi aññamaññaṃ sammisshipi sīmaṃ sammannitum vaṭṭatiyeva. Sā evaṃ sammannitvā bajjhamānā ekena dvīhi vā nimittehi abaddhā hoti, tīṇi pana ādim katvā vuttappakāraṇam nimittānaṃ satenāpi baddhā hoti. Sā tīhi siṅghāṭakasaṅṭhānā hoti, catūhi caturassā vā siṅghāṭakaaḍḍhacandamudiṅgādīsaṅṭhānā vā, tato adhikehi nānāsaṅṭhānā. Taṃ bandhitukāmehi sāmāntavīhāresu bhikkhū tassa tassa vihārassa sīmāparicchedam pucchitvā, baddhasīmavīhāraṇam sīmāya sīmantarikaṃ, abaddhasīmavīhāraṇam sīmāya upacāram ṭhapetvā disācārikabhikkhūnaṃ nissācārasamaye sace ekasmim gāmakhette sīmaṃ bandhitukāmā, ye tattha baddhasīmavīhārā, tesu bhikkhūnaṃ “mayam ajja sīmaṃ bandhissāma, tumhe sakasīmāparicchedato mā nikkhamitthā”ti pesetabbaṃ. Ye abaddhasīmavīhārā, tesu bhikkhū ekajjham sannipātetabbā, chandārahānaṃ chando āharāpetabbo. Sace aññānīpi gāmakkhetāni antokātukāmā, tesu gāmesu ye bhikkhū vasanti, tehipi āgantabbaṃ. Anāgacchantānaṃ chando āharitabboti mahāsumatthero āha. Mahāpadumatthero pana “nānāgāmakkhetāni nāma pāṭekkam baddhasīmāsadisāni, na tato chandapārisuddhi āgacchati. Antonimittagatehi pana bhikkhūhi āgantabba”nti vatvā puna āha – “samānasamvāsakasīmāsammannanakāle āgamanampi anāgamanampi vaṭṭati. Avippavāsasīmāsammannanakāle pana antonimittagatehi āgantabbaṃ, anāgacchantānaṃ chando āharitabbo”ti.

Evam sannipatitesu pana bhikkhūsu chandārahānaṃ chande āhaṭe tesu tesu maggesu nadītthagāmadvārādīsu ca āgantukabhikkhūnaṃ sīghaṃ sīghaṃ hatthapāsānayanatthañca bahisīmākaraṇatthañca ārāmike ceva samaṇuddese ca ṭhapetvā bherisaññaṃ vā saṅkhasaññaṃ vā katvā nimittakittānantaram vuttāya “suṇātu me bhante saṅho” tiādikāya kammavācāya sīmā bandhitabbā. Kammavācāpariyosāneyeva nimittāni bahi katvā heṭṭhā pathavisandhāraṃ udakaṃ pariyantaṃ katvā sīmā gatā hoti.

Imaṃ pana samānasamvāsakasīmaṃ sammannantehi pabbajjupasampadādīnaṃ saṅghakammānaṃ sukhakaraṇatthaṃ paṭhamaṃ khaṇḍasīmā bandhitabbā. Taṃ pana bandhantehi vattaṃ jānitabbaṃ. Sace hi bodhicetiyabhattasālādīni sabbavatthūni patiṭṭhāpetvā katavihāre bandhanti, vihāramajjhe bahūnaṃ samosaraṇatṭhāne abandhitvā vihārapaccante vivittokāse bandhitabbā. Akatavihāre bandhantehi bodhicetiyādīnaṃ sabbavatthūnaṃ ṭhānaṃ sallakkhetvā yathā patiṭṭhitesu vatthūsu vihārapaccante vivittokāse hoti, evaṃ bandhitabbā. Sā heṭṭhimaparicchena sace ekavīsati bhikkhū gaṇhāti, vaṭṭati. Tato oraṃ na vaṭṭati, paraṃ bhikkhusahassaṃ gaṇhantīpi vaṭṭati. Taṃ bandhantehi sīmāmālakassa samantā nimittupagā pāsāṇā ṭhapetabbā, na khaṇḍasīmāya ṭhitehi mahāsīmā bandhitabbā, na mahāsīmāya ṭhitehi khaṇḍasīmā, khaṇḍasīmāyameva pana ṭhatvā khaṇḍasīmā bandhitabbā, mahāsīmāyameva ṭhatvā mahāsīmā.

Tatrāyaṃ bandhanavidhi – samantā “eso pāsāṇo nimitta” nti evaṃ nimittāni kittetvā kammavācāya sīmā sammannitabbā. Atha tassā eva dalhīkammattamaṃ avippavāsakammavācā kātabbā. Evañhi sīmaṃ samūhanissāmāti āgatā samūhanitum na sakkhissanti. Sīmaṃ sammannitvā bahisīmantarikapāsāṇā ṭhapetabbā. Sīmantarikā pacchimakotiyaṃ ekaratanappamaṇā vaṭṭati. Vidatthippamaṇāpi vaṭṭatīti kurundiyam, caturaṅgulappamaṇāpi vaṭṭatīti mahāpaccariyaṃ vuttaṃ. Sace pana vihāro mahā hoti, dvepi tissopi tatutaripi khaṇḍasīmāyo bandhitabbā.

Evaṃ khaṇḍasīmaṃ sammannitvā mahāsīmāsammuttikāle khaṇḍasīmato nikkhamitvā mahāsīmāya ṭhatvā samantā anupariyāyantehi sīmantarikapāsāṇā kittetabbā. Tato avasesanimittāni kittetvā hatthapāsaṃ avijahantehi kammavācāya samānasamvāsakasīmaṃ sammannitvā tassā dalhīkammattamaṃ avippavāsakammavācāpi kātabbā. Evañhi “sīmaṃ samūhanissāmā” ti āgatā samūhanitum na sakkhissanti. Sace pana khaṇḍasīmāya nimittāni kittetvā tato sīmantarikāya nimittāni kittetvā mahāsīmāya nimittāni kittenti, evaṃ tīsu ṭhānesu nimittāni kittetvā yaṃ sīmaṃ icchanti, taṃ paṭhamaṃ bandhitum vaṭṭati. Evaṃ santepi yathāvuttenayena khaṇḍasīmatova paṭṭhāya bandhitabbā. Evaṃ baddhāsu pana sīmāsu khaṇḍasīmāya ṭhitā bhikkhū mahāsīmāya kammaṃ karontānaṃ na kopenti, mahāsīmāya vā ṭhitā khaṇḍasīmāya kammaṃ karontānaṃ sīmantarikāya pana ṭhitā ubhinnaṃpi na kopenti. Gāmakhette ṭhatvā kammaṃ karontānaṃ pana sīmantarikāya ṭhitā kopenti. Sīmantarikā hi gāmakhettaṃ bhajati.

Sīmā ca nāmesā na kevalaṃ pathavitaleyeva baddhā baddhā nāma hoti. Atha kho piṭṭhipāsāṇepi kuṭigehepi leṇepi pāsādepi pabbatamatthakepi baddhā baddhāyeva hoti. Tattha **piṭṭhipāsāṇe** bandhantehi pāsāṇapiṭṭhiyaṃ rājiṃ vā koṭṭetvā udukkhalaṃ vā khaṇitvā nimittaṃ na kātabbaṃ, nimittupagapāsāṇe ṭhapetvā nimittāni kittetabbāni. Kammavācāpariyosāne sīmā pathavisandhāraṃ udakaṃ pariyantaṃ katvā otarati. Nimittapāsāṇā yathāṭhāne na tiṭṭhanti, tasmā samantato rāji vā utṭhāpetabbā, catūsu vā koṇesu pāsāṇā vijjhitabbā, “ayaṃ sīmāparicchedo” ti vatvā akkharāni vā chinditabbāni. Keci usūyakā sīmaṃ jhāpessāmāti aggim denti, pāsāṇāva jhāyanti, na sīmā.

**Kuṭigehepi** bandhantehi bhittim akittetvā ekavīsatiyā bhikkhūnaṃ okāsaṭṭhānaṃ anto karitvā pāsāṇanimittāni ṭhapetvā sīmā sammannitabbā, antokuṭṭameva sīmā hoti. Sace antokuṭṭe ekavīsatiyā bhikkhūnaṃ okāso natthi, pamukhe nimittapāsāṇe ṭhapetvā sammannitabbā. Sace evampi nappahoti, bahinibbodakapatanatṭhānepi nimittāni ṭhapetvā sammannitabbā. Evaṃ sammatāya pana sabbamaṃ kuṭigehaṃ sīmatṭhameva hoti.

**Catubhittiyaleṇepi** bandhantehi kuṭṭaṃ akittetvā pāsāṇava kittetabbā. Sace anto okāso natthi, pamukhepi nimittāni ṭhapetabbāni. Sace nappahoti, bahi nibbodakapatanatṭhānepi nimittapāsāṇe ṭhapetvā nimittāni kittetvā sīmā sammannitabbā. Evaṃ leṇassa anto ca bahi ca sīmā hoti.

**Uparipāsādepi** bhittiṃ akittetvā anto pāsāṇe ṭhapetvā sīmā sammannitabbā. Sace nappahoti, pamukhepi pāsāṇe ṭhapetvā sammannitabbā. Evaṃ sammatā uparipāsādeyeva hoti, heṭṭhā na otarati. Sace pana bahūsu thambhesu tulānaṃ upari katapāsādassa heṭṭhimatale kuṭṭo yathā nimittānaṃ anto hoti, evaṃ utṭhahitvā tulārukkhehi ekasambaddho ṭhito, heṭṭhāpi otarati. Ekathambhapāsādassa pana uparimatale baddhā sīmā sace thambhamatthake ekavīsatiyā bhikkhūnaṃ okāso hoti, heṭṭhā otarati. Sace pāsādabhittito niggatesu niyyūhakādīsu pāsāṇe ṭhapetvā sīmāṃ bandhanti, pāsādabhitti antosīmāyaṃ hoti. Heṭṭhā panassā otaraṇānotaraṇaṃ vuttanayeneva veditabbāṃ. Heṭṭhāpāsāde kittentehipi bhitti ca rukkhathambhā ca na kittetabbā. Bhittilagge pana pāsāṇatthambhe kittetuṃ vaṭṭati. Evaṃ kittitā sīmā heṭṭhā pāsādassa pariyaṇatthambhānaṃ antoyeva hoti. Sace pana heṭṭhāpāsādassa kuḍḍo uparimatalena sambaddho hoti, uparipāsādampi abhiruhati. Sace pāsādassa bahi nibbodakapatanatṭhāne nimittāni karonti, sabbo pāsādo sīmaṭṭho hoti.

**Pabbatamatthake** talaṃ hoti ekavīsatiyā bhikkhūnaṃ okāsārahaṃ, tattha piṭṭhipāsāṇe viya sīmāṃ bandhanti. Heṭṭhāpabbatepi teneva paricchedena sīmā otarati. Tālamūlakapabbatepi upari sīmā baddhā heṭṭhā otarateva. Yo pana vitānaṣaṇṭhāno hoti, upari ekavīsatiyā bhikkhūnaṃ okāso atthi, heṭṭhā natthi, tassa upari baddhā sīmā heṭṭhā na otarati. Evaṃ mudiṅgasaṇṭhāno vā hotu paṇavasāṇṭhāno vā, yassa heṭṭhā vā majjhe vā sīmappamāṇaṃ natthi, tassupari baddhā sīmā heṭṭhā neva otarati. Yassa pana dve kūṭāni āsanne ṭhitāni, ekassapi upari sīmappamāṇaṃ nappahoti, tassa kūṭantaraṃ cinitvā vā pūretvā vā ekābaddhaṃ katvā upari sīmā sammannitabbā.

Eko sappaphaṇasadiso pabbato, tassupari sīmappamāṇassa atthitāya sīmāṃ bandhanti, tassa ce heṭṭhā ākāsapabbhāraṃ hoti, sīmā na otarati. Sace panassa vemajjhe sīmappamāṇo susirapāsāṇo hoti, otarati. So ca pāsāṇo sīmaṭṭhoyeva hoti. Athāpissa heṭṭhā leṇassa kuṭṭo aggakoṭiṃ āhacca tiṭṭhati, otarati, heṭṭhā ca upari ca sīmāyeva hoti. Sace pana heṭṭhā uparimassa sīmāparicchedassa pārato anto-leṇaṃ hoti, bahi sīmā na otarati. Athāpi uparimassa sīmāparicchedassa orato bahileṇaṃ hoti, anto sīmā na otarati. Athāpi upari sīmāya paricchedo khuddako, heṭṭhā leṇaṃ mahantaṃ sīmāparicchedamatikkamitvā ṭhitaṃ, sīmā upariyeva hoti, heṭṭhā na otarati. Yadi pana leṇaṃ khuddakaṃ sabbapacchimasīmāparimāṇaṃ, upari sīmā mahatī taṃ ajjhottharivā ṭhitā, sīmā otarati. Atha leṇaṃ atikhuddakaṃ sīmappamāṇaṃ na hoti, sīmā upariyeva hoti, heṭṭhā na otarati. Sace tato upaḍḍhaṃ bhijjivā patati, sīmappamāṇaṃ cepi hoti, bahi patitaṃ asīmā. Apatitaṃ pana yadi sīmappamāṇaṃ, sīmā hotiyeva.

Khaṇḍasīmā nīcavatthukā hoti, taṃ pūretvā uccavatthukaṃ karonti, sīmāyeva. Sīmāya gehaṃ karonti, sīmaṭṭhakameva hoti. Sīmāya pokkharāṇiṃ khaṇanti, sīmāyeva. Oggho sīmāmaṇḍalaṃ ottharivā gacchati, sīmāmālake aṭṭaṃ bandhitvā kammaṃ kātuṃ vaṭṭati. Sīmāya heṭṭhā umaṅganadī hoti, iddhiṃ bhikkhu tattha nisīdati, sace sā nadī paṭhamaṃ gatā, sīmā pacchā baddhā, kammaṃ na kopeti. Atha paṭhamaṃ sīmā baddhā, pacchā nadī gatā, kammaṃ kopeti. Heṭṭhāpathavitale ṭhito pana kopetiyeva.

Sīmāmālake vaṭarukkho hoti, tassa sākāhā vā tato niggatapāroho vā mahāsīmāya pathavitalaṃ vā tatthajātarukkhadīni vā āhacca tiṭṭhati, mahāsīmāṃ sodhetvā vā kammaṃ kātappaṃ, te vā sākāhāpārohā chinditvā bahiṭṭhakā kātappaṃ. Anāhacca ṭhitasākāhādīsu āruḷhabhikkhu hatthapāsaṃ ānetabbo. Evaṃ mahāsīmāya jātarukkhasa sākāhā vā pāroho vā vuttanayeneva sīmāmālake patiṭṭhāti, vuttanayeneva sīmāṃ sodhetvā vā kammaṃ kātappaṃ, te vā sākāhāpārohā chinditvā bahiṭṭhakā kātappaṃ.

Sace sīmāmālake kamme kariyamāne koci bhikkhu sīmāmālakassa anto pavisitvā vehāsaṭṭhitasākāhāya nisīdati, pādā vāssa bhūmigatā honti, nivāsanapārūpanaṃ vā bhūmiṃ phusati, kammaṃ kātuṃ na vaṭṭati. Pāde pana nivāsanapārūpanaṃ ukkhipāpetvā kātuṃ vaṭṭati. Idaṅca

lakkhaṇaṃ purimanayepi veditabbaṃ. Ayaṃ pana viseso – tatra ukkhipāpetvā kātuṃ na vaṭṭati, hatthapāsameva ānetabbo. Sace antosīmato pabbato abbhugacchati, tatraṭṭho bhikkhu hatthapāsam ānetabbo. Iddhiyā antopabbataṃ pavitṭhepi eseva nayo. Bajjhamānā eva hi sīmā pamāṇarahitaṃ padesaṃ na otarati. Baddhasīmāya jātaṃ yaṃkiñci yattha katthaci ekasambaddhena gataṃ sīmāsāṅkhyameva gacchatīti.

**140. Tiyojanaparamanti** ettha tiyojanaṃ paramaṃ pamāṇametissāti tiyojanaparamā; taṃ **tiyojanaparamaṃ**. Sammānantena pana majjhe ṭhatvā yathā catūsipi disāsu diyaḍḍhadiyaḍḍhajojanaṃ hoti, evaṃ sammānitabbā. Sace pana majjhe ṭhatvā ekekadisato tiyojanaṃ karonti, chayojanaṃ hotīti na vaṭṭati. Caturassaṃ vā tikoṇaṃ vā sammānantena yathā koṇato koṇaṃ tiyojanaṃ hoti, evaṃ sammānitabbā. Sace hi yena kenaci pariyantena kesaggamattampi tiyojanaṃ atikkāmeti, āpattiñca āpajjati sīmā ca asīmā hoti.

**Nadīpāranti** ettha pārayatīti pārā. Kiṃ pārayati? Nadīṃ. Nadiyā pārā nadīpārā, taṃ **nadīpāraṃ**; nadīṃ ajjhottharamānanti attho. Ettha ca nadiyā lakkhaṇaṃ nadīnimitte vuttanayameva. **Yatthassa dhuvanāvā vāti** yattha nadiyā sīmābandhanaṭṭhānagatesu titthesu niccasañcaraṇānāvā assa, yā sabbantimena paricchedena pājanapurisena saddhiṃ tayo jane vahati. Sace pana sā nāvā uddhaṃ vā adho vā kenacideva karaṇīyena puna āgamanatthāya nītā, corehi vā haṭṭā, avassaṃ labbhaneyyā, yā pana vātena vā chinnabandhanā vīcīhi nadimajjhaṃ nītā avassaṃ āharitabbā, puna dhuvanāvāva hoti. Udahe ogate thalaṃ ussārītāpi sudhākasaṭṭhādihi pūretvā ṭhapitāpi dhuvanāvāva. Sace bhinnā vā visaṅkhatapadarā vā na vaṭṭati. Mahāpadumatthero panāha – “sacepi tāvakālikaṃ nāvaṃ ānetvā sīmābandhanaṭṭhāne ṭhapetvā nimittāni kittenti, dhuvanāvāva hoti”ti. Tatra mahāsumatthero āha – “nimittaṃ vā sīmā vā kammavācāya gacchati na nāvāya. Bhagavatā ca dhuvanāvā anuññātā, tasmā nibaddhanāvāveva vaṭṭatī”ti.

**Dhuvasetu vāti** yattha rukkhasaṅghātamayo vā padarabaddho vā jaṅghasatthasetu vā hatthissādīnaṃ sañcaraṇayoggo mahāsetu vā atthi; antamaso taṅkhaṇaṅñeva rukkhaṃ chinditvā manussānaṃ sañcaraṇayoggo ekapadikasetupi dhuvasetutveva saṅkhyāṃ gacchati. Sace pana upari baddhāni vettalatādīni hatthena gahetvāpi na sakkā hoti tena sañcaritūṃ, na vaṭṭati.

**Evarūpaṃ nadīpārasīmaṃ sammānituntī** yatthāyaṃ vuttappakārā dhuvanāvā vā dhuvasetu vā abhimukhatittheyeva atthi, evarūpaṃ nadīpārasīmaṃ sammānitūṃ anujānāmīti attho. Sace dhuvanāvā vā dhuvasetu vā abhimukhatitthe natthi, īsakaṃ uddhaṃ abhiruhitvā adho vā orohitvā atthi, evampi vaṭṭati. Karavīkatissatthero pana “gāvutamattabbhantarepi vaṭṭatī”ti āha.

Imaṅca pana nadīpārasīmaṃ sammānantena ekasmiṃ tīre ṭhatvā uparisote nadītīre nimittaṃ kittetvā tato paṭṭhāya attānaṃ parikkhipantena yattakaṃ paricchedaṃ icchati, tassa pariyosāne adhosotepi nadītīre nimittaṃ kittetvā paratīre sammukhaṭṭhāne nadītīre nimittaṃ kittetabbaṃ. Tato paṭṭhāya yattakaṃ paricchedaṃ icchati, tassa vasena yāva uparisote paṭṭhamakittitanimittassa sammukhā nadītīre nimittaṃ, tāva kittetvā paccāharitvā paṭṭhamakittitanimittena saddhiṃ ghaṭetabbaṃ. Atha sabbanimittānaṃ anto ṭhite bhikkhū hatthapāsagate katvā kammavācāya sīmā sammānitabbā. Nadiyaṃ ṭhitā anāgatāpi kammaṃ na kopenti. Sammutipariyosāne ṭhapetvā nadīṃ nimittānaṃ anto pāratīre ca orimatīre ca ekasīmā hoti. Nadī pana baddhasīmāsāṅkhyāṃ na gacchati, visuṃ nadīsīmā eva hi sā.

Sace antonadiyaṃ dīpako hoti, taṃ antosīmāya kātukāmena purimanayeneva attanā ṭhitatīre nimittāni kittetvā dīpakassa orimante ca pārimante ca nimittaṃ kittetabbaṃ. Atha paratīre nadiyā orimatīre nimittassa sammukhaṭṭhāne nimittaṃ kittetvā tato paṭṭhāya purimanayeneva yāva uparisote paṭṭhamakittitanimittassa sammukhā nimittaṃ, tāva kittetabbaṃ. Atha dīpakassa pārimante ca orimante ca nimittaṃ kittetvā paccāharitvā paṭṭhamakittitanimittena saddhiṃ ghaṭetabbaṃ. Atha dvīsu tīresu dīpake ca bhikkhū sabbeva hatthapāsagate katvā kammavācāya sīmā sammānitabbā. Nadiyaṃ ṭhitā anāgacchantāpi kammaṃ na kopenti. Sammutipariyosāne ṭhapetvā nadīṃ nimittānaṃ anto tīradvayaṅca



dīpako ca ekasīmā hoti, nadī pana nadisīmāyeva.

Sace pana dīpako vihārasīmāparicchedato uddhaṃ vā adho vā adhikataro hoti, atha vihārasīmāparicchedanimittassa ujukameva sammukhibhūte dīpakassa sorimante nimittaṃ kittetvā tato paṭṭhāya dīpakasikharaṃ parikkhipantona puna dīpakassa sorimante nimittasammukhe pārimante nimittaṃ kittetabbaṃ. Tato paraṃ purimanayeneva pāratīre sammukhanimīttamādimkatvā pāratīranimittāni ca dīpakassa pārimantasorimantanimittāni ca kittetvā paṭṭhamakittitanimittena saddhiṃ ghaṭṭanā kātabbā. Evaṃ kittetvā sammatā sīmā pabbatasañḍānā hoti.

Sace pana dīpako vihārasīmāparicchedato uddhampi adhopi adhikataro hoti. Purimanayeneva dīpakassa ubhopi sikhārāni parikkhipitvā nimittāni kittentena nimittaghaṭṭanā kātabbā. Evaṃ kittetvā sammatā sīmā mudingsañḍhānā hoti.

Sace dīpako vihārasīmāparicchedassa anto khuddako hoti, sabbapaṭṭhamanayena dīpake nimittāni kittetabbāni. Evaṃ kittetvā sammatā sīmā paṇavasāṅḍhānā hoti.

Sīmānujānanakathā niṭṭhitā.

### Uposathāgārādikathā

**141. Anupariveniyanti** ekasīmamahāvihāre tasmim tasmim pariveṇe. **Asaṅketenāti** saṅketam akatvā. **Ekam samūhanitvāti** kammavācāya samūhanitvā.

**142. Yato pātimokkhaṃ suṇātīti** yattha katthaci bhikkhūnaṃ hatthapāse nisinno yasmā pātimokkhaṃ suṇāti; katovassa uposathoti attho. Idañca vatthuvase vuttam, hatthapāse nisinnassa pana asuṇantassāpi katova hoti uposatho. **Nimittā kittetabbāti** uposathapamukhassa khuddakāni vā mahantāni vā pāsānaitṭhakadārukhāṇḍadaṇḍakādīni yāni kānici nimittāni abbhokāse vā māḷakādīsū vā yattha katthaci saññaṃ katvā kittetum vaṭṭati. Atha vā **nimittā kittetabbāti** nimittupagā vā animittupagā vā paricchedajānanattham kittetabbā.

**Therehi bhikkhūhi paṭṭhamataram sannipatitunti** ettha sace mahāthero paṭṭhamataram na āgacchati, dukkaṭam. **Sabbeheva ekajjhaṃ sannipatitvā uposatho kātabboti** ettha sace porāṇako āvāso majjhe vihārassa hoti, pahoti cettha bhikkhūnaṃ nisajjaṭṭhānaṃ, tattha sannipatitvā uposatho kātabbo. Sace porāṇako paridubbalo ceva sambādho ca añño pacchā uṭṭhitāvāso asambādho, tattha uposatho kātabbo.

**Yattha vā pana thero bhikkhu viharatīti** etthāpi sace therassa vihāro sabbesaṃ pahoti, phāsuko hoti, tattha uposatho kātabbo. Sace pana so paccante visamappadese hoti, therassa vattabbaṃ – “bhante, tumhākaṃ vihāro aphāsukadeso, natthi ettha sabbesaṃ okāso, asukasmiṃ nāma āvāse okāso atthi, tattha gantum vaṭṭati”ti. Sace thero nāgacchati, tassa chandapārisuddhiṃ ānetvā sabbesaṃ pahonake phāsukaṭṭhāne uposatho kātabbo.

### Avippavāsasīmānujānanakathā

**143. Andhakavindāti** rājagahato gāvutattaye andhakavindaṃ nāma, taṃ upanissāya thero vasati; tato rājagahaṃ uposatham āgacchanto. Rājagahañhi parikkhipitvā aṭṭhārassa mahāvihārā sabbe ekasīmā, dhammasenāpatinā nesaṃ sīmā baddhā, tasmā veḷuvane saṅghassa sāmaggīdānattham āgacchantoti attho. **Nadiṃ tarantoti** sippiniyaṃ nāma nadiṃ atikkamanto. **Manam vuḷho ahosīti** īsakaṃ appattavulḷhabhāvo ahosi. Sā kira nadī gijjhakūṭato otaritvā caṇḍena sotena vahati. Tattha vegena āgacchantam udakaṃ amanasikaronto thero manam vuḷho ahosi, na pana vuḷho, udakabbhāhatānissa cīvarāni allāni jātāni.

**144. Sammatā sā sīmā saṅghena ticīvarena avippavāsā t̥hapetvā gāmañca gāmūpacārañcāti** imissā kammavācāya uppanakālato paṭṭhāya bhikkhūnaṃ purimakammavācā na vaṭṭati. Ayameva hi thāvarā hoti. Bhikkhunīnaṃ pana ayaṃ na vaṭṭati, purimāyeva vaṭṭati. Kasmā? Bhikkhunisaṅgho hi antogāme vasati. Yadi evaṃ siyā, so etāya kammavācāya ticīvaraparihāraṃ na labheyya, atthi cassa parihāro, tasmā purimāyeva vaṭṭati. Bhikkhunisaṅghassa hi dvepi sīmāyo labbhanti. Tattha bhikkhūnaṃ sīmāṃ ajjhottharivāpi tassā antopi bhikkhūnaṃ sīmāṃ sammannitūṃ vaṭṭati. Bhikkhūnampi bhikkhunisīmāya eseva nayo. Na hi te aññamaññassa kamme gaṇapūrakā honti, na kammavācaṃ vaggāṃ karonti. Ettha ca nigamanagarānampi gāmeneva saṅgaho veditabbo.

**Gāmūpacāro**ti parikkhittassa parikkhepo, aparikkhittassa parikkhepokāso. Tesu adhiṭṭhitatecīvariko bhikkhu parihāraṃ na labhati. Iti bhikkhūnaṃ avippavāsasīmā gāmañca gāmūpacārañca na ottharati, samānasaṃvāsakasīmāva ottharati. Samānasaṃvāsakasīmā cettha attano dhammatāya gacchati. Avippavāsasīmā pana yattha samānasaṃvāsakasīmā, tattheva gacchati. Na hi tassā viṣuṃ nimittakittanaṃ atthi, tattha sace avippavāsāya sammutikāle gāmo atthi, taṃ sā na ottharati. Sace pana sammatāya sīmāya pacchā gāmo nivasati, sopi sīmāsaṅkhyameva gacchati. Yathā ca pacchā nivīṭṭho, evaṃ paṭhamaṃ nivīṭṭhassa pacchā vaḍḍhitappadesopi sīmāsaṅkhyameva gacchati. Sacepi sīmāsammutikāle gehāni katāni, pavississāmāti ālayopi atthi, manussā pana appaviṭṭhā, porāṇakagāmaṃ vā sagehameva chaḍḍetvā aññattha gatā, agāmoyeva esa, sīmā ottharati. Sace pana ekampi kulāṃ pavīṭṭhaṃ vā āgataṃ vā atthi, gāmoyeva sīmā na ottharati.

**Evañca pana bhikkhave ticīvarena avippavāso samūhantabboti** ettha samūhanantena bhikkhūnā vattaṃ jānitabbaṃ. Tatridaṃ vattaṃ – khaṇḍasīmāya t̥hatvā avippavāsasīmā na samūhantabbā, tathā avippavāsasīmāya t̥hatvā khaṇḍasīmāpi. Khaṇḍasīmāyaṃ pana t̥hitena khaṇḍasīmāva samūhanitabbā, tathā itarāya t̥hitena itarā. Sīmāṃ nāma dvīhi kāraṇehi samūhananti pakatiyā khuddakaṃ puna āvāsavaḍḍhanatthāya mahatiṃ vā kātūṃ; pakatiyā mahatiṃ puna aññesaṃ vihārokaśādānatthāya khuddakaṃ vā kātūṃ. Tattha sace khaṇḍasīmāñca avippavāsasīmāñca jānanti, samūhanituñceva bandhituñca sakkhissanti. Khaṇḍasīmāṃ pana jānantā avippavāsaṃ ajānantāpi samūhanituñceva bandhituñca sakkhissanti. Khaṇḍasīmāṃ ajānantā avippavāsaṃyeva jānantā cetiyaṅgaṇabodhiyaṅgaṇauposathāgārādīsu nirāsaṅkat̥thānesu t̥hatvā appeva nāma samūhanitūṃ sakkhissanti, paṭibandhitūṃ pana na sakkhissanteva. Sace bandheyyuṃ, sīmāsaṃbhedaṃ katvā vihāraṃ avihāraṃ kareyyuṃ, tasmā na samūhanitabbā. Ye pana ubhopi na jānanti, teneva samūhanitūṃ na bandhitūṃ sakkhissanti. Ayañhi sīmā nāma kammavācāya vā asīmā hoti sāsanantaradhānena vā, na ca sakkā sīmāṃ ajānantehi kammavācā kātūṃ, tasmā na samūhanitabbā. Sādhukaṃ pana ñatvāyeva samūhanitabbā ca bandhitabbā cāti.

### Gāmasīmādikathā

**147.** Evaṃ baddhasīmāvasena samānasaṃvāsañca ekūposathabhāvañca dassetvā idāni abaddhasīmesupi okāsesu taṃ dassento “**asammatāya, bhikkhave, sīmāya aṭṭhapitāyā**”tiādimāha. Tattha **aṭṭhapitāyā**ti aparicchinnāya. Gāmaggaṇaṇena cettha nagarampi gahitameva hoti. Tattha yattake padese tassa gāmassa bhojakā baliṃ labhanti, so padeso appo vā hotu mahanto vā, **gāmasīmā**teva saṅkhyāṃ gacchati. **Nagaraniḡamasīmā**supi eseva nayo. Yampi ekasmiṃyeva gāmakhette ekaṃ padesaṃ “ayaṃ viṣuṃ gāmo hotū”ti paricchinditvā rājā kassaci deti, sopi viṣuṃgāmasīmā hotiyeva. Tasmā sā ca itarā ca pakatigāmanagaraniḡamasīmā baddhasīmāsadisāyeva honti, kevalaṃ pana ticīvaravippavāsaparihāraṃ na labhanti.

Evaṃ gāmantavāsīnaṃ sīmāparicchedaṃ dassetvā idāni āraññakānaṃ sīmāparicchedaṃ dassento “**agāmake ce**”tiādimāha. Tattha **agāmake ceti** gāmanigamanagarasīmāhi aparicchinne aṭṭavippadeso. Atha vā **agāmake ceti** vijjhāṭṭavisadise araññe bhikkhu vasati, athassa t̥hitokāsato samantā sattabbhantarā samānasaṃvāsakasīmāti attho. Ayaṃ sīmā ticīvaravippavāsaparihāraṃpi labhati. Tattha ekaṃ abbhantaraṃ aṭṭhavāsati hatthappamaṇaṃ hoti. Majjhe t̥hitassa samantā sattabbhantarā vinibbedhena

cuddasa honti. Sace dve saṅghā visuṃ vinayakammāni karonti, dvinnaṃ sattabbhantarānaṃ antare aññaṃ ekaṃ sattabbhantaraṃ upacārattāya ṭhapetabbaṃ. Sesā sattabbhantarasīmākaṭṭhā mahāvibhaṅge udositasikkhāpadaḥṣaṇṇāyaṃ vuttanayena gahetabbā.

**Sabbā bhikkhave nadī asīmāti** yā kāci nadīlakkaṇappattā nadī nimittāni kittetvā “etaṃ baddhasīmāṃ karomā”ti katāpi asīmāva hoti, sā pana attano sabhāveneva baddhasīmāsadisā, sabbamettha saṅghakammaṃ kātuṃ vaṭṭati. **Samuddajātassaresupi** ese va nayo. Ettha ca jātassaro nāma yena kenaci khaṇṭivā akato sayamjātasobbho samantato āgadena udakena pūrito tiṭṭhati.

Evaṃ nadīsamuddajātassarānaṃ baddhasīmābhāvaṃ paṭikkhipitvā puna tattha abaddhasīmāpaachedaṃ dassento “**nadiyā vā bhikkhave**”tiādimāha. Tattha **yaṃ majjhimassa purisassa samantā udakukkhepāti** yaṃ ṭhānaṃ majjhimassa purisassa samantato udakukkhepena paricchinnaṃ. Kathaṃ pana udakaṃ ukkhipitabbaṃ? Yathā akkhadhuttā dāruḡaḷaṃ khipanti, evaṃ udakaṃ vā vālikaṃ vā hatthena gahetvā thāmamajjhimena purisena sabbathāmena khipitabbaṃ. Yattha evaṃ khittaṃ udakaṃ vā vālikā vā patati, ayameko **udakukkhepo**. Tassa anto hatthapāsaṃ vijahitvā ṭhito kammaṃ kopeti. Yāva parisā vaḍḍhati, tāva sīmāpi vaḍḍhati. Parisapariyantato udakukkhepoyeva pamāṇaṃ. Jātassarasamuddesupi ese va nayo.

Ettha ca sace nadī nātidīghā hoti, pabhavato paṭṭhāya yāva mukhadvārā sabbattha saṅgho nisīdati, udakukkhepasīmākammaṃ natthi, sakalāpi nadī etesaṃyeva bhikkhūnaṃ pahoti. Yaṃ pana mahāsumattherena vuttaṃ “yojanaṃ pavattamānāyeva nadī, tatrāpi upari addhayojanaṃ pahāya heṭṭhā addhayojane kammaṃ kātuṃ vaṭṭatī”ti, taṃ mahāpadumatthereneva paṭikkhittaṃ. Bhagavatā hi “timaṅḍalaṃ paṭicchādetvā yattha katthaci uttarantiyā bhikkhuniyā antaravāsako temiyatī”ti idaṃ nadiyā pamāṇaṃ vuttaṃ, na yojanaṃ vā addhayojanaṃ vā. Tasmā yā imassa suttassa vasena pubbe vuttalakkaṇā nadī, tassā pabhavato paṭṭhāya saṅghakammaṃ kātuṃ vaṭṭatīti. Sace panettha bahū bhikkhū visuṃ visuṃ kammaṃ karonti, sabbehi attano ca aññesaṅca udakukkheparicchedassa antarā añño udakukkhepo sīmantarikatthāya ṭhapetabbo. Tato adhikaṃ vaṭṭatiyeva, ūnakaṃ pana na vaṭṭatīti vuttaṃ. Jātassarasamuddesupi ese va nayo.

Nadiyā pana kammaṃ karissāmāti gatehi sace nadī paripuṇṇā hoti samatittikā, udakasāṭikaṃ nivāsetvāpi antonadiyaṃyeva kammaṃ kātappaṃ. Sace na sakkonti, nāvāyapi ṭhatvā kātappaṃ. Gacchantiyā pana nāvāya kātuṃ na vaṭṭati. Kasmā? Udakukkhepamattameva hi sīmā, taṃ nāvā siḡhameva atikkāmeti. Evaṃ sati aññissā sīmāya ñatti aññissā anusāvanā hoti, tasmā nāvā arittena vā ṭhapetvā pāsāṇe vā lambitvā antonadiyaṃ jātarukkhe vā bandhitvā kammaṃ kātappaṃ. Antonadiyaṃ baddhaatṭakepi antonadiyaṃ jātarukkhepi ṭhitehi kātuṃ vaṭṭati.

Sace pana rukkhassa sākāhā vā tato nikkhantapāroho vā bahinadītīre vihārasīmāya vā gāmasīmāya vā paṭiṭṭhito, sīmāṃ vā sodhetvā sākāhaṃ vā chinditvā kammaṃ kātappaṃ. Bahinadītīre jātarukkhasa antonadiyaṃ pavitṭhasākāhāya vā pārohe vā nāvāṃ bandhitvā kammaṃ kātuṃ na vaṭṭati. Karontehe sīmā vā sodhetabbā, chinditvā vāssa bahipatiṭṭhitabhāvo nāsetabbo. Nadītīre pana khāṇukaṃ koṭṭetvā tattha baddhanāvāya na vaṭṭatiyeva.

Nadiyaṃ setuṃ karonti, sace antonadiyaṃyeva setu vā setupādā vā, setumhi ṭhitehi kammaṃ kātuṃ vaṭṭati. Sace pana setu vā setupādā vā bahitīre paṭiṭṭhitā, kammaṃ kātuṃ na vaṭṭati, sīmāṃ sodhetvā kātappaṃ. Atha setupādā anto, setu pana ubhinnaṃpi tīrānaṃ upariākāse ṭhito, vaṭṭati. Antonadiyaṃ pāsāṇo vā dīpako vā hoti, tassa yattakaṃ padesaṃ pubbe vuttappakāre pakativassakāle vassānassa catūsu māsesu udakaṃ ottharati, so nadīsāṅkhyameva gacchati. Ativuttikāle pana oghena otthaṭṭokāso na gahetabbo, so hi gāmasīmāsāṅkhyameva gacchati.

Nadito mātikaṃ nīharantā nadiyaṃ āvaraṇaṃ karonti, tañce ottharivā vā vinibbijhitvā vā udakaṃ gacchati, sabbattha pavattanaṭṭhāne kammaṃ kātuṃ vaṭṭati. Sace pana āvaraṇena vā koṭṭakabandhanena

vā sotam pacchijjati, udakam nappavattati, appavattanaṭṭhāne kammaṃ kātuṃ na vaṭṭati. Āvaraṇamatthakepi kātuṃ na vaṭṭati. Sace koci āvaraṇappadeso pubbe vuttapāsānadīpakappadeso viya udakena ajjhotthariyati, tattha vaṭṭati. So hi nadīsāṅkhyameva gacchati. Nadiṃ vināsetvā taḷākam karonti, heṭṭhā pāḷi baddhā, udakam āgantvā taḷākam pūretvā tiṭṭhati, ettha kammaṃ kātuṃ na vaṭṭati. Upari pavattanaṭṭhāne heṭṭhā ca chaḍḍitamodakam nadiṃ ottharivā sandanaṭṭhānato paṭṭhāya vaṭṭati. Deve avassante hemantagimhesu vā sukkhanadiyāpi vaṭṭati. Nadito nīhaṭamātikāya na vaṭṭati. Sace sā kālantarena bhijjivā nadī hoti, vaṭṭati. Kāci nadī kālantarena uppativā gāmanigamasīmaṃ ottharivā pavattati, nadiyeva hoti, kammaṃ kātuṃ vaṭṭati. Sace pana vihārasīmaṃ ottharati, vihārasīmātveva saṅkhyam gacchati.

**Samuddepi** kammaṃ karontehi yaṃ padesaṃ uddham vaḍḍhanaudakam vā pakativīci vā vegena āgantvā ottharati, tattha kātuṃ na vaṭṭati. Yasmiṃ pana padese pakativīciyo ottharivā saṅghahanti, so udakantato paṭṭhāya antosamuddo nāma, tattha ṭhitehi kammaṃ kātabbam. Sace ūmivego bādhati, nāvāya vā aṭṭake vā ṭhatvā kātabbam. Tesu vinicchayo nadiyam vuttanayeneva veditabbo. Samudde piṭṭhipāsāno hoti, taṃ kadāci ūmiyo āgantvā ottharanti, kadāci na ottharanti, tattha kammaṃ kātuṃ na vaṭṭati, so hi gāmasīmāsaṅkhyameva gacchati. Sace pana vīcīsu āgatāsupi anāgatāsupi pakatiudakeneva otthariyati, vaṭṭati. Dīpako vā pabbato vā hoti, so ce dūre hoti macchabandhānam agamanapathe, araṅṅāsīmāsaṅkhyameva gacchati. Tesam gamanapariyantassa orato pana gāmasīmāsaṅkhyam gacchati. Tattha gāmasīmaṃ asodhetvā kammaṃ kātuṃ na vaṭṭati. Samuddo gāmasīmaṃ vā nigamasīmaṃ vā ottharivā tiṭṭhati, samuddova hoti, tattha kammaṃ kātuṃ vaṭṭati. Sace pana vihārasīmaṃ ottharati, vihārasīmātveva saṅkhyam gacchati.

**Jātassare** kammaṃ karontehipi yattha pubbe vuttapakāre vassakāle vasse pacchinnamatte pivituṃ vā hatthapāde vā dhovituṃ udakam na hoti, sukkhati, ayam na jātassaro, gāmakhettasaṅkhyameva gacchati, tattha kammaṃ na kātabbam. Yattha pana vuttapakāre vassakāle udakam santiṭṭhati, ayameva jātassaro. Tassa yattake padese vassānam cātumāse udakam tiṭṭhati, tattha kammaṃ kātuṃ vaṭṭati. Sace gambhīram udakam, aṭṭakam bandhitvā tattha ṭhitehi jātassarassa anto jātarukkhāmi baddhaaṭṭakepi kātuṃ vaṭṭati. Piṭṭhipāsānadīpakesu panettha nadiyam vuttasadisova vinicchayo. Samavassadevakāle pahonakajātassaro pana sacepi dubbuṭṭhikāle vā gimhahemantesu vā sukkhati, nirudako hoti, tattha saṅghakammaṃ kātuṃ vaṭṭati. Yam andhakaṭṭhakathāyam vuttam “sabbo jātassaro sukkho anodako, gāmakhettaṃyeva bhajati”ti, taṃ na gahetabbam. Sace panettha udakatthāya āvāṭam vā pokkharāṇādīni vā khaṇanti, taṃ ṭhānam ajātassaro hoti, gāmasīmāsaṅkhyam gacchati. Lābutipusakādivappe katēpi ese va nayo.

Sace pana taṃ pūretvā thalam vā karonti, ekasmiṃ disābhāge pāḷiṃ bandhitvā sabbameva taṃ mahātaḷākam vā karonti, sabbopi ajātassaro hoti, gāmasīmāsaṅkhyameva gacchati. Loṇīpi jātassarasāṅkhyameva gacchati. Vassike cattāro māse udakaṭṭhānokāse kammaṃ kātuṃ vaṭṭatīti.

**148. Sīmāya sīmaṃ sambhindantīti** attano sīmāya paresam baddhasīmaṃ sambhindanti. Sace hi porāṇakassa vihārassa puratthimāya disāya ambo ceva jambū cāti dve rukkhā aññamaññam saṃsaṭṭhaviṭṭapā honti, tesu ambassa pacchimadisābhāge jambū. Vihārasīmā ca jambuṃ anto katvā ambaṃ kittetvā baddhā hoti, atha pacchā tassa vihārassa puratthimāya disāya vihāram katvā sīmaṃ bandhantā taṃ ambaṃ anto katvā jambuṃ kittetvā bandhanti, sīmāya sīmā sambhinnā hoti. Evaṃ chabbaggiyā akāṃsu, tenāha – “sīmāya sīmaṃ sambhindantī”ti.

**Sīmāya sīmaṃ ajjhottharantīti** attano sīmāya paresam baddhasīmaṃ ajjhottharanti;

Paresam baddhasīmaṃ sakalam vā tassā padesaṃ vā anto katvā attano sīmaṃ bandhanti. **Sīmantarikam ṭhapetvā sīmaṃ sammantituntīti** ettha sace paṭhamataram katassa vihārassa sīmā asammatā hoti, sīmāya upacāro ṭhapetabbo. Sace sammatā hoti, pacchimakoṭiyā hatthamattā sīmantarikā ṭhapetabbā. Kurundiyam vidatthimattampi, mahāpaccariyam caturaṅgulamattampi vaṭṭatīti vuttam.

Ekarukkhopi ca dvinnam sīmānam nimittam hoti, so pana vaḍḍhanto sīmāsaṅkaram karoti, tasmā na kātabbo.

### Uposathabhedādikathā

**149. Cātuddasiko ca pannarasiko cāti** ettha cātuddasikassa pubbakicce “ajjuposatho cātuddaso”ti vattabbaṃ.

**Adhammena vaggantiādīsu** sace ekasmiṃ vihāre catūsu bhikkhūsu vasantesu ekassa chandapārisuddhiṃ āharitvā tayo pārisuddhiuposatham karonti, tīsu vā vasantesu ekassa chandapārisuddhiṃ āharitvā dve pātimokkham uddisanti, **adhammena vaggam** uposathakammaṃ hoti. Sace pana cattāropi sannipatitvā pārisuddhiuposatham karonti, tayo vā dve vā pātimokkham uddisanti, **adhammena samaggam** nāma hoti. Sace catūsu janesu ekassa pārisuddhiṃ āharitvā tayo pātimokkham uddisanti, tīsu vā janesu ekassa pārisuddhiṃ āharitvā dve pārisuddhiuposatham karonti, **dhammena vaggam** nāma hoti. Sace pana cattāro ekattha vasantā sabbeva sannipatitvā pātimokkham uddisanti, tayo pārisuddhiuposatham karonti, dve aññamaññaṃ pārisuddhiuposatham karonti, **dhammena samaggam** nāma hotīti.

### Pātimokkhuddesakathā

**150. Nidānam uddisitvā avasesam sutena sāvetabbanti** “suṇātu me bhante saṅgho...pe... āvikatā hissa phāsu hotī”ti imaṃ nidānam uddisitvā “uddiṭṭham kho āyasmanto nidānam, tatthāyasmante pucchāmi – kaccittha parisuddhā, dutiyampi pucchāmi...pe... evametam dhārayāmi. Sutā kho panāyasmantehi cattāro pārājikā dhammā...pe... avivadamañehi sikkhitabba”nti evaṃ avasesam sutena sāvetabbam. Etena nayena sesāpi cattāro pātimokkhuddesā veditabbā.

**Savarabhayanti** aṭavimanussabhayaṃ. **Rājantarāyotiādīsu** sace bhikkhūsu “uposatham karissāmā”ti nisīnesu rājā āgacchati, ayaṃ rājantarāyo. Corā āgacchati, ayaṃ corantarāyo. Davadāho vā āgacchati, āvāse vā aggī uṭṭhahati, ayaṃ aggantarāyo. Megho vā uṭṭheti, ogho vā āgacchati, ayaṃ udakantarāyo. Bahū manussā āgacchati, ayaṃ manussantarāyo. Bhikkhum yakkho gaṇhāti, ayaṃ amanussantarāyo. Byagghādayo caṇḍamigā āgacchati, ayaṃ vāḷantarāyo. Bhikkhum sappādayo ḍaṃsanti, ayaṃ sarīsapantarāyo. Bhikkhu gilāno vā hoti, kālam vā karoti, verino vā tam māretukāmā gaṇhanti, ayaṃ jīvitarāyo. Manussā ekaṃ vā bahū vā bhikkhū brahmacariyā cāvetukāmā gaṇhanti, ayaṃ brahmacariyantarāyo. Evarūpesu antarāyesu saṃkhittena pātimokkho uddisitabbo, paḥamo vā uddeso uddisitabbo, ādimhi dve tayo cattāro vā. Ettha ca dutiyādīsu uddesesu yasmiṃ apariyosite antarāyo hoti, sopi suteneva sāvetabbo.

**Anajjhīṭṭhāti** anāṇattā ayācitā vā. Ajjhesanā cettha saṅghena sammatadhammajjhesakāyattā vā saṅghattherāyattā vā, tasmīṃ dhammajjhesake asati saṅghattheraṃ āpucchitvā vā tena yācito vā bhāsituṃ labhati. Saṅghattherenāpi sace vihāre bahū dhammakathikā honti, vārapaṭipāṭiyā vattabbā – “tvaṃ dhammaṃ bhaṇa, dhammaṃ kathehi, dhammadānaṃ dehi”ti vā vuttana tīhipi vidhīhi dhammo bhāsitaṃ. “Osārehi”ti vutto pana osāretumeva labhati, “kathehi”ti vutto kathetumeva, “sarabhaññaṃ bhaṇāhi”ti vutto sarabhaññaṃ eva. Saṅghattheropi ca uccatare āsane nisīno yācituṃ na labhati. Sace upajjhāyo ceva saddhivihāriko ca honti, upajjhāyo ca naṃ uccāsane nisīno “bhaṇāhi”ti vadati, sajjhāyaṃ adhiṭṭhahitvā bhaṇitabbaṃ. Sace panettha daharā bhikkhū honti, tesam “bhaṇāmī”ti bhaṇitabbaṃ.

Sace vihāre saṅghatthero attanoyeva nissitake bhaṇāpeti, aññe madhurabhāṇakepi nājjesati, so aññehi vattabbo – “bhante asukaṃ nāma bhaṇāpema”ti. Sace “bhaṇāpethā”ti vā vadati, tuṇhī vā hoti, bhaṇāpetuṃ vaṭṭati. Sace pana paṭibāhati, na bhaṇāpetabbaṃ. Yadi anāgateyeva saṅghatthere dhammasavanaṃ āradhāṃ, puna āgate ṭhapetvā āpucchanaṃ natthi. Osāretvā pana kathentena

āpucchitvā vā aṭṭhapetvāyeva vā kathetabbaṃ, kathentassa puna āgatepi ese va nayo.

Upanisinnakathāyapi saṅghattherova sāmī, tasmā tena sayama vā kathetabbaṃ, añño vā bhikkhu “kathēhī”ti vattabbo, no ca kho uccatare āsane nisinnena. Manussānaṃ pana “bhaṇāhī”ti vattum vaṭṭati. Manussā attano jānanakabhikkhū āpucchanti, tena therama āpucchitvā kathetabbaṃ. Sace saṅghatthero “bhante ime paṇhaṃ pucchanti”ti puṭṭho “kathēhī”ti vā bhaṇati, tuṇhī vā hoti, kathetum vaṭṭati. Antaraghare anumodanādīsupi ese va nayo. Sace saṅghatthero vihāre vā antaraghare vā “maṃ anāpucchitvāpi katheyysī”ti anujānāti, laddhakappiyama hoti, sabbattha vattum vaṭṭati.

Sajjhāyama karontenāpi thero āpucchitabboeva. Ekaṃ āpucchitvā sajjhāyantassa aparo āgacchati, puna āpucchana kiccaṃ natthi. Sace vissamissāmīti ṭhapitassa āgacchati, puna ārabhantēnāpi āpucchitabbaṃ. Saṅghatthere anāgateyeva āradhama sajjhāyantassāpi ese va nayo. Ekena saṅghattherena “maṃ anāpucchāpi yathāsukhama sajjhāyāhī”ti anuññāte yathāsukhama sajjhāyitum vaṭṭati. Aññasmim pana āgate taṃ āpucchitvāva sajjhāyitabbaṃ.

**151. Attanā vā attānaṃ sammannitabbaṃ**ti attanā vā attā sammannitabbo; pucchantena pana parisama oloketvā sace attano upaddavo natthi, vinayo pucchitabbo.

**153. Katepi okāse puggalaṃ tulayitvā**ti “atthi nu kho me ito upaddavo, natthī”ti evama upaparikkhitvā. **Puramhākanti** paṭhamama amhākaṃ. **Paṭikacevā**ti paṭhamatarameva. **Puggalaṃ tulayitvā okāsaṃ kātuntī** “bhūta me va nu kho āpattim vadati, abhūta”nti evama upaparikkhitvā okāsaṃ kātum anujānāmīti attho.

### Adhammakammaṭṭikkosānādikathā

**154. Adhammakammaṃ** vuttanayameva. **Paṭikkosituntī** vāretum. **Diṭṭhimpī āvikātuntī** “adhammakammaṃ idaṃ na me khamatī”ti evama aññassa santike attano diṭṭhim pakāsetum. **Catūhi pañcahīti**ādi tesama anupaddavathāya vuttama. **Sañcicca na sāventīti** yathā na suṇanti evama bhaṇissāmāti sañcicca saṇikaṃ uddisanti.

**155. Therādhikanti** therādhīnaṃ; therāyattaṃ bhavituntī attho. “Therādheyya”ntipi pāṭho, tasmā therena sayama vā uddisitabbaṃ, añño vā ajjhesitabbo. Ajjhesanavidhānañcetta dhammajjhesane vuttanayameva. **So na jānāti uposathaṃ vā**tiādīsū cātuddasikapannarasikabhedenā duvidhama, saṅghauposathādhedenā navavidhāna uposathaṃ na jānāti, catubbidhama uposathakammaṃ na jānāti, duvidhama pātimokkamaṃ na jānāti, navavidhama pātimokkhuddesaṃ na jānāti. **Yo tattha bhikkhu byatto paṭibaloti** ettha kiñcāpi daharassāpi byattassa pātimokkha anuññāto. Atha kho ettha ayamadhippāyo. Sace therassa pañca vā cattāro vā tayo vā pātimokkhuddesā nāgacchanti; dve pana akhaṇḍā suvisadā vācugatā honti, therāyattova pātimokkhā. Sace pana ettakampi visadama kātum na sakkoti, byattassa bhikkhuno āyatto hoti.

**Sāmantā āvāsā**ti sāmantaṃ āvāsaṃ. **Sajjukanti** tadaheva āgamanathāya. **Navama bhikkhū āṇāpetuntī** ettha yo sakkoti ugghetum, evarūpo āṇāpetabbo, na bālo.

### Pakkhagaṇānādiuggahaṇānujānanakathā

**156. Katimī bhanteti** ettha katīnaṃ pūraṇīti katimī. **Kālavatoti** kālasseva; pagevāti attho.

**158. Yama kālaṃ saratīti** ettha sāyampi “ajjuposatho samannāharathā”ti ārocetum vaṭṭati.

**159. Therena bhikkhunā navama bhikkhū āṇāpetuntī** etthāpi kiñci kammaṃ karonto vā

sadākārameva eko vā bhāranittharaṇako vā sarabhāṇakadhammakathikādīsū aññataro vā na uposathāgārasammajjanattham āṇāpetabbo, avasesā pana vārena āṇāpetabbā. Sace āṇatto sammūñjanim tāvākālikampi na labhati, sākhabhaṅgam kappiyam kāretvā sammajjitabbam, tampi alabhantassa laddhakappiyam hoti.

**160.** Āsanapaññāpanāṇattiyampi vuttanayeneva āṇāpetabbo. Āṇattena ca sace uposathāgāre āsanāni natthi, saṅghikāvāsatoṇi āharitvā paññāpetvā puna āharitabbāni. Āsanesu asati kaṭasārakepi taṭṭikāyopi paññāpetum vaṭṭati, taṭṭikāsupi asati sākhabhaṅgāni kappiyam kāretvā paññāpetabbāni, kappiyakāram alabhantassa laddhakappiyam hoti.

**161.** Padīpakaraṇepi vuttanayeneva āṇāpetabbo. Āṇāpentena ca “amukasmiṃ nāma okāse telam vā vaṭṭi vā kapallikā vā atthi, tam gahetvā karohi”ti vattabbo. Sace telādīni natthi, pariyesitabbāni, pariyesitvā alabhantassa laddhakappiyam hoti. Apica kapāle aggipi jāletabbo.

### Disaṃgamikādivatthukathā

**163. Saṅgahetabboti** “sādhu bhante āgatāttha, idha bhikkhā sulabhā sūpabyañjanam atthi, vasatha anukkaṇṭhamānā”ti evam piyavacanena saṅgahetabbo. Punappunam tathākaraṇavasena **anuggahetabbo**. “Āma vasissāmi”ti paṭivacanadāpanena **upalāpetabbo**. Atha vā catūhi paccayehi saṅgahetabbo ceva anuggahetabbo ca. Piyavacanena upalāpetabbo, kaṇṇasukham ālapitabboti attho. Cuṇṇādīhi **upaṭṭhāpetabbo**. **Āpatti dukkaṭassāti** sace sakalopi saṅgho na karoti, sabbesam dukkaṭam. Idha neva therā na daharā muccanti, sabbehi vārena upaṭṭhāpetabbo. Attano vāre anupaṭṭhahantassa āpatti. Tena pana mahātherānam pariveṇasammajjanadantakaṭṭhadānādīni na sādītabbāni. Evampi sati mahātherehi sāyamapātam upaṭṭhānam āgantabbam. Tena pana tesam āgamanam fiatvā paṭhamataram mahātherānam upaṭṭhānam gantabbam. Sacassa saddhimcarā bhikkhuupaṭṭhākā atthi, “mayham upaṭṭhākā atthi, tumhe appossukā viharathā”ti vattabbam. Athāpissa saddhimcarā natthi, tasmimyeva pana vihare eko vā dve vā vattasampannā vadanti “mayam therassa kattabbam karissāma, avasesā phāsu viharantū”ti sabbesam anāpatti.

**So āvāso gantabboti** uposathakaraṇatthāya anvaddhamāsam gantabbo. So ca kho utuvasseyeva, vassāne pana yam kattabbam, tam dassetum “**vassam vasanti bālā abyattā**”tiādīmāha. Tattha **na bhikkhave tehi bhikkhūhi tasmim āvāse vassam vasitabbanti** purimikāya pātimokkhuddesakena vinā na vassam upagantabbam. Sace so vassūpagatānam pakkamati vā, vibbhamati vā, kālam vā karoti, aññasmim satiyeva pacchimikāya vasitum vaṭṭati, asati aññattha gantabbam, agacchantānam dukkaṭam. Sace pana pacchimikāya pakkamati vā vibbhamati vā kālam vā karoti, māsadvayam vasitabbam.

### Pārisuddhidānakathā

**164. Kāyena viññāpetīti** pārisuddhidānam yena kenaci āṅgapaccāṅgena viññāpeti jānāpeti; vācam pana nicchāretum sakkonto vācāya viññāpeti; ubhayathā sakkonto kāyavācāhi. **Saṅghena tattha gantvā uposatho kātabboti** sace bahū tādisā gilānā honti, saṅghena paṭipāṭiyā ṭhatvā sabbe hatthapāse kātabbā. Sace dūre dūre honti, saṅgho nappahoti, tam divasam uposatho na kātabbo, natveva vaggena saṅghena uposatho kātabbo.

**Tattheva pakkamatīti** saṅghamajjham anāgantvā tatova katthaci gacchati. **Sāmaṇero paṭijānātīti** “sāmaṇero aha”nti evam paṭijānāti; bhūtamyeva vā sāmaṇerabhāvam āroceti, pacchā vā sāmaṇerabhūmiyam tiṭṭhatīti attho. Esa nayo sabbattha.

**Saṅghapatto pakkamatīti** sabbantimena paricchēdena uposathatthāya sannipatitānam catunnam bhikkhūnam hatthapāsam patvā pakkamati. Esa nayo sabbattha. Ettha ca ekena bahūnampi āhaṭā pārisuddhi āhaṭāva hoti. Sace pana so antarāmagge aññam bhikkhum disvā yesam anena pārisuddhi

gahitā, tesañca attano ca pārisuddhiṃ deti, tasseva pārisuddhi āgacchati, itarā pana bilāḷasaṅkhalikapārisuddhi nāma hoti. Sā na āgacchati.

**Sutto na ārocetī** āgantvā supati, “asukena pārisuddhi dinnā”ti na ārocetī. **Pārisuddhihārakassa anāpattī**ti ettha sace sañcicca nāroceti, dukkaṭaṃ āpajjati, pārisuddhi pana āhaṭṭāva hoti. Asañcicca anārocitattā panassa anāpatti, ubhinnampi ca uposatho katoyeva hoti.

### Chandadānakathā

**165.** Chandadānepi pārisuddhidāne vuttasadisoyeva vinicchayo. **Pārisuddhiṃ dentena chandampi dātuntī** ettha sace pārisuddhimeva deti na chandaṃ, uposatho kato hoti. Yaṃ pana saṅgho aññaṃ kammaṃ karoti, taṃ akataṃ hoti. Chandameva deti na pārisuddhiṃ, bhikkhusaṅghassa uposathopi kammampi katameva hoti, chandadāyakassa pana uposatho akato hoti. Sacepi koci bhikkhu nadiyā vā sīmāya vā uposathaṃ adhiṭṭhahitvā āgacchati, “kato mayā uposatho”ti acchituṃ na labhati, sāmaggī vā chando vā dātabbo.

**167. Saratipi uposathaṃ napi saratī**ti ekadā sarati, ekadā na sarati. **Atthi neva saratī**ti yo ekantaṃ neva sarati, tassa sammutidānakiccaṃ natthi. Anāgacchantopi kammaṃ na kopeti.

### Saṅghuposathādikathā

**168. So deso sammajjitvā**ti taṃ desaṃ sammajjitvā, upayogathe paccattaṃ. **Pāṇiyaṃ paribhojanīyanti**ādi pana uttānatthameva. Kasmā panetaṃ vuttaṃ? Uposathassa pubbakaraṇādiddassanattaṃ. Tenāhu aṭṭhakathācariyā –

“Sammajjanī padīpo ca, udakaṃ āsanena ca;  
Uposathassa etāni, pubbakaraṇanti vuccati”.

Iti imāni cattāri “pubbakaraṇa”nti akkhātāni.

“Chandapārisuddhiutukkhānaṃ, bhikkhugaṇanā ca ovādo;  
Uposathassa etāni, pubbakicanti vuccati.

Iti imāni pañca pubbakaraṇato pacchā kattabbāni “pubbakicca”nti akkhātāni.

“Uposatho yāvatikā ca bhikkhū kammappattā,  
Sabhāgāpattiyo ca na vijjanti;  
Vajjanīyā ca puggalā tasmim na honti,  
Pattakallanti vuccati”.

Iti imāni cattāri “pattakalla”nti akkhātānīti.

**Tehi saddhinti** tehi āgatehi saddhiṃ etāni pubbakaraṇādīni katvā uposatho kātabbo. **Ajja me uposathoti** ettha sace pannaraso hoti, “ajja me uposatho pannaraso”tipi adhiṭṭhātuṃ vaṭṭati. Cātuddasikepi eseva nayo.

### Āpattipaṭikammavidhikathā

**169. Bhagavatā paññattaṃ** “na sāpattikena uposatho kātabbo”ti idaṃ “yassa siyā āpatti”tiādivacaneneva pārisuddhidānapaññāpanena ca pārisuddhiuposathapaññāpanena ca paññattaṃ



hotīti veditabbaṃ. **Itthannāmaṃ āpattinti** thullaccayādīsu ekissā nāmaṃ gahetvā “thullaccayaṃ āpattiṃ pācittiyaṃ āpatti”nti evaṃ vattabbaṃ. **Taṃ paṭidesemīti** idaṃ “taṃ tumhamūle, taṃ tuyhamūle paṭidesemī”ti vuttepi suvuttameva hoti. **Passasīti** idañca “passasi āvuso taṃ āpattiṃ, passatha bhante taṃ āpatti”nti evaṃ vattabbaṃ. **Āma passāmīti** idaṃ pana “āma bhante passāmi, āma āvuso passāmi”ti evaṃ vuttampi suvuttameva hoti. **Āyatim samvareyyāsīti** ettha pana sace vuḍḍhataro “āyatim samvareyyāthā”ti vattabbo. Evaṃ vuttena pana “sādhu suṭṭhu samvarissāmi”ti vattabbameva.

**Yadā nibbematikoti** ettha sace panesa nibbematiko na hoti, vatthum kittetvāva desetum vaṭṭatīti andhakaṭṭhakathāyaṃ vuttaṃ. Tatrāyaṃ desanāvīdhi – sace meghacchanne sūriye “kālo nu kho no”ti vematiko bhuñjati, tena bhikkhunā “ahaṃ bhante vematiko bhuñjīm”, sace kālo atthi, “sambahulā dukkaṭā āpattiyo āpannomhi, no ce atthi, “sambahulā pācittiyā āpannomhi”ti evaṃ vatthum kittetvā “ahaṃ bhante yā tasmim vatthusmim sambahulā dukkaṭā vā pācittiyā vā āpattiyo āpanno, tā tumhamūle paṭidesemī”ti vattabbaṃ. Esa nayo sabbāpattīsu.

**Na bhikkhave sabhāgā āpattīti** ettha yaṃ dvepi janā vikālabhojanādinā sabhāgavattunā āpattiṃ āpajjanti, evarūpā vatthusabhāgā “sabhāgā”ti vuccati. Vikālabhojanappaccayā āpannaṃ pana anārittabhojanapaccayā āpannassa santike desetum vaṭṭati. Yāpi cāyaṃ vatthusabhāgā, sāpi desitā sudesitāva. Aññaṃ pana desanapaccayā desako, paṭiggahaṇappaccayā paṭiggahako cāti ubhopi dukkaṭaṃ āpajjanti, taṃ nānavatthukaṃ hoti, tasmā aññaṃaññaṃ desetum vaṭṭati.

**170. Sāmanto bhikkhu evamassa vacanīyoti** ettha sabhāgoyeva vattabbo. Visabhāgassa hi vuccamāne bhaṇḍanakalahasaṅghabhedādīnīpi honti, tasmā tassa avatvā “ito vuṭṭhahitvā paṭikarissāmi”ti ābhogaṃ katvā uposatho kātabboti andhakaṭṭhakathāyaṃ vuttaṃ.

### Anāpattipannarasakādīkathā

**172.** Anāpattipannarasake – **te na jāniṃsūti** sīmaṃ okkantāti vā okkamantīti vāti na jāniṃsu. **Athaññe āvāsikā bhikkhū āgacchantīti** gāmaṃ vā araññaṃ vā kenaci karaṇīyena gantvā tesam nisinnaṭṭhānaṃ āgacchanti. **Vaggā samaggasaññīnoti** tesam sīmaṃ okkantattā vaggā; sīmaṃ okkantabhāvassa ajānanato samaggasaññīno.

**173.** Vaggāvaggasaññīpannarasake – **te jānantīti** pabbate vā thale vā ṭhitā sīmaṃ okkante vā okkamante vā passanti. Vematikapannarasakaṃ uttānameva.

**175.** Kukkuccapakatapannarasake – yathā icchāya abhibhūto “icchāpakato”ti vuccati, evaṃ pubbhāge sannīṭṭhānaṃ katvāpi karaṇakkhaṇe akappiye akappiyasaññītāsāṅkhātena kukkucena abhibhūta “kukkuccapakatā”ti veditabbā.

**176.** Bhedapurekkhārapannarasake – akusalabalavatāya thullaccayaṃ vuttaṃ.

### Sīmokkantikaṭṭhālakathā

**177.** Āvāsikenaāgantukaṭṭhālakathā – yathā purime āvāsikenaāvāsikaṭṭhālakathā “te na jānanti athaññe āvāsikā”tiādi vuttaṃ, evaṃ “te na jānanti athaññe āgantukā”tiādinā nayena sabbam veditabbaṃ. Āgantukenaāvāsikaṭṭhālakathā pana – yathā purimaṭṭhālakathā “āvāsikā bhikkhū sannipatantī”ti āgataṃ, evaṃ “āgantukā bhikkhū sannipatantī”ti ānetabbaṃ. Āgantukenaāgantukaṭṭhālakathā pana – ubhayapadesu āgantukavasena yojetabboti.

**178.** Āvāsikānaṃ bhikkhūnaṃ cātuddaso hoti, āgantukānaṃ pannarasoti ettha yesaṃ pannaraso, te tīroratṭhato vā āgatā, atītaṃ vā uposathaṃ cātuddasikaṃ akāṃsūti veditabbā. **Āvāsikānaṃ anuvattitabbanti** āvāsikehi “ajjuposatho cātuddaso”ti pubbakicce kariyamāne anuvattitabbaṃ, na

paṭikkositabbaṃ. Na akāmā dātabbāti na anicchāya dātabbā.

### Līṅgādidassanakathā

**179. Āvāsikākāraṅti** āvāsikānaṃ ākāraṃ. Esa nayo sabbattha. **Ākāro** nāma yena tesam vattasampannā vā na vāti ācārasaṅghānaṃ gayhati. **Līṅgaṃ** nāma yaṃ te tattha tattha līne gamayati; adissamānepi jānāpetīti attho. **Nimittaṃ** nāma yaṃ disvā te atthīti nāyanti. **Uddeso nāma** yena te evarūpaparikkhārāti uddisanti; apadesaṃ labhantīti attho. Sabbametaṃ supaññattamañcapīṭhādīnañceva padasaddādīnañca adhivacanaṃ, yathāyogaṃ pana yojetabbaṃ. **Āgantukākārādīsupi** eseva nayo. Tattha **aññātakanti** aññesaṃ santakaṃ. **Pādānaṃ dhotāṃ udakanissekanti** pādānaṃ dhotānaṃ udakanissekaṃ. Bahuvacanaṃ ekavacanaṃ vedītabbaṃ. ‘Pādānaṃ dhotaudakanisseka’nti vā pāṭho; pādānaṃ dhovanaudakanissekanti attho.

**180.** Nānāsaṃvāsakādivatthūsu – **samānasaṃvāsakadiṭṭhinti** “samānasaṃvāsakā ete”ti diṭṭhiṃ. Na **pucchantīti** tesam laddhiṃ na pucchanti; apucchitvāva vattapaṭivattiṃ katvā ekato uposathaṃ karonti. **Nābhivitarantīti** nānāsaṃvāsakabhāvaṃ madditūṃ abhibhavitūṃ na sakkonti; taṃ diṭṭhiṃ na nissajjāpentīti attho.

### Nagantabbagantabbavārakathā

**181. Sabhikkhukā āvāsāti** yasmiṃ āvāse uposathakārakā bhikkhū atthi, tamhā āvāsā yaṃ na sakkoti tadaheva āgantūṃ, so āvāso uposathaṃ akatvā na gantabbo. **Aññātra saṅghenāti** saṅghappahonakehi bhikkhūhi vinā. **Aññātra antarāyāti** pubbe vuttaṃ dasavidhaṃ antarāyaṃ vinā. Sabbantimena pana paricchena attacattutthena antarāye vā satī gantūṃ vaṭṭati. **Anāvāsoti** navakammasālādiko yo koci padeso. Yathā ca āvāsādayo na gantabbā; evaṃ sace vihāre uposathaṃ karonti, uposathādiṭṭhānatthaṃ sīmāpi nadīpi na gantabbā. Sace panettha koci bhikkhu hoti, tassa santikaṃ gantūṃ vaṭṭati. Vissatṭhauposathāpi āvāsā gantūṃ vaṭṭati; evaṃ gato adhiṭṭhātumpi labhati. Āraññakenāpi bhikkhunā uposathadivase gāme piṇḍāya caritvā attano vihārameva āgantabbaṃ. Sace aññaṃ vihāraṃ okkamati, tattha uposathaṃ katvāva āgantabbaṃ, akatvā na vaṭṭati.

**182. Yaṃ jaññā sakkomi ajjeva gantunti** yaṃ jāneyya ajjeva tattha gantūṃ sakkomīti; evarūpo āvāso gantabbo. Tattha bhikkhūhi saddhiṃ uposathaṃ karontenāpi hi iminā neva uposathantarāyo kato bhavissatīti.

### Vajjanīyapuggalasandassanakathā

**183. Bhikkhuniyā nisinnaparisāyāti** adīsū hatthapāsūpagamaṃ namaeva pamāṇaṃ. **Aññātra avuṭṭhitāya parisāyāti** idañhi pārivāsīyapārisuddhidānaṃ nāma parisāya vuṭṭhitakālato paṭṭhāya na vaṭṭati, avuṭṭhitāya pana vaṭṭati. Tenāha – “aññātra avuṭṭhitāya parisāyā”ti. Tassa lakkhaṇaṃ bhikkhunivibhaṅge parivāsīyachandānavāṇṇanato gahetabbaṃ. **Anuposatheti** cātuddasiko ca pannarasiko cāti ime dve uposathe ṭhapetvā aññasmiṃ divase. **Aññātra saṅghasāmaggiyāti** yā kosambakabhikkhūnaṃ viya bhinne saṅghe puna saṅghasāmaggī kariyati, tathārūpiṃ saṅghasāmaggiṃ ṭhapetvā. Tadā ca “suṇātu me bhante saṅgho ajjuposatho sāmaggī”ti vatvā katabbo. Ye pana kismiñcīdeva appamattake uposathaṃ ṭhapetvā puna samaggā honti, tehi uposatheveva katabboti.

Uposathakkhandhakavaṇṇanā niṭṭhitā.

## 3. Vassūpanāyikakkhandhakaṃ

### Vassūpanāyikānujānanakathā

**184.** Vassūpanāyikakkhandhake – **apaññattoti** ananuññāto asaṃvihito vā. **Te idha bhikkhūti** te bhikkhū, idhasaddo nipātamatto. **Saṅghātaṃ āpādentāti** vināsaṃ āpādentā. **Saṅkasāyissanti** appossukkā nibaddhavāsaṃ vasissanti. **Sakuntakāti** sakuṇā. **Vassāne vassaṃ upagantunti** vassānanāmake temāse vassaṃ upagantabbanti attho. **Kati nu kho vassūpanāyikāti** kati nu kho vassūpagamanāni. **Aparajjugatāyāti** ettha aparajjugatāya assāti aparajjugatā, tassā aparajjugatāya; atikkantāya aparasmim divaseti attho. Dutiyāyepi māso gatāya assāti **māsagatā**, tassā māsagatāya; atikkantāya māse paripuṇṇeti attho. Tasmā āsālḥīpuṇṇamāya anantare pāṭipadadivase, āsālḥīpuṇṇamito vā aparāya puṇṇamāya anantare pāṭipadadivaseyeva vihāraṃ paṭijaggivā pānīyaṃ paribhojanīyaṃ upaṭṭhapetvā sabbam cetiyavandanādisāmīcikammaṃ niṭṭhapetvā “imasmim vihāre imaṃ temāsaṃ vassaṃ upemi”ti sakim vā dvattikkhattuṃ vā vācaṃ nicchāretvā vassaṃ upagantabbam.

Vācaṃ nicchāretvā vassaṃ upagantabbam.

### Vassānecārikāpaṭikkhepādikathā

**185-6. Yo pakkameyyāti** ettha anapekkhagamanena vā aññattha aruṇaṃ uṭṭhāpanena vā āpatti veditabbā. **Yo atikkameyyāti** ettha vihāragaṇanāya āpattiyo veditabbā. Sace hi taṃ divasaṃ vihārasatassa upacāraṃ okkamitvā atikkamati, sataṃ āpattiyo. Sace pana vihārūpacāraṃ atikkamitvā aññassa vihārassa upacāraṃ anokkamitvāva nivattati, ekā eva āpatti. Kenaci antarāyena purimikaṃ anupagatena pacchimikā upagantabbā.

**Vassaṃ ukkaḍḍhitukāmoti** vassanāmakam paṭhamamāsaṃ ukkaḍḍhitukāmo, sāvaṇamāsaṃ akatvā puna āsālḥīmāsameva kattukāmoti attho. **Āgame juṇheti** āgame māseti attho. **Anujānāmi bhikkhave rājūnaṃ anuvattitunti** ettha vassukkaḍḍhane bhikkhūnaṃ kāci parihāni nāma natthīti anuvattitūṃ anuññātaṃ, tasmā aññasmimpi dhammike kamme anuvattitabbam. Adhammike pana na kassaci anuvattitabbam.

### Sattāhakarāṇīyānujānanakathā

**187-8.** Sattāhakarāṇīyesu – **sattāhakarāṇīyena gantunti** sattāhabbhantare yaṃ kattabbam taṃ sattāhakarāṇīyaṃ, tena sattāhakarāṇīyena karaṇabhūtena gantuṃ anujānāmīti attho. **Pahite gantunti** imehi sattahi bhikkhūādīhi dūte pahiteyeva gantuṃ anujānāmīti attho. **Sattāhaṃ sannivatto kātabboti** sattāheyeva sannivattitabbo, aṭṭhamo aruṇo tattheva na uṭṭhāpetabboti attho.

**Bhikkhunisaṅghaṃ uddissāti** ito paṭṭhāya vaccakuṭi jantāgharaṃ jantāgharasālāti imāni tīṇi parihīnāni.

**189. Udositādīni** udositasikkhāpadādīsu vuttāneva. **Rasavatīti** bhattagehaṃ vuccati. **Vāreyyaṃ** sañcarittasikkhāpade vuttameva. **Purāyaṃ suttanto palujjati** yāva ayaṃ suttanto na palujjati, yāva ayaṃ suttanto na vinassati. **Aññataraṃ vā panassa kiccaṃ hoti karaṇīyaṃ vāti** etena parisankhataṃ yaṃkiñci karaṇīyaṃ saṅghitaṃ hoti. Sabbattha ca “icchāmi dānañca dātuṃ dhammañca sotuṃ bhikkhū ca passitu”nti imināva kappiyavacanena pesite gantabbam, etesaṃ vā vevacanena. Peyyālakkamo pana evaṃ veditabbo, yathā “upāsakena saṅghaṃ uddissa vihārādayo kārāpitā honti, sambahule bhikkhū uddissa, ekaṃ bhikkhuṃ uddissa, bhikkhunisaṅghaṃ uddissa, sambahulā bhikkhuniyo, ekaṃ bhikkhunim, sambahulā sikkhamānāyo, ekaṃ sikkhamānaṃ, sambahule sāmaṇere, ekaṃ sāmaṇeraṃ, sambahulā sāmaṇeriyo, ekaṃ sāmaṇerim uddissa attano atthāya nivesanaṃ kārāpitaṃ hoti”ti vuttaṃ; evameva “upāsikāya, bhikkhunā, bhikkhuniyā, sikkhamānāya, sāmaṇerena, sāmaṇeriyā saṅghaṃ uddissā”ti sabbam vattabbam. Etesu sattappakāresu karaṇīyesu pahite gantabbam.

### Pañcannaṃappahitepianujānanakathā

**193. Pañcannaṃ sattāhakaraṇīyenāti** etesaṃ bhikkhuādīnaṃ sahadhammikānaṃ “gilānabhattaṃ vā gilānupaṭṭhākabhattaṃ vā bhesajjaṃ vā pariyesissāmi, pucchissāmi vā, upaṭṭhahissāmi vā” ti evamādinā parato vitthāretvā dassitena kāraṇena appahitepi gantabbaṃ, pageva pahite. Bhikkhu gilāno hoti, anabhirati uppannā hoti, kukkuccaṃ uppannaṃ hoti, diṭṭhigataṃ uppannaṃ hoti, garudhammaṃ ajjhāpanno hoti parivāsāraho, mūlāya paṭikassanāraho hoti, mānattāraho, abbhānāraho, saṅgho kammaṃ kattukāmo hoti, kataṃ vā saṅghena kammaṃ hotīti etehi dasahi kāraṇehi bhikkhussa santikaṃ gantabbaṃ. Bhikkhuniyā santikaṃ navahi kāraṇehi gantabbaṃ, sikkhamānāya santikaṃ chahi – ādito catūhi, sikkhā kuppitā hoti, upasampajjitukāmā hotīti. Sāmaṇerassāpi chahi – ādito catūhi, vassaṃ pucchitukāmo upasampajjitukāmo hotīti. Sāmaṇeriyā upasampadaṃ apantvā sikkhāpadaṃ dātukāmo hotīti iminā saddhiṃ pañcahi. Parato mātāpitūnaṃ anuññātāṭṭhānēpi eseva nayo. Andhakaṭṭhakathāyaṃ pana “ye mātāpitūnaṃ upaṭṭhākā ñātakā vā aññātakā vā tesampi appahite gantuṃ vaṭṭatī” ti vuttaṃ, taṃ neva aṭṭhakathāyaṃ, na pāliyaṃ vuttaṃ, tasmā na gahetabbaṃ.

### Pahitevevaanujānanakathā

**199. Bhikkhugatikoti** ekasmiṃ vihāre bhikkhūhi saddhiṃ vasanakapuriso. **Undriyatīti** palujjati. **Bhaṇḍaṃ chedāpitanti** dabbasambhārabhaṇḍaṃ chedāpitaṃ. **Āvahāpeyyunti** āharāpeyyuṃ. **Dajjāhanti** dajje ahaṃ. **Saṅghakaraṇīyenāti** ettha yaṃkiñci uposathāgārādīsu senāsanesu cetiyachattavedikādīsu vā kattabbaṃ, antamaso bhikkhuno puggalikesanāsanaṃpi, sabbaṃ saṅghakaraṇīyameva. Tasmā tassa nipphādanatthaṃ dabbasambhāradīni vā āharitūṃ vaḍḍhakāpabhutīnaṃ bhattavetanādīni vā dāpetuṃ gantabbaṃ.

Ayaṃ panettha pālimuttakaratticchedavinicchayo – dhammasavanatthāya animantitena gantuṃ na vaṭṭati. Sace ekasmiṃ mahāvāse paṭhamāyaeva katikā katā hoti – “asukadivasāṃ nāma sannipatitabba” nti, nimantitoyeva nāma hoti, gantuṃ vaṭṭati. “Bhaṇḍakaṃ dhovissāmi” ti gantuṃ na vaṭṭati. Sace pana ācariyupajjhāyā paṇḍanti, vaṭṭati. Nātidūre vihāro hoti, tattha gantvā ajjeva āgamiṣṣāmi sampāpuṇitūṃ na sakkoti, vaṭṭati. Uddesaparipucchādīnaṃ atthāyapi gantuṃ na vaṭṭati. “Ācariyaṃ passissāmi” ti pana gantuṃ labhati. Sace pana naṃ ācariyo “ajja mā gacchā” ti vadati, vaṭṭati. Upaṭṭhākakulaṃ vā ñātikulaṃ vā dassanāya gantuṃ na labhatīti.

### Antarāyeaṇāpattivassacchedakathā

**201. Yena gāmo tena gantuntīādīsu** sace gāmo avidūraṃ gato hoti, tattha piṇḍāya caritvā vihārameva āgantvā vasitabbaṃ. Sace dūraṃ gato, sattāhavārena aruṇo utṭhāpetabbo. Na sakkā ce hoti, tatveva sabhāgaṭṭhāne vasitabbaṃ. Sace manussā yathāpavattāni salākabhattādīni denti, “na mayaṃ tasmīṃ vihāre vasimhā” ti vattabbā. “Mayaṃ vihārassa vā pāsādassa vā na dema, tumhākaṃ dema, yattha katthaci vasitvā bhuñjathā” ti vutte pana yathāsukhaṃ bhuñjitabbaṃ, tesāyaeva taṃ pāpuṇāti. “Tumhākaṃ vasanaṭṭhāne pāpuṇāpetvā bhuñjathā” ti vutte pana yattha vasanti, tattha netvā vassaggena pāpuṇāpetvā bhuñjitabbaṃ.

Sace pavāritakāle vassāvāsikaṃ denti, yadi sattāhavārena aruṇaṃ utṭhāpayiṃsu, gahetabbaṃ. Chinnavassehi pana “na mayaṃ tattha vasimha, chinnavassā maya” nti vattabbā. Yadi “yesaṃ amhākaṃ senāsanaṃ pāpitaṃ, te gaṇhantū” ti vadanti, gahetabbaṃ. Yaṃ pana vihāre upanikkhittakaṃ mā vinassīti idha āhaṭṭaṃ cīvarādivebhaṅgiyabhaṇḍaṃ, taṃ tattheva gantvā apaloketvā bhājetabbaṃ. “Ito ayyānaṃ cattāro paccaye dethā” ti kappiyakāraṇānaṃ dinne khettavatthuādike tatrappādepi eseva nayo. Saṅghikañhi vebhaṅgiyabhaṇḍaṃ antovihāre vā bahisīmāya vā hotu, bahisīmāya ṭhitānaṃ apaloketvā bhājetuṃ na vaṭṭati. Ubhayattha ṭhitampi pana antosīmāya ṭhitānaṃ apaloketvā bhājetuṃ vaṭṭatiyeva.

### Saṅghabhedeānāpattivassacchedakathā

**202. Saṅgho bhinnoti** ettha binne saṅghe gantvā karaṇīyaṃ natthi, yo pana “bhijjissatī” ti āsaṅkito, taṃ sandhāya “bhinno” ti vuttaṃ. **Sambahulāhi bhikkhunīhi saṅgho bhinnoti** ettha na bhikkhunīhi saṅgho bhinnoti daṭṭhabbo. Vuttañhetam “na kho upāli bhikkhunī saṅgham bhindatī” ti. Etā pana nissāya anubalaṃ katvā yaṃ saṅgham “bhikkhū bhindeyyu” nti āsaṅkā hoti, taṃ sandhāyetam vuttaṃ.

### Vajādīsuvassūpagamanakathā

**203. Vajoti** gopālakānaṃ nivāsattḥānaṃ. **Yena vajoti** ettha vajena saddhiṃ gatassa vassacchede anāpatti.

**Upakaṭṭhāyāti** āsannāya. **Satthe vassaṃ upagantuntī** ettha vassūpanāyikadivase tena bhikkhunā upāsakā vattabbā “kuṭikā laddhum vaṭṭatī” ti. Sace karitvā denti, tattha pavasitvā “idha vassaṃ upemī” ti tikkhattum vattabbaṃ. No ce denti, sālāsaṅkhepena ṭhitasakaṭassa heṭṭhā upagantabbaṃ. Tampi alabhantena ālayo kātabbo. Satthe pana vassaṃ upagantum na vaṭṭati. Ālayo nāma “idha vassaṃ vasissāmī” ti cittuppādamattaṃ. Sace maggappaṭipanneyyeva satthe pavāraṇadivaso hoti, tattheva pavāretabbaṃ. Atha sattho antovasseyeva bhikkhunā patthitaṭṭhānaṃ patvā atikkamati, patthitaṭṭhāne vasitvā tattha bhikkhūhi saddhiṃ pavāretabbaṃ. Athāpi sattho antovasseyeva antarā ekasmiṃ gāme tiṭṭhati vā vippakirati vā, tasmimyeva gāme bhikkhūhi saddhiṃ vasitvā pavāretabbaṃ, apavāretvā tato paraṃ gantum na vaṭṭati.

Nāvāyaṃ vassaṃ upagacchantenāpi kuṭiyamyeva upagantabbaṃ. Pariyesitvā alabhantena ālayo kātabbo. Sace antotemāsaṃ nāvā samuddeyyeva hoti, tattheva pavāretabbaṃ. Atha nāvā kūlam labhati, ayañca parato gantukāmo hoti, gantum na vaṭṭati. Nāvāya laddhagāmeyeva vasitvā bhikkhūhi saddhiṃ pavāretabbaṃ. Sacepi nāvā anutīrameva aññattha gacchati, bhikkhu ca paṭhamam laddhagāmeyeva vasitukāmo, nāvā gacchatu bhikkhunā tattheva vasitvā bhikkhūhi saddhiṃ pavāretabbaṃ.

Iti vaje satthe nāvāyanti tīsu ṭhānesu natthi vassacchede āpatti, pavāretuñca labhati. Purimesu pana “vālehi ubbālā honti” tiādīsū saṅghabhedapariyantesu vatthūsū kevalam anāpatti hoti, pavāretum pana na labhati.

**204. Na bhikkhave rukkhasusireti** ettha suddhe rukkhasusireyyeva na vaṭṭati; mahantassa pana rukkhasusirassa anto padaracchadanaṃ kuṭikaṃ katvā pavisanadvāraṃ yojetvā upagantum vaṭṭati. Rūkkham chinditvā khāṇukamatthake padaracchadanaṃ kuṭikaṃ katvāpi vaṭṭatiyyeva. **Rukkhaṅgaṅgāyāti** etthāpi suddhe viṭapamatte na vaṭṭati. Mahāviṭape pana aṭṭakaṃ bandhitvā tattha padaracchadanaṃ kuṭikaṃ katvā upagantabbaṃ. **Asenāsānikenāti** yassa pañcannaṃ chadanānaṃ aññatarena channaṃ yojitadvārabandhanaṃ senāsānaṃ natthi, tena na upagantabbaṃ. **Na bhikkhave chavakuṭikāyanti** chavakuṭikā nāma ṭaṅkitamañcādibhedā kuṭi, tattha upagantum na vaṭṭati. Susāne pana aññaṃ kuṭikaṃ katvā upagantum vaṭṭati. **Na bhikkhave chatteti** etthāpi catūsū thambhesu chattaṃ ṭhapetvā āvaraṇam katvā dvāraṃ yojetvā upagantum vaṭṭati, chattaṅgaṅgā nāmesā hoti. **Cāṭiyāti** etthāpi mahantena kapallena chatte vuttanayena kuṭim katvā upagantum vaṭṭati.

### Adhammikakatikādīkathā

**205. Evarūpā katikāti** ettha aññāpi yā īdisī adhammikā katikā hoti, sā na kātabbāti attho. Tassā lakkhaṇam mahāvibhaṅge vuttaṃ.

**207-8. Paṭissave ca āpatti dukkaṭassāti** ettha na kevalam “imaṃ temāsaṃ idha vassaṃ vasathā” ti etasseva paṭissave āpatti, “imaṃ temāsaṃ bhikkham gaṇhatha, ubhopi mayam idha vassaṃ vasissāma, ekato uddisāpessāmā” ti evamādināpi tassa tassa paṭissave dukkaṭam. Tañca kho paṭhamam suddhacittassa pacchā viṣamvādanapaccayā, paṭhamampi asuddhacittassa pana paṭissave pācittiyam,

visaṃvādane dukkaṭanti pācittiyena saddhiṃ dukkaṭaṃ yujjati.

**So tadaheva akaraṇīyoti**ādīsu sace vassaṃ anupagantvā vā pakkamati, upagantvā vā sattāhaṃ bahiddhā vītināmeti, purimikā ca na paññāyati, paṭissave ca āpatti. Vassaṃ upagantvā pana aruṇaṃ anuṭṭhāpetvā tadaheva sattāhakarāṇīyena pakkamantassāpi antosattāhe nivattantassa anāpatti, ko pana vādo dvīhatīhaṃ vasitvā antosattāhe nivattantassa. **Dvīhatīhaṃ vasitvā**ti etthāpi nirapekkheneva upacārātikkame vassacchedo veditabbo. Sace idha vasissāmīti ālayo atthi, asatiyā pana vassaṃ na upeti, gahitasenāsaṇaṃ suggahitaṃ, chinnavasso na hoti, pavāretuṃ labhatiyeva.

**Sattāhaṃ anāgatāya pavāraṇāyā**ti ettha navamito paṭṭhāya gantuṃ vaṭṭati, āgacchatu vā mā vā, anāpatti. Sesāṃ uttānamevāti.

Vassūpanāyikakkhandhakavaṇṇanā niṭṭhitā.

## 4. Pavāraṇākkhandhakaṃ

### Aphāsukavīhārakathā

**209.** Pavāraṇākkhandhake – **neva ālapeyyāma na sallapeyyāmā**ti ettha **ālāpo** nāma paṭhamavacanaṃ; **sallāpo** pacchimavacanaṃ. **Hatthavilāṅghakenā**ti hatthukkhepakena. **Pasusaṃvāsanti** pasūnaṃ viya saṃvāsaṃ. Pasavopi hi attano uppannaṃ sukhadukkhaṃ aññamaññassa na ārocenti, paṭisanthāraṃ na karonti, tathā etepi na akaṃsu; tasmā nesāṃ saṃvāso “pasusaṃvāso”ti vuccati. Esa nayo sabbattha. **Na bhikkhave mūgabbataṃ tīthiyasamādānanti** “imaṃ temāsaṃ na kathetabba”nti evarūpaṃ vatasamādānaṃ na kātabbaṃ; adhammakatikā hesā. **Aññamaññānulomatā**ti aññamaññaṃ vattuṃ anulomabhāvo. “Vadantu maṃ āyasmanto”ti hi vadantaṃ sakkā hoti kiñci vattuṃ; na itaraṃ. **Āpattivuṭṭhānatā vinayapurekkhāratā**ti āpattīhi vuṭṭhānabhāvo vinayaṃ purato katvā caraṇabhāvo. “Vadantu maṃ āyasmanto”ti hi evaṃ vadanto āpattīhi vuṭṭhahissati, vinayañca purakkhatvā viharissatīti vuccati.

**210.** **Suṇātu me bhante saṅgho ajja pavāraṇā, yadi saṅghassa pattakallaṃ, saṅgho pavāreyyā**ti ayaṃ sabbasaṅgāhikā nāma ñatti; evaṃhi vutte tevācikaṃ dvevācikaṃ ekavācikañca pavāretuṃ vaṭṭati. Samānavassikaṃ na vaṭṭati. “Tevācikaṃ pavāreyyā”ti vutte pana tevācikameva vaṭṭati, aññaṃ na vaṭṭati. “Dvevācikaṃ pavāreyyā”ti vutte dvevācikañca tevācikañca vaṭṭati, ekavācikañca samānavassikañca na vaṭṭati. “Ekavācikaṃ pavāreyyā”ti vutte pana ekavācika-dvevācika-tevācikāni vaṭṭanti, samānavassikameva na vaṭṭati. “Samānavassika”nti vutte sabbam vaṭṭati.

**211.** **Acchantī**ti nisinnāva honti, na uṭṭhahanti. **Tadamantarā**ti tadantarā; tāvatakaṃ kālanti attho.

### Pavāraṇābhedaḥkathā

**212.** **Cātuddasikā ca pannarasikā cāti** ettha cātuddasikāya “ajja pavāraṇā cātuddasī”ti evaṃ pubbakiccaṃ kātabbaṃ, pannarasikāya “ajja pavāraṇā pannarasī”ti.

Pavāraṇakammesu sace ekasmiṃ vihāre pañcasu bhikkhūsu vasantesu ekassa pavāraṇaṃ āharitvā cattāro gaṇaṇattim ṭhapetvā pavārenti, catūsu tīsu vā vasantesu ekassa pavāraṇaṃ āharitvā tayo vā dve vā saṅghaṇattim ṭhapetvā pavārenti, sabbametaṃ adhammenavaggaṃ pavāraṇakammaṃ.

Sace pana sabbepi pañca janā ekato sannipattitvā gaṇaṇattim ṭhapetvā pavārenti, cattāro tayo vā dve vā vasantā ekato sannipattitvā saṅghaṇattim ṭhapetvā pavārenti, sabbametaṃ adhammenasamaggaṃ pavāraṇakammaṃ.

Sace pañcasu janesu ekassa pavāraṇaṃ āharitvā cattāro saṅghañattim ṭhapetvā pavārenti, catūsu tīsu vā ekassa pavāraṇaṃ āharitvā tayo vā dve vā gaṇañattim ṭhapetvā pavārenti, sabbametaṃ dhammenavaggaṃ pavāraṇakammaṃ.

Sace pana sabbepi pañca janā ekato sannipatitvā saṅghañattim ṭhapetvā pavārenti, cattāro vā tayo vā ekato sannipatitvā gaṇañattim ṭhapetvā pavārenti, dve aññamaññaṃ pavārenti, ekako vasanto adhiṭṭhānapavāraṇaṃ karoti, sabbametaṃ dhammenasamaggaṃ nāma pavāraṇakammanti.

### **Pavāraṇādānānujānanakathā**

**213. Dinnā hoti pavāraṇāti** ettha evaṃ dinnāya pavāraṇāya pavāraṇāhārakena saṅghaṃ upasaṅkamitvā evaṃ pavāretabbaṃ – “tisso bhante bhikkhu saṅghaṃ pavāreti diṭṭhena vā sutena vā parisāṅkāya vā, vadatu taṃ bhante saṅgho anukampaṃ upādāya, passanto paṭikarissati. Dutiyampi... pe... tatiyampi bhante tisso bhikkhu saṅghaṃ pavāreti...pe... paṭikarissati”ti. Sace pana vuḍḍhataro hoti, “āyasmā bhante tisso”ti vattabbaṃ; evañhi tena tassathāya pavāritam hotīti.

**Pavāraṇaṃ dentena chandampi dātunti** ettha chandadānaṃ uposathakkhandhake vuttanayeneva veditabbaṃ. Idhāpi ca chandadānaṃ avasesakammattāya. Tasmā sace pavāraṇaṃ dento chandaṃ deti, vuttanayena āhaṭāya pavāraṇāya tena ca bhikkhunā saṅghena ca pavāritameva hoti. Atha pavāraṇameva deti, na chandaṃ, tassa ca pavāraṇāya ārocitāya saṅghena ca pavārite sabbesaṃ suppavāritam hoti, aññaṃ pana kammaṃ kuppāti. Sace chandameva deti na pavāraṇaṃ, saṅghassa pavāraṇā ca sesakammāni ca na kuppanti, tena pana bhikkhunā appavāritam hoti. Pavāraṇadivase pana bahisīmāyaṃ pavāraṇaṃ adhiṭṭhahitvā āgatenapi chando dātabbo, tena saṅghassa pavāraṇakammaṃ na kuppāti.

**218. Ajja me pavāraṇāti** ettha sace cātuddasikā hoti, “ajja me pavāraṇā cātuddasī”ti sace pannarasikā “ajja me pavāraṇā pannarasī”ti evaṃ adhiṭṭhātabbaṃ.

**219. Tadahupavāraṇāya āpattintiādi** vuttanayameva.

### **Anāpattipannarasakādikathā**

**222. Puna pavāretabbanti** puna pubbakiccaṃ katvā ñattim ṭhapetvā saṅghattherato paṭṭhāya pavāretabbaṃ. Sesam uposathakkhandhakavaṇṇanāyaṃ vuttanayeneva veditabbaṃ.

**228. Āgantukehi āvāsikānaṃ anuvattitabbanti** “ajja pavāraṇā cātuddasī”ti etadeva pubbakiccaṃ kātabbaṃ. Pannarasikavārepi eseva nayo. **Āvāsikehi nissīmaṃ gantvā pavāretabbanti** assāvasāne ayaṃ pālīmuttakavinichayo – sace purimikāya pañca bhikkhū vassaṃ upagatā, pacchimikāyapi pañca, purimehi ñattim ṭhapetvā pavārite pacchimehi tesam santike pārisuddhiuposatho kātabbo, na ekasmiṃ uposathagge dve ñattiyo ṭhapetabbā. Sacepi pacchimikāya upagatā cattāro tayo dve eko vā hoti, eseva nayo. Atha purimikāya cattāro pacchimikāyapi cattāro tayo dve eko vā eseva nayo. Athāpi purimikāya tayo, pacchimikāyapi tayo dve vā, eseva nayo. Idañhettha lakkhaṇaṃ – sace purimikāya upagatehi pacchimikāya upagatā thokatarā ceva honti samasamā ca, saṅghapavāraṇāya gaṇaṃ pūrenti, saṅghapavāraṇāvasena ñatti ṭhapetabbāti.

Sace pana purimikāya tayo, pacchimikāya eko hoti, tena saddhim te cattāro honti, catunnaṃ saṅghañattim ṭhapetvā pavāretum na vaṭṭati. Gaṇañattiyā pana so gaṇapūrako hoti, tasmā gaṇavasena ñattim ṭhapetvā purimehi pavāretabbaṃ. Itarena tesam santike pārisuddhiuposatho kātabbo. Sace purimikāya dve pacchimikāya dve vā eko vā hoti, eseva nayo. Sace purimikāya eko, pacchimikāyapi eko hoti, ekena ekassa santike pavāretabbaṃ, ekena pārisuddhiuposatho kātabbo. Sace pana purimavassūpagatehi pacchimavassūpagatā ekenapi adhikatarā honti, paṭhamam pātimokkham uddisitvā pacchā thokatarehi tesam santike pavāretabbaṃ.

Kattikacātumāsiniyā pavāraṇāya pana sace paṭhamam vassūpagatehi mahāpavāraṇāya pavāritehi pacchā upagatā adhikatarā vā samasamā vā honti, pavāraṇāñattim ṭhapetvā pavāretabbam. Tehi pavārite pacchā itarehi pārisuddhiuposatho kātabbo. Atha mahāpavāraṇāya pavāritā bahū bhikkhū honti, pacchimavassūpagatā thokatarā vā eko vā, pātimokkhe uddiṭṭhe pacchā tesam santike tena pavāretabbam.

**233. Na ca bhikkhave appavāraṇāya pavāretabbam, aññatra saṅghasāmaggiyāti** ettha kosambakasāmaggīsadisāva sāmaggī veditabbā. “Aja pavāraṇā sāmaggī”ti evañcetha pubbakiccam kātabbam. Ye pana kismiñcīdeva appamattake pavāraṇam ṭhapetvā samaggā honti, tehi pavāraṇāyameva pavāraṇā kātabbā. Sāmaggīpavāraṇam karontehe ca paṭhamapavāraṇam ṭhapetvā pātipadato paṭṭhāya yāva kattikacātumāsini puṇṇamā, etthantare kātabbā, tato pacchā vā pure vā na vaṭṭati.

### Dvevācīkāḍipavāraṇākathā

**234. Dvevācīkam pavāretunti** ettha ñattim ṭhapentenāpi “yadi saṅghassa pattakallam saṅgho dvevācīkam pavāreyyā”ti vattabbam, ekavācīke “ekavācīkam pavāreyyā”ti, samānavassikepi “samānavassīkam pavāreyyā”ti vattabbam, ettha ca bahūpi samānavassā ekato pavāretum labhanti.

### Pavāraṇāṭhapanakathā

**236. Bhāsītāya lapitāya apariyositāyāti** ettha sabbasaṅgāhikañca puggalikañcāti duvidham pavāraṇāṭhapanam. Tattha sabbasaṅgāhike “suṇātu me bhante saṅgho...pe... saṅgho tevācīkam pavāre” iti sukārato yāva rekāro, tāva bhāsītā lapitā apariyositāva hoti pavāraṇā. Etthantare ekapadehi ṭhapentena ṭhapitā hoti pavāraṇā. ‘Yya’kāre pana patte pariyoṣitā hoti, tasmā tato paṭṭhāya ṭhapentena ṭhapitāpi aṭṭhapitā hoti. Puggalikaṭhapanane pana – “saṅgham bhante pavāremi...pe... tatiyampi bhante saṅgham pavāremi diṭṭhena vā...pe... passanto paṭi”ti saṅkārato yāva ayaṃ sabbapacchimo ‘ṭi’kāro tāva bhāsītā lapitā apariyositāva hoti pavāraṇā, etthantare ekapadehi ṭhapentena ṭhapitā hoti pavāraṇā, “karissāmī”ti vutte pana pariyoṣitā hoti, tasmā “karissāmī”ti etasmim pade patte ṭhapitāpi aṭṭhapitā hoti. Esa nayo dvevācīkaekavācīkasamānavassīkāsupi. Etāsupi hi ṭikārāvasānaṃyeva ṭhapanakhattanti.

**237. Anuyuñjīyamānoti** “kimhi naṃ ṭhapesī”ti parato vuttanayena pucchiyamāno. **Omadditvāti** etāni “alam bhikkhu mā bhaṇḍana”ntiādīni vacanāni vatvā, vacanomaddanā hi idha omaddanāti adhippetā. **Anuddhamṣitam paṭijānātīti** “amūlakena pārājikena anuddhamṣito ayaṃ mayā”ti evam paṭijānāti. **Yathādhammanti** saṅghādisesena anuddhamṣane pācittiyam; itarehi dukkaṭam. **Nāsetvāti** liṅganāsanāya nāsetvā.

**238. Sāssa yathādhammam paṭikatāti** ettakameva vatvā pavārethāti vattabbā, asukā nāma āpattīti idaṃ pana na vattabbam, etañhi kalahassa mukham hoti.

### Vatthuṭhapanādīkathā

**239. Idaṃ vatthu paññāyati na puggaloti** ettha corā kira araṇṇavihāre pokkharāṇito macche gahetvā pacitvā khādītvā agamaṃsu. So taṃ vippakāram disvā ārame vā kiñci dhuttana kataṃ vippakāram disvā “bhikkhussa iminā kamma bhavitabba”nti sallakkhetvā evamāha. **Vatthum ṭhapetvā saṅgho pavāreyyāti** “yadā taṃ puggalam jānissāma, tadā naṃ codessāma. Idāni pana saṅgho pavāretū”ti ayamettha attho. **Idāneva naṃ vadehīti** sace iminā vatthunā kañci puggalam parisankasi, idāneva naṃ apadisāhīti attho. Sace apadisati, taṃ puggalam anuvijjivā pavāretabbam; no ce apadisati, upaparikkhitvā jānissāmāti pavāretabbam.

**Ayaṃ puggalo paññāyati na vatthūti** ettha eko bhikkhu mālāgandhavilepanehi cetiyam vā pūjesi, ariṭṭham vā pivi, tassa tadanurūpo sarīragandho ahosi; so taṃ gandham sandhāya “imassa bhikkhuno



evarūpo sarīragandho’’ti vatthum pakāsento evamāha. **Puggalaṃ ṭhapetvā saṅgho pavāreyyāti** etaṃ puggalaṃ ṭhapetvā saṅgho pavāretu. **Idāneva naṃ vadehīti** yaṃ tvam puggalaṃ ṭhapesi, tassa puggalassa idāneva dosaṃ vada. Sace ayamassa dosoti vadati, taṃ puggalaṃ sodhetvā pavāretabbaṃ. Atha nāhaṃ jānāmīti vadati, upaparikkhitvā jānissāmīti pavāretabbaṃ.

**Idaṃ vatthu ca puggalo ca paññāyatīti** purimanayeneva corehi macche gahetvā pacitvā paribhuttaṭṭhānaṅca gandhādīhi nahānaṭṭhānaṅca disvā ‘‘pabbajitassa kamma’’nti maññamāno so evamāha. **Idāneva naṃ vadehīti** idāneva tena vatthunā parisaṅkitaṃ puggalaṃ vadehi; idaṃ pana ubhayampi disvā diṭṭhakālate paṭṭhāya vinicchinitvāva pavāretabbaṃ. **Kallaṃ vacanāyāti** kallaṃ codanāya; codetum vaṭṭatīti attho. Kasmā? Pavāraṇato pubbe avinicchitattā pacchā ca disvā coditattāti. **Ukkoṭanakaṃ pācittiyanti** idaṅhi ubhayaṃ pubbe pavāraṇāya disvā vinicchinitvāva bhikkhū pavārenti, tasmā puna taṃ ukkoṭentassa āpatti.

### Bhaṇḍanakārahakavattukathā

**240. Dve tayo uposathe cātuddasike kātunti** ettha catutthapañcamā dve, tatiyo pana pakatiyāpi catuddasikoyevāti. Tasmā tatiyacatutthā vā tatiyacatutthapañcamā vā dve tayo cātuddasikā kātabbā. Atha catutthe kate suṇanti, pañcamo cātuddasiko kātabbo. Evampi dve cātuddasikā hontī. Evaṃ karontā bhaṇḍanakārahakānaṃ terase vā cātuddase vā ime pannarasīpavāraṇaṃ pavāressanti. Evaṃ pavārentehi ca bahisīmāya sāmaṇere ṭhapetvā ‘‘te āgacchantī’’ti sutvā lahuṃ lahuṃ sannipatitvā pavāretabbaṃ. Etamatthaṃ dassetuṃ ‘‘te ce bhikkhave...pe... tathā karontū’’ti vuttaṃ.

**Asaṃvihitāti** saṃvidahanarahitā āgamanajānanatthāya akatasamvidahitā; aviññātāva hutvāti attho. **Tesaṃ vikkhitvāti** ‘‘kilantattha muhuttaṃ vissamathā’’tiādinā nayena sammohaṃ katvāti attho. **No ce labhethāti** no ce bahisīmaṃ gantuṃ labheyyum; bhaṇḍanakārahakānaṃ sāmaṇerehi ca daharabhikkhūhi ca niraṇṭaraṃ anubaddhāva hontī. **Āgame juṇheti** yaṃ sandhāya āgame juṇhe pavāreyyāmāti ñattim ṭhapesum, tasmim āgame juṇhe komudiyā cātumāsiniyā akāmā pavāretabbaṃ, avassaṃ pavāretabbaṃ, na hi taṃ atikkamitvā pavāretum labbhati. **Tehi ce bhikkhave bhikkhūhi pavāriyamāneti** evaṃ cātumāsiniyā pavāriyamāne.

### Pavāraṇāsaṅghakathā

**241. Aññataro phāsuvihāroti** taruṇasamatho vā taruṇavipassanā vā. **Paribāhirā bhavissāmāti** anibaddharattiṭṭhānadivāṭṭhānādibhāvena bhāvanānuyogaṃ sampādetum asakkontā bāhirā bhavissāma. **Sabbeva ekajjhaṃ sannipatitabbanti** iminā chandadānaṃ paṭikkhipati. Bhinnassa hi saṅghassa samaggakaraṇakāle tiṇavatthārahakasamathe imasmiṅca pavāraṇāsaṅghaṃ imesu tīsu ṭhānesu chandaṃ dātum na vaṭṭati. Pavāraṇāsaṅgho nāmāyaṃ vassaṭṭhakammaṭṭhānānaṃ thāmagatasamathavipassanānaṃ sotāpannādīnaṅca na dātabbo. Taruṇasamathavipassanālābhino pana sabbe vā hontu, upaḍḍhā vā, ekapuggalo vā ekassapi vasena dātabboyeva. Dinne pavāraṇāsaṅgahe antovasse parihārova hoti, āgantukā tesaṃ senāsaṇaṃ gahetum na labhanti. Tehipi chinnavassehi na bhavitabbaṃ, pavāretvā pana antarāpi cārikaṃ pakkamitum labhantīti dassanatthaṃ ‘‘**tehi ce bhikkhave**’’tiādimāha. Sesaṃ sabbattha uttānamevāti.

Pavāraṇākkhandhakavaṇṇanā niṭṭhitā.

## 5. Cammakhandhakaṃ

### Soṇakoḷivisavattukathā

**242. Cammakhandhake – issariyādhipaccanti** issarabhāvena ca adhipatibhāvena ca

samannāgataṃ. **Rajjanti** rājabhāvaṃ, raññā kattabbakiccaṃ vā. **Soṇo nāma koḷivisoti** ettha **soṇoti** tassa nāmaṃ; **koḷivisoti** gottaṃ. **Pādatalesu lomānīti** rattesu pādatalesu sukhumāni añjanavaṇṇāni kammacittikatāni lomāni jātāni honti. So kira pubbe asītisahassānaṃ purisānaṃ jeṭṭhapuriso hutvā tehi saddhiṃ paccekabuddhassa vasanaṭṭhāne paṇṇasālaṃ katvā attano sassirikaṃ uṇṇapāvāraṃ paccekabuddhassa pādehi akkamaṇaṭṭhāne pādapuñchanikaṃ katvā ṭhapesi. Temāsaṃ pana sabbeva paccekabuddhaṃ upaṭṭhahimsu. Ayaṃ tassa ca tesaṃca asītiyā gāmikasahassānaṃ pubbayogo.

**Asītīgāmikasahassānīti** tesu gāmesu vasantānaṃ kulaputtānaṃ asītisahassāni. **Kenacideva karaṇīyena**ti kenaci karaṇīyena viya; na panassa kiñci karaṇīyaṃ atthi aññatra tassa dassanā. Rājā kira tānīpi asītikulaputtasahassāni sannipātāpento “evaṃ aparisaṅkanto soṇo āgamissatī”ti sannipātāpesi. **Diṭṭhadhammike attheti** “kasivaṇṇijjādīni dhammena kattabbāni, mātāpitāro dhammena positabbā”ti evamādinā nayena idhalokahite atthe anusāsivā. **So no bhagavāti** so amhākaṃ bhagavā tumhe samparāyike atthe anusāsissatīti attho.

**Bhagavantaṃ paṭivedemīti** bhagavantaṃ jānāpemi. **Pāṭikāya nimujjitvāti** sopānassa heṭṭhā aḍḍhacandapāsāṇe nimujjitvā. **Yassa dāni bhante bhagavā kālaṃ maññatīti** yassa tesam hitakiriyaṭṭhassa bhagavā kālaṃ jānāti. **Vihārapacchāyanti** vihārapaccante chāyayaṃ. **Samannāharantīti** pasādavasena punappunaṃ manasi karonti. **Bhiyyosomattāyati** bhiyyosomattāya puna visiṭṭhataraṃ dassehīti attho. **Antaradhāyatīti** adassanaṃ hoti.

### Soṇassa pabbajjākathā

**243. Lohitena phuṭo hotīti** lohitena makkhito hoti. **Gavāghātananti** yattha gāvo haññanti, tādisoti attho. **Kusalo** nāma vīṇāya vādanakusalo. **Vīṇāya tantissareti** vīṇāya tantiyā sare. **Accāyatāti** atīyatā kharamucchitā. **Saravatīti** sarasampannā. **Kammaññāti** kammakkhamā. **Atisithilāti** mandamucchanā. **Same guṇe paṭiṭṭhitāti** majjhime sare ṭhapetvā mucchitā. **Vīriyasamataṃ adhiṭṭhahāti** vīriyasampayuttasamataṃ adhiṭṭhāhi, vīriyaṃ samathena yojeḥīti attho. **Indriyānaṃca samataṃ paṭivijjhāti** saddhādīnaṃ indriyānaṃ samataṃ samabhāvaṃ. Tattha saddhaṃ paññāya, paññāṇca saddhāya, vīriyaṃ samādhinā, samādhīṇca vīriyena yojayamāno indriyānaṃ samataṃ paṭivijjha. **Tattha ca nimittaṃ gaṇhāhīti** tasmīṃ samathe sati, yena ādāse mukhabimbeneva nimittena uppajjitabbaṃ, taṃ samathanimittaṃ vipassanānimittaṃ magganimittaṃ phalanimittaṃca gaṇhāhi, nibbatteḥīti attho.

**244. Aññaṃ byākareyyanti** arahā ahanti jānāpeyyaṃ. **Cha ṭhānānīti** cha kāraṇāni. **Adhimutto hotīti** paṭivijjhivā paccakkhaṃ katvā ṭhito hoti. **Nekkhammādhimuttoti**adi sabbam arahattavasena vuttaṃ. Arahattañhi sabbakilesehi nikkhantattā **nekkhammaṃ**, teheva pavivittattā **paviveko**, byāpajjābhāvato **abyāpajjaṃ**, upādānassa khayante uppannattā **upādānakkhayo**, taṇhākkhayante uppannattā **taṇhakkhayo**, sammohābhāvato **asammohoti** ca vuccati.

**Kevalaṃ saddhāmattakanti** paṭivedharahitaṃ kevalaṃ paṭivedhapaññāya asammissaṃ saddhāmattakaṃ. **Paṭicayanti** punappunaṃ karaṇena vuḍḍhiṃ. **Vītarāgattāti** maggappaṭivedhena rāgassa vigatattāyeva nekkhammasaṅkhātāṃ arahattaṃ paṭivijjhivā ṭhito hoti. Phalasaṃpattivihāreṇeva viharati, tanninnamānasoyeva hotīti attho. Sesapadesupi eseva nayo.

**Lābhasakkārasilokanti** catupaccayaḷābhaṇca tesamyeva sukatabhāvaṇca vaṇṇabhaṇaṇaṇca. **Nikāmayamānoti** icchamāno patthayamāno. **Pavivekādhimuttoti** viveke adhimutto ahanti evaṃ arahattaṃ byākarotīti attho.

**Sīlabbataparāmāsanti** sīlaṇca vataṇca parāmasitvā gahitagahaṇamattaṃ. **Sārato paccāgacchantoti** sārabhāvena jānanto. **Abyāpajjādhimuttoti** abyāpajjaṃ arahattaṃ byākarotīti attho. Imināva nayena sabbavāresu attho veditabbo.

**Bhusāti** balavanto. **Nevassa cittaṃ pariyādiyanti** etassa khīṇāsavassa cittaṃ gahetvā ṭhātuṃ na sakkonti. **Amissīkatanti** amissakatam. Kilesāhi ārammaṇena saddhiṃ cittaṃ missaṃ karonti, tesam abhāvā amissīkatam. **Ṭhitanti** paṭiṭṭhitam. **Āneñjappattanti** acalanappattam. **Vayañcassānupassatī** tassa cittaṃ uppādampi vayampi passati.

**Nekkhammaṃ adhimuttassāti** arahattaṃ paṭivijjhivā ṭhitassa. Sesapadehipi arahattameva kathitam. **Upādānakkhayassāti** upayogatthe sāmivacanaṃ. **Asammohañca cetasoti** cittaṃ ca asammohaṃ adhimuttassa. **Disvā āyatanuppādanti** āyatanānaṃ uppādañca vayañca disvā. **Sammā cittaṃ vimuccatī** sammā hetunā nayena imāya vipassanāya paṭipattiyā phalasaṃpattivasena cittaṃ vimuccati, nibbānārammaṇe adhimuccati. **Santacittassāti** nibbutacittaṃ. **Tādinoti** iṭṭhāniṭṭhe anunayaapaṭighehi akampiyattā tādi, tassa tādino.

### Diguṇādiupāhanapaṭikkhepakathā

**245. Aññaṃ byākarontī** arahattaṃ byākaronti. **Attho ca vuttoti** yena arahāti ñāyati, so attho vutto. Suttattho pana suttavaṇṇanatoyeva gahetabbo. **Attā ca anupanītoti** ahaṃ arahāti evaṃ byañjanavasena attā na upanīto. **Atha ca panidhekacce moghapurisāti** aññaṃ pana tucchapurisā hasamānā viya asantameva aññaṃ vacanamattena santaṃ katvā byākaronti. **Ekapaḷāsikanti** ekapaḷalam. **Asītisakaṭavāheti** ettha dve sakaṭabhārā eko vāhoti veditabbo. **Sattahatthikañca anīkanti** ettha cha hatthiniyo eko ca hatthīti idamekaṃ **anīkaṃ**. Īdisāni satta anīkāni sattahatthikaṃ anīkaṃ nāma. **Diguṇāti** dvipaḷalā. **Tiguṇāti** tipaḷalā. **Gaṇaṅguṇūpāhanāti** catupaḷalato paṭṭhāya vuccati.

### Sabbanīlikādipaṭikkhepakathā

**246. Sabbanīlikāti** sabbāva nīlikā. Esa nayo **sabbapītikādīsūpi**. Tattha ca nīlikā umāpupphavaṇṇā hoti, pītikā kaṇikārapupphavaṇṇā, lohikā jayasumanapupphavaṇṇā, mañjīṭṭhikā mañjīṭṭhavaṇṇā eva, kaṇhā addāriṭṭhakavaṇṇā, mahāraṅgarattā satapadipiṭṭhivaṇṇā, mahānāmarattā sambhinnavaṇṇā hoti paṇḍupalāsavaṇṇā. Kurundiyam pana “padumapupphavaṇṇā”ti vuttā. Etāsu yaṃkiñci labhitvā rajanaṃ coḷakena puñchitvā vaṇṇam bhinditvā dhāretuṃ vaṭṭati. Appamattakepi bhinne vaṭṭatiyeva.

**Nīlakavaddhikāti** yasaṃ vaddhāyeva nīlā. Eseva nayo sabbattha. Etāpi vaṇṇabhedam katvā dhāretabbā. **Khallakabaddhāti** paṇhipidhānattham tale khallakam bandhitvā katā. **Puṭabaddhāti** yonakaupāhanā vuccati, yā yāvajaṅghato sabbapādam paṭicchādeti. **Pāliguṇṭhimāti** paliguṇṭhitvā katā; yā upari pādamaṭṭameva paṭicchādeti, na jaṅgham. **Tūlapuṇṇikāti** tūlapicunā pūretvā katā. **Tittirapattikāti** tittirapattasadisā vicittabaddhā. **Meṇḍavisāṇavaddhikāti** kaṇṇikaṭṭhāne meṇḍakasīṅgasaṅṭhāne vaddhe yojetvā katā. **Ajavisaṇavaddhikādīsūpi** eseva nayo. **Vicchikālikāpi** tattheva vicchikanaṅguṭṭhasaṅṭhāne vaddhe yojetvā katā. **Morapiñchaparisisibbitāti** talesu vā vaddhesu vā morapiñchehi suttakasadisēhi parisibbitā. **Citrāti** vicitrā; etāsu yaṃkiñci labhitvā, sace tāni khallakādīni apanetvā sakkā honti vaḷaṅṅjituṃ, vaḷaṅṅjetabbā. Tesu pana sati vaḷaṅṅjantassa dukkaṭam. **Sīhacammaaparikkhaṭā** nāma pariyantesu cīvare anuvātam viya sīhacammaṃ yojetvā katā. **Lūvakacammaaparikkhaṭāti** pakkhibiḷālacammaaparikkhaṭā. Etāsūpi yā kāci labhitvā tam cammaṃ apanetvā dhāretabbā.

**247. Omukkanti** paṭimuñcivā apanītam. **Navāti** aparibhuttā.

### Ajjhārāmeupāhanapaṭikkhepakathā

**248. Abhijīvanikassāti** yena sippena abhijīvanti, jīvikam kappenti, tassa kāraṇāti attho. **Idha kho tam bhikkhveti** ettha tanti nipātamattam, idha kho bhikkhave sobheyyāthāti attho. **Yaṃ tumheti** ye tumhe. Atha vā yadi tumheti vuttam hoti. Yadisaddassa hi atthe ayam nipāto. **Ācariyesūti** ādimhi pabbajjācariyo, upasampadācariyo, nissayācariyo, uddesācariyoti ime cattāropi idha ācariyā eva.

Avassikassa chabbasso ācariyamatto. So hi catuvassakāle taṃ nissāya vacchati; evaṃ ekavassassa sattavasso, duvassassa aṭṭhavasso, tivassassa navavasso, catuvassassa dasavasso. Imepi ācariyamattā eva. Upajjhāyassa sandiṭṭhasambhattā pana saḥāyabhikkhū, ye vā pana keci dasahi vassehi mahantatarā te sabbepi upajjhāyamattā nāma. Ettakesu bhikkhūsu anupāhanesu caṅkamantesu saupāhanassa caṅkamato āpatti.

**249. Pādakhilābādho** nāma pādato khīlasadisam̐ maṃsam̐ nikkhantaṃ hoti.

**251. Tiṇapādukāti** yena kenaci tiṇena katapādukā. **Hintālapādukāti** khajjūrīpattehi katapādukā; hintālapattehipi na vaṭṭatiyeva. **Kamalapādukāti** kamalatiṇam̐ nāma atthi, tena katapādukā; usīrapādukāti pi vadanti. **Kambalapādukāti** uṇṇāhi katapādukā. **Asaṅkamanīyāti** bhūmiyaṃ suppatiṭṭhitā niccalā asaṃhāriyā.

**252. Aṅgajātaṃ chupantīti** aṅgajāteneva aṅgajātaṃ chupanti. **Ogāhetvā mārentīti** anto udake dalhaṃ gahetvā mārenti.

### Yānādipaṭikkhepakathā

**253. Itthiyuttenāti** dhenuyuttana. **Purisantarenāti** purisasārathinā. **Purisayuttenāti** goṇayuttana. **Itthantarenāti** itthisārathinā. **Gaṅgāmahiyāyāti** gaṅgāmahakīlikāya. **Purisayuttaṃ hatthavaṭṭakanti** ettha purisayuttaṃ itthisārathi vā hotu, purisasārathi vā vaṭṭati. Hatthavaṭṭakaṃ pana itthiyo vā vaṭṭentu purisā vā, vaṭṭatiyeva. **Yānuggāhenāti** yānaṃ abhiruhantassa sabbo kāyo calati tappaccayā. **Sivikanti** pīṭhakasivikaṃ. **Paṭāṅkinti** vaṃse laggetvā kataṃ paṭapotalikaṃ.

**254. Uccāsayanamahāsayanānānīti** ettha **uccāsayananti** pamāṇātikkantaṃ mañcaṃ. **Mahāsayananti** akappiyattharaṇaṃ, āsandīādīsu **āsandīti** pamāṇātikkantāsanam̐. **Pallaṅkoti** pādesu vālarūpāni ṭhapetvā kato. **Gonakoti** dīghalomako mahākojavo; caturaṅgulādhikāni kira tassa lomāni. **Cittakāti** vānacitro uṇṇāmayattharaṇo. **Paṭikāti** uṇṇāmayo setattharaṇo. **Paṭalikāti** ghanapupphako uṇṇāmayalohitatharaṇo; yo āmalakapaṭṭotipi vuccati. **Tūlikāti** pakatitūlikāyeva. **Vikatikāti** sīhabyagghādirūpavicitro uṇṇāmayattharaṇo. **Uddalomīti** ekato uggatalomaṃ uṇṇāmayattharaṇaṃ; “uddhalomī” tipi pāṭho. **Ekantalomīti** ubhato uggatalomaṃ uṇṇāmayattharaṇaṃ. **Kaṭṭissanti** ratanaparisibbitaṃ koseyyakaṭṭissamayaṃ paccattharaṇaṃ. **Koseyyanti** ratanaparisibbitaṃ kosiyasuttamayaṃ paccattharaṇaṃ; suddhakoseyyaṃ pana vaṭṭati.

**Kuttakanti** soḷasannaṃ nāṭakitthīnaṃ ṭhatvā naccanayoggaṃ uṇṇāmayaattharaṇaṃ. **Hatthatharaassattharāti** hatthiassapiṭṭhīsu attharaṇakaattharaṇā eva. **Rathattharepi** eseva nayo. **Ajinappaveṇīti** ajinacammehi mañcappamāṇena sibbitvā katā paveṇī. **Kadalīmīgapavarapaccattharaṇanti** kadalīmīgacammaṃ nāma atthi, tena kataṃ pavarapaccattharaṇaṃ, uttamapaccattharaṇanti attho. Taṃ kira setavatthassa upari kadalīmīgacammaṃ pattharivā sibbitvā karonti. **Sauttaracchadanti** saha uttaracchadanena; uparibaddhena rattavitānena saddhinti attho. Setavitānampi heṭṭhā akappiyapaccattharaṇe sati na vaṭṭati, asati pana vaṭṭati. **Ubhatolohitakūpadhānanti** sīsūpadhānañca pādūpadhānañcāti mañcassa ubhatolohitakūpadhānaṃ, etaṃ na kappati. Yaṃ pana ekameva upadhānaṃ ubhosu passesu rattaṃ vā hoti, padumavaṇṇaṃ vā citraṃ vā, sace pamāṇayuttaṃ, vaṭṭati. Mahāupadhānaṃ pana paṭikkhittaṃ.

### Sabbacammaṭikkhepādikathā

**255. Dīpicchāpoti** dīpipotako. **Ogumphiyantīti** bhittidaṇḍakādīsu veṭhetvā bandhanti.

**256. Abhinisīditunti** abhinissāya nisīdituṃ; apassayaṃ katvā nisīditunti attho. **Gilānena**

**bhikkhunā saupāhanenā**ti ettha gilāno nāma yo na sakkoti anupāhano gāmaṃ pavisitum.

**257. Kuraraghareti** evaṃnāmake nagare; etenassa gocaragāmo vutto. **Papatake pabbateti** papatanāmake pabbate; etenassa nivāsanaṭṭhānaṃ vuttaṃ. **Soṇoti** tassa nāmaṃ. Koṭiagghanakaṃ pana kaṇṇapaṇḍhanakaṃ dhāreti, tasmā “kuṭikaṇṇo”ti vuccati; koṭikaṇṇoti attho. **Pāsādikanti** pasādajanaṃ. **Pasādanīyanti** idaṃ tasseva atthavevacanaṃ. **Uttamadamasamathanti** uttamam damathaṅca samathaṅca paññaṅca samādhiṅca kāyūpasamaṅca cittūpasamaṅcātipi attho. **Dantanti** sabbesaṃ visūkāyikavipphanditānaṃ upacchinnattā dantaṃ; khīṇakilesanti attho. **Guttanti** saṃvaraguttiyā guttaṃ. **Santindriyanti** yatindriyaṃ. **Nāganti** āguvirahitaṃ. **Tiṇṇaṃ me vassānaṃ accayenā**ti mama pabbajjādivasato paṭṭhāya tiṇṇaṃ vassānaṃ accayena. **Upasampadaṃ alatthanti** ahaṃ upasampadaṃ alabhiṃ. **Kaṇhuttarā**ti kaṇhamattikuttarā; upari vaḍḍhitakaṇhamattikāti attho. **Gokaṇṭakahatā**ti gunnaṃ khurehi akkantaḥhūmito samuṭṭhitehi gokaṇṭakehi upahatā. Te kira gokaṇṭake ekapaṭalīkā upāhanā rakkhitum na sakkonti; evaṃ kharā honti. **Eragū, moragū, majjārū, jantū**ti imā catassopi tiṇajātiyo; ete hi kaṭasārake ca taṭṭikāyo ca karonti. Ettha **eragū**ti erakatiṇaṃ; taṃ olārikaṃ. Moragūtiṇaṃ tambasīsaṃ mudukaṃ sukhasamphassaṃ, tena katataṭṭikā nipajjitvā vuṭṭhitamatte puna uddhumātā hutvā tiṭṭhati. Majjārūnā sātākepi karonti. Jantussa maṇisadiso vaṇṇo hoti. **Senāsaṇaṃ paññapesī**ti bhisim vā kaṭasārakaṃ vā paññapesi; paññapetvā ca pana soṇassa āroceti – “āvuso sathā tayā saddhiṃ ekāvāse vasitukāmo, gandhakuṭiyaṃyeva te senāsaṇaṃ paññatta”nti.

**258. Ayaṃ khvassa kāloti** ayaṃ kho kālo bhaveyya. **Paridassī**ti paridassesi. “Idaṅcīdaṅca vadeyyāsīti yaṃ me upajjhāyo jānāpesi, tassa ayaṃ kālo bhaveyya, handa dāni ārocemi taṃ sāsana”nti ayamettha adhippāyo.

**259. Vinayadharapañcamenā**ti anussāvanācariyapañcamena. **Anujānāmi bhikkhave sabbapaccantimesu janapadesu guṇaṅguṇūpāhananti** ettha manussacammaṃ ṭhapetvā yena kenaci cammena upāhanā vaṭṭati. Upāhanakosakasatthakosakakuñcīkakosakesupi ese va nayo. **Cammāni attharaṇānī**ti ettha pana yaṃkiñci eḷakacammaṃ ajacamaṅca attharivā nipajjitum vā nisīditum vā vaṭṭati. Migacamme eṇīmigo vātāmito pasadamigo kuraṅgamigo migamātuko rohitāmito etesaṃyeva cammāni vaṭṭanti. Aññesaṃ pana –

Makkaṭo kālasīho ca, sarabho kadalīmigo;  
Ye ca vālamigā keci, tesam cammaṃ na vaṭṭati.

Tattha **vālamigā**ti sīhabyagghaacchataracchā; na kevalaṅca etesaṃyeva, yesaṃ pana cammaṃ vaṭṭatīti vuttaṃ, te ṭhapetvā avasesā antamaso gomahimsasasabīlārādayopi sabbe imasmim atthe vālamigātveva veditabbā. Etesaṅhi sabbesaṃ cammaṃ na vaṭṭati. **Na tāva taṃ gaṇaṇūpagaṃ yāva na hatthaṃ gacchatī**ti yāva āharitvā vā na dinnam, tumhākaṃ bhante cīvaram uppannanti paḥiṇitvā vā nārocitaṃ, tāva gaṇaṇam na upeti. Sace anadhiṭṭhitaṃ, vaṭṭati; adhiṭṭhitaṅca gaṇaṇam na upeti attho. Yadā pana ānetvā vā dinnam hoti, uppannanti vā sutam, tato paṭṭhāya dasāhameva parihāram labhatīti.

Cammakkhandhakavaṇṇanā niṭṭhitā.

## 6. Bhesajjakkhandhakaṃ

### Pañcabhesajjādīkathā

**260.** Bhesajjakkhandhake – **sāradikena ābādhenā**ti saradakāle uppannena pittābādhena, tasmiṅhi kāle vassodakenapi tementi, kaddamampi maddanti, antarantārā ātapopi kharo hoti, tena tesam pittaṃ koṭṭhabbantaragataṃ hoti. **Āhāratthaṅca phareyyā**ti āhāratthaṃ sādheyya.

**261. Nacchādentīti** na jiranti, na vātarogaṃ paṭippassambhetuṃ sakkonti. **Senesitānīti** siniddhāni. **Bhattācchādakenāti** bhattaṃ arocikena.

**262. Acchavasantiādīsu** nissaggiyavaṇṇanāyaṃ vuttanayeneva vinicchayo veditabbo. **Kāle paṭiggahitantiādīsu** majjhanhike avītivatte paṭiggahetvā pacitvā parissāvetvā cāti attho. **Telaparibhogena paribhuñjitunti** sattāhakālikatelaparibhogena paribhuñjituṃ.

**263. Mūlabhesajjādi** vinicchayopi khuddakavaṇṇanāyaṃ vuttoyeva. Tasmā idha yaṃ yaṃ pubbe avuttaṃ taṃ tadeva vaṇṇayissāma. **Vacattanti** setavacaṃ. **Nisadaṃ nisadapotakanti** pisanasilā ca pisanapoto ca. **Phaggavanti** latājāti. **Nattamālanti** karañjaṃ. **Hiṅguhiṅgujatuhīṅgusipāṭikā** hiṅgujātiyoyeva. **Takatakapaṭṭitakapaṇṇiyo** lākhājātiyo.

**Sāmuḍḍanti** samuḍḍatīre vālukā viya santiṭṭhanti. **Kāḷaloṇanti** pakatilōṇaṃ. **Sindhavanti** setavaṇṇaṃ pabbate uṭṭhahati. **Ubbhidanti** bhūmito ankuram uṭṭhahati. **Bilanti** dabbasambhārehi saddhiṃ pacitaṃ, taṃ rattavaṇṇaṃ.

**264-6. Kāyo vā duggandhoti** kassaci assādīnaṃ viya kāyagandho hoti, tassāpi sirīsakosumbādicuṇṇāni vā gandhacuṇṇāni vā sabbāni vaṭṭanti. **Chakaṇanti** gomayaṃ. **Rajananippakkanti** rajanakasaṭaṃ. Pākatikacuṇṇampi koṭṭetvā udakena temetvā nhāyituṃ vaṭṭati; etampi rajananippakkasaṅkhepameva gacchati.

**Āmakamaṃsaṅca khādi āmakalohitaṅca pivīti** na taṃ bhikkhu khādi na pivī, amanusso khāditvā ca pivītvā ca pakkanto, tena vuttaṃ – “tassa so amanussikābādho paṭippassambhī”ti.

**Añjananti** sabbasaṅgāhikavacanametam. **Kālñjananti** ekā añjanajāti. **Rasañjanaṃ** nānāsambhārehi kataṃ. **Sotañjananti** nadīsotādīsu uppajjanakaṃ añjanaṃ. **Geruko** nāma suvaṇṇageruko. **Kapallanti** dīpasikhato gahitamasi. **Añjanūpapimsanehīti** añjanena saddhiṃ ekato pimsitabbehi, na hi kiñci aññanūpapimsanaṃ na vaṭṭati. **Candananti** lohitacandanādikaṃ yaṃkiñci. **Tagarādīni** pākāṭāni, aññānīpi nīluppalādīni vaṭṭantiyeva.

**Aṭṭhimayanti** manussaṭṭhiṃ ṭhapetvā avasesaṭṭhimayaṃ. **Dantamayanti** hatthidantādīsabbadantamayaṃ. **Visāṇamayepi** akappiyaṃ nāma natthi, **naḷamayādayo** ekantakappiyāyeva. **Salākakṭṭhāniyanti** yattha salākaṃ odahanti, taṃ susiradaṇḍakaṃ vā thavikaṃ vā anujānāmīti attho. **Aṃsabaddhakoti** añjanitthavikāya aṃsabaddhako. **Yamakanatthukaraṇṇinti** samasotāhi dvīhi panāḷikāhi ekam natthukaraṇṇiṃ.

**267. Anujānāmi bhikkhave telapākanti** yaṃkiñci bhesajjapakkhittaṃ sabbam anuññātameva hoti. **Atipakkhittamajjānīti** ativiya khittamajjāni; bahuṃ majjaṃ pakkhipitvā yojitānīti attho.

**Aṅgavātoti** hatthapāde vāto. **Sambhārasedanti** nānāvidhapaṇṇabhaṅgasedaṃ. **Mahāsedanti** mahantaṃ sedaṃ; porisappamāṇaṃ āvāṭaṃ aṅgārānaṃ pūretvā paṃsuvālikādīhi pidahitvā tattha nānāvidhāni vātaharaṇapaṇṇāni santharivā telamakkhiteṇa gattena tattha nipajjivā samparivattantena sarīraṃ sedetuṃ anujānāmīti attho. **Bhaṅgodakanti** nānāpaṇṇabhaṅgakuthitaṃ udakaṃ; tehi paṇṇehi ca udakena ca siñcitvā siñcitvā sedetabbo. **Udakakoṭṭhakanti** udakakoṭṭhe cāṭiṃ vā doṇiṃ vā uṇhodakassa pūretvā tattha pavisitvā sedakammakaraṇaṃ anujānāmīti attho.

**Pabbavāto hotīti** pabbe pabbe vāto vijjhanti. **Lohitaṃ mocetunti** sathakena lohitaṃ mocetuṃ. **Pajjaṃ abhisankharitunti** yena phālitaṭṭhāni pākāṭikā honti; taṃ nāḷikerādīsu nānābhesajjāni pakkhipitvā pajjaṃ abhisankharituṃ; pādānaṃ sappāyabhesajjaṃ pacitunti attho. **Tilakakkena atthoti** piṭṭhehi tilehi attho. **Kabalikanti** vaṇamukhe sattupīṇḍaṃ pakkhipituṃ. **Sāsapakūḍḍenāti**

sāsapapīṭṭhena. **Vaḍḍhamamsanti** adhikamamsaṃ āṇi viya uṭṭhahati. **Loṇasakkharikāya chinditunti** khurena chindituṃ. **Vikāsikanti** telarundhanapilotikaṃ. **Sabbaṃ vaṇapaṭikammanti** yaṃkiñci vaṇaparikkammaṃ nāma atthi; sabbaṃ anujānāmīti attho.

**268. Sāmaṃ gahetvāti** idaṃ na kevalaṃ sappadaṭṭhasseva, aññasimipi daṭṭhavise sati sāmam gahetvā paribhuñjitabbaṃ; aññesu pana kāraṇesu paṭiggahitameva vaṭṭati. **Kato na puna paṭiggahettabboti** sace bhūmippatto, paṭiggahettabbo; appattaṃ pana gahetuṃ vaṭṭati.

**269. Gharadinnakābādhoti** vasīkaraṇapānakasamuṭṭhitarogo. **Sītāloṇinti** naṅgalena kasantassa phāle laggamattikaṃ udakena āloṇetvā pāyetuṃ anujānāmīti attho.

**Duṭṭhagahaṇikoti** vipannagahaṇiko; kicchena uccāro nikkhamatīti attho. **Āmisakhāranti** sukkhodanaṃ jhāpetvā tāya chārikāya paggharitaṃ khārodakaṃ. **Muttaharītakanti** gomuttaparibhāvitaṃ harītakaṃ. **Abhisannakāyoti** ussannadosakāyo. **Acchakañjiyanti** taṇḍulodakamaṇḍo. **Akaṭayusanti** asiniddho muggapacitapānīyo. **Kaṭākaṭanti** sova dhotasiniddho. **Paṭicchādanīyēnāti** maṃsarasena.

### Gulādianujānanakathā

**272. Sace bhikkhave pakkāpi muggā jāyantīti** pakkā muggā sacepi jāyanti, yathāsukhaṃ paribhuñjitabbā. Pakkattā hi te kappiyā eva.

**274. Antovutthanti** akappiyakuṭiyam vutthaṃ. **Sāmaṃ pakkanti** ettha yaṃkiñci āmisam bhikkhuno pacituṃ na vaṭṭati. Sacepissa uṇhayāguyā sulasipaṇṇāni vā siṅgiveram vā loṇam vā pakkhipanti, tampi cāletuṃ na vaṭṭati, “yāguṃ nibbāpemi”ti pana cāletuṃ vaṭṭati. Uttanḍulabhattaṃ labhitvāpi pidahituṃ na vaṭṭati. Sace pana manussā pidahitvāva denti, vaṭṭati; “bhattaṃ vā mā nibbāyatū”ti pidahituṃ vaṭṭati. Khīratakādīsū pana sakiṃ kuthitesu aggim dātuṃ vaṭṭati, punapākassa anuññātattā. **Ukkapiṇḍakāpi khādantīti** biḷāmūsikagodhāmaṅgusā khādanti. **Damakāti** vighāsādā.

**276. Tato nīhaṭanti** yattha nimantitā bhūñjanti, tato nīhaṭtaṃ.

**278. Vanaṭṭhaṃ pokkharatṭhanti** vane ceva paduminigacche ca jātaṃ. **Abijanti** taruṇaphalaṃ, yassa bijaṃ na aṅkuraṃ janeti. **Nibbaṭṭabijanti** bijaṃ nibbaṭṭetvā apanetvā paribhuñjitabbakaṃ ambapanasādi.

**279. Duropayo vaṇoti** dukkhena ruhati, dukkhena pākatiko hotīti attho. **Dupparihāraṃ satthanti** sambādhe dukkhena satthaṃ parihareyyam. **Satthakammaṃ vā vatthikammaṃ vāti** yathāparicchinne okāse yena kenaci satthena vā sūciyā vā kaṇṭakena vā sattikāya vā pāsāṇasakkhalikāya vā nakhena vā chindanaṃ vā phālanam vā vijjhanam vā lekhanam vā na kātabbam; sabbañhetam satthakammameva hoti. Yena kenaci pana cammena vā vatthena vā vatthipiḷānampi na kātabbam; sabbañhetam vatthikammameva hoti. Ettha ca **sambādhassa sāmantā dvaṅgulāti** idaṃ satthakammaṃyeva sandhāya vuttaṃ. Vatthikammaṃ pana sambādheyeva paṭikkhittaṃ. Tatha pana khāraṃ ādātuṃ yena kenaci rajjukena vā bandhituṃ vaṭṭati. Yadi tena chijjati, succhinnaṃ. Aṇḍavuḍḍhirogepi satthakammaṃ na vaṭṭati, tasmā aṇḍam phāletvā bijāni uddharitvā “arogaṃ karissāmī”ti na kattabbam. Aggītāpanabhesajjalimpanesu pana paṭikkhepo natthi. Vaccamagge bhesajjamakkhitā ādānavaṭṭi vā veḷunāḷikā vā vaṭṭati, yāya khārakammaṃ vā karonti, telaṃ vā pavesenti.

**280. Pavattamamsanti** matassa maṃsam. **Māghātoti** taṃ divasaṃ na labbhā kenaci kiñci jīvitā voropetuṃ. **Potthanikanti** maṃsacchedanasatthakaṃ vuccati. **Kimpimāyāti** kimpī imāya. **Na bhagavā ussahatīti** na bhagavā sakkoti. **Yatra hi nāmāti** yasmā nāma. **Paṭivekkhīti** vīmaṃsi; paṭipucchīti vuttaṃ hoti. **Appaṭivekkhitvāti** appaṭipucchitvā. Sace pana asukamamsanti jānāti, paṭipucchanakiccaṃ

natthi, ajānantena pana pucchitvāva khāditabbaṃ.

### Hatthimaṃsādipaṭikkhepakathā

**281. Sunakhamamsanti** ettha araññakokā nāma sunakhasadisā honti, tesam maṃsam vaṭṭati. Yo pana gāmasunakhiyā vā kokena kokasunakhiyā vā gāmasunakhena saṃyogā uppanno, tassa maṃsam na vaṭṭati, so hi ubhayaṃ bhajatīti. **Ahimaṃsanti** kassaci apādakassa dīghajātikassa maṃsam na vaṭṭati. **Sīhamamsādīni** pākaṭāneva.

Ettha ca manussamaṃsam sajjatitāya paṭikkhittam, hatthiassamaṃsam rājanatāya, sunakhamamsaṃsaṃ ahimaṃsaṃsaṃ paṭikkulātāya, sīhamamsādīni pañca attano anupaddavatthāyāti. Imesaṃ manussādīnaṃ dasannaṃ maṃsampi aṭṭhipi lohitampi cammampi lomampi sabbaṃ na vaṭṭati, yaṃkiñci ñatvā vā añatvā vā khādantassa āpattiyeva. Yadā jānāti, tadā desetabbā. “Apucchitvā khādissāmī”ti gaṇhato paṭiggahaṇe dukkaṭam, “pucchitvā khādissāmī”ti gaṇhato anāpatti. Uddissa kataṃ pana jānitvā khādantasseva āpatti, pacchā jānanto āpattiyā na kāretabboti.

### Yāgumadhugoḷakādikathā

**282. Ekattakoti** ekako, natthi me dutiyoti attho. **Pahūtaṃ yāguñca madhugoḷakañca paṭiyādāpetvāti** so kira satasahassaṃ vayaṃ katvā paṭiyādāpesi. Anumodanāgāthāpariyosāne “patthayataṃ icchata”nti padānaṃ “alameva dātu”nti iminā sambandho. Sace pana “patthayatā icchata”ti pāṭho atthi, soyeva gahetabbo.

**283. Bhojjayāgunti** yā pavāraṇaṃ janeti. **Yadaggenāti** yaṃ ādiṃ katvā. **Saggā te āraddhāti** sagganibbattakapuññaṃ upacitanti attho. **Yathādhammo kāretabboti** paramparabhojanena kāretabbo, bhojjayāguyā hi pavāraṇā hotīti.

**284. Nāhaṃ taṃ kaccānāti** tasmim kira avasiṭṭhagule devatā sukhumojaṃ pakkhipiṃsu, sā añhesaṃ pariṇāmaṃ na gacchati, tasmā evamaḥa. **Gilānassa guḷanti** tathārūpena byādhinā gilānassa pacchābhataṃ guḷaṃ anujānāmīti attho.

### Pāṭaligāmaavatthukathā

**285. Sabbasantharinti** yathā sabbaṃ santhataṃ hoti, evaṃ.

**286. Sunidhavassakārāti** sunidho ca vassakāro ca dve brāhmaṇā magadharañño mahāmattā mahāmaccā. **Vajjīnaṃ paṭibāhāyāti** vajjirājakulānaṃ āyamukhapacchindanattaṃ. **Vatthūnīti** gharavatthūni. **Cittāni namanti nivesanāni māpetunti** tā kira devatā vatthuvijjāpāṭhakānaṃ sarīre adhimuccitvā evaṃ cittāni nāmenti. Kasmā? Amhākaṃ yathānurūpaṃ sakkāraṃ karissantīti attho. **Tāvatiṃsehīti** loke kira sakkāṃ devarājānaṃ vissakammañca upādāya tāvatimsā paṇḍitāti saddo abbhuggato, tenevāha tāvatimsēhīti, tāvatimsēhi saddhiṃ mantetvā viya māpentīti attho. **Yāvatā ariyaṃ āyatananti** yattakaṃ ariyamanussānaṃ osaraṇaṭṭhānaṃ nāma atthi. **Yāvatā vaṇippathoti** yattakaṃ vaṇijānaṃ ābhatabhaṇḍassa rāsivaseneva kayavikkayaṭṭhānaṃ nāma atthi. **Idaṃ agganagaranti** tesam ariyāyatanavaṇippathānaṃ idaṃ agganagaraṃ bhavissati. **Puṭabhedananti** puṭabhedanaṭṭhānaṃ mocanaṭṭhānanti vuttaṃ hoti. **Aggito vātīādīsu** samuccayattho vā saddo. Tatra hi ekassa koṭṭhāsassa aggito, ekassa udakato, ekassa abbhantarato, aññamaññābheda antarāyo bhavissati. **Uḷumpanti** pāragamanatthāya āṇiyo ākoṭetvā kataṃ. **Kullanti** valliādīhi bandhitvā kataṃ.

**Annaṃvanti** sabbantimena paricchēdena yojanamattaṃ gambhīrassa ca puthullassa ca udakaṭṭhānassetam adhivacanaṃ. **Saranti** idha nadī adhippetā. **Idaṃ vuttaṃ hoti** – ye gambhīraṃ



vitthataṃ taṇhāsaraṃ taranti, te ariyamaggasaṅkhātāṃ setuṃ katvāna visajja pallalāni anāmasitvāva udakabharitāni ninnatṭhānāni; ayaṃ pana idaṃ appamattakaṃ udakaṃ uttaritukāropi kullaṅhi parijano bandhati, buddhā pana buddhasāvaka ca vinā eva kullena tiṇṇā medhāvino janāti.

**287. Ananubodhāti** abujjhanena. **Sandhāvitanti** bhavato bhavaṃ gamanavasena sandhāvitaṃ. **Samsaritanti** punappunaṃ gamanavasena saṃsaritaṃ. **Mamañceva tumhākañcāti** mayā ca tumhehi ca. Atha vā **sandhāvitaṃ saṃsaritanti** sandhāvanaṃ saṃsaraṇaṃ mamañceva tumhākañca ahoṣīti evamettha attho daṭṭhabbo. **Samsitanti** saṃsaritaṃ. **Bhavanetti samūhatāti** bhavato bhavagamaṇā sandhāvanā taṇhāraju suṭṭhu hatā chinnā appavattikatā.

**289. Nīlāti** idaṃ sabbasaṅgāhakaṃ. **Nīlavaṇṇāti**ādi tasseva vibhāgadassanattaṃ. Tattha na tesāṃ pakativaṇṇā nīlā, nīlavilepanānaṃ vicittatāvasenetāṃ vuttaṃ. **Paṭivaṭṭesīti** pahāresi. **Sāhāraṃ dajjeyyāthāti** sajanapadaṃ dadeyyātha. **Aṅguḷiṃ phoṭesunti** aṅguḷiṃ cālesuṃ. **Ambakāyāti** itthikāya. **Olokethāti** passatha. **Apalokethāti** punappunaṃ passatha. **Upasaṃharathāti** upanetha. Imaṃ licchaviparisāṃ tumhākaṃ cittaena tāvatimsaparisāṃ haratha, tāvatimsassa samakaṃ katvā passathāti attho.

### Sīhasenāpativatthuādikathā

**290. Dhammassa ca anudhammaṃ byākaronṭīti** bhagavatā vuttakāraṇassa anukāraṇaṃ kathenti. **Sahadhammiko vādānuvādoti** aparehi vuttakāraṇena sakāraṇo hutvā tumhākaṃ vādo viññugarahitabbaṃ kāraṇaṃ koci appamattakopi kiṃ na āgacchati. Idaṃ vuttaṃ hoti “kiṃ sabbakārenāpi tumhākaṃ vāde gārayhakāraṇaṃ natthi”ti. **Anabbhakkhātukāmāti** abhibhavitvā na ācikkhitukāmā.

**293. Anuviccakāranti** anuviditvā cintetvā tulayitvā kātabbaṃ karohīti vuttaṃ hoti. **Ñātamanussānanti** loke pākaṭānaṃ. **Sādhu hotīti** sundaraṃ hoti. **Paṭākaṃ parihareyyunti** paṭākaṃ ukkhipitvā nagare ghoṣantā āhiṇḍeyyūṃ. Kasmā? “Evaṃ no amhākaṃ mahantabhāvo bhavissati”ti. **Opānabhūtanti** paṭiyattaudapāno viya ṭhitaṃ. **Kulanti** nivesanaṃ. **Dātābbaṃ maññeyyāsīti** mā imesaṃ deyyadhammaṃ upacchindittha, sampattānaṅhi dātābamevāti ovadati. **Okāroti** avakāro lāmakabhāvo. **Sāmukkamsikāti** attanāyeva uddharitvā gahitā; asādhāraṇaṃ aññesanti attho. **Uddissa katanti** uddisitvā kataṃ.

**294. Paṭiccakammanti** attānaṃ paṭicca katanti attho. Atha vā **paṭiccakammanti** nimittakammassetāṃ adhivacanaṃ, taṃ paṭiccakammaṃ ettha atthīti maṃsampi paṭiccakammanti vuttaṃ. Yo hi evarūpaṃ maṃsaṃ paribhuñjati, sopi tassa kammaṃ dāyādo hoti, vadhakassa viya tassāpi paṇaghātakammaṃ hotīti adhippāyo. **Jiridanti** jiranti abbhācikkhantā na jiranti, abbhakkhānaṃ antaṃ na gacchantīti attho. **Tikoṭiparisuddhakathā** saṅghabhedasikkhāpadavaṇṇanāyaṃ vuttā.

### Kappiyabhūmianujānanakathā

**295. Sakaṭaparivaṭṭanti** sakaṭehi parikkhepaṃ viya katvā acchanti. **Paccantimanti** abhilāpamattametaṃ “yaṃ saṅgho ākaṅkhati”ti vuttatā pana dhuravihāropi sammannitūṃ vaṭṭati, kammavācaṃ avatvā apalokanēnāpi vaṭṭatiyeva. **Kākoravasaddanti** tattha tattha pavitṭhānaṃ āmisakhādanatthāya anuppageyeva sannipatitānaṃ kākānaṃ oravasaddaṃ. **Yasojo** nāma kapilasuttapariyosāne pabbajitānaṃ pañcanaṃ satānaṃ aggapuriso.

**Ussāvanantikanti**ādīsu ussāvanantikā tāva evaṃ kattabbā. Yo thambhānaṃ vā upari bhittipāde vā nikhanitvā vihāro kariyati, tassa heṭṭhā thambhapaṭicchakā pāsāṇā bhūmigatikā eva. Paṭhamathambhaṃ pana paṭhamabhittipādaṃ vā paṭitṭhāpentehi bahūhi samparivāretvā “kappiyakuṭiṃ karoma,

kappiyakuṭiṃ karomā”ti vācam nicchārentehi manussesu ukkhipitvā patitṭhāpentesu āmasitvā vā sayam ukkhipitvā vā thambhe vā bhittipādo vā patitṭhāpetabbo. Kurundimahāpaccarīsu pana “kappiyakuṭi kappiyakuṭi”ti vatvā patitṭhāpetabbanti vuttam. Andhakaṭṭhakathāyaṃ “saṅghassa kappiyakuṭiṃ adhiṭṭhāmī”ti vuttam. Tam pana avatvāpi aṭṭhakathāsu vuttanayena vutte doso natthi. Idam panettha sādharmaṇalakkhaṇam, thambhapatitṭhānaṅca vacanapariyosānaṅca samakālam vaṭṭati. Sace hi anitṭhite vacane thambho patitṭhāti, appatitṭhite vā tasmim vacanam nitṭhāti, akatā hoti kappiyakuṭi. Teneva mahāpaccariyam vuttam – “bahūhi samparivāretvā vattabbam, avassaṅhi ettha ekassapi vacananiṭṭhānaṅca thambhapatitṭhānaṅca ekato bhavissatī”ti.

Iṭṭhakilāmatikākuṭtikāsu pana kuṭṭisu heṭṭhā cayam bandhitvā vā abandhitvā vā karontu, yato paṭṭhāya bhittim uṭṭhāpetukāmā honti, tam sabbapaṭhamam iṭṭhakam vā silam vā mattikāpiṇḍam vā gahetvā vuttanayeneva kappiyakuṭi kātābbā. Iṭṭhakādayo hi bhittiyā paṭhamiṭṭhakādīnam heṭṭhā na vaṭṭanti, thambhā pana upari ugacchanti, tasmā vaṭṭanti. Andhakaṭṭhakathāyaṃ “thambhehi kariyamāne catūsu koṇesu cattāro thambhā iṭṭhakādikuṭṭe catūsu koṇesu dve tisso iṭṭhakā adhiṭṭhātabbā”ti vuttam. Tathā pana akatāyapi doso natthi, aṭṭhakathāsu hi vuttameva pamāṇam.

**Gonisādikā** duvidhā – āramagonisādikā, viharagonisādikāti. Tāsu yattha neva āramo na senāsanāni parikkhittāni honti, ayam “**āramagonisādikā**” nāma. Yattha senāsanāni sabbāni vā ekaccāni vā parikkhittāni, āramo aparikkhitto, ayam “**viharagonisādikā**” nāma. Iti ubhayatrāpi āramassa aparikkhittabhāvoyeva pamāṇam. Āramo pana upaḍḍhaparikkhittopi bahutaram parikkhittopi parikkhittoyeva nāmāti kurundimahaāpaccariyādīsu vuttam. Ettha kappiyakuṭim laddhum vaṭṭati.

**Gahapatīti** manussā āvāsam katvā “kappiyakuṭim dema, paribhuñjathā”ti vadanti, esā gahapati nāma. “Kappiyakuṭim katum demā”ti vuttepi vaṭṭatiyeva. Andhakaṭṭhakathāyaṃ pana “yasmā bhikkhum ṭhapetvā sesasahadhammikānam sabbesaṅca devamanussānam hatthato paṭiggaho ca sannidhi ca antovutthaṅca tesam santakam bhikkhussa vaṭṭati, tasmā tesam gehāni vā tehi dinnā kappiyakuṭi vā gahapatīti vuccatī”ti vuttam. Punapi vuttam – “bhikkhusaṅghassa viharam ṭhapetvā bhikkhunupassayo vā āramikānam vā titthiyānam vā devatānam vā nāgānam vā api brahmānam vimānam kappiyakuṭi hotī”ti, tam suvuttam; saṅghasantakameva hi bhikkhusantakam vā geham gahapatikuṭikā na hoti. **Sammutikā** nāma kammavācam sāvetvā katāti.

Yam imāsu catūsu kappiyabhūmīsu vuttam āmisam, tam sabbam antovutthasaṅkhyam na gacchati. Bhikkhūnaṅca bhikkhunīnaṅca antovutthaantopakamocanattaṅhi kappiyakuṭiyo anuññātā. Yam pana akappiyabhūmiyam sahaseyyappahonake gehe vuttam saṅghikam vā puggalikam vā bhikkhussa bhikkhuniyā vā santakam ekarattampi ṭhapitam, tam antovuttham; tattha pakkaṅca antopakam nāma hoti, etam na kappati. Sattāhakālikam pana yāvajīvikaṅca vaṭṭati.

Tatrāyam vinicchayo – sāmaṇero bhikkhussa taṇḍulādikam āmisam āharitvā kappiyakuṭiyam nikkhipitvā punadivase pacitvā deti, antovuttham na hoti. Tattha akappiyakuṭiyam nikkhittasappiādīsu yaṅkiñci pakkhipitvā deti, mukhasannidhi nāma hoti. Mahāpaccariyam pana “antovuttham hotī”ti vuttam. Tattha nāmamattameva nānākaṅcam. Bhikkhu akappiyakuṭiyam ṭhapitasappiṅca yāvajīvikapaṇṇaṅca ekato pacitvā paribhuñjati, sattāham nirāmisam vaṭṭati. Sace āmisasamsaṭṭham katvā paribhuñjati, antovutthaṅceva sāmampākaṅca hoti. Etenupāyena sabbasamsaggā veditabbā.

Imā pana kappiyakuṭiyo kadā jahitavatthukā honti? Ussāvanantikā tāva yā thambhānam upari bhittipāde vā nikhaṇitvā katā, sā sabbesu thambhesu ca bhittipādesu ca apanītesu jahitavatthukā hoti. Sace pana thambhe vā bhittipāde vā parivattenti, yo yo ṭhito tattha tattha patitṭhāti, sabbesupi parivattitesu ajahitavatthukāva hoti. Iṭṭhakādīhi katā cayassa upari bhittiatthāya ṭhapitam iṭṭhakam vā silam vā mattikāpiṇḍam vā ādimkatvā vināsitaḥkāle jahitavatthukā hoti. Yehi pana iṭṭhakādīhi adhiṭṭhitā, tesu apanītesupi tadaññāsu patitṭhitāsu ajahitavatthukāva hoti.

Gonisādikā pākārādīhi parikkhepe kate jahitavatthukā hoti. Puna tasmiṃ ārāme kappiyakuṭi laddhuṃ vaṭṭati. Sace pana punapi pākārādayo tattha tattha khaṇḍā honti, tato tato gāvo pavisanti, puna kappiyakuṭi hoti. Itarā pana dve gopānasīmattaṃ ṭhapetvā sabbasmiṃ chadane vinaṭṭhe jahitavatthukā honti. Sace gopānasīnaṃ upari ekampi pakkhapāsakamaṇḍalaṃ atthi, rakkhati.

Yatra panimā catassopi kappiyabhūmiyo natthi, tattha kiṃ kātabbaṃ? Anupasampannassa datvā tassa santakaṃ katvā paribhuñjītabbaṃ. Tatridaṃ vatthu – karavikatissatthero kira vinayadharapāmokkho mahāsīvattherassa santikaṃ agamāsi. So dīpālakena sappikumbhaṃ passitvā “bhante kimeta”nti pucchi. Thero “āvuso gāmato sappikumbho ābhato, lūkhadivase sappinā bhūñjanatthāyā”ti āha. Tato naṃ tissatthero “na vaṭṭati bhante”ti āha. Thero punadivase pamukhe nikkhipāpesi. Tissatthero puna ekadivase āgato taṃ disvā tatheva pucchitvā “bhante sahaseyyappahonakatthāne ṭhapetuṃ na vaṭṭati”ti āha. Thero punadivase bahi nīharāpetvā nikkhipāpesi, taṃ corā hariṃsu. So puna ekadivasam āgataṃ tissattheram āha – “āvuso tayā ‘na vaṭṭati’ti vutto so kumbho bahi nikkhitto corehi avahato”ti. Tato naṃ tissatthero āha – “nanu bhante anupasampannassa dātabbo assa, anupasampannassa hi datvā tassa santakaṃ katvā paribhuñjitum vaṭṭati”ti.

**296-9.** Meṇḍakavatthu uttānameva. Api cettha **anujānāmi bhikkhave pañca goraseti** ime pañca gorase viṣum paribhogena paribhuñjītumpi anujānāmīti attho. **Pātheyyaṃ pariyesituntī** ettha sace keci sayameva ñatvā denti, iccetaṃ kusalaṃ; no ce denti, ñātipavāritatthānato vā bhikkhācāravattena vā pariyesitabbaṃ. Tathā alabhantena aññātikaapavāritatthānato yācitvāpi gahetabbaṃ. Ekadivasena gamanīye magge ekabhattatthāya pariyesitabbaṃ. Dīghe addhāne yattakena kantāraṃ nittharati, tattakaṃ pariyesitabbaṃ.

### Keṇiyajaṭilavatthukathā

**300. Kājehi gāhāpetvāti** pañcahi kājasatehi susaṅkhatassa badarapānassa kuṭasahassaṃ gāhāpetvā. **Etasmiṃ nidāne etasmiṃ pakaraṇe dhammiṃ kathaṃ katvāti** “sādhu bhikkhave pānaṃ apivantā samaṇassa gotamassa sāvakā paccayabāhullikāti vādaṃ na uppādayittha, mayi ca gāraṃ akattha, mama ca tumhesu gāraṃ janayittha, iti vo ahaṃ iminā kāraṇena suṭṭhu pasanno”tiādinā nayena dhammiṃ kathaṃ katvā **anujānāmi bhikkhave aṭṭha pānānīti**ādimāha.

Tattha **ambapānanti** āmehi vā pakkehi vā ambehi katapānaṃ. Tattha āmehi karontena ambataruṇāni bhinditvā udake pakkhipitvā ātape ādiccapākena pacitvā parissāvetvā tadahupaṭiggahitehi madhusakkarakappūrādīhi yojetvā kātabbaṃ. Evaṃ kataṃ purebhattameva kappati. Anupasampannehi kataṃ labhitvā pana purebhattaṃ paṭiggahitaṃ purebhattaṃ sāmisa-paribhogenāpi vaṭṭati, pacchābhattaṃ nīrāmisaparibhogena yāva aruṇuggamaṇā vaṭṭatiyeva. Esa nayo sabbapānesu.

Tesu pana **jambupānanti** jambuphalehi katapānaṃ. **Cocapānanti** aṭṭhikehi kadaliphalehi katapānaṃ. **Mocapānanti** anaṭṭhikehi kadaliphalehi katapānaṃ. **Madhukapānanti** madhukānaṃ jātirasena katapānaṃ; taṃ pana udakasambhinnaṃ vaṭṭati, suddhaṃ na vaṭṭati. **Muddikapānanti** muddikā udake madditvā ambapānaṃ viya katapānaṃ. **Sālūkapānanti** rattuppalaṇīluppalaḍḍīnaṃ sālūke madditvā katapānaṃ. **Phārusakapānanti** phārusakaphalehi ambapānaṃ viya katapānaṃ. Imāni aṭṭha pānāni sītānīpi ādiccapākānīpi vaṭṭanti, aggipākāni na vaṭṭanti. **Dhaññaphalarasanti** sattannaṃ dhaññānaṃ phalarasaṃ. **Dākarasanti** pakkaḍḍākarasaṃ. Yāvakālikapattānañhi purebhattaṃyeva raso kappati. Yāvajīvikānaṃ paṭiggahetvā ṭhapitasappiādīhi saddhiṃ pakkānaṃ sattāhaṃ kappati. Sace pana suddhaudakena pacati, yāvajīvampi vaṭṭati. Khīrādīhi pana saddhiṃ pacitum na vaṭṭati. Aññehi pakkampi dākarasasaṅkhyameva gacchati. Kurundiyaṃ pana “yāvakālikapattānaṃpi sītodakena madditvā kataraso vā ādiccapāko vā vaṭṭati”ti vuttaṃ. **Ṭhapetvā madhukapuppharasanti** ettha madhukapuppharaso aggipāko vā hotu ādiccapāko vā, pacchābhattaṃ na vaṭṭati. Purebhattampi yaṃ pānaṃ gahetvā majjaṃ karonti, so ādīto paṭṭhāya na vaṭṭati. Madhukapupphaṃ pana allaṃ vā sukkaṃ vā bhajjitaṃ vā tena kataphāṇitaṃ vā yato paṭṭhāya majjaṃ na karonti, taṃ sabbam purebhattaṃ vaṭṭati.

Ucchuraso nikasaṭo pacchābhattaṃ vaṭṭati. Iti pānāni anujānantena imepi cattāro rasā anuññātāti. **Agghuttamukhā yaññāti**ādīsu agghitamaṃ seṭṭhaṃ, agghitamaṃ mukhanti vuttaṃ hoti.

### Rojamallādivatthukathā

**301-2.** Rojavatthu uttānatthameva. Tattha **saṅkaram akamaṣūti** katikamaṃ akamaṣu. **Uḷaram kho te idanti** sundaram kho te idaṃ. **Nāham bhante ānanda bahukatoti** nāham buddhādigatapasādabahumānena idhāgatoti dasseti. **Sabbañca ḍākanti** sappiādīhi pakkaṃ vā apakkaṃ vā yaṃkiñci ḍākaṃ. **Piṭṭhakhādanīyanti** piṭṭhamayaṃ khādanīyaṃ; rojo kira idaṃ ubhayampi satahassamaṃ vayaṃ katvā paṭiyādāpesi.

**303.** **Mañjukāti** madhuravacanā. **Paṭibhāneyyakāti** sake sippe paṭibhānasampannā. **Dakkhāti** chekā, analasā vā. **Pariyodātasippāti** niddosasippā. **Nāḷiyāvāpakenāti** nāḷiyā ca āvāpakena ca. **Āvāpako nāma** yattha laddhaṃ laddhaṃ āvapanti, pakkhipantīti vuttaṃ hoti. **Na ca bhikkhave nahāpitapubbena khurabhaṇḍanti** ettha gahetvā pariharitumeva na vaṭṭati, aññassa santakena kese chedetumaṃ vaṭṭati. Sace vetanaṃ gahetvā chindati, na vaṭṭati. Yo anahāpitapubbo tassa pariharitumpi vaṭṭati, taṃ vā aññaṃ vā gahetvā kese chedetumpi vaṭṭati.

**304.** **Bhāgaṃ datvāti** dasamabhāgaṃ datvā; idaṃ kira jambudīpe porāṇakacārittaṃ, tasmā dasakoṭṭhāse katvā eko koṭṭhāso bhūmisāmikānaṃ dātabbo.

### Catumahāpadesakathā

**305.** **Yaṃ bhikkhave mayā idaṃ na kappatīti** ime cattāro mahāpadese bhagavā bhikkhūnaṃ nayaggahaṇatthāya āha. Tattha dhammasaṅgāhakattherā suttaṃ gahetvā parimaddantā idaṃ addasaṃsu. **Ṭhapetvā dhaññaphalarasanti** sattadhaññarasāni pacchābhattaṃ na kappantīti paṭikkhittāni. Tālanāḷikerapanasalabujaalābukumbhaṇḍapussaphalatipusaphalaelālukāni, nava mahāphalāni sabbañca aparannaṃ, dhaññagatikameva. Taṃ kiñcāpi na paṭikkhittaṃ, atha kho akappiyaṃ anulometi, tasmā pacchābhattaṃ na kappati. Aṭṭha pānāni anuññātāni. Avasesāni vettatintiṇikamātuluṅgakapitthakosambakaramandādikhuddakaphalapānāni aṭṭhapānagatikāneva, tāni kiñcāpi na anuññātāni, atha kho kappiyaṃ anulomanti, tasmā kappanti. Ṭhapetvā hi sānulomaṃ dhaññaphalarasaṃ aññaṃ phalapānaṃ nāma akappiyaṃ natthi, sabbaṃ yāmakālikamaṃyevāti kurundiyaṃ vuttaṃ.

Bhagavatā cha cīvarāni anuññātāni. Dhammasaṅgāhakattherehi tesamaṃ anulomāni dukūlaṃ, pattuṇṇaṃ, cīnapaṭṭaṃ, somārapaṭṭaṃ, iddhimayikaṃ, devadattiyanti aparāni cha anuññātāni. Tattha “**pattuṇṇa**”nti pattuṇṇadese pāṇakehi sañjātavatthaṃ. Dve paṭā desanāmeneva vuttā. Tāni tīṇi koseyyasānulomāni. Dukūlaṃ sāṇassa, itarāni dve kappāsikassa vā sabbesaṃ vā.

Bhagavatā ekādasa patte paṭikkhipitvā dve pattā anuññātā – lohapatto ceva mattikāpatto ca. Lohathālakamaṃ, mattikāthālakamaṃ, tambalohathālakanti tesamaṃyeva anulomāni. Bhagavatā tayo tumbā anuññātā – lohatumbo, kaṭṭhatumbo, phalatumboti. Kuṇḍikā, kañcanako, udakatumboti tesamaṃyeva anulomāni. Kurundiyaṃ pana “pānīyasankhapānīyasarāvākāni etesaṃ anulomāni”ti vuttaṃ. Paṭṭikā, sūkarantanti dve kāyabandhanāni anuññātāni, dussapaṭṭena rajjukena ca katakāyabandhanāni tesamaṃ anulomāni. Setacchattaṃ, kilañjacchattaṃ, paṇṇacchattanti tīṇi chattāni anuññātāni. Ekapaṇṇacchattaṃ tesamaṃyeva anulomanti iminā nayena pāḷiñca aṭṭhakathañca anupekkhitvā aññānīpi kappiyākappiyānaṃ anulomāni veditabbāni.

**Tadahupaṭiggahitaṃ kāle kappatīti**ādi sabbaṃ sambhinnarasaṃ sandhāya vuttaṃ. Sace hi challimpi anapanetvā sakaleneva nāḷikeraphalena saddhiṃ pānakaṃ paṭiggahitaṃ hoti, nāḷikeramaṃ apanetvā taṃ vikālepi kappati. Upari sappiṇḍamaṃ ṭhapetvā sītalapāyāsaṃ denti, yaṃ pāyāsena

asamsaṭṭhaṃ sappi, taṃ apanetvā sattāhaṃ paribhuñjituṃ vaṭṭati. Baddhamadhuphāṇitādīsupi eseva nayo. Takkolajātiphalādīhi alaṅkaritvā piṇḍapātaṃ denti, tāni uddharitvā dhovitvā yāvajīvaṃ paribhuñjitabbāni. Yāguyaṃ pakkhipitvā dinnasiṅgiverādīsupi telādīsū pakkhipitvā dinnalaṭṭhimadhukādīsupi eseva nayo. Evaṃ yaṃ yaṃ asambhinnarasam hoti, taṃ taṃ ekato paṭiggahitampi yathā suddham hoti, tathā dhovitvā vā tacchetvā vā tassa tassa kālavasena paribhuñjituṃ vaṭṭati.

Sace pana sambhinnarasam hoti samsaṭṭhaṃ, na vaṭṭati. Yāvakālikañhi attanā saddhiṃ sambhinnarasāni tīpi yāmakālikādīni attano sabhāvaṃ upaneti, yāmakālikaṃ dvepi sattāhakālikādīni attano sabhāvaṃ upaneti, sattāhakālikampi attanā saddhiṃ samsaṭṭhaṃ yāvajīvikam attano sabhāvaññeva upaneti; tasmā tena tadahupaṭiggahitena saddhiṃ tadahupaṭiggahitam vā purepaṭiggahitam vā yāvajīvikam sattāhaṃ kappati dvīhapaṭiggahitena chāham, tīhapaṭiggahitena pañcāham...pe... sattāhapaṭiggahitena tadaheva kappatīti veditabbam. Tasmāyeva hi “sattāhakālikena bhikkhave yāvajīvikam tadahupaṭiggahita”nti avatvā “paṭiggahitam sattāhaṃ kappatī”ti vuttam.

Kālayāmasattāhātikkamesu cettha vikālabhojanasannidhibhesajjasikkhāpadānaṃ vasena āpattiyo veditabbā. Imesu ca pana catūsu kālikesu yāvakālikaṃ yāmakālikanti idameva dvayaṃ antovutthakañceva sannidhikārakañca hoti, sattāhakālikañca yāvajīvikañca akappiyakuṭiyam nikkhipitumpi vaṭṭati, sannidhimpī na janetīti. Sesam sabbattha uttānamevāti.

Bhesajjakkhandhakavaṇṇanā niṭṭhitā.

## 7. Kathinakkhandhakaṃ

### Kathinānujānanakathā

**306.** Kathinakkhandhake – **pāveyyakāti** pāveyyaraṭṭhavāsino. Pāveyyaṃ nāma kosalesu pacchimadisābhāge raṭṭhaṃ; tattha vāsinoṭi vuttam hoti. Kosalarañño ekapitukabhātūnaṃ bhaddavaggiyattherānaṃ etaṃ adhivaṇṇanaṃ. Tesu sabbajetṭhako anāgāmī, sabbapacchimako sotāpanno, ekopi arahā vā puthujjano vā natthi. **Āraññikāti** dhutaṅgasamādānavasena āraññikā; na araññāvāsamattena. Piṇḍapātikādibhāvepi tesam eseva nayo. Sīsavasena cetam vuttam. Ime pana terasāpi dhutaṅgāni samādāyeva vattanti. **Udakasaṅgaheti** udakena saṅgahite ghaṭṭite samsaṭṭhe; thale ca ninne ca ekodakābhūteti attho.

**Udakacikkhalleti** akkantaakkantaṭṭhāne udakacikkhallo uṭṭahitvā yāva ānisadā paharati, īdise cikkhalleti attho. **Okapuṇṇehīti** udakapuṇṇehi. Tesam kira cīvarāni ghanāni, tesu patitam udakam na paggharati ghanattā puṭabaddham viya tiṭṭhati. Tena vuttam – “okapuṇṇehi cīvarehī”ti. “Oghapuṇṇehī”tipi pāṭho.

**Avivadamānā vassam vasimhāti** ettha āgantukaṭṭhāne senāsanaphāsutāya abhāvena ca bhagavato dassanālābhena ukkaṅṭhitatāya ca te bhikkhū phāsum na vasimsu, tasmā “avivadamānā phāsukam vassam vasimhā”ti nāvocum. **Dhammiṃ katham katvāti** bhagavā tesam bhikkhūnaṃ anamataggiyakatham kathesi. Te sabbepi kathāpariyosāne arahattam pāpuṇitvā nisinnaṭṭhānatoyeva ākāse uppatitvā agamaṃsu, taṃ sandhāya vuttam – “dhammiṃ katham katvā”ti. Tato bhagavā “sace kathinatthāro paññatto abhavissa, ete bhikkhū ekam cīvaram ṭhapetvā santaruttarena āgacchantā na evam kilantā assu, kathinatthāro ca nāmesa sabbabuddhehi anuññāto”ti cintetvā kathinatthāram anujānitukāmo bhikkhū āmantesi, āmantetvā ca pana “**anujānāmi bhikkhave**”tiādīmāha.

Tattha **atthatakathinānaṃ voti** nipātamattam vokāro; atthatakathinānanti attho. Evañhi sati parato “so nesam bhavissatī”ti yujjati. Atha vā **voti** sāmivacanamevetam. **So nesanti** ettha pana so

cīvaruppādo ye atthatakathinā, tesam bhavissatīti attho.

Tattha **anāmantacāro**ti yāva kathinaṃ na uddhariyati, tāva anāmantetvā caraṇaṃ kappissati, cārittasiikkhāpadena anāpatti bhavissatīti attho. **Asamādānacāro**ti ticīvaraṃ asamādāya caraṇaṃ; cīvaravippavāso kappissatīti attho. **Gaṇabhojananti** gaṇabhojanampi kappissati. **Yāvadatthacīvaranti** yāvattakena cīvarena attho, tāvattakaṃ anadhiṭṭhitaṃ avikappitaṃ kappissatīti attho. **Yo ca tattha cīvaruppādoti** tattha kathinatthataśimāyaṃ matacakīvaraṃ vā hotu saṅghaṃ uddissa dinnāṃ vā saṅghikena tatrūpādena ābhaṭaṃ vā, yena kenaci ākārena yaṃ saṅghikacīvaraṃ uppajjati, taṃ tesam bhavissatīti attho.

**Evañca pana bhikkhave kathinaṃ attharitabbanti** ettha kathinatthāraṃ ke labhanti, ke na labhantīti? Gaṇavasena tāva pacchimakoṭiyā pañca jānā labhanti, uddhaṃ sataśassampī, pañcannaṃ heṭṭhā na labhanti. Vutthavassavasena purimikāya vassaṃ upagantvā paṭhamapavāraṇāya pavāritā labhanti, chinnavassā vā pacchamikāya upagatā vā na labhanti, aññasmiṃ vihāre vutthavassāpi na labhantīti mahāpaccariyaṃ vuttaṃ. Purimikāya upagatānaṃ pana sabbe gaṇapūrakā honti, ānisaṃsaṃ na labhanti, ānisaṃso itaresaṃyeva hoti. Sace purimikāya upagatā cattāro vā honti tayo vā dve vā eko vā, itare gaṇapūrake katvā kathinaṃ attharitabbaṃ. Atha cattāro bhikkhū upagatā, eko paripuṇṇavasso sāmaṇero, so ce pacchamikāya upasampajjati, gaṇapūrako ceva hoti, ānisaṃsañca labhati. Tayo bhikkhū dve sāmaṇerā, dve bhikkhū tayo sāmaṇerā, eko bhikkhu cattāro sāmaṇerāti etthāpi eseva nayo. Sace purimikāya upagatā kathinatthāraṃ kusalā na honti, atthāraṃ kusalā khandhakabhāṇakatherā pariyesivā ānetabbā. Kammavācaṃ sāvetvā kathinaṃ attharāpetvā dānañca bhuñjitvā gamissanti. Ānisaṃso pana itaresaṃyeva hoti.

Kathinaṃ kena dinnāṃ vaṭṭati? Yena kenaci devena vā manussena vā pañcannaṃ vā sahadhammikānaṃ aññatarena dinnāṃ vaṭṭati. Kathinadāyakassa vattaṃ atthi, sace so taṃ ajānanto pucchati – ‘bhante kathaṃ kathinaṃ dātabba’nti tassa evaṃ ācikkhitabbaṃ – ‘tiṇṇaṃ cīvarānaṃ aññatarappahonakaṃ sūriyuggamanasamaye vatthaṃ ‘kathinacīvaraṃ demā’ti dātuṃ vaṭṭati, tassa parikammaṭthaṃ ettakā nāma sūciyo, ettakaṃ suttaṃ, ettakaṃ rajanaṃ, parikammaṃ karontānaṃ ettakānaṃ bhikkhūnaṃ yāgubhattaṅga dātuṃ vaṭṭati’nti.

Kathinatthāraṃ kenāpi dhammena samena uppannaṃ kathinaṃ attharantena vattaṃ jānitabbaṃ. Tantavāyagehato hi ābhasantānena khalimakkhitasāṭako na vaṭṭati, malīnasāṭakopi na vaṭṭati, tasmā kathinatthārasāṭakaṃ labhitvā suṭṭhu dhovivā sūciādāni cīvarakammūpakaraṇāni sajjetvā bahūhi bhikkhūhi saddhiṃ tadaheva sibbitvā niṭṭhitasūcikkammaṃ rajitvā kappabinduṃ datvā kathinaṃ attharitabbaṃ. Sace tasmiṃ anatthateyeva aññaṃ kathinasāṭakaṃ āharati, aññāni ca bahūni kathinānisaṃsavatthāni deti, yo ānisaṃsaṃ bahuṃ deti, tassa santakeneva attharitabbaṃ. Itaro yathā tathā ovadivā saññāpetabbo.

Kathinaṃ pana kena attharitabbaṃ? Yassa saṅgho kathinacīvaraṃ deti. Saṅghena pana kassa dātabbaṃ? Yo jīṇnacīvaro hoti. Sace bahū jīṇnacīvarā honti, vuḍḍhassa dātabbaṃ. Vuḍḍhesupi yo mahāpariso tadaheva cīvaraṃ katvā attharituṃ sakkoti, tassa dātabbaṃ. Sace vuḍḍho na sakkoti navakataro sakkoti, tassa dātabbaṃ. Apica saṅghena mahātherassa saṅghaṃ kātuṃ vaṭṭati, tasmā ‘‘tumhe bhante gaṇhatha, mayaṃ katvā dassāmā’’ti vattabbaṃ. Tīsu cīvaresu yaṃ jīṇnaṃ hoti, tadatthāya dātabbaṃ. Pakatiyā dupaṭṭacīvarassa dupaṭṭatthāyeva dātabbaṃ. Sacepissa ekapaṭṭacīvaraṃ ghaṇaṃ hoti, kathinasāṭako ca pelavo, sārūpatthāya dupaṭṭappahonakameva dātabbaṃ, ‘‘ahaṃ alabhanto ekapaṭṭaṃ pārupāmi’’ti vadantassāpi dupaṭṭaṃ dātuṃ vaṭṭati. Yo pana lobhapakatiko hoti, tassa na dātabbaṃ. Tenāpi ‘‘kathinaṃ attharivā pacchā sibbitvā dve cīvarāni karissāmi’’ti na gahetabbaṃ. Yassa pana dīyati, tassa yena vidhinā dātabbaṃ, taṃ dassetuṃ ‘‘evañca pana bhikkhave kathinaṃ attharitabba’’nti ārabhitvā **suṇātu me bhantetiādikā** dānakammavācā tāva vuttā.

Evaṃ dinne pana kathine sace taṃ kathinadussaṃ niṭṭhitaparikkammaeva hoti, iccetaṃ kusalaṃ.

No ce niṭṭhitaparikkammaṃ hoti, “ahaṃ thero”ti vā “bahussuto”ti vā ekenāpi akātuṃ na labbhati, sabbeveva sannipatitvā dhovanasibbanarajanāni niṭṭhāpetabbāni. Idañhi kathinavattaṃ nāma buddhappasatthaṃ. Atīte padumuttaropi bhagavā kathinavattaṃ akāsi. Tassa kira aggasāvako sujātatthero nāma kathinaṃ gaṇhi, taṃ satthā aṭṭhasaṭṭhiyā bhikkhusatasahasseehi saddhiṃ nisīditvā akāsi.

Katariyositaṃ pana kathinaṃ gahetvā atthārakena bhikkhunā “sace saṅghāṭiyā kathinaṃ attharitikāmo hoti, porāṇikā saṅghāṭi paccuddharitabbā, navā saṅghāṭi adhiṭṭhātabbā. ‘Imāya saṅghāṭiyā kathinaṃ attharāmi’ti vācā bhinditabbā”tiādinaṃ parivāre vuttavidhānena kathinaṃ attharitabbāṃ. Attharitvā ca pana “tena kathinatthārakena bhikkhunā saṅghaṃ upasaṅkamitvā ekaṃsaṃ uttarāsaṅgaṃ karitvā añjalim paggahetvā evamassa vacanīyo – ‘atthataṃ bhante saṅghassa kathinaṃ, dhammiko kathinatthāro, anumodathā’ti tehi anumodakehi bhikkhūhi ekaṃsaṃ uttarāsaṅgaṃ karitvā añjalim paggahetvā evamassa vacanīyo – ‘atthataṃ āvuso saṅghassa kathinaṃ, dhammiko kathinatthāro, anumodāma’”ti evamādinā parivāre vuttavidhānena anumodāpetabbāṃ, itarehi ca anumoditabbāṃ. Evaṃ sabbesaṃ atthataṃ hoti kathinaṃ. Vuttañhetā parivāre “dvinnāṃ puggalānaṃ atthataṃ hoti kathinaṃ – atthārakassa ca anumodakassa cā”ti (pari. 403). Punapi vuttaṃ – “na saṅgho kathinaṃ attharati, na gaṇo kathinaṃ attharati, puggalo kathinaṃ attharati, saṅghassa anumodanā gaṇassa anumodanā puggalassa atthārā saṅghassa atthataṃ hoti kathinaṃ, gaṇassa atthataṃ hoti kathinaṃ, puggalassa atthataṃ hoti kathinaṃ”ti (pari. 414).

Evaṃ atthate pana kathine sace kathinacīvarena saddhiṃ ābhatā ānisaṃsaṃ dāyakā “yena amhākaṃ kathinaṃ gahitaṃ, tasseva demā”ti denti, bhikkhusaṅgho anissaro. Atha avicāretvā datvā gacchanti, bhikkhusaṅgho issaro. Tasmā sace kathinatthārakassa sesacīvarānipi dubbalāni honti, saṅghena apaloketvā tesampi atthāya vatthāni dātabbāni. Kammavācā pana ekāyeva vaṭṭati. Avasese kathinānisaṃse balavavatthāni vassāvāsikaṭṭhitikāya dātabbāni, ṭhitikāya abhāve therāsanato paṭṭhāya dātabbāni, garubhaṇḍaṃ na bhājetabbāṃ. Sace pana ekasīmāya bahū vihārā honti, sabbe bhikkhū sannipātetvā ekattha kathinaṃ attharitabbāṃ, visuṃ visuṃ attharituṃ na vaṭṭati.

**308.** Idāni yathā ca kathinaṃ atthataṃ hoti, yathā ca anattataṃ, taṃ vidhiṃ vitthārato dassetuṃ **evañca pana bhikkhave atthataṃ hoti kathinaṃ evaṃ anattatanti** vatvā akaraṇīyañceva mahābhūmikañca anattatalakkhaṇaṃ tāva dassento **na ullikhitamattenā**tiādike catuvīsati ākāre dassesi. Tato paraṃ atthatalakkhaṇaṃ dassento **ahatena atthatanti**ādike sattarasa ākāre dassesi. Parivārepi hi “catuvīsatiyā ākārehi anattataṃ hoti kathinaṃ, sattarasahi ākārehi atthataṃ hoti kathina”nti idameva lakkhaṇaṃ vuttaṃ.

Tattha **ullikhitamattenā**ti dīghato ca puthulato ca pamāṇaggahaṇamattena. Pamāṇañhi gaṇhanto tassa tassa padesassa sañjānanatthaṃ nakhādīhi vā paricchedaṃ dassento ullikhati, nalāṭādisu vā ghaṃsati, tasmā taṃ pamāṇaggahaṇaṃ “ullikhitamatta”nti vuccati. **Dhovanamattenā**ti kathinadussadhovanamattena. **Cīvaravicāraṇamattenā**ti “pañcakaṃ vā sattaṃ vā navakaṃ vā ekādasakaṃ vā hotū”ti evaṃ vicāritamattena. **Chedanamattenā**ti yathāvicāritassa vatthassa chedanamattena. **Bandhanamattenā**ti moghasuttakāropanamattena. **Ovaṭṭiyakaraṇamattenā**ti moghasuttakānusārena dīghasibbitamattena. **Kaṇḍusakaraṇamattenā**ti muddhiyapattabandhanamattena. **Daḷhikammakaraṇamattenā**ti dve cimilikāyo ekato katvā sibbitamattena. Atha vā paṭhamacimilikā ghaṭetvā ṭhapitā hoti, kathinasāṭakaṃ tassā kucchicimilikā katvā sibbitamattenātipi attho. Mahāpaccariyaṃ “pakaticīvarassa upassayadānenā”ti vuttaṃ. Kurundiyaṃ pana “pakatipattabaddhacīvaraṃ dupaṭṭaṃ kātuṃ kucchicimilikā alliyāpanamattenā”ti vuttaṃ. **Anuvātakaraṇamattenā**ti piṭṭhianuvātāropanamattena. **Paribhaṇḍakaraṇamattenā**ti kucchianuvātāropanamattena. **Ovaddheyyakaraṇamattenā**ti āgantukapattāropanamattena. Kathinacīvarato vā pattaṃ gahetvā aññasmim akathinacīvare pattāropanamattena.

**Kambalamaddanamattenā**ti ekavāraṃyeva rajane pakkhittena dantavaṇṇena paṇḍupalāsavaṇṇena

vā. Sace pana sakim vā dvikkhattum vā rattampi sārubbam hoti, vaṭṭati. **Nimittakatenā**ti “iminā dussena kathinaṃ attharissāmi”ti evaṃ nimittakatenā. Ettakameva hi parivāre vuttam. Aṭṭhakathāsu pana “ayaṃ sātako sundaro, sakkā iminā kathinaṃ attharitu’nti evaṃ nimittakammam katvā laddhenā”ti vuttam. **Parikathākatenā**ti “kathinaṃ nāma dātum vaṭṭati, kathinadāyako bahum puññaṃ pasavati”ti evaṃ parikathāya uppāditenā. Kathinaṃ nāma atiukkaṭṭham vaṭṭati, mātarampi viññāpetum na vaṭṭati, ākāsato otiṇṇasadisameva vaṭṭatīti. **Kukkukatenā**ti tāvakālikena. **Sannidhikatenā**ti ettha duvidho sannidhi karaṇasannidhi ca nicayasannidhi ca. Tattha tadaheva akatvā ṭhapetvā karaṇam karaṇasannidhi. Saṅgho ajja kathinadussam labhitvā punadivase deti, ayaṃ nicayasannidhi.

**Nissaggiyenā**ti rattinissaggiyena. Parivārepi vuttam – “nissaggiyam nāma kariyamāne aruṇam utthahati”ti. **Akappakatenā**ti anādinakappabindunā. **Añña**tra saṅghāṭiyātiādīsu ṭhapetvā saṅghāṭiuttarāsāngaantaravāsake añña paccattharaṇādīnā atthataṃ anattataṃ hotīti. **Añña**tra pañcakena vā atirekapañcakena vāti pañca vā atirekāni vā khaṇḍāni katvā mahāmaṇḍalaaḍḍhamaṇḍalāni dassetvā kateneva vaṭṭati. Evañhi samaṇḍalikatam hoti, tam ṭhapetvā añña acchinnakena vā dvatticatukhaṇḍena vā na vaṭṭati. **Añña**tra puggalassa atthārāti puggalassa atthāram ṭhapetvā na añña saṅghassa vā gaṇassa vā atthārena atthataṃ hoti. **Nissīmaṭṭho anumodatī**ti bahiupacārasīmāya ṭhito anumodati.

**309. Ahatenā**ti aparibhuttana. **Ahatakappenā**ti ahasadisena ekavāram vā dvikkhattum vā dhotena. **Pilotikāyā**ti hatavattakāsāṭakena. **Paṃsukūlenā**ti tevāsatiyā khettesu uppannapaṃsukūlena. Paṃsukūlikabhikkhunā coḷakabhikkham ahiṇḍitvā laddhacoḷakehi katacīvarenātipi kurundimahāpaccarīsu vuttam. **Pāpaṇikenā**ti āpaṇadvāre patitapilotikam gahetvā kathinatthāya deti, tenāpi vaṭṭatīti attho. Sesam vuttavipallāseneva veditabbam. Imasmiṃ pana ṭhāne “saha kathinassa atthārā kati dhammā jāyantī”tiādi bahuaṭṭhakathāsu vuttam, tam sabbam parivāre pālīārūḷhameva, tasmā tattha āgatanayeneva veditabbam. Na hi tena idha avuccamānena kathinatthārakassa kiñci parihāyati.

**310.** Evaṃ kathinatthāram dassetvā idāni ubbhāram dassetum **kathaṇca bhikkhave ubbhatam hoti kathinantiādimāha**. Tattha **mātikā**ti mātaro; janettiyoti attho. Kathinubbhārāñhi etā aṭṭha janettiyō. Tāsu pakkamanam anto assāti **pakkamanantikā**. Evaṃ sesāpi veditabbā.

### Ādāyasattakakathā

**311. Na paccessanti** na puna āgamissam. Etasmiṃ pana pakkamanantike kathinuddhāre paṭhamam cīvarapalibodho chijjati, pacchā āvāsapalibodho. Evaṃ pakkamato hi cīvarapalibodho antosīmāyameva chijjati, āvāsapalibodho sīmātikkame. Vuttampi cetam parivāre –

“Pakkamanantiko kathinuddhāro, vutto ādiccabandhunā;  
Etañca tāham vissajjissam, cīvarapalibodho paṭhamam chijjati;  
Pacchā āvāsapalibodho chijjatī”ti. (pari. 415);

**Cīvaram ādāyā**ti akatacīvaram ādāya. **Bahisīmagatassāti** aññaṃ sāmantavihāram gatassa. **Evaṃ hotīti** tasmim vihāre senāsanaphāsukam vā sahāyasampattiṃ vā disvā evam hoti. Etasmiṃ pana niṭṭhānantike kathinuddhāre āvāsapalibodho paṭhamam chijjati, so hi “na paccessa”nti citte uppannamatteyeva chijjati. Vuttampi cetam –

“Niṭṭhānantiko kathinuddhāro, vutto ādiccabandhunā;  
Etañca tāham vissajjissam, āvāsapalibodho paṭhamam chijjati;  
Cīvare niṭṭhite cīvarapalibodho chijjatī”ti.

Etena nayena sesamātikāvibhajanepi attho veditabbo. Ayaṃ pana viseso – “sanniṭṭhānantike dvepi palibodhā nevimaṃ cīvaram kāressam, na paccessanti citte uppannamatteyeva ekato chijjantīti.



Vuttañhetam –

“Sanniṭṭhānantiko kathinuddhāro, vutto ādiccabandhunā;  
Etañca tāham vissajjissam, dve palibodhā apubbam acarimam chijjantī”ti.

Evam sabbakathinuddhāresu palibodhupacchedo veditabbo. So pana yasmā iminā ca vuttanayena parivāre ca āgatabhāvena sakkā jānitum, tasmā vitthārato na vutto. Ayaṃ panettha sañkhepo – nāsanantike āvāsapalibodho paṭhamam chijjati, cīvare naṭṭhe cīvarapalibodho chijjati. Yasmā cīvare naṭṭhe cīvarapalibodho chijjati, tasmā “nāsanantiko”ti vuttam.

Savanantike cīvarapalibodho paṭhamam chijjati, tasmā tassa saha savanena āvāsapalibodho chijjati.

Āsāvachedike āvāsapalibodho paṭhamam chijjati. Cīvarāsāya upacchinnāya cīvarapalibodho chijjati. Ayaṃ pana yasmā “anāsāya labhati; āsāya na labhati; tassa evam hoti ‘idhevīmam cīvaram kāressam, na paccessa’”ntiadinā nayena itarehi uddhārehi saddhim vomissakadesano anekappabhedo hoti, tasmā parato visum vitthāretvā vutto, idha na vutto. Idha pana savanantikassa anantaram sīmātikantiko vutto. Tattha cīvarapalibodho paṭhamam chijjati, tassa bahisīme āvāsapalibodho chijjati. Sahubbhāre dve palibodhā apubbam acarimam chijjantīti.

**316-325.** Evam ādāyavāre sattakathinuddhāre dassetvā puna samādāyavārepi vippakatacīvarassa ādāyasamādāyavāresupi yathāsambhavam teyeva dassitā. Tato param antosīmāyam “paccessam na paccessa”nti imam vidhim anāmasitvāva “na paccessa”nti imameva āmasitvā anadhiṭṭhitenā”tiadinā nayena ca ye ye yujjanti, te te dassitā. Tato param “cīvarāsāya pakkamatī”tiadinā nayena itarehi saddhim vomissakanayena anekakkhattum āsāvachedikam dassetvā puna disaṃgamiyavasena ca phāsuvihārikavasena ca niṭṭhānantikesu yujjamānā kathinuddhārā dassitā. Evam pabhedato kathinuddhāram dassetvā idāni ye tena tena kathinuddhārena palibodhā chijjantīti vuttā, tesam paṭipakkhe dassento **dveme bhikkhave kathinassa palibodhā**tiadinā. Tattha **cattenā**ti yena cittena so āvāso catto hoti, tam cattam nāma, tena cattena. **Vantamuttessupi** eseva nayo. Sesam sabbattha uttānamevāti.

Kathinakkhandhakavaṇṇanā niṭṭhitā.

## 8. Cīvarakkhandhakam

### Jīvakavatthukathā

**326.** Cīvarakkhandhake – **padakkhiṇā**ti chekā kusalā. **Abhisatā**ti abhigatā. Kehi abhigatāti? Atthikehi atthikehi manussehi; karaṇatthe pana sāmivacanam katvā “atthikānam atthikānam manussāna”nti vuttam. **Paññāsāya ca rattim gacchatī**ti paññāsa kahāpaṇe gahetvā rattim gacchati. **Negamoti** kuṭumbiyagaṇo.

**327.** **Sālavatim kumārim gaṇikam vuṭṭhāpesī**ti nāgarā dve satahassāni, rājā satahassanti tīṇi satahassāni, aññāñca ārāmyānavāhanādiparicchedam datvā vuṭṭhāpesum; gaṇikaṭṭhāne ṭhapesunti attho. **Paṭisatena ca rattim gacchatī**ti rattim paṭisatena gacchati. **Gilānam paṭivedeyyanti** gilānabhavam jānāpeyyam. **Kattarasuppeti** jīṇasuppe.

**328.** **Kā me deva mātā, ko pitā**ti kasmā pucchi? Tam kira aññe rājadārakā kīlāntā kalahe uṭṭhite “nimmātikō nippitiko”ti vadanti. Yathā ca aññesam dārakānam chaṇḍīsū cuḷamātāmahāmātādayo kiñci paṇṇākāram pesenti, tathā tassa na koci kiñci peseti. Iti so tam sabbam cintetvā “nimmātikoyeva nu kho aha”nti jānanattham “kā me deva mātā, ko pitā”ti pucchi.

**Yannūnāhaṃ sippaṃ sikkheyyanti** yaṃnūna ahaṃ vejjasippaṃ sikkheyyanti cintesi. Tassa kira etadahosi – “imāni kho hatthiassasippādāni parūpaghātapaṭisaṃyuttāni, vejjasippaṃ mettāpubbabhāgaṃ sattānaṃ hitapaṭisaṃyutta”nti. Tasmā vejjasippameva sandhāya “yaṃnūnāhaṃ sippaṃ sikkheyya”nti cintesi. Apicāyaṃ ito kappasatasahassassa upari padumuttarassa bhagavato upaṭṭhākaṃ “buddhupaṭṭhāko aya”nti catuparisantare patthataṅgaṃ vejjaṃ disvā “aho vatāhampi evarūpaṃ ṭhānantaraṃ pāpuṇeyya”nti cintetvā sattāhaṃ buddhappamukhassa saṅghassa dānaṃ datvā bhagavantaṃ vanditvā “ahampi bhagavā tumhākaṃ upaṭṭhāko asukavejjo viya anāgate buddhupaṭṭhāko bhaveyya”nti patthanamakāsi. Tāya purimapatthanāya codiyamānopesa vejjasippameva sandhāya “yaṃnūnāhaṃ sippaṃ sikkheyya”nti cintesi.

**329. Disāpāmokkhoti** sabbadisāsu vidito pākaṭo padhāno vāti attho. Tasmīṃca samaye takkasīlato vāñijā abhayaṛājakumāraṃ dassanāya agamaṃsu. Te jīvako “kuto tumhe āgatā”ti pucchi. “Takkasīlato”ti vutte “atthi tattha vejjasippācariyo”ti pucchi. “Āma kumāra, takkasīlāyaṃ disāpāmokkho vejjo paṭivasatī”ti sutvā “tena hi yadā gacchatha, mayhaṃ āroceyyāthā”ti āha. Te tathā akaṃsu. So pitaraṃ anāpucchā tehi saddhiṃ takkasīlaṃ agamāsi. Tena vuttaṃ – “abhayaṃ rājakumāraṃ anāpucchā”tiādi.

**Ichāmahaṃ ācariya sippaṃ sikkhituntī** taṃ kira upasaṅkamantaṃ disvā so vejjo “kosi tvam tātā”ti pucchi. So “bimbisāramahārājassa nattā abhayakumārassa puttomhī”ti āha. “Kasmā pana tvamasi tāta idhāgato”ti, tato so “tumhākaṃ santike sippaṃ sikkhitu”nti vatvā icchāmahaṃ ācariya sippaṃ sikkhituntī āha. **Bahuṇca gaṇhātīti** yathā aññe khattiyakumārādayo ācariyassa dhanam datvā kiñci kammaṃ akatvā sikkhantiyeva, na so evaṃ. So pana kiñci dhanam adatvā dhammantevāsikova hutvā ekaṃ kālam upajjhāyassa kammaṃ karoti, ekaṃ kālam sikkhati. Evaṃ santepi abhinīhārasampanno kulaputto attano medhāvītāya bahuṇca gaṇhātī, lahuṇca gaṇhātī, suṭṭhu ca upadhāreti, gahitañcassa na sammussati.

**Satta ca me vassāni adhīyantassa nayimassa sippassa anto paññāyatīti** ettha ayaṃ kira jīvako yattakaṃ ācariyo jānāti, yaṃ aññe soḷasahi vassehi uggaṇhanti, taṃ sabbam sattaḥ vassehi uggaṇhesi. Sakkassa pana devarañño etadahosi – “ayaṃ buddhānaṃ upaṭṭhāko aggavissāsako bhavissati, handa naṃ bhesajjayojanaṃ sikkhāpemi”ti ācariyassa sarīre ajjhāvasitvā yathā ṭhapetvā kammavipākaṃ avasesarogaṃ ekeneva bhesajjayogena ticchitum sakkoti, tathā naṃ bhesajjayojanaṃ sikkhāpesi. So pana “ācariyassa santike sikkhāmī”ti maññati, tasmā “samattho idāni jīvako ticchitū”nti sakkena vissatthamatte evaṃ cintetvā ācariyaṃ pucchi. Ācariyo pana “na iminā mamānubhāvena uggaṇhitaṃ, devatānubhāvena uggaṇhita”nti ñatvāva **tena hi bhaṇeti**ādīmāha. **Samantā yojanaṃ āhiṇḍantoti** divase divase ekekena dvārena nikkhamitvā cattāro divase āhiṇḍanto. **Parittaṃ pātheyyaṃ pādāsīti** appamattakaṃ adāsi. Kasmā? Tassa kira etadahosi – “ayaṃ mahākulassa putto gatamattoyeva pitipitāmahānaṃ santikā mahāsakkāraṃ labhissati, tato mayhaṃ vā sippassa vā guṇaṃ na jānissati, antarāmagge pana khīṇapātheyyo sippaṃ payojetvā avassaṃ mayhañca sippassa ca guṇaṃ jānissati”ti parittaṃ dāpesi.

### Seṭṭhibhariyādivatthukathā

**330. Pasatenāti** ekahatthapuṭena. **Picunāti** kappāsapaṭalena. **Yatrahi nāmāti** yā nāma. **Kimpimāyanti** kimpī me ayaṃ. **Upajānāmetassa saṃyamassāti** katassa ca rogūpasamassa ca upakāraṃ jānāmāti adhippāyo.

**331. Sabbālaṅkāraṃ tuyhaṃ hotūti** rājā kira “sace imaṃ gaṇhissati, pamāṇayutte ṭhāne naṃ ṭhapessāmi. Sace na gaṇhissati, abhantarikaṃ naṃ vissāsakaṃ karissāmī”ti cintetvā evamāha. Abhayakumārassāpi nāṭakānampi cittaṃ uppajji “aho vata na gaṇheyyā”ti. Sopi tesam cittaṃ ñatvā viya “idaṃ me deva ayyikānaṃ ābharaṇaṃ, nayidaṃ mayhaṃ gaṇhitum patirūpa”nti vatvā **alam devāti**ādīmāha. **Adhikāraṃ me devo saratūti** katassa upakāraṃ me devo saratūti attho. Rājā pasanno

sabbākārasampannaṃ geḥaṅca ambavanuyyānaṅca anusamvaccharam satasahassauṭṭhānakam gāmaṅca mahāsakkāraṅca datvā **tena hi bhaṇeti**ādīmāha.

### Rājagahaseṭṭhivatthukathā

**332. Sakkhissasi pana tvam gahapatīti** kasmā āha? Iriyāpathasamparivattanena kira matthaluṅgaṃ na saṅṭhāti, assa ca tīhi sattāhehi niccalassa nipannassa matthaluṅgaṃ saṅṭhahissatīti ṇatvā appeva nāma sattasattamāse paṭijānitvā sattasattadivasepi nipajjeyyāti naṃ evamāha. Teneva parato vuttam “api ca paṭikaceva mayā ṇāto”ti. **Sīsacchaviṃ uppāṭetvāti** sīsacammaṃ apanetvā. **Sibbinim vināmetvāti** sibbinim vivaritvā. **Nāhaṃ ācariya sakkomīti** tassa kira sarīre mahāḍāho uppajji, tasmā evamāha. **Tīhi sattāhehīti** tīhi passehi ekekena sattāhena.

**333. Janaṃ ussāretvāti** janaṃ nīharāpetvā.

### Pajjotarājavatthukathā

**334. Jegucchaṃ me sappīti** ayam kira rājā vicchikassa jāto, vicchikavisapaṭighātāya ca sappi bhesajjaṃ hoti vicchikānaṃ paṭikūlaṃ, tasmā evamāha. **Uddekaṃ dassatīti** uggāraṃ dassati. **Paññāsa yojanikā hotīti** paññāsa yojanāni gantuṃ samatthā hoti. Na kevalaṅcassa rañño hatthinīyeva, nāḷāgiri nāma hatthī yojanasataṃ gacchati, celakaṅṇo ca muṅcakeso cāti dve assā vīsayojanasataṃ gacchanti, kāko dāso saṭṭhiyojanāni gacchati.

Ekassa kira kulaputtassa anuppanne buddhe ekadivasam bhuñjitum nisinnassa paccekabuddho dvāre ṭhatvā agamāsi, tasseko puriso “paccekabuddho āgantvā gato”ti ārocesi. So sutvā “gaccha, vegena pattaṃ āharā”ti āharāpetvā attano sajjitaṃ bhattaṃ sabbaṃ datvā pesesi. Itaro taṃ āharitvā paccekabuddhassa hatthe ṭhapetvā “ahaṃ bhante tumhākaṃ katena iminā kāyaveyyāvatikena yattha yattha nibbattopi vāhanasampanno homi”ti patthanam akāsi. So ayam etarahi pajjoto nāma rājā jāto, tāya patthanāya ayam vāhanasampatti.

**Sappim pāyetvāti** sappiṅca pāyetvā; paricārikānaṅca āhārācāre vidhiṃ ācikkhitvā. **Nakhena bhesajjaṃ olumpetvāti** nakhena bhesajjaṃ odahitvā; pakkhipitvāti attho. **Nicchāresīti** virecesi.

### Siveyyakadussayugakathā

**335. Siveyyakaṃ** nāma uttarakurūsu sivathikaṃ avamaṅgalavatthaṃ. Tattha kira manussā mataṃ tena vatthena veṭhetvā nikkhipanti, taṃ “maṃsapesi”ti sallakkhetvā hatthisoṅḍakasakuṇā ukkhipitvā himavantakūṭe ṭhapetvā vatthaṃ apanetvā khādanti. Atha vanacarakā vatthaṃ disvā rañño āharanti. Evamidaṃ pajjotena laddhaṃ. Siviraṭṭhe kusalā itthiyo tīhi aṃsūhi suttaṃ kantanti, tena suttana vāyitavatthaṃ etantipi vadanti.

### Samattiṃsavirecanakathā

**336. Sinehethāti** kiṃ pana bhagavato kāyo lūkhoti na lūkho? Bhagavato hi āhāre sadā devatā dibbojaṃ pakkhipanti, sinehapānaṃ pana sabbattha dose temeti, sirā mudukā karoti, tenāyaṃ evamāha. **Tīpi uppalahatthānīti** ekaṃ oḷārikadosaharaṇatthaṃ, ekaṃ majjhimadosaharaṇatthaṃ, ekaṃ sukhumadosaharaṇatthaṃ. **Nacirasseva pakatatto ahoṣīti** evaṃ pakatatte pana kāye nāgarā dānaṃ sampādesuṃ. Jīvako āgantvā bhagavantaṃ etadavoca – “bhagavā ajja nāgarā tumhākaṃ dānaṃ dātukāmā, mā antogāmaṃ piṇḍāya pavisathā”ti. Mahāmoggallānatthero cintesi – “kuto nu kho ajja bhagavato paṭhamam piṇḍapāto laddhuṃ vaṭṭatī”ti. Tato cintesi – “soṅo seṭṭhiputto khettparikammato paṭṭhāya aññehi asādhāraṇānaṃ khīrodakasecanasamvaddhānaṃ gandhasālīnaṃ odanaṃ bhuñjati, tato bhagavato piṇḍapātaṃ āharissāmī”ti iddhiyā gantvā tassa pāsadatale attānaṃ dassesi. So therassa

pattam gahetvā paṇītaṃ piṇḍapātaṃ adāsi. Therassa ca gamanākāraṃ disvā “bhuñjatha bhante”ti āha. Thero tamatthaṃ ārocesi “bhuñjatha bhante, ahaṃ aññaṃ bhagavato dassamī”ti theram bhojtvā gandhehi pattam ubbaṭṭetvā piṇḍapātassa pūretvā adāsi, taṃ thero āharitvā bhagavato adāsi.

Rājāpi kho bimbisāro “ajja bhagavā kiṃ bhuñjissatī”ti vihāraṃ āgantvā pavisaṃmānova piṇḍapātagandhaṃ ghāyitvā bhuñjitukāmo ahoṣi. Bhagavato dvīsuyeva piṇḍapātesu bhājanagatesu devatā ojaṃ pakkhipiṃsu – yañca sujātā adāsi; yañca parinibbānakāle cundo kammāraputto; aññesu kabaḷe kabaḷe pakkhipiṃsu, tasmā bhagavā rañño icchaṃ jānitvā apakkhittojameva thokaṃ piṇḍapātaṃ rañño dāpesi. So paribhuñjitvā pucchi – “kiṃ bhante, uttarakuruto ābhatam bhojana”nti? “Na mahārāja, uttarakuruto; apica kho taveva raṭṭhavāsino gahapatiputtassa bhojanam eta”nti vatvā soṇassa sampattim ācikkhi. Taṃ sutvā rājā soṇam daṭṭhukāmo hutvā cammakkhandaḥ vuttanayena asītiyā kulaputtasahashehi saddhim soṇassa āgamaṇam akāsi. Te bhagavato dhammaḍḍesaṇam sutvā sotāpannā jātā. Soṇo pana pabbajitvā arahatte patiṭṭhito. Bhagavāpi etadatthameva rañño piṇḍapātaṃ dāpesi.

### Varayācanakathā

**337.** Evaṃ katabhattakicce bhagavati atha kho jīvako komārabhacco taṃ siveyyakaṃ dussayugaṃ ādāya...pe... etadavoca. **Atikkantavarāti** ettha vinicchayo mahākhandhake vuttanayeneva veditabbo. **Bhagavā bhante paṃsukūliko bhikkhusaṅgho cāti** bhagavato hi buddhattam pattato paṭṭhāya yāva idaṃ vattham, etthantare vīsati vassāni na koci gahapatīcīvaraṃ sādīyi, sabbe paṃsukūlikāva ahesuṃ. Tenāyaṃ evamāha. **Gahapatīcīvaranti** gahapatīhi dinnacīvaraṃ. **Dhammiyā kathāyāti** vatthadānānisamsapaṭiṣaṃyuttāya kathāya. **Itarītareṇāpīti** appagghenapi mahagghenapi; yena kenacīti attho. **Pāvāroti** salomako kappāsādībhedo. **Anujānāmi bhikkhave kojavanti** ettha pakatikojavameva vaṭṭati, mahāpiṭṭhiyakojavaṃ na vaṭṭati. Mahāpiṭṭhiyakojavanti unṇāmayo pāvārasadiso kojavo.

### Kambalānujānanādīkathā

**338. Kāsīrājāti** kāsīnaṃ rājā; pasenadissa ekapitīkabhātā esa. **Aḍḍhakāsiyanti** ettha kāsīti sahasaṃ vuccati taṃ agghanaṃ kāsīyo. Ayaṃ pana pañcasatāni agghati, tasmā “aḍḍhakāsiyo”ti vutto. Tenevāha – “upaḍḍhakāsīnaṃ khamamāna”nti.

**339. Uccāvacānīti** sundarāni ca asundarāni ca. **Bhaṅgaṃ** nāma khomādīhi pañcahi suttehi missetvā kataṃ; vākamayamevātipi vadanti.

**340. Ekamyeva bhagavatā cīvaraṃ anuññātaṃ na dveti** te kira itarītareṇa cīvareṇāti etassa “gahapatikena vā paṃsukūlena vā”ti evaṃ atthaṃ sallakkhiṃsu. **Nāgamesunti** yāva te susānato āgacchanti, tāva te na acchiṃsu; pakkamiṃsuyeva. **Nākāmā bhāgaṃ dātunti** na anicchāya dātuṃ; yadi pana icchanti, dātabbo. **Āgamesunti** upacāre acchiṃsu. Tenāha bhagavā āha – “anujānāmi bhikkhave āgamaṇānaṃ akāmā bhāgaṃ dātu”nti. Yadi pana manussā “idhāgatā eva gaṇhantū”ti denti, saññānaṃ vā katvā gacchanti “sampattā gaṇhantū”ti sampattānaṃ sabbesampi pāpuṇanti. Sace chaḍḍetvā gatā, yena gahitaṃ, so eva sāmī. **Sadisā susānaṃ okkamīṃsūti** sabbe samaṃ okkamīṃsu; ekadisāya vā okkamīṃsūtipi attho. **Te katikaṃ katvāti** laddhaṃ paṃsukūlaṃ sabbe bhājetvā gaṇhissāmāti bahimeva katikaṃ katvā.

**342.** Cīvarapaṭiḍḍhāhanti yo gahapatikehi saṅghassa dīyamānaṃ cīvaraṃ gaṇhāti. **Yo na chandāgatim gaccheyyāti** adīsū cīvarapaṭiḍḍhāhakesu pacchā āgatānampi attano ñātakādīnaṃ paṭhamataraṃ paṭiḍḍhāhanto vā ekaccasmim pemaṃ dassetvā gaṇhanto vā lobhapakatikatāya attano pariṇāmento vā **chandāgatim gacchati** nāma. Paṭhamataraṃ āgatassāpi kodhavasena pacchā gaṇhanto vā duggatamanussesu avamaññaṃ katvā gaṇhanto vā “kiṃ vo ghare ṭhapanokāso natthi, tumhākaṃ santakaṃ gahetvā gacchathā”ti evaṃ saṅghassa lābhantarāyaṃ karonto vā **dosāgatim gacchati** nāma. Yo pana mutṭhassati asampajāno, ayaṃ **mohāgatim gacchati** nāma. Pacchā āgatānampi issarānampi

bhayena paṭhamataram paṭiggaṇhanto vā “cīvarapaṭiggāhakaṭṭhānaṃ nāmetaṃ bhāriya”nti santasanto vā **bhayāgatiṃ gacchati** nāma. “Mayā idañcīdañca gahitaṃ, idañcimdañca na gahita”nti evaṃ jānanto **gahitāgahitaṃ jānāti** nāma. Tasmā yo na chandāgatiādivasena gacchati, ñātakaaññātakaadḍhaduggatesu visesaṃ akatvā āgatapaapāṭiyā gaṇhāti, sīlacārapaṭipattiyutto hoti, satimā medhāvī bahussuto, sakkoti dāyakānaṃ vissatṭhavācāya parimaṇḍalehi padabyañjanehi anumodanaṃ karonto pasādaṃ janetuṃ, evarūpo sammannitabbo.

**Evañca pana bhikkhave sammannitabboti** ettha pana etāya yathāvuttāya kammavācāyapi apalokanenāpi antovihāre sabbasaṅghamajjhepi khaṇḍasīmāyapi sammannituṃ vaṭṭatiyeva. Evaṃ sammatenā ca vihārapaccante vā padhānaghare vā na acchitabbaṃ. Yattha pana āgatāgatā manussā sukhaṃ passanti, tādise dhuravihāraṭṭhāne bījanaṃ passe ṭhapetvā sunivatthena supārutena nisīditabbanti.

**Tattheva ujjhitvāti** “paṭiggahaṇameva amhākaṃ bhāro”ti vatvā gahitaṭṭhāneyeva chaḍḍetvā gacchanti. **Cīvaranidahakanti** cīvarapaṭisāmakaṃ. **Yo na chandāgatiṃ gaccheyyāti**ādīsu cettha ito parañca sabbattha vuttanayeneva vinicchayo veditabbo. Sammutivinicchayopi kathitānusāreneva jānitabbo.

### Bhaṇḍāgārasammutiādīkathā

**343. Vihāraṃ vāti**ādīsu yo ārāmamajjhe ārāmikasāmaṇerādīhi avivitto sabbesaṃ samosaraṇaṭṭhāne vihāro vā aḍḍhayogo vā hoti, so sammannitabbo. Paccantasenāsaṇaṃ pana na sammannitabbaṃ. Imaṃ pana bhaṇḍāgāraṃ khaṇḍasīmāṃ gantvā khaṇḍasīmāya nisinnehi sammannituṃ na vaṭṭati, vihāramajjheyeva sammannitabbaṃ.

**Guttāguttañca jāneyyāti** ettha yassa tāva chadanādīsu koci doso natthi, taṃ guttaṃ. Yassa pana chadanatiṇaṃ vā chadaniṭṭhakā vā yattha katthaci patitā, yena ovassati vā, mūsikādīnaṃ vā paveso hoti, bhittiādīsu vā katthaci chiddaṃ hoti, upacikā vā utṭhahanti, taṃ sabbaṃ aguttaṃ nāma. Taṃ sallakkhetvā paṭisaṅkharitabbaṃ. Sītasamaye dvārañca vātapānañca supihitaṃ kātabbaṃ, sītena hi cīvarāni kaṇṇakitāni honti. Uṇhasamaye antarantarā vātapavesanattaṃ vivaritabbaṃ. Evaṃ karonto hi guttāguttaṃ jānāti nāma.

Imehi pana cīvarapaṭiggāhakaḍḍhi tīhipi attano vattaṃ jānitabbaṃ. Tattha cīvarapaṭiggāhakena tāva yaṃ yaṃ manussā “kālacīvara”nti vā “akālacīvara”nti vā “accekaḍḍhāra”nti vā “vassikasāṭika”nti vā “nisīdana”nti vā “paccattharaṇa”nti vā “mukhapuñchanacoḷa”nti vā denti, taṃ sabbaṃ ekarāsīṃ katvā missetvā na gaṇhitabbaṃ, visuṃ visuṃ katvāva gaṇhitvā cīvaranidahakassa tatheva ācikkhitvā dātabbaṃ. Cīvaranidahakenāpi bhaṇḍāgārikassa dadamānena idam kālacīvaraṃ...pe... idam mukhapuñchanacoḷanti ācikkhitvāva dātabbaṃ. Bhaṇḍāgārikenāpi tatheva visuṃ visuṃ viya saññānaṃ katvā ṭhapetabbaṃ. Tato saṅghena “kālacīvaraṃ āharā”ti vutte kālacīvameva dātabbaṃ...pe... mukhapuñchanacoḷakaṃ āharāti vutte tadeva dātabbaṃ.

Iti bhagavatā cīvarapaṭiggāhako anuññāto, cīvaranidahako anuññāto, bhaṇḍāgāraṃ anuññātaṃ, bhaṇḍāgāriko anuññāto, na bāhulikātāya na asantuṭṭhiyā; apica kho saṅghassānuggahāya. Sace hi āhaṭṭhaṃ gahetvā bhikkhū bhājeyyūṃ, neva āhaṭṭhaṃ na anāhaṭṭhaṃ na dinnāṃ nādinnaṃ na laddhaṃ nāladdhaṃ jāneyyūṃ, āhaṭṭhaṃ therāsane vā dadeyyūṃ, khaṇḍākhandaṃ vā chinditvā gaṇheyyūṃ; evaṃ sati ayuttaparibhogo ca hoti, na ca sabbesaṃ saṅgho kato hoti. Bhaṇḍāgāre pana cīvaraṃ ṭhapetvā ussannaḍḍhāle ekekassa bhikkhuno ticīvaraṃ vā dve dve vā ekekaṃ vā cīvaraṃ dassanti, laddhāladdhaṃ jānissanti, aladdhabhāvaṃ ñatvā saṅghaṃ kātuṃ maññissanti.

**Na bhikkhave bhaṇḍāgāriko vuṭṭhāpetabboti** ettha aññepi avuṭṭhāpanīyā jānitabbā. Cattāro hi na vuṭṭhāpetabbā – vuḍḍhataro, bhaṇḍāgāriko, gilāno, saṅghato laddhasenāsanoti. Tattha vuḍḍhataro attano

vuḍḍhatāya navakatarena na vuṭṭhāpetabbo, bhaṇḍāgāriko saṅghena sammannitvā bhaṇḍāgārassa dinnatāya, gilāno attano gilānatāya, saṅgho pana bahussutassa uddesaparipucchādīhi bahupakārassa bhāranitthārakassa phāsukaṃ āvāsaṃ anuṭṭhāpanīyaṃ katvā deti, tasmā so upakāratāya ca saṅghato laddhatāya ca na vuṭṭhāpetabboti.

**Ussannaṃ hotīti** bahu rāsikataṃ hoti, bhaṇḍāgāraṃ na gaṇhāti. **Sammukhībhūtenāti** antoupacārasīmāyaṃ ṭhiteṇa. **Bhājetunti** kālaṃ ghoṣetvā paṭipāṭiyā bhājetuṃ. **Kolāhalaṃ akāsīti** “amhākaṃ ācariyassa detha, upajjhāyassa dethā”ti evaṃ mahāsaddaṃ akāsī. Cīvarabhājanakaṅgesu sabhāgānaṃ bhikkhūnaṃ apāpuṇantampi mahagghaṃ cīvaraṃ dento chandāgatim gacchati nāma. Aññesaṃ vuḍḍhatarānaṃ pāpuṇantampi mahagghaṃ cīvaraṃ adatvā appagghaṃ dento dosāgatim gacchati nāma. Mohamūlho cīvaradānavattaṃ ajānanto mohāgatim gacchati nāma. Mukharānaṃ navakānampi bhayena apāpuṇantameva mahagghaṃ cīvaraṃ dento bhayāgatim gacchati nāma. Yo evaṃ na gacchati, sabbesaṃ tulābhūto pamāṇabhūto majjhatto hoti, so sammannitabbo. **Bhājītābhājītanti** “ettakāni vatthāni bhājītāni, ettakāni abhājītāni”ti jānanto “bhājītābhājītaṅca jāneyyā”ti vuccati.

**Uccinitvāti** “idaṃ thūlaṃ, idaṃ saṅhaṃ, idaṃ ghaṇaṃ, idaṃ tanukaṃ, idaṃ paribhuttaṃ, idaṃ aparibhuttaṃ, idaṃ dīghato ettakaṃ puthulato ettaka”nti evaṃ vatthāni vicinitvā. **Tulayitvāti** “idaṃ ettakaṃ agghati, idaṃ ettaka”nti evaṃ agghaparicchedaṃ katvā. **Vaṇṇāvannaṃ katvāti** sace sabbesaṃ ekekameva dasagghanaṃ pāpuṇāti, iccetaṃ kusalaṃ; no ce pāpuṇāti, yaṃ nava vā aṭṭha vā agghati, taṃ aññena ekaagghanaṃ ca dviagghanaṃ ca saddhim bandhitvā etena upāyena same paṭivīse ṭhapetvāti attho. **Bhikkhū gaṇetvā vaggāṃ bandhitvāti** sace ekekassa diyamāne divaso nappahoti, dasa dasa bhikkhū gaṇetvā dasa dasa cīvarapaṭivīse ekavaggaṃ bandhitvā ekaṃ bhaṇḍikaṃ katvā evaṃ cīvarapaṭivīsaṃ ṭhapetuṃ anujānāmīti attho. Evaṃ ṭhapitesu cīvarapaṭivīsesu kuso pātetabbo. Tehipi bhikkhūhi puna kusapātaṃ katvā bhājetabbaṃ.

**Sāmaṇeraṇaṃ upaḍḍhapaṭivīsanti** ettha ye sāmaṇerā attissarā bhikkhusaṅghassa kattabbakammaṃ na karonti, uddesaparipucchāsu yuttā ācariyupajjhāyānaṃyeva vattapaṭipattim karonti, aññesaṃ na karonti, etesaṃyeva upaḍḍhabhāgo dātabbo. Ye pana purebhattaṅca pacchābhattaṅca bhikkhusaṅghasseva kattabbakiccaṃ karonti, tesāṃ samako dātabbo. Idaṅca piṭṭhisamāye uppanna bhaṇḍāgāre ṭhapiteṇa akālacīvareneva kathitaṃ. Kālacīvaraṃ pana samakameva dātabbaṃ. Tatruppādavassāvāsikaṃ sammūñjanībandhanādi saṅghassa phātikammaṃ katvā gahetabbaṃ. Etañhettha sabbesaṃ vattaṃ. Bhaṇḍāgārikacīvarepi sace sāmaṇerā āgantvā “bhante mayaṃ yāguṃ pacāma, bhattaṃ pacāma, khajjakaṃ pacāma, appaharitaṃ karoma, dantakaṭṭhaṃ āharāma, raṅgachallim kappiyaṃ katvā dema, kiṃ amhehi na kataṃ nāmā”ti ukkuṭṭhim karonti, samabhāgo dātabbo. Etaṃ ye ca virajjhivā karonti, yesaṅca karaṇabhāvo na paññāyati, te sandhāya vuttaṃ. **Kurundiyam** pana “sace sāmaṇerā ‘kasmā mayaṃ bhante saṅghakammaṃ na karoma, karissāmā”ti yācanti, samapaṭivīso dātabbo”ti vuttaṃ.

**Uttaritukāmoti** nadiṃ vā kantāraṃ vā uttaritukāmo; satthaṃ labhitvā disā pakkamitukāmoti attho. **Sakaṃ bhāgaṃ dātunti** idaṃ bhaṇḍāgārato cīvarāni nīharitvā puñje kate ghaṇṭiyā pahaṭāya bhikkhusaṅghe sannipatite satthaṃ labhitvā gantukāmo “satthato mā parihāyī”ti etamatthaṃ sandhāya vuttaṃ. Tasmā anīhatesu vā cīvaresu appahaṭāya vā ghaṇṭiyā asannipatite vā saṅghe dātuṃ na vaṭṭati. Cīvaresu pana nīhatesu ghaṇṭim paharivā bhikkhusaṅghe sannipatite cīvarabhājakena “imassa bhikkhuno koṭṭhāsena ettakena bhavitabba”nti takketvā nayaggāhena cīvaraṃ dātabbaṃ. Tulāya tulitamiva hi samasamaṃ dātuṃ na sakkā, tasmā ūnaṃ vā hotu adhikaṃ vā, evaṃ takkena nayena dinnam sudinnaṃ. Neva ūnaṃ puna dātabbaṃ, nātirittaṃ paṭiggaṇhitabbanti.

**Atirekabhāgenāti** dasa bhikkhū honti, sātakāpi daseva, tesu eko dvādasa agghati, sesā dasagghanaṃ. Sabbesu dasagghanaṃkavasena kuse pāṭite yassa bhikkhuno dvādasagghanaṃ kuso pāṭito, so “ettakena mama cīvaraṃ pahoti”ti tena atirekabhāgena gantukāmo hoti. Bhikkhū “atirekaṃ āvuso

saṅghassa santaka’’nti vadanti, taṃ sutvā bhagavā ‘‘saṅghike ca gaṇasantake ca appakaṃ nāma natthi, sabbattha saṃyamo kātabbo, gaṇhantenāpi kukkuccāyitabba’’nti dassetuṃ ‘‘**anujānāmi bhikkhave anukkhepe dinne**’’ti āha. Tattha **anukkhepo** nāma yaṃkiñci anukkhipitabbaṃ anuppadātabbaṃ kappiyabhaṇḍaṃ; yattakaṃ tassa paṭivīse adhikaṃ, tattake agghanake yasmim̐ kismiñci kappiyabhaṇḍe dinneti attho.

**Vikalake tosetvāti** ettha cīvaravikalakaṃ puggalavikalakanti dve vikalakā. **Cīvaravikalakaṃ** nāma sabbesaṃ pañca pañca vatthāni pattāni, sesānipi atthi, ekekaṃ pana na pāpuṇāti, chinditvā dātābbāni. Chindantehi ca aḍḍhamaṇḍalādīnaṃ vā upāhanatthavikādīnaṃ vā pahonakāni khaṇḍāni katvā dātābbāni, heṭṭhimaparicchedena caturaṅgulavittthārampi anuvātappahonakāyāmaṃ khaṇḍaṃ katvā dātuṃ vaṭṭati, aparibhogāṃ pana na kātabbanti evamettha cīvarassa appahonakabhāvo cīvaravikalakaṃ. Chinditvā dinne pana taṃ tositaṃ hoti, atha kusapāto kātabbo. Sacepi ekassa bhikkhuno koṭṭhāse ekaṃ vā dve vā vatthāni nappahonti, tattha aññaṃ sāmaṇakaṃ parikkhāraṃ ṭhapetvā yo tena tussati, tassa taṃ bhāgaṃ datvā pacchā kusapāto kātabbo. Idampi cīvaravikalakanti **andhakaṭṭhakathāyaṃ** vuttaṃ.

**Puggalavikalakaṃ** nāma dasa dasa bhikkhū gaṇetvā vaggaṃ karontānaṃ eko vaggo na pūراتi, aṭṭha vā nava vā honti, tesāṃ aṭṭha vā nava vā koṭṭhāsā ‘‘tumhe ime gahetvā visuṃ bhājethā’’ti dātābbā. Evamaṃ puggalānaṃ appahonakabhāvo puggalavikalakaṃ. Visuṃ dinne pana taṃ tositaṃ hoti, evaṃ tosetvā kusapāto kātabboti. Atha vā vikalake tosetvāti yo cīvaravibhāgo ūnako, taṃ aññaṃ parikkhārena samaṃ katvā kusapāto kātabbo.

### Cīvararajanakathā

**344. Chakaṇenāti** gomayena. **Paṇḍumattikāyāti** tambamattikāya. Mūlarajanādīsu haliddiṃ ṭhapetvā sabbāṃ mūlarajanaṃ vaṭṭati. Mañjiṭṭhiñca tuṅgahārañca ṭhapetvā sabbāṃ khandharajanaṃ vaṭṭati. Tuṅgahāro nāma eko sakaṇṭakarukkho, tassa haritālavanṇaṃ khandharajanaṃ hoti. Loddañca kaṇḍulañca ṭhapetvā sabbāṃ tacarajanaṃ vaṭṭati. Allipattaṃ nilipattañca ṭhapetvā sabbāṃ pattarajanaṃ vaṭṭati. Gihiparibhuttaṃ pana allipattena ekavāraṃ rajituṃ vaṭṭati. Kimsukapupphañca kusumbhapupphañca ṭhapetvā sabbāṃ puppharajanaṃ vaṭṭati. Phalarajane pana na kiñci na vaṭṭati.

**Sītudakāti** apakkarajanaṃ vuccati. **Uttarāḷumpanti** vaṭṭādhāraṃ, rajanakumbhiyā majjhe ṭhapetvā taṃ ādhāraṃ parikkhipitvā rajanaṃ pakkhipituṃ anujānāmīti attho. Evañhi kate rajanaṃ na uttarati. **Udake vā nakhapiṭṭhikāya vāti** sace paripakkaṃ hoti, udakapātiyā dinno thevo sahasā na visarati, nakhapiṭṭhiyampi avisaranto tiṭṭhati. **Rajanaḷuṅkanti** rajanaḷuṅkaṃ. **Daṇḍakathālakanti** tameva sadaṇḍakaṃ. **Rajanakolambanti** rajanaḷuṅkaṃ. **Omaddantīti** sammaddanti. **Na ca acchinne theve pakkamitunti** yāva rajanabindu gaḷitaṃ na chijjati, tāva na aññaṃ gantabbaṃ. **Patthinnanti** atirajitattā thaddhaṃ. **Udake osāretunti** udake pakkhipitvā ṭhapetuṃ. Rajane pana nikkhante taṃ udakaṃ chaḍḍetvā cīvaraṃ madditabbaṃ. **Dantakāsāvānīti** ekaṃ vā dve vā vāre rajitvā dantavaṇṇāni dhārenti.

### Chinnakacīvarānujānanakathā

**345. Acchibaddhanti** caturassakedārabaddhaṃ. **Pāḷibaddhanti** āyāmato ca vitthārato ca dīghamariyādabaddhaṃ. **Mariyādabaddhanti** antarantarā rassamariyādabaddhaṃ. **Siṅghāṭakabaddhanti** mariyādāya mariyādaṃ vinivijjhivā gataṭṭhāne siṅghāṭakabaddhaṃ; catukkasaṇṭhānanti attho. **Samvidahitunti** kātuṃ. **Ussahasi tvaṃ ānandāti** sakkosi tvaṃ ānanda. **Ussahāmi bhagavāti** tumhehi dinnanayena sakkomīti dasseti. **Yatra hi nāmāti** yo nāma. **Kusimpi nāmāti**ādīsu kusīti āyāmato ca vitthārato ca anuvātādīnaṃ dīghapattānametaṃ adhvacaṇaṃ. **Aḍḍhakusīti** antarantarā rassapattānaṃ nāmaṃ. **Maṇḍalanti** pañcakaṇḍikacīvarassa ekekasmim̐ khaṇḍe mahāmaṇḍalaṃ. **Aḍḍhamaṇḍalanti** khuddakamaṇḍalaṃ. **Vivaṭṭanti** maṇḍalañca aḍḍhamaṇḍalañca ekato katvā sibbitaṃ majjihimakhaṇḍaṃ.

**Anuvivaṭṭanti** tassa ubhosu passesu dve khaṇḍāni. **Gīveyyakanti** gīvāveṭṭhanatṭhāne daḷhīkaraṇatṭhaṃ aññaṃ suttasamsibbitaṃ āgantukapattaṃ. **Jaṅgheyakanti** jaṅghapāpūṇanatṭhāne tatheva samsibbitaṃ pattaṃ. Gīvatṭhāne ca jaṅghatṭhāne ca pattānamevettaṃ nāmantipi vadanti. **Bāhantanti** anuvivaṭṭānaṃ bahi ekekaṃ khaṇḍaṃ. Iti pañcakhaṇḍikacīvarenaṃ vicāritanti. Atha vā **anuvivaṭṭanti** vivaṭṭassa ekapassato dvinnaṃ ekapassato dvinnanti catunnampi khaṇḍānametaṃ nāmaṃ. **Bāhantanti** suppaṃānaṃ cīvaraṃ pārupantena saṃharitvā bāhāya upari ṭhapitā ubho antā bahimukhā tiṭṭhanti, tesāṃ etaṃ nāmaṃ. Ayameva hi nayo mahāatṭhakathāyaṃ vuttoti.

### Ticīvarānujānanakathā

**346. Cīvarehi ubbhaṇḍiketi** cīvarehi ubbhaṇḍe kate; yathā ukkhittabhaṇḍā honti evaṃ kate; ukkhittabhaṇḍikabhāvaṃ āpāditeti attho. **Cīvarabhisinti** ettha **bhisinti** dve tiṇi ekato katvā bhisisaṅkhepena saṃharitacīvarāni vuttāni. Te kira bhikkhū “dakkhiṇāgiritto bhagavā lahuṃ paṭinivattissatī”ti tattha gacchantā jīvakaṃvatthusmiṃ laddhacīvarāni ṭhapetvā agamaṃsu. Idāni pana cirena āgamissatīti maññaṃānā ādāya pakkamiṃsu. **Antaratṭhakāsūti** māghassa ca phagguṇassa ca antarā aṭṭhasu. **Na bhagavantaṃ sītaṃ ahoṣīti** bhagavato sītaṃ nāhoṣi. **Etadahosi yepi kho te kulaputtāti** na bhagavā ajjhokāse anisiditvā etamatthaṃ na jānāti, mahājanasaññaṇāpanatṭhaṃ pana evamakāsi. **Sītālukāti** sītapakatikā; ye pakatiyāva sītena kilamanti. **Diguṇaṃ saṅghāṭinti** dupaṭṭhaṃ saṅghāṭiṃ. **Ekacciyaṃti** ekapaṭṭhaṃ. Iti “bhagavā attanā catūhi cīvarehi yāpeti, amhākaṃ pana ticīvaraṃ anujānāti”ti vacanassa okāsaṃ upacchinditūṃ diguṇaṃ saṅghāṭiṃ anujānāti, ekaccike itare. Evañhi nesāṃ cattāri bhavissanti.

### Atirekacīvarādikathā

**348. Aggaḷaṃ acchupeyyanti** chiddatṭhāne pilotikakhaṇḍaṃ laggāpeyyaṃ. **Ahatakappānanti** ekavāraṃ dhotānaṃ. **Uddhaṭṭānanti** ututo dīghakālato uddhaṭṭānaṃ hatavatthakānaṃ, pilotikānanti vuttaṃ hoti. **Pāpaṇiketi** antarāpaṇato patitapilotikacīvare. **Ussāho karaṇīyoti** pariyesanā kātabbā. Paricchedo panettha natthi, paṭṭasatampi vaṭṭati. Sabbamidaṃ sādīyantassa bhikkhuno vasena vuttaṃ. **Aggaḷaṃ tunnanti** ettha uddharitvā allīyāpanakhaṇḍaṃ **aggaḷaṃ**, suttana samsibbitaṃ **tunnaṃ**; vaṭṭetvā karaṇaṃ **ovaṭṭikaṃ** . **Kaṇḍusakāṃ** vuccati muddikā. **Daḷhīkammanti** anuddharitvā upassayaṃ katvā allīyāpanakaṃ vatthakhaṇḍaṃ.

**349-351.** Visākhāvatthu uttānatthaṃ. Tato paraṃ pubbe vinicchitameva. **Sovaggikanti** saggappattahetukaṃ. Tenevāha “sovaggika”nti. Sokaṃ apanetīti **sokanudaṃ**. **Anāmayāti** arogā. **Saggamhi kāyamhīti** saggopapannā.

**353. Puthujjanā kāmesu vītarāgāti** jhānalābhino.

**356. Sandiṭṭhoti** diṭṭhamattakamitto. **Sambhattoti** ekasambhogo daḷhamitto. **Ālapitoti** “mama santakaṃ yaṃ iccheyyāsi, taṃ gaṇhāhi”ti evaṃ vutto. Etesu tīsu aññataranāmena saddhiṃ jīvati, gahite attamano hotīti imehi gahitavissāso ruhati.

### Pacchimavikappanupagacīvarādikathā

**359. Paṃsukūlakatoti** katapaṃsukūlo. **Garuko hotīti** jinṇajinṇatṭhāne aggaḷāropanena garuko hoti. **Suttalūkhaṃ kātunti** sutteneva aggaḷaṃ kātunti attho. **Vikaṇṇo hotīti** suttaṃ acchetvā acchetvā sībantaṇaṃ eko saṅghāṭikoṇo dīgho hoti. **Vikaṇṇaṃ uddharituntī** dīghakoṇaṃ chinditūṃ. **Okiriyaṇtīti** chinnakoṇato gaḷanti. **Anuvātaṃ paribhaṇḍanti** anuvātañceva paribhaṇḍaṇca. **Pattā lujjantīti** mahantesu pattamukhesu dinnāni suttāni gaḷanti, tato pattā lujjanti. **Aṭṭhapadakaṃ kātunti** aṭṭhapadakacchannena pattamukhaṃ sibbitūṃ.



**360. Anvādhikampi āropetunti** āgantukapattampi dātum. Idam pana appahonake āropetabbam. Sace pahoti, āgantukapattam na vaṭṭati, chinditabbameva.

**361. Na ca bhikkhave saddhādeyyanti** ettha sesañātīnam dento vinipātetiyeva. Mātāpitaro pana sace rajje ṭhitā patthayanti, dātabbam.

**362. Gilānoti** gilānatāya gahetvā gantum asamatto. **Vassikasāṅketanti** vassike cattāro māse. **Nadīpāranti** nadiyā pāre bhattam bhuñjitabbam hoti. **Aggaḷaguttivihāroti** sabbesveva cetesu gilānavassikasāṅketanadīpāragamanaatthatakathinabhāvesu aggaḷaguttiyeva pamāṇam. Gutte eva hi vihāre etesu kāraṇesu nikkhipitvā bahi gantum vaṭṭati, na agutte. Āraññakassa pana vihāro na sugutto hoti, tena bhaṇḍukhalikāya pakkhipitvā pāsāṇasusira rukkhasusirādīsu suppaṭicchannesu ṭhapetvā gantabbam.

### Saṅghikacīvaruppādakathā

**363. Tuyheva bhikkhu tāni cīvarānīti** aññattha gahetvā haṭṭānīpi tuyheva; na tesam añño koci issaroti. Evañca pana vatvā anāgatepi nikkukkuccā gaṇhissantīti dassetum **idha panāti**ādīmāha. **Tasseva tāni cīvarāni yāva kathinassa ubbhārāti** sace gaṇapūrake bhikkhū labhitvā kathinam atthataṃ hoti, pañcamāse; no ce atthataṃ hoti, ekaṃ cīvaramāsameva. Yam “saṅghassa demā”ti vā denti, “saṅgham uddissa demā”ti vā denti, “vassaṃvutthasaṅghassa demā”ti vā denti, “vassāvāsikaṃ demā”ti vā denti, sacepi matakacīvaram avibhajitvā tam vihāram pavisanti, tam sabbam tasseva bhikkhuno hoti. Yampi so vassāvāsattāya vaḍḍhiṃ payojetvā ṭhapitaupanikkhepato vā tatruppādato vā vassāvāsikaṃ gaṇhāti, sabbam suggahitameva hoti. Idamettha lakkhaṇam, yena tenākārena saṅghassa uppannam vattham atthatakathinassa pañcamāse, anattatakathinassa ekaṃ cīvaramāsam pāpuṇātīti. Yam pana “idam idha vassaṃvutthasaṅghassa demā”ti vā “vassāvāsikaṃ demā”ti vā vatvā dinnam, tam anattatakathinassāpi pañcamāse pāpuṇāti. Tato param pana uppannam vassāvāsikaṃ pucchitabbam – “kiṃ atītavasse idam vassāvāsikaṃ, udāhu anāgatavasse”ti! Kasmā? Piṭṭhisamaye uppannattā.

**Utukālanti** vassānato aññam kālam. **Tāni cīvarāni ādāya sāvattim gantvāti** ettha tāni cīvarāni gatagataṭṭhāne saṅghikāneva honti, bhikkhūhi diṭṭhamattamevettha pamāṇam. Tasmā sace keci paṭipatham āgacchantā “kuhiṃ āvuso gacchasi”ti pucchitvā tamattham sutvā “kiṃ āvuso mayam saṅgho na homā”ti tattheva bhājetvā gaṇhanti, suggahitāni. Sacepi esa maggā okkamitvā kañci vihāram vā āsanāsālam vā piṇḍāya caranto ekaṃ gehameva vā pavisati, tatra ca nam bhikkhū disvā tamattham pucchitvā bhājetvā gaṇhanti, suggahitāneva.

**Adhiṭṭhātunti** ettha adhiṭṭhahantena vattam jānitabbam. Tena hi bhikkhunā ghaṇṭim paharivā kālam ghoṣetvā thokam āgametvā sace ghaṇṭisaññāya vā kālasaññāya vā bhikkhū āgacchanti, tehi saddhiṃ bhājetabbāni. No ce āgacchanti, “mayhimāni cīvarāni pāpuṇantī”ti adhiṭṭhātabbāni. Evaṃ adhiṭṭhite sabbāni tasseva honti, ṭhitikā pana na tiṭṭhati.

Sace ekekaṃ uddharitvā “ayaṃ paṭhamabhāgo mayham pāpuṇāti, ayaṃ dutiyabhāgo”ti evam gaṇhāti, gahitāni ca suggahitāni honti, ṭhitikā ca tiṭṭhati. Evaṃ pāpetvā gaṇhantenāpi adhiṭṭhitameva hoti. Sace pana ghaṇṭim paharivā vā appaharivā vā kālampi ghoṣetvā vā aghoṣetvā vā “ahamevettha mayhameva imāni cīvarānī”ti gaṇhāti, duggahitāni honti. Atha “añño koci idha natthi, mayham etāni pāpuṇantī”ti gaṇhāti, suggahitāni.

**Pātite kuseti** ekakoṭṭhāse kusadaṇḍake pātitamatte sacepi bhikkhusahassam hoti, gahitameva nāma cīvaram. Nākāmā bhāgo dātabbo. Sace pana attano ruciyā dātukāmā honti, dentu. Anubhāgepi eseva nayo.

**Sacīvarānīti** “kālacīvarampi saṅghassa itova dassāma, visum sajjiyamāne aticiram hotī”ti

khippaṃyeva sacīvarāni bhattāni akaṃsu. **There āgama uppannānī** tumhesu pasādena khippaṃ uppannāni.

**Saṅghassa demāti cīvarāni dentī**ti sakalampi cīvarakālaṃ saṅikaṃ saṅikaṃ dentiyeva. Purimesu pana dvīsu vatthūsu pacchinnadānattā adāṃsūti vuttaṃ. **Sambahulā therāti** vinayadharapāmokkatherā. Idaṃ pana vatthūṃ saddhiṃ purimena dvebhātikavatthunā parinibbute bhagavati uppannaṃ, ime ca therā dīṭṭhapubbā tathāgataṃ, tasmā purimesu vatthūsu tathāgatena paññattanayeneva kathesuṃ.

### Upanandasakyaputtavatthukathā

**364. Gāmakāvāsaṃ agamāsī**ti appeva nāma cīvarāni bhājentā mayhampi saṅghaṃ kareyyunti cīvarabhājanakālaṃ sallakkhetvāva agamāsi. **Sādiyissasī**ti gaṇhissasi. Ettha ca kiñcāpi tassa bhāgo na pāpuṇāti. Atha kho “nagaravāsiko ayaṃ mukharo dhammakathiko”ti te bhikkhū “sādiyissasī”ti āhaṃsu. **Yo sādiyeyya āpatti dukkaṭassāti** ettha pana kiñcāpi lahukā āpatti, atha kho gahitāni gahitaṭṭhāne dātabbāni. Sacepi natṭhāni vā jiṇṇāni vā honti, tasseva gīvā. Dehīti vutte adento dhuranikkhepe bhaṇḍagghena kāretabbo.

**Ekādhippāyanti** ekaṃ adhippāyaṃ; ekaṃ puggalapaṭivīsameva dethāti attho. Idāni yathā so dātabbo, taṃ dassetuṃ tantim ṭhapento **idha panāti**ādīmāha. Tattha **sace amutra upaḍḍhaṃ amutra upaḍḍhanti** ekekasmim ekāhamekāhaṃ vā sattāhaṃ sattāhaṃ vā sace vasati, ekekasmim vihāre yaṃ eko puggalo labhati, tato tato upaḍḍhaṃ upaḍḍhaṃ dātabbaṃ. Evaṃ ekādhippāyo dinno hoti. **Yattha vā pana bahutaranti** sace ekasmim vihāre vasanto itarasmim sattāhavārena aruṇameva uṭṭhāpeti, evaṃ purimasim bahutaraṃ vasati nāma. Tasmā tato bahutaraṃ vasitavihārato tassa paṭivīso dātabbo. Evampi ekādhippāyo dinno hoti. Idañca nānālābhehi nānūpacārehi ekasīmavihārehi kathitaṃ, nānāsīmavihāre pana senāsanaggāho paṭippassambhati. Tasmā tattha cīvarapaṭivīso na pāpuṇāti. Sesam pana āmisabhesajjādi sabbam sabbattha antosīmagatassa pāpuṇāti.

### Gilānavatthukathā

**365. Mañcake nipātesunti** evaṃ dhovivā aññaṃ kāsāvaṃ nivāsetvā mañcake nipajjāpesuṃ; nipajjāpetvā ca panāyasmā ānando muttakarīsakiliṭṭhaṃ kāsāvaṃ dhovivā bhūmiyaṃ paribhaṇḍaṃ akāsi. **Yo bhikkhave maṃ upaṭṭhaheyya, so gilānaṃ upaṭṭhaheyyāti** yo maṃ ovādānusāsānikāraṇena upaṭṭhaheyya, so gilānaṃ upaṭṭhaheyya; mama ovādakārakena gilāno upaṭṭhātabboti ayamevettha attho. Bhagavato ca gilānassa ca upaṭṭhānaṃ ekasadisanti evaṃ panettha attho na gahetabbo. **Saṅghena upaṭṭhātabboti** yassete upajjhādayo tasmim vihāre natthi, āgantuko hoti ekacāriko bhikkhu, so saṅghassa bhāro, tasmā saṅghena upaṭṭhātabbo. No ce upaṭṭhaheyya, sakalassa saṅghassa āpatti. Vāraṃ ṭhapetvā jaggantesu pana yo attano vāre na jaggati, tasseva āpatti. Saṅghattheropi vārako na muccati. Sace sakalo saṅgho ekassa bhāraṃ karoti, eko vā vattasampanno bhikkhu ahameva jaggissāmīti paṭijaggati, saṅgho āpattito muccati.

**366. Abhikkamantaṃ vā abhikkamatī**tiādīsu vaḍḍhantaṃ vā ābādhaṃ “idaṃ nāma me paribhuñjantassa vaḍḍhanti, idaṃ paribhuñjantassa parihāyati, idaṃ paribhuñjantassa tiṭṭhatī”ti yathābhūtaṃ nāvīkarotīti evamattho dāṭṭhabbo. **Nālanti** na patirūpo, na yutto upaṭṭhātuṃ. **Bhesajjaṃ samvidhātunti** bhesajjaṃ yojetuṃ asamattho hoti. **Āmisantaroti** āmisam assa antaranti āmisantaro. **Antaranti** kāraṇaṃ vuccati; āmisakāraṇā yāgubhattapattacīvarāni patthento upaṭṭhātīti attho.

### Matasantakakathā

**367. Kālānkateti** kālakiriya. **Gilānupaṭṭhākānaṃ dātunti** ettha anantaraṃ vuttāya kammavācāya dinnampi apaloketvā dinnampi dinnameva hoti, vaṭṭati.

**369. Yaṃ tattha lahubhaṇḍaṃ yaṃ tattha garubhaṇḍanti** ettha lahubhaṇḍagarubhaṇḍānaṃ nānākaraṇaṃ parato vaṇṇayissāma. Gilānupaṭṭhākālābhe pana ayaṃ ādito paṭṭhāya vinicchayo –

Sace sakale bhikkhusaṅghe upaṭṭhahante kālaṃ karoti, sabbepi sāmikā. Atha ekaccehi vāre kate ekaccehi akateyeva kālaṃ karoti, tattha ekacce ācariyā vadanti – “sabbepi attano vāre sampatte kareyyuṃ, tasmā sabbepi sāmīno”’ti. Ekacce vadanti – “yehi jaggito te eva labhanti, itare na labhanti”’ti. Sāmaṇere kālaṅkate sace cīvaraṃ atthi, gilānupaṭṭhākānaṃ dātabbaṃ. No ce atthi yaṃ atthi, taṃ dātabbaṃ. Aññasmim̐ parikkhāre sati cīvarabhāgaṃ katvā dātabbaṃ.

Bhikkhu ca sāmaṇero ca sace samaṃ upaṭṭhahiṃsu, samako bhāgo dātabbo. Atha sāmaṇerova upaṭṭhahati, bhikkhussa saṃvidahanamattameva hoti, sāmaṇerassa jeṭṭhakabhāgo dātabbo. Sace sāmaṇero bhikkhunā ānītaudakena yāguṃ pacitvā paṭiggāhāpanamattameva karoti, bhikkhu upaṭṭhahati, bhikkhussa jeṭṭhakabhāgo dātabbo.

Bahū bhikkhū samaggā hutvā upaṭṭhahanti, sabbesaṃ samako bhāgo dātabbo. Yo panettha visesena upaṭṭhahati, tassa viseso kātabbo. Yena pana ekadivasampi gilānupaṭṭhākavasena yāgubhattaṃ vā pacitvā dinnāṃ, nahānaṃ vā paṭiyāditaṃ, sopi gilānupaṭṭhākova. Yo samīpaṃ anāgantvā bhesajjatanḍulādīni peseti, ayaṃ gilānupaṭṭhāko na hoti. Yo pariyesitvā gāhāpetvā āgacchati, ayaṃ gilānupaṭṭhākova.

Eko vattasīsena jaggati; eko paccāsāya, matakāle ubhopi paccāsīsanti, ubhinnampi dātabbaṃ. Eko upaṭṭhahitvā gilānassa vā kamma attano vā kamma katthaci gato “puna āgantvā jaggissāmī”’ti, etassapi dātabbaṃ. Eko ciraṃ upaṭṭhahitvā “idāni na sakkomī”’ti dhuraṃ nikkhipitvā gacchati, sacepi taṃdivasameva gilāno kālaṃkaroti, upaṭṭhākabhāgo na dātabbo.

Gilānupaṭṭhāko nāma gihi vā hotu pabbajito vā, antamaso mātugāmopi, sabbe bhāgaṃ labhanti. Sace tassa bhikkhuno pattacīvaramattameva hoti, aññaṃ natthi; sabbaṃ gilānupaṭṭhākānaṃyeva dātabbaṃ. Sacepi sahasaṃ agghati, aññaṃ pana bahumpi parikkhāraṃ te na labhanti; saṅghasseva hoti. Avasesaṃ bhaṇḍaṃ bahukañceva mahagghaṅca, ticīvaraṃ appagghaṃ; tato gahetvā ticīvaraparikkhāro dātabbo. Sabbañcetaṃ saṅghikatova labbhati.

Sace pana so jīvamānoyeva sabbaṃ attano parikkhāraṃ nissajjitvā kassaci adāsi, koci vā vissāsaṃ aggahehi, yassa dinnāṃ, yena ca gahitaṃ, tasseva hoti. Tassa ruciyā eva gilānupaṭṭhākā labhanti, aññesaṃ adatvā dūre ṭhapitaparikkhārāpi tattha tattha saṅghasseva honti. Dvinnāṃ santakaṃ hoti avibhattaṃ, ekasmiṃ kālaṅkate itaro sāmī. Bahūnampi santake eseva nayo. Sabbesu matesu saṅghikaṃ hoti. Sacepi avibhajitvā saddhivihārikādīnaṃ denti adinnaṃyeva hoti. Vibhajitvā dinnāṃ pana sudinnaṃ. Taṃ tesu matesupi saddhivihārikādīnaṃyeva hoti, na saṅghassa.

### **Kusacīrādipaṭṭhikhepakathā**

**371.** Kusacīrādīsu **akkanāḷanti** akkanāḷamayaṃ. **Potthakoti** makacimayo vuccati. Sesāni paṭhamapārājikavaṇṇanāyaṃ vuttāni. Tesu potthake eva dukkaṭaṃ. Sesesu thullaccayānīti. Akkadussakadalidussaerakadussāni pana potthakagatikāneva.

**372.** Sabbanīlakādīni rajanaṃ dhovitvā puna rajitvā dhāretabbāni. Na sakkā ce honti dhovituṃ, paccattharaṇāni vā kātabbāni. Dupatṭacīvarassa vā majjhe dātabbāni. Tesāṃ vaṇṇanānattaṃ upāhanāsu vuttanayameva. Acchinnadasadīghadasāni dasā chinditvā dhāretabbāni. Kañcukaṃ labhitvā phāletvā rajitvā paribhuñjituṃ vaṭṭati. Veṭhanepi eseva nayo. Tirīṭakaṃ pana rukkachallimayaṃ; taṃ pādapuñchanaṃ kātuṃ vaṭṭati.

**374. Patirūpe gāhake**ti sace koci bhikkhu “ahaṃ tassa gaṇhāmī”’ti gaṇhāti, dātabbanti attho.

Evametesu tevīsatiyā puggalesu soḷasa janā na labhanti, satta janā labhantīti.

### Saṅghebhinnecīvaruppādakathā

**376. Saṅho bhijjati** bhijjivā kosambakabhikkhū viya dve koṭṭhāsā honti. **Ekasmim pakkheti** ekasmim koṭṭhāse dakkhiṇodakañca gandhādīni ca denti, ekasmim cīvarāni. **Saṅhassevetanti** sakalassa saṅghassa dvinnampi koṭṭhāsānaṃ etaṃ hoti, ghaṇṭim paharivā dvīhipi pakkhehi ekato bhājetabbaṃ. **Pakkhassevetanti** evaṃ dinne yassa koṭṭhāsassa udakaṃ dinnāṃ, tassa udakameva hoti; yassa cīvaraṃ dinnāṃ, tasseva cīvaraṃ. Yattha pana dakkhiṇodakaṃ pamāṇaṃ hoti, tattha eko pakkho dakkhiṇodakassa laddhattā cīvarāni labhati, eko cīvarānameva laddhattāti ubhohipi ekato hutvā yathāvuddhaṃ bhājetabbaṃ. Idaṃ kira parasamudde lakkhaṇanti mahāaṭṭhakathāyaṃ vuttaṃ. **Tasmīyeva pakkheti** ettha pana itaro pakkho anissaroyeva. **Cīvarapesanavattḥūni** pākāṇeva.

### Aṭṭhacīvaramātikākathā

**379.** Idāni ādīto paṭṭhāya vuttacīvarānaṃ paṭilābhakhettaṃ dassetuṃ “**aṭṭhimā bhikkhave mātikā**”tiādīmāha. **Sīmāya detīti**di puggalādhīṭṭhānanayena vuttaṃ. Ettha pana sīmāya dānaṃ ekā mātikā, katikāya dānaṃ dutiyā...pe... puggalassa dānaṃ aṭṭhamā. Tattha sīmāya dammīti evaṃ sīmaṃ parāmasitvā dento **sīmāya deti** nāma. Esa nayo sabbattha.

**Sīmāya deti, yāvatikā bhikkhū antosīmagatā tehi bhājetabbanti**ādīmhi pana mātikānidese **sīmāya detīti** ettha tāva khaṇḍasīmā, upacārasīmā, samānasaṃvāsasīmā, avippavāsasīmā, lābhasīmā, gāmasīmā, nigamasīmā, nagarasīmā, abbhantarasīmā, udakukkhepasīmā, janapadasīmā, raṭṭhasīmā, rajjasīmā, dīpasīmā, cakkavāḷasīmāti pannarasa sīmā veditabbā.

Tattha khaṇḍasīmā sīmākathāyaṃ vuttāva. Upacārasīmā parikkhittassa vihārassa parikkhepena aparikkhittassa parikkhepārahaṭṭhānena paricchinnā hoti. Apica bhikkhūnaṃ dhuvasannipātaṭṭhānato vā pariyante ṭhitabhojanasālato vā nibaddhavasanaāvāsato vā thāmamajjhimassa purisassa dvinnāṃ leḍḍupātānaṃ anto upacārasīmā veditabbā, sā pana āvāsesu vaḍḍhantesu vaḍḍhati, parihāyantesu parihāyati. Mahāpaccariyaṃ pana “bhikkhūsupi vaḍḍhantesu vaḍḍhati”ti vuttaṃ. Tasmā sace vihāre sannipatitabhikkhūhi saddhim ekābaddhā hutvā yojanasatampi pūretvā nisīdanti, yojanasatampi upacārasīmāva hoti, sabbesaṃ lābho pāpuṇāti. Samānasaṃvāsavippavāsasīmādvayampi vuttameva.

Lābhasīmā nāma neva sammāsambuddhena anuññātā, na dhammasaṅgāhakattherehi ṭhapitā; apica kho rājarājamahāmatā vihāraṃ kāretvā gāvutaṃ vā aḍḍhayaṃ vā yojanaṃ vā samantato paricchinditvā “ayaṃ amhākaṃ vihārassa lābhasīmā”ti nāmalikhitake thambhe nikhaṇitvā “yaṃ etthantare uppajjati, sabbāṃ taṃ amhākaṃ vihārassa demā”ti sīmaṃ ṭhapenti, ayaṃ lābhasīmā nāma. Gāmanigamanagaraabbhantaraudakukkhepasīmāpi vuttā eva. Janapadasīmā nāma – kāsikosalaratṭhādīnaṃ anto bahū janapadā honti, tattha ekeko janapadaparicchedo janapadasīmā. Raṭṭhasīmā nāma kāsikosalaratṭhāparicchedo. Rajjasīmā nāma “coḷabhogo keraḷabhogo”ti evaṃ ekekassa rañño āṇāpavattitṭhānaṃ. Dīpasīmā nāma samuddantena paricchinnamahādīpā ca antaradīpā ca. Cakkavāḷasīmā nāma cakkavāḷapabbateneva paricchinnā.

Evametāsu sīmāsu khaṇḍasīmāya kenaci kammena sannipatitaṃ saṅghaṃ disvā “ettheva sīmāya saṅghassa demī”ti vutte yāvatikā bhikkhū antokhaṇḍasīmagatā, tehi bhājetabbaṃ. Tesāmyeva hi taṃ pāpuṇāti. Aññesaṃ sīmantarikāya vā upacārasīmāya vā ṭhitānampi na pāpuṇāti. Khaṇḍasīmāya ṭhite pana rukkhe vā pabbate vā ṭhitassa heṭṭhā vā pathavīvemajjhagatassa pāpuṇātiyeva. “Imissā upacārasīmāya saṅghassa dammī”ti dinnāṃ pana khaṇḍasīmāsīmantarikāsu ṭhitānampi pāpuṇāti. “Samānasaṃvāsasīmāya dammī”ti dinnāṃ pana khaṇḍasīmāsīmantarikāsu ṭhitānaṃ na pāpuṇāti. Avippavāsasīmālābhasīmāsu dinnāṃ tāsu sīmāsu antogatānaṃ pāpuṇāti. Gāmasīmādisu dinnāṃ tāsaṃ sīmānaṃ abbhantare baddhasīmāya ṭhitānampi pāpuṇāti. Abbhantarasīmāudakukkhepasīmāsu dinnāṃ

tattha antogatānaṃyeva pāpuṇāti. Janapadaratṭharajjadīpacakkavāḷasīmāsupi gāmasīmādīsu vuttasadisoyeva vinicchayo.

Sace pana jambudīpe t̥hito “tambapaṇṇidīpe saṅghassa dammī”ti deti, tambapaṇṇidīpato ekopi gantvā sabbesaṃ gaṇhituṃ labhati. Sacepi tatreva eko sabhāgabhiṅkhu sabhāgānaṃ bhāgaṃ gaṇhāti, na vāretabbo. Evaṃ tāva yo sīmaṃ parāmasitvā deti, tassa dāne vinicchayo veditabbo.

Yo pana asukasīmāyāti vattuṃ na jānāti, kevalaṃ sīmāti vacanamattameva jānanto vihāraṃ gantvā “sīmāya dammī”ti vā “sīmatṭhakasaṅghassa dammī”ti vā bhaṇāti, so pucchitabbo – “sīmā nāma bahuvihā, katarasīmaṃ sandhāya bhaṇasī”ti? Sace vadati – “ahaṃ asukasīmāti na jānāmi, sīmatṭhakasaṅgho bhājetvā gaṇhātū”ti katarasīmāya bhājetabbaṃ? Mahāsīvatto kirāha – “avippavāsasīmāyā”ti. Tato naṃ āhaṃsu – “avippavāsasīmā nāma tiyojanāpi hoti, evaṃ sante tiyojane t̥hitā lābhaṃ gaṇhissanti, tiyojane t̥hatvā āgantukavattaṃ pūretvā ārāmaṃ pavisitabbaṃ bhavissati, gamiko tiyojanaṃ gantvā senāsaṃ āpucchissati, nissayapaṭipannassa tiyojanātikkaṃ nissayo paṭippassambhissati, pārivāsikena tiyojanaṃ atikkamitvā aruṇaṃ uṭṭhāpetabbaṃ bhavissati, bhikkhuniyā tiyojane t̥hatvā ārāmapavesanaṃ āpucchitabbaṃ bhavissati, sabbampetaṃ upacārasīmāya paricchavedaseneva kātuṃ vaṭṭati. Tasmā upacārasīmāyameva bhājetabba”nti.

**Katikāyāti** samānalābhakatikāya. Tenevāha – “sambahulā āvāsā samānalābhā hontī”ti. Tatrevaṃ katikā kātabbā, ekasmiṃ vihāre sannipatitehi bhikkhūhi yaṃ vihāraṃ saṅgaṇhitukāmā samānalābhaṃ kātuṃ icchanti, tassa nāmaṃ gahetvā asuko nāma vihāro porāṇakoti vā buddhādhiṅvutthoti vā appalābhoti vā yaṃkiñci kāraṇaṃ vatvā taṃ vihāraṃ iminā vihārena saddhiṃ ekalābhaṃ kātuṃ saṅghassa ruccatīti tikkhattuṃ sāvetabbaṃ. Ettāvatā tasmīṃ vihāre nisinnopi idha nisinnova hoti, tasmīṃ vihārepi saṅghena evameva kātabbaṃ. Ettāvatā idha nisinnopi tasmīṃ nisinnova hoti. Ekasmiṃ lābhe bhājjiyamāne itarasmīṃ t̥hitassa bhāgaṃ gahetuṃ vaṭṭati. Evaṃ ekena vihārena saddhiṃ bahūpi āvāsā ekalābhā kātabbā.

**Bhikkhāpaṇṇattiyāti** attano pariccāgapaṇṇāpanaṭṭhāne. Tenevāha – “yattha saṅghassa dhuvakārā kariyantī”ti. Tassattho – yasmiṃ vihāre imassa cīvaradāyakassa santakaṃ saṅghassa pākavaṭṭaṃ vā vattati, yasmiṃ vā vihāre bhikkhū attano bhāraṃ katvā sadā gehe bhojeti, yattha vā anena āvāso kārito, salākabhaddāni vā nibaddhāni, yena pana sakalopi vihāro patiṭṭhāpito, tattha vattabbaṃ natthi, ime dhuvakārā nāma. Tasmā sace so “yattha mayhaṃ dhuvakārā kariyantī, tattha dammī”ti vā “tattha dethā”ti vā bhaṇāti, bahūsu cepi t̥hānesu dhuvakārā hontī, sabbattha dinnameva hoti.

Sace pana ekasmiṃ vihāre bhikkhū bahutarā hontī, tehi vattabbaṃ – “tumbhākaṃ dhuvakāre ekattha bhikkhū bahū ekattha appakā”ti. Sace “bhikkhugaṇānāya gaṇhathā”ti bhaṇāti, tathā bhājetvā gaṇhituṃ vaṭṭati. Ettha ca vatthabhesajjādī appakampi sukhena bhājjiyati. Yadi pana mañco vā piṭhakaṃ vā ekameva hoti, taṃ pucchitvā yassa vā vihārassa ekavihārepi vā yassa senāsaṃ so vicāreti, tattha dātabbaṃ. Sace “asukabhikkhu gaṇhātū”ti vadati, vaṭṭati. Atha “mayhaṃ dhuvakāre dethā”ti vatvā avicāretvāya gacchati, saṅghassāpi vicāretuṃ vaṭṭati. Evaṃ pana vicāretabbaṃ – “saṅghattherassa vasanaṭṭhāne dethā”ti vattabbaṃ. Sace tassa senāsaṃ paripuṇṇaṃ hoti, yattha nappahoti, tattha dātabbaṃ. Sace eko bhikkhu “mayhaṃ vasanaṭṭhāne senāsanaparibhogabhaṇḍaṃ natthī”ti vadati, tattha dātabbaṃ.

**Saṅghassa detīti** vihāraṃ pavisitvā “imāni cīvarāni saṅghassa dammī”ti deti. **Sammukhībhūtenāti** upacārasīmāya t̥hitena saṅghena ghaṇṭiṃ paharivā kālaṃ ghoṣetvā bhājetabbaṃ. Sīmatṭhassa asampattassāpi bhāgaṃ gaṇhanto na vāretabbo. Vihāro mahā hoti, therāsanato paṭṭhāya vatthesu diyyamānesu alasaṅgātikā mahātherā pacchā āgacchanti, “bhante vīsativassānaṃ diyyati, tumbhākaṃ t̥hitikā atikkantā”ti na vattabba, t̥hitikaṃ t̥hapetvā tesāṃ datvā pacchā t̥hitikāya dātabbaṃ.

Asukavihāre kira baṃhaṃ cīvaraṃ uppannanti sutvā yojanantarikavihāratopi bhikkhū āgacchanti,

sampattasampattānaṃ t̥hitatt̥hānato paṭṭhāya dātabbaṃ. Asampattānampi upacārasīmaṃ pavitt̥hānaṃ antevāsikādīsu gaṇhantesu dātabbameva. “Bahupacārasīmāya t̥hitānaṃ dethā”ti vadanti, na dātabbaṃ. Sace pana upacārasīmaṃ okkantehi ekābaddhā hutvā attano vihāradvāre vā antovihāreyeva vā hontī, parisavasena vaḍḍhitā nāma hoti sīmā, tasmā dātabbaṃ. Saṅghanavakassa dinnepi pacchā āgatānaṃ dātabbameva. Dutiyabhāge pana therāsaṇaṃ āruḷhe āgatānaṃ paṭhamabhāgo na pāpuṇāti, dutiyabhāgato vassaggena dātabbaṃ.

Ekasmiṃ vihāre dasa bhikkhū hontī, “dasa vatthāni saṅghassa demā”ti denti, pāṭekkaṃ bhājetabbāni. Sace “sabbāneva amhākaṃ pāpuṇantī”ti gahetvā gacchantī, duppāpitāni ceva duggahitāni ca gatagataṭṭhāne saṅghikāneva hontī. Ekaṃ pana uddharitvā “idaṃ tumhākaṃ pāpuṇātī”ti saṅghattherassa datvā “sesāni amhākaṃ pāpuṇantī”ti gahetuṃ vaṭṭati.

Ekameva vatthaṃ saṅghassa demāti āharanti, abhājetvāva amhākaṃ pāpuṇantīti gaṇhanti, duppāpitañceva duggahitañca. Satthakena pana haliddiādīnā vā lekhaṃ katvā ekaṃ koṭṭhāsaṃ “imaṃ t̥hānaṃ tumhākaṃ pāpuṇātī”ti saṅghattherassa pāpetvā “sesaṃ amhākaṃ pāpuṇātī”ti gahetuṃ vaṭṭati. Yaṃ pana vatthasseva pupphaṃ vā valī vā, tena paricchedaṃ kātuṃ na vaṭṭati. Sace ekaṃ tantaṃ uddharitvā “idaṃ t̥hānaṃ tumhākaṃ pāpuṇātī”ti saṅghattherassa datvā “sesaṃ amhākaṃ pāpuṇātī”ti gaṇhanti, vaṭṭati. Khaṇḍaṃ khaṇḍaṃ chinditvā bhājjiyamānaṃ vaṭṭatiyeva.

Ekabhikkhuke vihāre saṅghassa cīvaresu uppannesu sace pubbe vuttanayeneva so bhikkhu “sabbāni mayhaṃ pāpuṇantī”ti gaṇhāti, suggahitāni, t̥hitikā pana na tiṭṭhati. Sace ekekaṃ uddharitvā “idaṃ mayhaṃ pāpuṇātī”ti gaṇhāti, t̥hitikā tiṭṭhati. Tattha aṭṭhitāya t̥hitikāya puna aññasmiṃ cīvare uppanne sace eko bhikkhu āgacchati, majjhe chinditvā dvīhipi gahetabbaṃ. T̥hitāya t̥hitikāya puna aññasmiṃ cīvare uppanne sace navakataro āgacchati, t̥hitikā heṭṭhā orohati. Sace vuḍḍhataro āgacchati, t̥hitikā uddhaṃ ārohati. Athañño natthi, puna attano pāpetvā gahetabbaṃ.

“Saṅghassa demā”ti vā “bhikkhusaṅghassa demā”ti vā yena kenaci ākārena saṅghaṃ āmasitvā dinnāṃ pana paṃsukūlikānaṃ na vaṭṭati, “gahapaticīvaraṃ paṭikkhipāmi paṃsukūlikaṅgaṃ samādiyāmi”ti vuttattā, na pana akappiyattā. Bhikkhusaṅghena apaloketvā dinnampi na gahetabbaṃ. Yaṃ pana bhikkhu attano santakaṃ deti, taṃ bhikkhudattiyāṃ nāma vaṭṭati, paṃsukūlaṃ pana na hoti. Evaṃ santepi dhutaṅgaṃ na bhijjati. “Bhikkhūnaṃ dema, therānaṃ demā”ti vutte pana paṃsukūlikānampi vaṭṭati. “Idaṃ vatthaṃ saṅghassa dema, iminā upāhanatthavikapattatthavikaāyogaṃsabaddhakādīni karontū”ti dinnampi vaṭṭati.

Pattatthavikādīnaṃ atthāya dinnāni bahūnīpi hontī, cīvaratthāyapi pahontī, tato cīvaraṃ katvā pārūpituṃ vaṭṭati. Sace pana saṅho bhājitātīrittāni vatthāni chinditvā upāhanatthavikādīnaṃ atthāya bhājeti, tato gahetuṃ na vaṭṭati. Sāmihehi vicāritameva hi vaṭṭati, na itaraṃ.

“Paṃsukūlikasaṅghassa dhamakaraṇapaṭādīnaṃ atthāya demā”ti vuttepi gahetuṃ vaṭṭati, parikkhāro nāma paṃsukūlikānampi icchitabbo. Yaṃ tattha atirekaṃ hoti, taṃ cīvarepi upanetuṃ vaṭṭati. Suttaṃ saṅghassa denti, paṃsukūlikehipi gahetabbaṃ. Ayaṃ tāva vihāraṃ pavisitvā “imāni cīvarāni saṅghassa dammī”ti dinnesu vinicchayo.

Sace pana bahupacārasīmāyaṃ addhānappaṭipanne bhikkhū disvā “saṅghassa dammī”ti saṅghattherassa vā saṅghanavakassa vā ārocetī, sacepi yojanaṃ pharitvā parisā t̥hitā hoti, ekabaddhā ce, sabbesaṃ pāpuṇāti. Ye pana dvādasahi hatthehi parisāṃ asampattā, tesāṃ na pāpuṇāti.

**Ubhatosaṅghassa detīti** ettha “ubhatosaṅghassa dammī”ti vuttepi “dvidhā saṅghassa dammi, dvinnaṃ saṅghānaṃ dammi, bhikkhusaṅghassa ca bhikkhunisaṅghassa ca dammī”ti vuttepi ubhatosaṅghassa dinnameva hoti. **Upaḍḍhaṃ dātabbanti** dvebhāge same katvā eko dātabbo. “Ubhatosaṅghassa ca tuyhañca dammī”ti vutte sace dasa dasa bhikkhū ca bhikkhuniyo ca hontī,

ekavāsati paṭivīse katvā eko puggalassa dātabbo, dasa bhikkhusaṅghassa, dasa bhikkhunisaṅghassa yena puggaliko laddho so saṅghatopi attano vassaggena gahetuṃ labhati. Kasmā? Ubhatosaṅghaggaṇena gahitattā.

“Ubhatosaṅghassa ca cetiyassa ca dammī”ti vuttepi eseva nayo. Idha pana cetiyassa saṅghato pāpuṇanakoṭṭhāso nāma natthi, ekapuggalassa pattakoṭṭhāsasamova koṭṭhāso hoti.

“Ubhatosaṅghassa ca tuyhañca cetiyassa cā”ti vutte pana dvāvāsati koṭṭhāse katvā dasa bhikkhūnaṃ, dasa bhikkhunīnaṃ, eko puggalassa, eko cetiyassa dātabbo. Tattha puggalo saṅghatopi attano vassaggena puna gahetuṃ labhati, cetiyassa ekoyeva.

“Bhikkhusaṅghassa ca bhikkhunīnañca dammī”ti vutte pana na majjhe bhinditvā dātabbaṃ, bhikkhū ca bhikkhuniyo ca gaṇetvā dātabbaṃ. “Bhikkhusaṅghassa ca bhikkhunīnañca tuyhañcā”ti vutte pana puggalo visuṃ na labhati, pāpuṇanaṭṭhānato ekameva labhati. Kasmā? Bhikkhusaṅghaggaṇena gahitattā. “Bhikkhusaṅghassa ca bhikkhunīnañca tuyhañca cetiyassa cā”ti vuttepi cetiyassa ekapuggalapaṭivīso labbhati, puggalassa visuṃ na labbhati, tasmā ekaṃ cetiyassa datvā avasesaṃ bhikkhū ca bhikkhuniyo ca gaṇetvā bhājetabbaṃ.

“Bhikkhūnañca bhikkhunīnañca dammī”ti vuttepi majjhe bhinditvā na dātabbaṃ, puggalagaṇanāya eva vibhajitabbaṃ. “Bhikkhūnañca bhikkhunīnañca tuyhañca cetiyassa cā”ti evaṃ vuttepi cetiyassa ekapuggalapaṭivīso labbhati, puggalassa visuṃ natthi, bhikkhū ca bhikkhuniyo ca gaṇetvā eva bhājetabbaṃ. Yathā ca bhikkhusaṅghaṃ ādiṃ katvā nayo nīto, evaṃ bhikkhunisaṅghaṃ ādiṃ katvāpi netabbo. “Bhikkhusaṅghassa ca tuyhañcā”ti vutte puggalassa visuṃ na labbhati, vassaggeneva gahetabbaṃ. “Bhikkhusaṅghassa ca cetiyassa cā”ti vutte pana cetiyassa visuṃ paṭivīso labbhati. “Bhikkhusaṅghassa ca tuyhañca cetiyassa cā”ti vuttepi cetiyasseva labbhati, na puggalassa.

“Bhikkhūnañca tuyhañcā”ti vuttepi visuṃ na labbhati. “Bhikkhūnañca cetiyassa cā”ti vutte pana cetiyassa labbhati. “Bhikkhūnañca tuyhañca cetiyassa cā”ti vuttepi cetiyasseva visuṃ labbhati, na puggalassa. Bhikkhunisaṅghaṃ ādiṃ katvāpi evameva yojetabbaṃ.

Pubbe buddhappamukhassa ubhatosaṅghassa dānaṃ denti, bhagavā majjhe nisīdati, dakkhiṇato bhikkhū vāmato bhikkhuniyo nisīdanti, bhagavā ubhinnaṃ saṅghatthero, tadā bhagavā attanā laddhapaccaye attanāpi paribhuñjati, bhikkhūnampi dāpeti. Etarahi pana paṇḍitamanussā sadhātukaṃ paṭimaṃ vā cetiyaṃ vā ṭhapetvā buddhappamukhassa ubhatosaṅghassa dānaṃ denti. Paṭimāya vā cetiyassa vā purato ādhārake pattaṃ ṭhapetvā dakkhiṇodakaṃ datvā buddhānaṃ demāti, tattha yaṃ paṭhamaṃ khādanīyaṃ bhojanīyaṃ denti, vihāraṃ vā āharitvā idaṃ cetiyassa demāti piṇḍapātañca mālāgandhādīni ca denti, tattha kathaṃ paṭipajjitabbanti? Mālāgandhādīni tāva cetiye āropetabbāni, vatthehi paṭākā, telena padīpā kātabbā, piṇḍapātamadhuphāṇitādīni pana yo nibaddhacetiyaajaggako hoti pabbajito vā gahaṭṭho vā, tasseva dātabbāni. Nibaddhajaggake asati āhaṭṭhabhattaṃ ṭhapetvā vattaṃ katvā paribhuñjituṃ vaṭṭati. Upakaṭṭhe kāle bhuñjitvā pacchāpi vattaṃ kātuṃ vaṭṭatiyeva.

Mālāgandhādīsu ca yaṃ kiñci “idaṃ haritvā cetiyassapūjaṃ karoṭhā”ti vutte dūrampi haritvā pūjetabbaṃ. “Bhikkhaṃ saṅghassa harā”ti vuttepi haritabbaṃ. Sace pana “ahaṃ piṇḍāya carāmi, āsanāsālāya bhikkhū atthi, te āharissantī”ti vutte “bhante tuyhaṃyeva dammī”ti vadati, bhuñjituṃ vaṭṭati. Atha pana “bhikkhusaṅghassa dassāmi”ti harantassa gacchato antarāva kālo upakaṭṭho hoti, attano pāpetvā bhuñjituṃ vaṭṭati.

**Vassaṃvuṭṭhasaṅghassa detīti** vihāraṃ pavasitvā “imāni cīvarāni vassaṃvuṭṭhasaṅghassa dammī”ti deti. **Yāvatikā bhikkhū tasmim āvāse vassaṃvuṭṭhāti** yattakā vassacchedaṃ akatvā purimavassaṃvuṭṭhā, tehi bhājetabbaṃ, aññesaṃ na pāpuṇāti. Disāpakkantassāpi satī paṭiggāhake yāva kathinassubbhārā dātabbaṃ, anattathe pana kathine antohemante evaṃca vatvā dinnāṃ,

pacchimavassamvuṭṭhānampi pāpuṇāṭīti lakkhaṇaññū vadanti. Aṭṭhakathāsu panetaṃ na vicāritaṃ.

Sace pana bahiupacārasīmāyaṃ ṭhito “vassamvuṭṭhasaṅghassa dammī”ti vadati, sampattānaṃ sabbesaṃ pāpuṇāṭī. Atha “asukavihāre vassamvuṭṭhasaṅghassa”ti vadati, tatra vassamvuṭṭhānameva yāva kathinassubbhārā pāpuṇāṭī. Sace pana gimhānaṃ paṭhamadivasato paṭṭhāya evaṃ vadati, tatra sammukhībhūtānaṃ sabbesaṃ pāpuṇāṭī. Kasmā? Piṭṭhisamaye uppannattā. Antovasseyeva “vassamvasantānaṃ dammī”ti vutte chinnavassā na labhanti, vassamvasantāva labhanti. Cīvaramāse pana “vassamvasantānaṃ dammī”ti vutte pacchamikāya vassūpagatānaṃyeva pāpuṇāṭī, purimikāya vassūpagatānaṃca chinnavassānaṃca na pāpuṇāṭī.

Cīvaramāso paṭṭhāya yāva hemantassa pacchimo divaso, tāva vassāvāsikaṃ demāti vutte kathinaṃ atthataṃ vā hotu anathataṃ vā atītavassamvuṭṭhānameva pāpuṇāṭī. Gimhānaṃ paṭhamadivasato paṭṭhāya vutte pana mātikā āropetabbā – “atītavassāvāsassa pañca māsā atikkantā, anāgato catumāsaccayena bhavissati, kataravassāvāsassa detī”ti? Sace “atītavassamvuṭṭhānaṃ dammī”ti vadati, taṃantovassamvuṭṭhānameva pāpuṇāṭī, disāpakkantānampi sabhāgā gaṇhituṃ labhanti.

Sace “anāgate vassāvāsikaṃ dammī”ti vadati, taṃ ṭhapetvā vassūpanāyikadivase gahetabbam. Atha “agutto vihāro, corabhayaṃ atthi, na sakkā ṭhapetuṃ, gaṇhitvā vā āhiṇḍitu”nti vutte “sampattānaṃ dammī”ti vadati, bhājetvā gahetabbam. Sace vadati “īto me bhante tatiye vasse vassāvāsikaṃ na dinnam, taṃ dammī”ti, tasmim antovasse vuṭṭhabhikkhūnaṃ pāpuṇāṭī. Sace te disā pakkantā, añño vissāsiko gaṇhāti, dātabbam. Atha ekoyeva avasiṭṭho, sesā kālaṅkatā, sabbaṃ ekasseva pāpuṇāṭī. Sace ekopi natthi, saṅghikaṃ hoti, sammukhībhūtehi bhājetabbam.

**Ādissa detīti** ādisitvā paricchinditvā deti; **yāguyā vāti**ādīsu ayamatto – yāguyā vā...pe... bhesajje vā ādissa deti. Tatrāyaṃ yojanā – bhikkhū ajjatanāya vā svātānāya vā yāguyā nimantetvā tesam gharaṃ pavitṭhānaṃ yāguṃ deti, yāguṃ datvā pītāya yāguyā “imāni cīvarāni, yehi mayhaṃ yāgu pītā, tesam dammī”ti deti, yehi nimantitehi yāgu pītā, tesameva pāpuṇāṭī. Yehi pana bhikkhācāravattena gharadvārena gacchantehi vā gharaṃ pavitṭthehi vā yāgu laddhā, yesam vā āsanāsālato pattam āharitvā manussehi nītā, yesam vā therehi pesitā, tesam na pāpuṇāṭī. Sace pana nimantitabhikkhūhi saddhim aññepi bahū āgantvā antogehaṅca bahigeḥaṅca pūretvā nisinnā, dāyako ca evaṃ vadati – “nimantitā vā hontu animantitā vā, yesam mayā yāgu dinnā, sabbesaṃ imāni vatthāni hontū”ti sabbesaṃ pāpuṇāṭī. Yehi pana therānaṃ hatthato yāgu laddhā, tesam na pāpuṇāṭī. Atha so “yehi mayhaṃ yāgu pītā, sabbesaṃ hontū”ti vadati, sabbesaṃ pāpuṇāṭī. Bhattakhādanīyesupi eseva nayo.

**Cīvare vāti** pubbepi yena vassam vāsetvā bhikkhūnaṃ cīvaraṃ dinnapubbaṃ hoti, so ce bhikkhū bhojetvā vadati – “yesam mayā pubbe cīvaraṃ dinnam, tesameva imaṃ cīvaraṃ vā suttaṃ vā sappimadhuphāṇitādīni vā hontū”ti, sabbaṃ tesameva pāpuṇāṭī. **Senāsane vāti** yo mayā kārite vihāre vā pariveṇe vā vasati, tassidaṃ hotū”ti vutte tasseva hoti. **Bhesajje vāti** “mayam kālena kālam therānaṃ sappiādīni bhesajjāni dema, yehi tāni laddhāni, tesamevidam hotū”ti vutte tesameva hoti.

**Puggalassa detīti** “imaṃ cīvaraṃ itthannāmassa dammī”ti evaṃ parammukhā vā pādāmūle ṭhapetvā “imaṃ bhante tumhākaṃ dammī”ti evaṃ sammukhā vā deti. Sace pana “idaṃ tumhākaṅca tumhākaṃ antevāsikānaṅca dammī”ti evaṃ vadati, therassa ca antevāsikānaṅca pāpuṇāṭī. Uddesaṃ gahetuṃ āgato gahetvā gacchanto ca atthi, tassāpi pāpuṇāṭī. “Tumhehi saddhim nibaddhacārikabhikkhūnaṃ dammī”ti vutte uddesantevāsikānaṃ vattaṃ katvā uddesaparipucchādīni gahetvā vicarantānaṃ sabbesaṃ pāpuṇāṭī. Ayaṃ puggalassa detīti imasmim pade vinicchayo. Sesam sabbattha uttānamevāti.

Cīvarakkhandhakavaṇṇanā niṭṭhitā.



## 9. Campeyyakkhandhakam

### Kassapagottabhikkhuvatthukathā

**380.** Campeyyakkhandhake – **gaggarāya pokkharāṇiyā tīreti** gaggarānāmikāya itthiyā kāritapokkharāṇiyā tīre. **Tantibaddhoti** tasmim āvāse kattabbatāntipaṭibaddho. **Ussukkampi akāsi yāguyāti**ādīsu manussehi āgantukesu āgatesu ācikkheyyāthāti vuttaṭṭhāneyeva ussukkaṃ kātuṃ vaṭṭati; na avuttaṭṭhāne. **Gaccha tvam bhikkhūti** satthā tassa bhikkhuno tattheva senāsanam sappāyanti addasa, tenevamāha.

**382. Adhammena vaggakammaṃ karontīti**ādīnaṃ parato pāliyaṃyeva nānākaraṇaṃ āgamissati.

**385. Aññatrāpi dhammā kammaṃ karontīti** aññatrāpi dhammaṃ kammaṃ karonti, ayameva vā pāṭho. Bhūtena vatthunā kataṃ dhammena kataṃ nāma hoti, tathā na karontīti attho. **Aññatrāpi vinayā kammaṃ, aññatrāpi satthusāsanā kammanti** etesupi eseva nayo. Ettha pana **vinayoti** codanā ca sārāṇā ca. **Satthusāsananti** ñattisampadā anussāvanasampadā ca; tāhi vinā kammaṃ karontīti attho. **Paṭikuṭṭhakatanti** paṭikuṭṭhañceva katañca; yaṃ aññesu paṭikkosantesu kataṃ taṃ paṭikuṭṭhañceva hoti katañca; tādisampi kammaṃ karontīti attho.

**387. Chayimāni bhikkhave kammāni adhammakammanti**ādīsu pana “**dhammo**”ti pāliyā adhivacanaṃ. Tasmā yaṃ yathāvuttāya pāliyā na kariyati, taṃ adhammakammanti veditabbaṃ. Ayamettha saṅkhepo, vitthāro pana pāliyaṃyeva āgato. So ca kho ñattidutiyañatticatutthakammānaṃyeva vasena. Yasmā pana ñattikamme ñattidutiyañatticatutthesu viya hāpanaṃ vā aññathā karaṇaṃ vā natthi, apalokanakammañca sāvetvāva kariyati, tasmā tāni pāliyaṃ na dassitāni, tesam sabbesampi kammānaṃ vinicchayaṃ parato vaṇṇayissāma.

### Catuvaggakaraṇādikathā

**388.** Idāni yadidaṃ chaṭṭhaṃ dhammena samaggakammaṃ nāma, taṃ yehi saṅghehi kātabbaṃ, tesam pabhedaṃ dassetuṃ “**pañca saṅghā**”tiādi vuttaṃ. **Kammappattoti** kammaṃ patto, kammayutto kammāraho; na kiñci kammaṃ kātuṃ nārahatīti attho.

**389. Catuvaggakaraṇaṃce bhikkhave kammaṃ bhikkhunicatutthoti**ādī parisato kammavipattidassanatthaṃ vuttaṃ. Tattha ukkhittakaggahaṇena kammanānāsaṃvāsako gahito, nānāsaṃvāsakaggahaṇena laddhinānāsaṃvāsako. **Nānāsīmāya ṭhitacatutthoti** sīmantarikāya vā bahisīmāya vā hatthapāse ṭhitenāpi saddhiṃ catuvaggo hutvāti attho.

**393. Pārivāsikacatutthoti**ādī parivāsādikammānaṃyeva parisato vipattidassanatthaṃ vuttaṃ, tesam vinicchayaṃ parato vaṇṇayissāma.

**394. Ekaccassa bhikkhave saṅghamajjhe paṭikkosanā ruhatīti**ādī paṭikuṭṭhakatakammaṃ kuppākuppabhāvadassanatthaṃ vuttaṃ. **Pakatattassāti** avipannasīlassa pārājikaṃ anajjhāpanassa. **Ānantarikassāti** attano anantaram nisinnassa.

### Dvenissāraṇādikathā

**395. Dvemā bhikkhave nissāraṇāti**ādī vatthuto kammānaṃ kuppākuppabhāvadassanatthaṃ vuttaṃ. Tattha “**appatto nissāraṇaṃ, tañce saṅgho nissāreti, sunissārito**”ti idaṃ pabbājanīyakammaṃ sandhāya vuttaṃ. Pabbājanīyakammaṃ hi vihārato nissārenti, tasmā taṃ “nissāraṇā”ti vuccati. Tañcesa yasmā kuladūsako na hoti, tasmā āveṇikena lakkhaṇena appatto. Yasmā

panassa ākaṅkhamāno saṅgho pabbājanīyakammaṃ kareyyāti vuttaṃ, tasmā sunissārito hoti. **Taṅce saṅgho nissāretīti** sace saṅgho tajjanīyakammādivasena nissāreti, so yasmā tattha “tiṇṇaṃ bhikkhave bhikkhūnaṃ ākaṅkhamāno saṅgho tajjanīyakammaṃ kareyya – eko bhaṇḍanakāraako hoti kalahakāraako vivādakāraako bhassakāraako saṅghe adhikaraṇakāraako, eko bālo hoti abyatto āpattibahulo anapadāno, eko gihisaṃsaṭṭho viharati ananulomikehi gihisaṃsaggehī”ti (cūḷava. 395) evaṃ ekekenapi aṅgena nissāraṇā anuññātā, tasmā sunissārito.

**396. Osāraṇāti** pavesanā. **Tattha taṅce saṅgho osāretīti** upasampadakkammavasena paveseti. **Dosāritoti** duosārito. Sahassakkhattumpi upasampādito anupasampannova hoti ācariyupajjhāyā ca sātisārā, tathā seso kārakasaṅgho, na koci āpattito muccati. Iti ime ekādasa abhabbapuggalā dosāritā. Hatthacchinnādayo pana dvattiṃsa suosāritā, upasampādītā upasampannāva honti, na te labbhā kiñci vattaṃ. Ācariyupajjhāyā pana kārakasaṅgho ca sātisārā, na koci āpattito muccati.

**397. Idha pana bhikkhave bhikkhussa na hoti āpatti daṭṭhabbāti**ādi abhūtavatthuvaseṇa adhammakammaṃ, bhūtavatthuvaseṇa dhammakammaṅca dassetuṃ vuttaṃ. Tattha **paṭinissajjitāti** paṭinissajjitabbā.

### Upālipucchākathā

**400.** Upālipaṅhesupi vatthuvaseṇeva dhammādhmakammaṃ vibhattaṃ. Tattha dve nayā – ekamūlako ca dvimūlako ca. Ekamūlako uttānoyeva. Dvimūlake yathā sativinayo amūḷhavinayena saddhiṃ ekā pucchā katā, evaṃ amūḷhavinayādayopi tassapāpiyyasikādīhi. Avasāne pana **upasampadārahaṃ upasampādetīti** ekameva padaṃ hoti. Parato bhikkhūnampi sativinayaṃ ādim katvā ekekena saddhiṃ sesapadāni yojetabbāni.

### Tajjanīyakammakathā

**407. Idha pana bhikkhave bhikkhu bhaṇḍanakārakoti**ādi “adhammenavaggaṃ, adhammenasamaggaṃ; dhammenavaggaṃ, dhammapatirūpakenavaggaṃ, dhammapatirūpakenasamagga”nti imesaṃ vaseṇa cakkamaṃ bandhitvā tajjanīyādīsū sattasu kammesu paṭipassaddhīsū ca vipattidassanatthaṃ vuttaṃ. Tattha **anapadānoti** apadānavirahito. Apadānaṃ vuccati paricchedo; āpattiparicchedavirahitoti attho. Tato paraṃ paṭikuṭṭhakatakammappabhedam dassetuṃ sāyeva pāḷi “akataṃ kamma”ntiādīhi saṃsanditvā vuttā. Tattha na kiñci pāḷianusāreṇa na sakkā vidituṃ, tasmā vaṇṇanaṃ na vitthārayimhāti.

Campeyyakkhandhakavaṇṇanā niṭṭhitā.

## 10. Kosambakakkhandhakaṃ

### Kosambakavivādakathā

**451.** Kosambakakkhandhake – **taṃ bhikkhuṃ āpattiyā adassane ukkhipiṃsūti** ettha ayamanupubbikathā – dve kira bhikkhū ekasmiṃ āvāse vasanti vinayadharo ca suttantiko ca. Tesu suttantiko bhikkhu ekadivasam vaccakuṭṭiṃ pavīṭṭho ācamanaudakāvasesam bhājane ṭhapetvāva nikkhami. Vinayadharo pacchā pavīṭṭho taṃ udakaṃ disvā nikkhamitvā taṃ bhikkhuṃ pucchi – “āvuso, tayā idaṃ udakaṃ ṭhapita”nti? “Āmāvuso”ti. “**Kiṃ tvam** ettha āpattibhāvaṃ na jānāsī”ti? “Āma, na jānāmī”ti. “Hoti, āvuso ettha āpattī”ti? “Sace hoti, desissāmī”ti. “Sace pana te, āvuso, asaṅcicca asatiyā kataṃ, natthi āpattī”ti. So tassā āpattiyā anāpattidiṭṭhi ahoṣi.

Vinayadharopi attano nissitakānaṃ “ayaṃ suttantiko āpattiṃ āpajjamānopi na jānātī”ti ārocesi. Te

tassa nissitake disvā “tumhākaṃ upajjhāyo āpattiṃ āpajjitvāpi āpattibhāvaṃ na jānātī”ti āhaṃsu. Te gantvā attano upajjhāyassa ārocesuṃ. So evamāha – “ayaṃ vinayadharo pubbe anāpattī”ti vatvā “idāni āpattī”ti vadati. Musāvādī esotī. Te gantvā “tumhākaṃ upajjhāyo musāvādī”ti evaṃ aññamaññaṃ kalahaṃ vaḍḍhayiṃsu. Tato vinayadharo okāsaṃ labhitvā tassa āpattiyā adassane ukkhepanīyakammaṃ akāsi. Tena vuttaṃ – “taṃ bhikkhuṃ āpattiyā adassane ukkhipiṃsū”ti.

**453. Bhinno bhikkhusaṅgho bhinno bhikkhusaṅgho** ettha na tāva bhinno; apica kho yathā deve vuṭṭhe “idāni sassaṃ nipphanna”nti vuccati, avassañhi taṃ nipphajjissati, evameva iminā kāraṇena āyatiṃ avassaṃ bhijjissati, so ca kho kalahavasena na saṅghabhedavasena, tasmā “bhinno”ti vuttaṃ. Sambhamaatthavasena cettha āmeditaṃ veditaṃ.

**454. Etamatthaṃ bhāsivā uṭṭhāyāsanaṃ pakkāmiti** kasmā evaṃ bhāsivā pakkāmi? Sace hi bhagavā ukkhepake vā “akāraṇe tumhehi so bhikkhu ukkhitto”ti vadeyya, ukkhittānūvattake vā “tumhe āpattiṃ āpannā”ti vadeyya, “etesaṃ bhagavā pakkho, etesaṃ bhagavā pakkho”ti vatvā āghātaṃ bandheyyuṃ, tasmā tantimeva ṭhapetvā etamatthaṃ bhāsivā uṭṭhāyāsanaṃ pakkāmi.

**455. Attanā vā attānanti** ettha yo saṅghena ukkhepanīyakatānaṃ adhammavādīnaṃ pakkhe nisinno “tumhe kiṃ bhaṇathā”ti tesañca itaresañca laddhiṃ sutvā “ime adhammavādino, itare dhammavādino”ti cittaṃ uppādeti, ayaṃ tesāṃ majjhe nisinnova tesāṃ nānāsaṃvāsako hoti, kammaṃ kopeti, itaresampi hatthapāsaṃ anāgatattā kopeti. Evaṃ attanā vā attānaṃ nānāsaṃvāsakaṃ karoti. **Samānasaṃvāsakanti** etthāpi yo adhammavādīnaṃ pakkhe nisinno “adhammavādino ime, itare dhammavādino”ti tesāṃ majjhaṃ pavisati, yattha vā tattha vā pana pakkhe nisinno “ime dhammavādino”ti gaṇhāti, ayaṃ attanā vā attānaṃ samānasaṃvāsakaṃ karotīti veditaṃ.

**456. Kāyakammaṃ vacīkammanti** ettha kāyena paharantā kāyakammaṃ upadaṃsenti, pharusāṃ vadantā vacīkammaṃ upadaṃsentīti veditaṃ. **Hatthaparāmāsaṃ karontīti** kodhavasena hatthehi aññamaññaṃ parāmasanaṃ karontī. **Adhammiyāyamāneti** adhammiyāni kiccāni kurumāne. **Asammodikāvattamānāyāti** asammodikāya vattamānāya. Ayameva vā pāṭho. Sammodanakathāya avattamānāyāti attho. **Ettāvataṃ na aññamaññanti** ettha dve pantiyo katvā upacāraṃ muñcivā nisīditabbaṃ, dhammiyāyamāne pana sammodikāya vattamānāya āsanantarikāya nisīditabbaṃ, ekekaṃ āsanaṃ antaraṃ katvā nisīditabbaṃ.

**457-458. Mā bhaṇḍananti**ādīsu “akatthā”ti pāṭhasesaṃ gahetvā “mā bhaṇḍanaṃ akatthā”ti evamattho daṭṭhabbo. **Adhammavādīti** ukkhittānūvattakesu aññataro. Ayaṃ pana bhikkhu bhagavato atthakāmo, ayaṃ kirassa adhippāyo “ime bhikkhū kodhābhībhūtā satthu vacanaṃ na gaṇhanti, mā bhagavā ete oবাদanto kilamitthā”ti tasmā evamāha. Bhagavā pana “pacchāpi saññaṃ labhitvā oramissanti”ti tesāṃ anukampāya atītavattuṃ āharitvā kathesi. Tattha **anattatoti** anatto ato; etasmā **me** purisā anattoti vuttaṃ hoti. Atha vā anattatoti anattado. Sesaṃ pākāmeva.

**464. Puthusaddoti**ādīgāthāsu pana puthu mahā saddo assāti **puthusaddo**. **Samajanoti** samāno ekasadiṣo jano; sabbo cāyaṃ bhaṇḍanakāraḷojano samantato saddanicchāraṇena puthusaddo ceva sadiṣo cāti vuttaṃ hoti. **Na bālo koci maññathāti** tattha koci ekopi “ahaṃ bālo”ti na maññittha; sabbepe paṇḍitamāninoyeva. **Nāññaṃ bhiyyo amaññarunti** koci ekopi “ahaṃ bālo”ti ca na maññittha; bhiyyo ca saṅghasmiṃ bhijjamāne aññaṃpi ekaṃ “mayhaṃ kāraṇā saṅgho bhijjati”ti idaṃ kāraṇaṃ na maññitthāti attho.

**Parimuṭṭhāti** parimuṭṭhassatino. **Vācāgocarabhāṇinoti** rākārassa rassādeso kato, vācāgocarā na satipaṭṭhānādigocarā. Bhāṇino ca kathaṃ bhāṇino? **Yāvicchanti mukhāyāmaṃ** yāva mukhaṃ pasāretuṃ icchanti, tāva pasāretvā bhāṇino, ekopi saṅghagāravana mukhasaṅkocaṃ na karotīti attho. **Yena nītāti** yena kalahena imaṃ nillajjabhāvaṃ nītā. **Na taṃ vidūti** na taṃ jānanti, “evaṃ sādīnavo aya”nti.

**Ye ca taṃ upanayhantīti** taṃ “akkocchi maṃ, avadhi ma”ntiādikaṃ ākāraṃ ye ca upanayhanti. **Sanantanoti** porāṇo.

**Pareti** paṇḍite tṭhapetvā tato aññe bhaṇḍanakāraḥā pare nāma. Te ettha saṅghamajjhe kalahaṃ karontā “mayam yamāmaṣe upayamāma; satataṃ samitaṃ maccusantikaṃ gacchāmā”ti na jānanti. **Ye ca tattha vijānantīti** ye tattha paṇḍitā “mayam maccusamīpaṃ gacchāmā”ti vijānanti. **Tato sammanti medhagāti** evañhi te jānantā yonisomanasikāraṃ uppādetvā medhagānaṃ kalahānaṃ vūpasamāya paṭipajjanti.

**Aṭṭhicchinnāti** ayaṃ gāthā brahmadattañca dīghāvukumārañca sandhāya vuttā. Tesampi hoti saṅgati, kasmā tumhākaṃ na hoti, yesaṃ vo neva mātāpitūnaṃ aṭṭhīni chinnāni, na pāṇā hatā, na gavāssadhanāni haṭṭhāntīti.

**Sace labhethāti**ādigāthā paṇḍitasahāyassa ca bālasahāyassa ca vaṇṇāvaṇṇadīpanatthaṃ vuttā. **Abhibhuyya sabbāni parissayāntīti** pākaṭaparissaye ca paṭicchannaparissaye ca abhibhavivā tena saddhiṃ attamano satimā careyya.

**Rājāva raṭṭhaṃ vijitanti** yathā attano vijitaṃ raṭṭhaṃ mahājanakarājā ca arindamamahārājā ca pahāya ekakā carimṣu; evaṃ careyyāti attho. **Mātaṅgaraññeva nāgoti** mātaṅgo araññe nāgo. **Mātaṅgoti** hatthī vuccati; **nāgoti** mahantādhivacanamaṃ. Yathā hi mātuposako mātaṅganāgo araññe eko cari, na ca pāpāni akāsi. Yathā ca pālileyako, evaṃ eko care, na ca pāpāni kayirāti vuttaṃ hoti.

### Pālileyakagamanakathā

**467. Pālileyake viharati rakkhitavanasañḍeti** pālileyakaṃ upanissāya rakkhitavanasañḍe viharati. **Hatthināgoti** mahāhatthī. **Hatthikalabhehīti** hatthipotakehi. **Hatthicchāpehīti** khīrūpakehi daharapotakehi. **Chinnaggāntīti** tehi purato purato gacchantehi chinnaggāni khāyitāvasesāni khāṇusadisāni tiṇāni khādanti. **Obhaggobhagganti** tena hatthināgena uccaṭṭhānato bhañjitvā bhañjitvā pātitaṃ. **Assa sākhābhaṅganti** etassa santakaṃ sākhābhaṅgaṃ te khādanti. **Āvilāntīti** tehi paṭhamataraṃ otarivā pivantehi ālulitāni kaddamodakāni pivati. **Ogāhāti** titthato.

**Nāgassa nāgenāti** hatthināgassa buddhanāgena. **Īsānantassāti** rathāsāsadisadantassa. **Yadeko ramatī vaneti** yasmā buddhanāgo viya ayampi hatthināgo eko pavivitto vane ramati; tasmāssa nāgassa nāgena cittaṃ sameti, ekībhāvaratīyā ekasadisam hotīti attho.

**Yathābhirantaṃ viharitvāti** ettha temāsaṃ bhagavā tattha vihāsīti vedītabbo. Ettāvātā kosambakehi kira ubbālho bhagavā temāsaṃ araññaṃ pavisitvā vasīti sabbattha kathā patthaṭā ahoṣi.

**Atha kho kosambakā upāsakāti** atha kho imaṃ kathāsallāpaṃ sutvā kosambivāsino upāsakā.

### Aṭṭhārasavatthukathā

**468. Adhammaṃ dhammoti**ādīni aṭṭhārasa bhedakaravatthūni saṅghabhedakakkhandhake vaṇṇayissāma.

**475. Taṃ ukkhittakaṃ bhikkhuṃ osāretvāti** taṃ gahetvā sīmaṃ gantvā āpattiṃ desāpetvā kammavācāya osāretvā. **Tāvadeva uposathoti** taṃdivasameva uposathakkhandhake vuttanayeneva sāmaggīuposatho kātabbo.

**476. Amulā mūlaṃ gantvāti** na mūlā mūlaṃ gantvā; taṃ vatthum avinicchinitvāti attho. **Ayaṃ**

**vuccati upāli saṅghasāmaggī atthāpetā byañjanūpetā**ti atthato apagatā, “saṅghasāmaggī”ti imaṃ pana byañjanamattam upetā.

**477. Saṅghassa kiccesūti** saṅghassa karaṇīyesu uppannesu. **Mantanāsūti** vinayamantanāsu. **Atthesu jātesūti** vinayaatthesu uppannesu. **Vinicchayesūti** tesamyeva atthānaṃ vinicchayesu. **Mahatthikoti** mahāupakāro. **Paggahārahoti** paggaṇhituṃ vutto.

**Anānuvajjo paṭhamena sīlatoti**ādīmhiyeva tāva sīlato na upavajjo. **Avekkhitācāroti** apekkhitācāro; ālokite vilokite sampajānakārītiādinā nayena upaparikkhitācāro. **Aṭṭhakathāsu** pana “appaṭicchannācāro”ti vuttam.

**Visayhāti** abhibhavitvā. **Anuyyutaṃ bhaṇanti** anuññātaṃ anapagataṃ bhaṇanto. Yasmā hi so anuyyutaṃ bhaṇati, usūyāya vā agatigamanavasena vā kāraṇāpagataṃ na bhaṇati, tasmā atthaṃ na hāpeti. Usūyāya pana agatigamanavasena vā bhaṇanto atthaṃ hāpeti, kāraṇaṃ na deti, tasmā so parisagato chambhati ceva vedhati ca. Yo īdiso na hoti, ayaṃ “paggahāraho”ti dasseti.

Kiñca bhiyyo “tatheva pañha”nti gāthā, tassattho – yathā ca anuyyutaṃ bhaṇanto atthaṃ na hāpeti, tatheva parisāya majjhe pañhaṃ pucchito samāno na ceva pajjhāyati, na ca maṅku hoti. Yo hi atthaṃ na jānāti, so pajjhāyati. Yo vattuṃ na sakkoti, so maṅku hoti. Yo pana atthañca jānāti, vattuñca sakkoti; so na pajjhāyati, na maṅku hoti. **Kālāgatanti** kathetabbayuttakāle āgataṃ. **Byākaraṇārahanti** pañhassa atthānulomatāya byākaraṇānucchavikaṃ. **Vacoti** vadanto; evarūpaṃ vacanaṃ bhaṇantoti attho. **Raṇjetīti** toseti. **Viññūparisanti** viññūnaṃ parisam.

**Ācerakamhi ca saketī** attano ācariyavāde. **Alaṃ pametunti** vīmaṃsitaṃ taṃ taṃ kāraṇaṃ paññāya tulayitaṃ samattho. **Paguṇoti** kataparicayo laddhāsevano. **Kathetaveti** kathetabbe. **Viraddhikovidoti** viraddhaṭṭhānakusalo.

**Paccatthikā yena vajantīti** ayaṃ gāthā yādise kathetabbe paguṇo, taṃ dassetuṃ vuttā. Ayañhettha attho – yādiseṇa kathitena paccatthikā ca niggaṃ gacchanti, mahājano ca saññāpanaṃ gacchati; saññāntiṃ avabodhanaṃ gacchatīti attho. Yañca kathento sakaṃ ādāyaṃ attano ācariyavādaṃ na hāpeti, yasmim vātthusmim adhikaraṇaṃ uppannaṃ, tadanurūpaṃ anupaghātakaraṃ pañhaṃ byākaramāno tādise kathetabbe paguṇo hotīti.

**Dūteyyakammesu alanti** aṭṭhahi dūtaṅgehi samannāgatattā saṅghassa dūteyyakammesu samattho. **Suṭṭhu uggaṇhātīti samuggaho.** Idaṃ vuttam hoti – yathā nāma āhunaṃ āhutipiṇḍam samuggaṇhanti, evaṃ pītisomanassajāteneva cetasā saṅghassa kiccesu samuggaho, saṅghassakiccesu tassa tassa kiccassa paṭiggāhakoti attho. **Karaṃ vacoti** vacanaṃ karonto. **Na tena maññatīti** tena vacanakaraṇena “ahaṃ karomi, saṅghabhāraṃ nittharāmī”ti na mānātimānaṃ jappeti.

**Āpajjati yāvatakesu vatthūsūti** yattakesu vatthūsu āpattim āpajjamāno āpajjati. **Hoti yathā ca vuṭṭhitīti** tassā ca āpattiyā yathā vuṭṭhānaṃ hoti. **Ete vibhaṅgāti** yesu vatthūsu āpajjati, yathā ca vuṭṭhānaṃ hoti, imesaṃ atthānaṃ jotakā ete vibhaṅgā. **Ubhayassāti** ubhaye assa. **Svāgatāti** suṭṭhu āgatā. **Āpattivuṭṭhānapadassa kovidoti** āpattivuṭṭhānakāraṇakusalo.

**Yāni cācaranti** yāni ca bhaṇḍanakāraṇādīni ācaranto tajjanīyakammādivasena nissāraṇaṃ gacchati. **Osāraṇaṃ taṃvusitassa jantunoti** taṃ vattaṃ vusitassa jantuno, yā osāraṇā kātabbā, etampi jānāti. **Sesaṃ sabbattha uttānamevāti.**

Kosambakakkhandhakavaṇṇanā niṭṭhitā.

Samantapāsādikāya vinayaṣaṃvaṇṇanāya

Mahāvaggavaṇṇanā samattā.

Mahāvagga-aṭṭhakathā niṭṭhitā.